

ЎТКИР ҲОШИМОВ

# СЕВГИ ҚИССАЛАРИ

Ҳикоялар ва қиссалар



ТОШКЕНТ – «O'ZBEKISTON» – 2013

УЎК: 821.512.133-3  
КБК 84(5Ў)6  
X-71

**Хошимов, Ўткир**  
Х-71 Севги қиссалари: ҳикоялар ва қиссалар/Ў. Хошимов.— Тошкент: Ўзбекистон, 2013.— 480 б.  
ISBN 978-9943-01-937-9

Севги. Мұхаббат... Инсоният тарихи қанча узоқ бўлса, Мұхаббат деб аталмиш туйғу ҳам шунчалик қадимийдир. Зоро, инсон бор экан, севги ҳам яшайверади. Шоир ва ёзувчилар, расом ва бастикорлар асрлар давомида бу мавзуда бир-биридан гўзал асарлар яратгани бежиз эмас.

Элимизнинг атоқли ва ардокли адиби, Ўзбекистон халқ ёзувчилиси Ўткир Хошимов ҳам мұхаббат хақида талай ҳикоя, қисса, романлар ёзган ва улар китобхонлар томонидан катта қизиқиш билан мутолаа қилиб келинмоқда. Бу асарларда севгининг сехр ва қувончлари, изтироб ва армонлари ғоят ҳаётий, таъсирчан акс этган.

Ушбу китобга адибимизнинг энг ҳаяжонли асарлари жамланган.

УЎК: 821.512.133-3  
КБК 84(5Ў)6

ISBN 978-9943-01-937-9

© «O'ZBEKISTON» НМИУ, 2013

---

---

## ХАЛҚ МЕҲРИНИ ҚОЗОНГАН АДИБ

Ўткир Ҳошимов ижодини тўлиб-тўлғаниб, шиддат ва каромат билан оқаётган дарёга ўхшатгим келади. Бу тўлқинлигу тўлғаниш, шиддату салобатда ёзувчи қалби билан халқ дарди кесишган нуқталарда ҳосил бўлувчи илоҳий, инсоний ва бадиий қонуниятлар ётади. Бу дарёни вужудга келтирган ўз осмонлари, қор-ёмғирлари, ўз тоғлари, булоқлари, жилғалари, армонли ва қувончли ўз кўз ёшлари бор.

Бу дарё – ундан пайдо бўлувчи янги-янги сойлар, шўхшањ ва дилбар ариқлар кўзни қувонтиради. Кўнгилни яйратади, ҳаёт ва одамлар ҳакида кечагига қараганда чукурроқ мушоҳада юритишга ундейди; кучга-куч қўшади, дала-тузларга, боғу боғчаларга оби раҳмат олиб киради.

Дарё ўз бағрини табиатдан олиб, яна табиатга қайтарганидек, Ўткир Ҳошимов ҳам ўз асарларининг юрак уришини ҳаётдан, жамиятдан, одамлардан олади, хужайраларга бадиий жон бағишлиб, яна ҳаётга, жамиятга, одамларга қайтаради.

Йўл осон эмас, тошдан-тошга урилишлар бор, лекин дарё ўзига маҳтал манзилларга етиб бормаса бўлмайди, унинг қисмати шундай. Адид асарларининг бош мақсади ҳам китобхонлар маънавий чанқоқлигини қондиришига қаратилади. Йўлда тўлин дарё тўлқинлари гоҳ асов отдек кўкка сапчиб кетади, кўпиради, тошади, гоҳ меҳрибон

кўл остида роҳатланган аёл зулфидек майин тортади, мавжларида меҳр нури эркаланади.

Ўткир Ҳошимов асарларини дарёга бежиз ўхшатаётганим йўқ. Ўқисангиз, уларнинг дилидаги дарёваш сифатларни аниқ кўрасиз, англайсиз ва хис этасиз. Адибнинг «Нур борки, соя бор», «Икки эшик ораси», «Тушда кечган умрлар» сингари романларидағи айрим руҳий талотумлар тасвири, баъзан бутун бир халқ қиёфасини на-моён эта оловчи ижтимоий дард ва муаммоларнинг бадиий талқини; «Баҳор қайтмайди», «Қалбингга қулоқ сол», «Дунёнинг ишлари» сингари қиссалардаги қалб манзаралари ва табиат жилоларидан тарагиб турувчи ажиб мусиқийлик, тилсиз армонлар ифодасидаги қўрғошин сокинлик; «Дафтар ҳошиясидаги битиклар» деб аталувчи туркумга жо бўлган бадиий фалсафа ёғдулари; қатор публицистик мақолаларда бўй кўрсатувчи – бориб турган исёнкор руҳ ҳамда «Қатағон» каби драматик асардаги кўкрак қафасига сигмай, портлай деб турган фифон ва бошқалар – барчаси, бирлашиб, булар Ўткир Ҳошимов асарлари, жонли дарёнинг ўзгинаси эмасми, деяётгандек бўлаверади.

Ёзувчи маҳоратини белгилайдиган омиллар кўп. Ҳар бир ёзувчига у ёки бу омил салмоқлироқ юзага чиқар. Ўткир Ҳошимов маҳоратини белгилаган асосий омил, эҳтимол, журъат ва жасоратдир. Машҳур ёзувчимиз Саид Аҳмад унинг ижодидаги бу хусусиятни кўп йиллар аввал алоҳида таъкидлагани бежиз эмас.

Ўткир Ҳошимовнинг XX аср 70–80-йилларида ёзилган «Ўзбеклар», «Урушнинг сўнгги курбони», «Қалбингга қулоқ сол» каби хикоя, қиссаларини оламизми, ёхуд кейинроқ ёзилиб, шу ва ундан бирмунча аввали ги йиллар ҳаёти тасвирланган «Нур борки, соя бор», «Икки эшик ораси» ва «Тушда кечган умрлар» каби романлари ҳамда «Инсон садоқати», «Қатағон» каби

драмалариға назар ташлаймизми, бошқа турли муҳим ижтимоий муаммолар қаторида, маънавиятнинг гўзал ёғдулари ҳамда унинг аста-секин горат этилаётган айрим кирраларини тасвирлашга алоҳида эътибор берилганини кўрамиз. Маънавиятнинг горат этилиши эса моҳият эътибори билан, миллатнинг таназзулга юз тута бошлиши демакдир. Адиб шўро тузумидаги зўравонликлар боис мустабид ва қатағон сиёсат туфайли шундай бўлмоқда, деб айюҳаннос солгани йўқ, бу муаммоларни у бадиий йўсинда, зимдан, ичдан кўрсатиб берди, тасвирлади, замондошларимизнинг хатти-харакатлари орқали юзага олиб чиқди. Бу адиднинг ўзига хос, кўпинча сиёсат ва мафкурага алоқаси йўқдек, лекин аслида уларнинг кўзга кўринмас тазифидан зириллаб турувчи жасорати эди. Бу шўролар қулаши арафасида шуҳрат топган В. Шукшин, В. Распутин, Анарларга хос мақсадни қалб қудуқларига тушириб, яширин ифодалай билиш эди.

Эҳтимол, бу жараён ёзувчи идрокида биз ҳозирги босқичга келиб энди англаётганимиз даражада аниқ мақсадли кечмаган бўлиши мумкинdir, лекин бундан қатъи назар, эрк ва рух озодлиги, юрт ва ватан шарафи ёзувчи асарларида гоҳ онг оқими йўсинида, гоҳ очик ва ошкор тарзда намоён бўлгани шубҳасиз. Буни унинг асарлари аниқ кўрсатиб турибди.

Дадиллик билан, журъат билан халқ дардини ёритиш истеъоди Ўткир Ҳошимовда дафъатан ёхуд машҳур қисса, романларигагина келиб пайдо бўлгани йўқ, албатта. Бу фазилат унинг ижодида 60-йиллардаёк кўзга ташланади. 1968 йилда бўлса керак, «Тошкент оқшоми» газетасида унинг «Ном ҳам ҳусн белгиси» номли бир мақоласи чиқди. Унда пойтахт кўчаларию турли манзиллардаги номларнинг аксари кундан-кунга миллий тилимиздан ўзга бир тилда бўлиб кетаётгани ҳақида қайғуриб ёзилган эди. Бу – ўзбек тилига дав-

лат тили мақоми берилишидан деярли йигирма йил аввал айтилган фикр, амалий қадам, ўқтам жасорат эди. Бу фикрларни ўқиган ҳозирги ёш китобхон: шунга ҳам шунчами, арзимаган кичкинагина бир нарса учун-а, деб ажабланиши мумкин. Лекин ёш адибнинг бу ҳаракати арзимаган, кичкина иш эмас, ўз даври учун жиддий деб баҳолашга арзигулик иш эди. Бу ҳаракат мафкура корчалонлари эътиборидан четда қолмади, албатта. Бунинг учун ёш адибга ҳайфсан эълон қилинди. Ҳайтовур, адиб дардини тушунувчилар бўлган шекилли, жазони бундан кучайтиришмади.

Ўткир Ҳошимов келажаги ойдин ёзувчи эканини дастлаб айтган устоз адиб Абдулла Қаҳҳор экани бугун барчага маълум. Ёш Ўткир Ҳошимовнинг журъатли адиб бўлажагини илк бор айтганлар эса, биз буржуа ғанимлар деб атаган хорижлик мутахассислар эди.

«Шарқ юлдизи» журналининг 1971 йил охирги сонларидан бирида «Қалбингга қулок сол» қиссаси босилиб чиқади. Асарнинг қайси бир лавҳасида Чарос ва Ёдгор исмли талабалар ўзаро сухбатда ўрта асрларда Марказий Осиёдаги маданият Ғарбдагига нисбатан юқори даражада бўлган; Америка қитъаси мавжуд эканини Беруний Колумбдан анча бурун эътироф этган; ўзимизнинг мумтоз Шарқ мусаввирларимиз Ғарб рассомларидан кўра ҳаётйроқ асарлар чизишган қабилидаги мавзуларда фикр юритадилар.

Ўйлаб қаралса, бу фикрларнинг ҳеч бирида ажабланарли жойи йўқ. Чунки барчаси тўғри. Асар қаҳрамонлари бу фикрларни ўзга халқ ёки мамлакатларни камситиш, ерга уриш мақсадида ҳам айтиётгани йўқ. Ўзаро сухбатда, ёшларга хос шижаот билан ўз миллий ғуурларини ифодалаяптилар, холос. Бироқ, ҳамма гап шундаки, бундай фикрларни қирқ йил аввал очик ва бемалол, ғуур билан айтиш салкам миллатчилик деб баҳолангувчи эди.

Қисса эълон қилингач, Америкадаги Колумбия университети мутахассисларидан бири – Роберт Ж.Баррет деган кишининг эътиборига тушади. Мақолаларидан бирида бу асарни таҳлил доирасига тортади. (Қаранг: Роберт Ж.Баррет. Нуктаи назардаги умумийлик ва Ўрта Осиё миллий адабиёти / Шўролар Ўрта Осиёсида миллий масала. Нью-Йорк – Вашингтон – Лондон: «Прэгер», 1973, инглиз тилида). Роберт Ж.Баррет мулоҳаза юрита туриб, Ўткир Ҳошимовнинг бу асари ва қаҳрамонлари янада синчилаб ўрганилишга муносиб, деган фикрни айтади. Гап Чарос ва Ёдгор каби қаҳрамонларнинг миллатпарварлигига, ўз тарихига муҳаббатида эди. Янада аниқроқ айтганда, американлик мутахассиснинг фикрича, асар қаҳрамонларидаги, демакки, уларнинг карашларини ифода этаётган адидаги бу мулоҳазаларга Ўрта Осиёдаги етакчи миллатлардан биридаги миллий уйғониш муждалари сифатида қарамоқ лозим. Баррет мулоҳазаларини хам муайян даражада ўз давридаги мағкуравий мақсадлардан батамом холи деб бўлмасада, уларда аслида, холис ҳақиқатни кўрмаслик мумкин эмас. Лекин, салқам қирқ йил аввал танқидчилигимиз бу фикрларга қандай муносабат билдири? Ғарбдаги буржуа шўрошунослиги ўзбек адаби асари ҳақида ижобий фикр айтдими, тамом, бир гап бор, буни беэътибор қолдирмаслик даркор. Катта адидми, кичик адидми, бундан қатъи назар, хушёр бўлиши лозим, деб хуласа чиқарган ва матбуотда ўз фикрини мақолаларидан бирида баён қилган эди. Шу тариқа Ўткир Ҳошимов журъатли, мустақил фикрли қаҳрамонлар яратишини «Қалбингга қулоқ сол» сингари ўтган асрнинг 60-йиллари охирида яратилган дастлабки қиссалардаёқ бошлаган эди. Ана шу: қалбга қулоқ солиш – халқ қалбига, замондошлар қалбига қулоқ тутиш, уларнинг дардини кўтариб чиқиш, мана, деярли ярим асрдан буён ёзувчи сифатидаги, ўз

халқининг фарзанди сифатидаги Ўткир Ҳошимов ижоди ва фаолиятининг лейтмотиви бўлиб келмоқда.

Ўткир Ҳошимов асарлари, айниқса, романларига хос мухим бир фазилат бор. Унинг романларидағи халқ учун юрт учун, бирдек мухим ва долзарб ижтимоий маҳраждан ташқари, мустақил ҳаётга эндиғина қадам қўйиб келаётган ўн саккиз ёшли талаба ҳам; ажабтовур ҳаётий тажриба орттирган, тақдир довонларининг пасту баландларини кўрган, дейлик, эллик ёшли амалдор ёки элнинг амалсиз, мартабасиз ўтаётган оддий бир вакили ҳам; ёхуд умр шомини бошдан кечираётган, эшигига тўртта машина хизматда турган отахону бир ойда қозони ақалли бир марта гўшт тушмайдиган муштипар онаизор ҳам ҳаёт ҳақидаги, одамлар ҳақидаги ўз орзу умидларини, армонларини, эсиз ўқинчлари-ю, адолатга мустаҳкам ишончларини топа олади. Бу хусусият ёзувчининг ўзини ҳам, асарларини ҳам халқка ниҳоятда яқин қиласи. Гап бу ерда, Ўткир Ҳошимов асарларининг факат маъноси, мазмуни, гояси ва, ҳатто, кўтариб чиқилган муаммосидагина эмас. Энг асосийси, шуларнинг барчаси нечоғлик бадиий теран, гўзал, янги охорларда тасвирланишида; юкорида айтилган – барча ёшдаги китобхонлар бадиий дидини аниқ, идрок эта билишда, аниқ худди ўқувчиларга маълум ва матлуб бадиий оҳанглар топилишида.

Ўткир Ҳошимов «Икки эшик ораси», «Тушда кечган умрлар» номли романлари билан ўзбек романчилигининг бадиий имкониятларини кенгайтирди. XXI аср ўзбек танқидчилиги бу ҳар иккала романни улардаги бадиий яхлитлик жиҳатидан, айниқса, композицион бутунлик нуктаи назаридан XX аср жаҳон адабиётининг нодир намуналари, масалан, Фолкнер асарлари билан қиёслаб ўрганмоқда. «Икки эшик ораси» ва «Тушда кечган умрлар» романларини бадиият ва, хусусан, композицион курилиш жиҳатидан ўрганиш (М. Шарафиддинова) ўзбек

романчилигининг XX аср жаҳон адабиётидаги ўзига хос ўрнини ёритишда муҳим рол ўйнамоқда.

Ўткир Ҳошимов XX аср ўзбек адабиёти тарихи ҳамда XXI асрнинг ҳозиргача кечган ўн йилидаги ўзбек адабиёти ичидаги асарлари ҳалқ қалбига чукур томир отган, энг кўп ўқувчиларга, ихлосмандларга эга бўлган ёзувчиларимиздан бири, эҳтимолки, биринчиси саналади. Мен шу жумлаларни ёзишга ёздиму ўйланиб қолдим. Кулогим остида айрим биродарларимнинг: хай, ҳай, бирор ўзингизни босинг, Қодирийу Ойбек, Абдулла Қаххор, Одил Ёқубов, Пиримкул Қодиров, Эркин Воҳидов ва Абдулла Орипов-чи? Бу тарзда мушоҳада юритиб, бир адабни иккинчисига қарши қўйиш ярамайди, деган иштибоҳларини эшитгандек бўлдим. Бу – тўғри фикр. Ҳар бир ёзувчининг адабиётимиз тарихида, китобхонлар қалбида эгаллаган ўз мавқеи, шуҳрати, ўз ўрни бор, албатта. Бироқ, мен юқоридаги мулоҳаза билан адабларимизнинг бирини иккинчисига зидламоқчи эмасман, уларнинг бири юқори, иккинчисини қўйироқ демоқчи ҳам эмасман. Ўткир Ҳошимов асарлари ҳалқ орасида нечоғлик кенг тарқалгани ҳақида баъзи фикрларни айтмоқчиман, холос. Мана, тахминан, қирқ йил доирасига тааллуқли айрим маълумотлар: «Бахор қайтмайди» қиссаси шу вақтгача ўн марта нашр этилибди. Қисса ёзилганидан сўнг беш-олти йил ўтгач, бу асар асосида яратилган телевизия марказий телевидениеси орқали шу вақтгача қирқ марта тақроран кўрсатилибди. «Нур борки, соя бор» романи ҳозиргача салкам ўн марта қайта-қайта нашрдан чиқибди. «Дунёнинг ишлари» ҳам, агар янгилишмасам, ўндан ортиқ нашр юзини кўрди, Республика марказий телевидениеси орқали ўттиз йилда ўттиз марта қайта-қайта намойиш этилди. Тошкентта ташриф буюрган америкалик бир ўзбекшунос олима бу қиссани аслиятда ўқиб чиққач, чидай олмайдиган даражада она-

жонимни соғиндим, деб, бир неча кундан кейиноқ уйига қайтиб кетгани ҳақидағи ҳодиса жаҳон миқёсидаги бадий адабиётта доир дарслікларни безай оладиган маълумот эмасми?..

Яна бир мисол. «Икки эшик ораси» романы яратилғанига ҳали йигирма беш йил бўлгани йўқ. Бу асар ҳам ҳозиргача ўн марта қайта-қайта чоп этилди, ўзга тилларга ўғирилди. «Дафтар ҳошиясидаги битиклар» китоби ҳақида ҳам шу фикрни айтиш мумкин. Бу адібнинг ҳалқ севган асарлари ўзбек тилида, бошқа тилларда ҳар иккича йилда янгидан нашр этилмоқда, деган гапдир. Асарлари асосида тайёрланган телефильмлар, телеспектакллар Республика телевидениесининг марказий дастурлари орқали ўнлаб йиллар давомида миллионлаб томошибинларга мунтазам равишда кўрсатиб борилса, роман ва қиссалар, ҳикоялар бир эмас, икки эмас, ўн мартадан қайта нашр этилиб турса, уларнинг умумий тиражи икки ярим миллион нусхадан ошиб кетган бўлса, шу эмасми Ўткир Ҳошимов китобхонлари энг бисёр адилардан бири эканинга далил. Бу китобларга талаб каттаки, нашриётлар чоп этади (яна бунинг устига, ҳозирги бозор иқтисодиётидек шароитларда денг). Бу асарларга телетомошибинларнинг чанқоқлиги тугамаятики, телеэкранлардан тушмай келади (ижодий рақобат кучли, ҳатто, янги-янги асарларга экранда вакт ажратиш осон бўлмаган ҳозирги муҳитда).

Маълумки, Чингиз Айтматовнинг деярли барча қисса ва романлари экранлаштирилган. Ҳалқ ниҳоятда севган адид ва асарларгина бундай баҳтга ноил бўлади. Шу маънода Ўткир Ҳошимов ҳам ана шундай ёзувчилар сирасига киради. Ёзувчининг ўн бешга яқин ҳикоя, қисса, романлари китоб саҳифаларидан ташқари зангори экран орқали ҳам муҳлислар қалбига етиб боргани, айрим асарлари асосида бадий фильм яратилгани нечоғлик кенг экани ҳақида тасаввур бера олади.

Ҳаётдаги бирор-бир ҳодиса қалбига дард бўлиб кўчмаса, кўнглига ўт бўлиб тушмаса, Ўткир Ҳошимов кўлига қалам олмайдиган ёзувчилар тоифасидан. Бунинг устига ўша дардини, шунчаки, ёритибгина қўя қолмайди, ўз юрагининг кўри билан алангага айлантиради. Токи, бу аланга тафти унга муҳтож дилларга куч-кувват берсин, ҳаётдаги ножоизликни, нобопликни ёндирысин, кўйдирсин. Қатор ўткир публицистик мақолаларининг газета-журнал сахифаларидағина қолиб кетмасдан, муайян ижтимоий кучга айланиши қалбларга ўткир резонанс беришининг сабаби шундан. Биргина «Қалбнинг оппок дафтари» (1981) номли публицистик мақолани эслайлик. Шўро даври сўнгги босқичдаги собиқ Иттифоқда ёхуд жумхуриятимизда маориф тизимиға доир, очиғини айтганда, хукумат қарорлари, фирмә кўрсатмалари оз бўлмаган. Бироқ, қарорларнинг аксарида саноқ, кўрсаткич, хўжакўрсинглик талаблари устувор бўлиб, ўзак масалалардан бири – ўқитувчи ҳақида қайгуриш, унинг мақомини кўтариш кўп ҳолларда эътибордан четда қолиб келди. Бу эса, ўз навбатида, ўқитувчи касбига беписандлик тамойилини келтириб чиқарди. Моҳият эътибори билан олиб қараганда, бу – умуман, жамиятнинг таназзулга юз тута бошлигинини англатувчи кўрсаткичлардан бири эди. Ана шундай шароитда Ўткир Ҳошимов «Қалбнинг оппок дафтари» номли публицистик мақоласини эълон қилди. Мақолада вужудга келган ўша 80-йиллар шароитида бу касб эгаларига чукур қайгудошлик ҳиссининг ўзи етарли эмаслиги, бунинг учун аниқ янги тадбирлар амалга оширилиши лозимлиги айтилади, ўқитувчи меҳнати, яшаши учун тегишли шароитлар яратилмас экан, наинки маориф тизими, балки умуман жамиятимиз бир жойда депсиниб қоладигина эмас, орқага кетиши мумкинлиги ҳақида ниҳоятда жиддий фикрлар ўртага ташланади. Ёдимда, бу мақола ўз вақтида катта шов-шувга сабаб бўлди.

Ўйлайманки, ушбу биргина публицистик асар ижтимоий салмоқ жиҳатидан, жамиятга таъсири жиҳатидан ўша вақтдаги бир неча расмий қарорлардан кўра кучлироқ эди. Бошқачароқ айтганда, ушбу мақола маориф тизими ҳақидаги расмий хужжатларда эътибордан четда қолиб келаётган муаллим қисмати ва тақдирига доир кўпдан-кўп иқтисодий, маънавий, ахлоқий, миллий, хуқукий муаммоларни куюнчаклик билан кўтариб чиқсан эди. Ёзувчи мақоласида, бу масалалар нуқтаи назаридан хукумат қарорларига тил теккизилмаган, хужжатлар танқид қилинмаган, албатта. Бироқ, бу – моҳият эътибори билан, муаллимдек, тарбиячидек буюк касб эгаларига расмий доиралар, расмий сиёsat муносабатларининг ўзига хос тарзда усталик билан кескин ва аёвсиз фош этилиши эди. «Қалбнинг оппок дафтари» эътибордан четда қолмади ва четда қолиши мумкин ҳам эмасди. Аста-секинлик билан етилиб келаётган, уйгона бошлаган замонларнинг хур фикрлари ҳам ўзига яраша самара беради. Жумхурият маориф вазирлиги ҳайъати мақолани муҳокама қилишга мажбур бўлди ва ҳатто, маҳсус қарор қабул қилди. Юртимиздаги маориф тизимининг барча бўғинлари ва илмий ташкилотларида, педагог жамоаларида уни бажариш юзасидан тегишли тадбирлар ишлаб чиқиш топширилди. Яна қофозбозликнинг ўзида, десангиз ноҳақ бўлмайсиз, албатта. Лекин, ўқитувчилар дарди деган катта бир ижтимоий муаммога жамият эътиборининг тортилиши ҳам катта гап эди.

Республикамиз Мустақилликка эришгач, Президентимиз эълон қилган дастлабки Фармонлар ўқитувчиларнинг оғирини енгил қилиш, муаллим мақомини барча йўналишларда кўтариш масалаларига бағишланганинг ўзиёқ Истиқлол давридаги ички сиёsatнинг дастлабки қадамлари ёқ нечоғлик мухим ва тўғри йўналишда бўлганини кўрсатади. Аввалги босқичларда ҳам ёрқин

намоён бўлиб, алангадек ловиллаб турган публицистик шижаот сўнгги йилларда Ўткир Ҳошимов ижодида янада жонланди. Адид Истиқлол даврига келиб Президентимиз И.А. Каримовнинг улкан ғояларини ҳаётга, замондошли римиз қалбига янада чуқурроқ сингдиришга қаратилган, маънавият ва миллий қадриятларимиз муаммоларига бағишиланган ўнлаб публицистик мақолалар эълон қилди. «Мардлик», «Ўзликни англаш баҳти», «Мустақиллик – масъулият демак», «Истиқлол бизни дунёга танидди», «Оёғинг ердан узилмасин» сингари мақолаларда бир жиҳатдан амалга оширилаётган улкан бунёдкорлик ишларининг моҳият ва самаралари таҳлил ва талқин этилди, иккинчи бир жиҳатдан, ушбу бунёдкорлик ишларининг гайрат билан амалга оширилишига бош-қош бўлаётган Ўртбоши сиймоси гавдалантирилди.

Ўткир Ҳошимов ранг-баранг жанрларда ижод этиб келётган ёзувчидир. Унинг «Икки карра икки беш», «Шумлик», «Осмондан тушган пул», «Сўққабош бевагина» сингари тўпламларига кирган воқеий ва бадиий ҳажвиялар бугунги ҳажвий адабиётимизнинг гўзал ва сара намуналаридир. Масалан, адебнинг устоз Сайд Аҳмад ҳақидаги «Гаройиб саёҳат» номли ҳикояси ҳозирги жаҳон адабиётининг манаман деган юмористик новеллалари билан беллаша олади. Афсуски, айрим мулоҳазаларни ҳисобга олмаганда танқидчилигимиз ёзувчининг бу йўналишдаги ҳикоялари ҳақида чуқур ва атрофлича фикр юритишга ўтганича йўқ. Ҳолбуки, харakterлар яратишдаги тиниқлик, тилдаги жозиба ва индивидуаллик, давр ва инсон табиатида намоён бўлувчи айрим хусусий кусурлар билан бир қаторда, баъзи бир жиддий ижтимоий иллатларнинг кескин ва ёрқин гавдалантирилиши ҳамда ҳаётбахш, меҳрли кулги фазилатларига кўра Ўткир Ҳошимов ҳажвиялари ҳозирги адабиётимизда муҳим ўрин тутади ва адабиётимизнинг ранг-баранг тароватини

очиб бериш жиҳатидан улар жиддий ўрганилишга арзигулиқдир.

Ўткир Ҳошимовнинг қатор драматик асарлари ҳақида ҳам шу фикрни айтиш ўринли. Унинг саҳна асарлари драма турининг турли жанрларида битилганини таъкидлаш жоиз: «Инсон садоқати» – психологик драма, «Тўйлар муборак» – комедия, «Баланд дорга осилма» – сатирик комедия. «Қатағон» эса – фожиа. Маълумки, бизнинг ўзбек адабиётимизда ҳам, умуман, собиқ шўро адабиётларида ҳам фожиа жанрида ёзилган асарлар кўп эмас. Бунинг сабаби аён, албатта. Шўро тузуми ўз жамиятида фожиа сифатида тасвирланувчи воеа-ходиса ёки қаҳрамон тақдири бўлиши мумкин эмас деб тушунувчи ёки, ҳеч бўлмаганда, шундай деб тушунилишини истагувчи эди. Ҳолбуки, шўро тузумида ҳаётга ва айрим қаҳрамонлар тақдирига фожиа талаблари асосида ёндашишга арзигулик ҳодиса, тақдирлар йўқгина эмас, ҳатто оз бўлмаган. Ўткир Ҳошимов «Қатағон» фожиасида Ўзбекистондаги шўро тузумининг сўнгги босқичдаги даврини, «ўзбек иши», «пахта иши» деб орсизларча қилинган сиёсий ўйинларни ва бу тухматлар туфайли халқ бошига, унинг айрим фарзандлари бошига тушган фожиаларни, бу фожиаларнинг илдиз ва сабабларини кескин туғёнли тўлқинларда изчил реалистик лузум (принцип)ларда кўрсатиб берди. Афсуски, айрим мулоҳазаларни ҳисобга олмаганда, бу асар ҳам ҳанузгача атрофлича ва чукур таҳлилини топмай келаётир.

Шу ўринда Ўткир Ҳошимовнинг А. Қодирий, А. Қаҳхор, Ойбек, Сайд Аҳмад, О. Ёқубов каби адиблар; О. Шарафиддинов, У. Норматов, А. Расулов каби танқидчилар; ўзига тенгкур, даврадош шоир-ёзувчилар ҳақида ёзган турли йўналиш, миқёсдаги мақолалари, шунингдек, ёзувчи ижоди, маҳорат сирларига доир чукур, теран мулоҳазалари сўнгги босқичдаги адабий жараён-

да ўзига хос ўрин тутишини алоҳида таъкидлаш жоиз. Ҳаёт, адабиёт, маҳорат ҳакидаги бу адабий ўйлар ижодий кечинмаларни ёритиш, ёзувчининг ўз адабий-эстетик дунёси сир-синоатларини ўрганиш билан бир қаторда, айниқса, ёшларга ўзбек адабиёти дунёсини ўзлаштиришда муҳим манба бўла олади. Агар эътибор берсангиз, Ўткир Ҳошимовнинг адабий ўйлари, хусусан, «Дафтар ҳошия-сидаги битиклар»да ўз ифодасини топган мулоҳазалари, хеч муболагасиз, бамисоли бадиий асарлардек кизиқиб, берилиб, севилиб ўқилади. Бунинг сабаби, адабнинг бу йўналишдаги мақолалари, мушоҳадалари ҳам бадиийлик билан тўйингланлиги туфайлидир. Демакки, унинг адабий ўйлари, бадиий асарлари бир-бирини янада тўлдиради, мунтазам бир яхлитликни ташкил этади.

Ўткир Ҳошимов қаҳрамонларини ҳаётбахш, кў-таринки, романтик йўсинда кўрсатиш билан бир қаторда, ҳаётнинг аччиқ ҳақиқатларини бўймай-нетмай, бу жа-раённинг ички фалсафасидаги мутаносибликни бузмай, изчил реалистик йўсинда тасвирловчи ёзувчидир. «Икки эшик ораси»даги Ориф оқсоқол фақат доно бўлгани учунгина эмас, айниқса, ҳақгўй бўлгани учун ҳаётнинг аччиқ ҳақиқатлари олдида эсанкирамагани, журъат ва жасорат билан ҳақ йўлдан тоймагани учун китобхонларнинг севимли қаҳрамонларидан бири бўлиб қолди.

Адаб, уруш давридаги баъзи ҳамюртларимизнинг киёфасини танқид қилишда бироз ошириб юбормадимикан, деган таъналардан кўрқмай, Умар закунчи феъл-авторидаги ярамас, ифлос хусусиятларни хеч ик-киланмай аёвсиз фош этди. Қаҳрамонни бундай талқин этиш роман салмоғига салмоқ кўшди. Чунки адаб ҳаёт ҳақиқатидан чекинмади. Қаҳрамонни журъат ва жасорат билан тасвирлашда ёзувчи «Тушда кечган умрлар» романнida янги бир қадам кўйди. Асар қаҳрамони – афғон урушидек даҳшатлардан омон қайтган Рустам бемақсад


уруш туфайли фарзанд кўриш баҳтидан мосуво бўлгани учун ва шўролар сиёсатининг Ўзбекистонга қилаётган зуғумларига чидолмай, ўз жонига қасд қиласди. Бунинг сабаби қалвидаги баъзи бир идеалларнинг нурай бошлиши, «ўзбек иши» деб ном олган ноҳақликлар ҳамда ўзимизнинг ичимиздан чиқсан ваҳший комиссарга ўхшаганларнинг ҳамон от устида экани эди.

Ўткир Ҳошимовнинг журъат ва жасорати бадиий қаҳрамонлари орқалигина эмас, Ватан ва миллат фарзанди сифатидаги фуқаролик фаолиятида ҳам намоён бўлади. Шўро замонининг сўнгги босқичларида Москвадаги съездлар саройи минбаридан туриб Юргончи гояларига ҳамоҳанг равишда ўз халқи ва юртининг манфаатларини кўркмай, дадил ҳимоя қилиши, ўша вақтдаги иттифоқ раҳбарларининг мунофиқларча тухмат билан йўғрилган сиёсатларини кескин фош этиши, улар билан юзма-юз туриб тортишуви адид табиатидаги бундай хусусиятларни, хеч шубҳасиз, жасорат деб аташга асос беради. Асар қаҳрамонларидаги бу каби хусусиятлар адабнинг ўзига ўтгани, адабнинг ўз табиатидаги бундай фазилатлар асар қаҳрамонларида намоён бўлгани учун ҳам ёзувчи мана деярли ярим асрдан буён китобхонлар ардоғига сазовор бўлиб келмоқда.

Миллионлаб китобхонлар Ўткир Ҳошимов асарларидаги халқпарвар, миллатпарвар қаҳрамонларни ардоклаб севгандаридек, ёзувчининг ўзини ҳам қалбларининг қаҳрамони деб биладилар ва шундай бўлишини орзу қиласдилар.

*Бахтиёр Назаров, академик*

# ҲИКОЯЛАР



2- Ўткир Ҳошимов

---

---

## МУҲАББАТ

### I

Узок, энтикиб ўпишдилар. Қизнинг соч толалари Тиркашнинг юзига тегиб турар, алланечук нотаниш, аммо тотли ис анқир, унинг бутун вужуди таранг тортилиб, оёқлари титрар, қизнинг ҳам елкалари билинар-билинмас силкинаётганини ҳис қилиб турарди. Тўсатдан қиз силтаниб, қаддини ростлади-ю, зарб билан итариб юборди уни.

Тиркаш лайлак қилиб қўйилган аравага суяниб қолди. У ҳамон ўзига келолмас, аллақандай ички бир тўлқин борган сайин қаттиқроқ жўш уради.

– Дадам сўйиб ташлайди, – деди киз тўзиб кетган сочларини кафти билан текисларкан. Аммо, дадасидан ҳеч қачон ҳайиқмаганлиги, бундан кейин ҳам ҳайиқмаслиги унинг овозидан билиниб турарди.

Тиркаш аравадан уч-тўрт қадам нарида, майсалар устига ташлаб қўйилган бир парча намат устида ухлаб ётган чолга қаради. Чол ола-була хуржунга бошини ташлаб, оёқларини керганича, чалқанча ётар, қоронғида юзи аниқ кўринмасди. Ундан ҳам нарирокда бир туп дўлананинг тўкилган ҳазонини шитирлатиб, шарпадай коп-кора эшак ўтлаб юради.

Тиркаш қаддини ростлаб, қизга тикилиб қолди. Унинг катта-катта кўзлари ёниб турар, узун-узун киприклари, кирра бурни қоронғида янаям жозибали қўринар, Тиркаш ҳали ҳам ҳаяжонини босиб ололмас эди. Икковлари анчагача жимиб қолишиди. Арслонбоб тогининг чўққиси

ёниб кетди. Зум ўтмай дум-думалоқ тўлин ой чиқди. Чор атрофга нур аралаш сукунат сели қуилгандаи, ҳаммаёқ жимжит бўлиб қолди. Япроқлари тўкила бошлаган дўлана соядай қорайиб кўринар, ҳавода хазон, ғўзапоя иси анкирди.

Киз сочини қайтадан ўриб, орқасига ташлади. Тиркашнинг ёнига келди-да, ниҳолдай нозик гавдасини эгиб, арава ичидан пахталик нимча олиб кийди. Тиркашга бир караб қўйди-ю, оёқларини осилтириб, аравага ўтириб олди. У энди ҳамма нарсани унутгандаи, Тиркашни кўрмаётгандай эди. Бошини баланд кўтариб, ойга тикилиб ўтирас, чехрасида бепарволик кўриниб турарди. Бояги тўлқин яна жўш уриб кетди. Тиркаш нима қилаётганини ўзи ҳам сезмай, тиз чўкиб, қизнинг оёқларидан маҳкам кучоқлаб олди.

– Дилор, кетма. Илтимос қиласман, ялинаман... – У қизнинг тиззасига бош қўйди. Негадир шу топда қизнинг кўллари сочини силашини кутар, орзу киласди. Дилор эгилиб унинг елкасидан итарди.

– Кет бу ердан!

– Тушунсанг-чи, ахир, қаёққа борасан?! Нимага борасан? – Тиркаш қизнинг оёқларини маҳкамроқ қисиб, илтижо билан бош чайқади. – Йўқ дема, Дилор. Иккаламиз бирга ишлаймиз. Сен нимани хоҳласанг...

– Кет, мен ухлайман! – Дилор тагин унинг елкасидан итарди.

Тиркаш қизнинг чимирилган қошлирига, қатъият билан қимтилган лабларига қараб, энди гапириш ортиқча эканини тушунди. Аста қаддини ростлаб, бошини қуий солди, ўзига ҳам эриш туюлган паст, ўқинч овозда пи chirлади:

– Кетиб қолманлар, тонготарда келаман.

Шартта бурилди-да, тасмадай оқариб ётган тупрок кўчадан соясини босиб, чопиб кетди. Ой коптоқдай сак-

раб-сакраб унга эргашиб келаётгандек бўлар, қишлоқ томондан итларнинг акиллагани эшитилар, сой шовуллар эди. Қир устига чиққанида олд томондан қишлоқ чироқлари кўринди. У тўхтаб қолди. Орқасига бурилиб қаради. Пастликда, йўл ёқасидаги ўша бир туп дўлана корайиб кўринар, Дилор ҳам, отаси ҳам дараҳт кўланкаси тагида қолиб кетганди.

Тиркаш тез юрганидан нафаси қисиб, терлаб кетганини энди сезди. Кўйлагини ечиб елкасига ташлади-да, тагин қишлоқ томонга қаради. Катта йўлдан нур занжири билан боғланиб қолгандай қатор-қатор машиналар ўтиб борарди. «Пунктга пахта олиб кетишяпти», деб ўйлади у. Бирдан кўнгли чўқди. «Йўқ! – деди у пичирлаб. – Ҳеч қаёққа бормайман. Бормайман! Уйга ҳам, Дилорнинг олдига ҳам. Ҳеч нима керакмас менга, ҳеч нима!».

У кўйлагини ерга ташлаб, куриб, сарғайиб қолган кўқатлар устига ўтирди.

«Нима бўляпти ўзи? Қаёқданам шу кизни учратдим?!  
Наҳотки, энди ҳамма нарсадан – уйим, қишлоғим, отамдан айрилсам? Наҳотки, энди Тентаксойдан бир умр бoshimni олиб кетсам? Нима бўляпти ўзи?».

У дикқат билан қулоқ сола бошлади. Бу сафар сойнинг шовуллаши аниқ эшитилди. Кейин хўроздар чўзиб-чўзиз қичқира бошлади. Эҳтимол, уларнинг ҳовлисидағи тождор хўрор ҳам кўноқда туриб, бўйини чўзганча жўр бўлаётгандир. Эҳтимол, Қосим ота хирмондан қайтиб, унинг келишини кутиб, супада нос чекиб мудраб ўтиргандир.

Тиркашнинг хаёлида Қосим отанинг оппоқ қоши остидан ўйчанлиқ, мулойимлик билан боқиб турган кўзлари, сўлғинроқ, аммо нуроний юзи, чўқки соқоли жонланди. Шу кўзларнинг нурини олган Тиркашнинг ўзи эмасмикин? Шу соч-соқолга қирор кўндирган Тиркашнинг ўзи эмасмикин! Ахир уни одам қилган, ота ўрнида ота бўлган

киши шу эмасмиди?.. Тиркашдан бошқа суюнчиғи борми унинг...

Кошки эди, Тентаксойга ўша эски арава кириб келмаган бўлса... Кошки эди, Тиркаш шу аравада келаётган лўли қизни – Дилорни кўрмаган бўлса...

Тиркаш ўрнидан сакраб тургиси, қишлоқ томонга югуриб кетгиси келди. Лекин қачонлардир гўдаклик хотирасига маҳкам ўрнашиб қолган, унутилаёзган соғинч бир туйғу устун келди-ю, чалқанча ётиб олди. Ой ҳаволаб кетган, қатлам-қатлам куз булутлари оҳиста сузиб ўтар, намхуш тупроқ иси анқир эди.

## II

Бу воқеага анча йил бўлиб кетган. Анча йиллар...

Тиркаш эсини танибдики, шу тупроқ вояга етказди уни. Дунёга қайси куни келганини, отаси ким, онаси ким эканини ҳалиям билмайди. Тўрт-беш ёшида одам ажратадиган бўлиб қолганида лўлилар чодирида кўрди ўзини. Ота-онаси аллақачон кўз юмиб кетганини шулардан эшитди. Ҳаммага эргашиб юргани учун Тиркаш деб чақиришаркан уни. Улар Тиркашни кўлма-кўл кўтариб, катта қилишибди... Тиркаш ҳам шу лўлилардан биттаси эди. Ярим кечагача чилдирма чалиб, базм қилишни, кизил кўйлагининг этагини ҳилпиратиб рақс тушишни ҳеч нимага алишмайдиган хотинларнинг ҳаммаси унинг онаси эди. Гулхан атрофида давра куриб ўтирган лўлиларнинг ҳаммаси ота эди унга.

Ҳазин қўшиқлар оғушида мудраган оқшомлар, ой нурига ғарқ бўлган осмон... Тиркаш дунёга келиб энг аввал шуларни кўрганди. Кун ботар-ботмас уларнинг элати кўкаламзор бир ерга чодир тикар, Тиркаш кўкатлар устига чалқанча тушиб оларди-да, чилдирманинг гумбирлашига, қувноқ қаҳқаҳаларга қулоқ солиб ётар, гул-

хан атрофида лип-лип айланаётган соялардан кўзи тиниб, ухлаб қоларди.

Эрта тонгда одамларнинг говур-гувури, эшакларнинг ҳанграшидан уйғониб кетарди. Шудрингдан хўл бўлиб кетган жингалак сочларини силаб ўрнидан туар, увишиб қолган қўлларини укалааб-уқалааб кўярди.

Яна ўша узун-узун йўллар бошланарди. Дунёда йўлларнинг нега шунчалик қўплигига унинг ақли етмас, лўлилар элати бўлса бир зум ҳам тўхтамас, қаёқка кетишадиганини ҳеч ким билмасди.

Тиркашнинг сўнгсиз-ниҳоясиз йўллари Тентаксойда тўхтади. Баҳор оқшомларидан бирида лўлилар элати шундоқкина сойнинг бўйига, тошлоқ соҳилга чодир тикиди. Тентаксой сон-саноқсиз оролчалар ҳосил қилиб ҳайқирад, осмони фалакка марварид сочарди.

Тиркаш ўшандаги етти-саккизларга бориб қолган, тишлари бир марта тўкилиб чиқсан эди. Кун бўйи йўл юравериб чараганиданми, ҳаммадан олдин ухлаб қолибди.

Тонготарга яқин энтикиб уйғониб кетди. Уйғонди-ю, тўлқинлар кетма-кет урилиб, сув қаърига тортиб кеташадиганини билиб, чинқириб юборди. Аммо овозини ўзи ҳам эшитолмади. Оғзига сув тўлиб, ўқчий бошлади. Сой даҳшатли гулдуросдан титрар, еру кўк қоп-кора тўлқинларга кўмилган эди. Тиркаш сувдан қалқиб чиқиб, қоп-кора осмонни сўнгги марта кўрди-ю, типирчилааб чўкиб кетди.

У кўзини очганида бошига эгилиб турган нотаниш кишини кўрди. Элатида бундай одам йўқ эди. Бошига кўк духоба дўппи кийиб олибди. Юзлари кизариб кетган, оқ оралаган мўйлови хўл бўлиб, чўқчи соқолига ёпишиб қолибди. У жиққа сув кўйлагининг этагини қайриб, Тиркашнинг пешанасини артди.

– Отинг нима, ўғлим?

Тиркаш ўзини шу одам сувдан олиб чиққанини энди тушунди.

– Кетаман!

У ўрнидан турмокчи бўлган эди, мажоли келмади. Нотаниш киши унинг устига кўрпа ташлади.

– Элатларинг кетиб қолишиди. Сени аллақачон ўлдига чиқаришган бўлса керак. – Нотаниш киши чуқур хўрсинди. – Сел ёмон қутурди-да! Тентаксой шунақа ўзи. Ҳар баҳорда жиловини йўқотиб қўяди.

Тиркаш бегона уйнинг гулдор қоғоз ёпиштирилган шифтига тикилиб ёта-ёта кўзлари илинди.

... Бу воқеага анча йил бўлиб кетган... Анча йиллар...

Агар уч қун аввал қишлоққа яна битта лўли арава кириб келмаганида, агар Дилорни кўрмаганида, киз кетаман деб туриб олмаганида, ўша дамларни эслаб ўтиармиди у?

### III

Қуёш уфққа лаб босди. Кичкинагина шалақ арава тупроқ ўйлдан имиллаб борар эди. Қора эшак чиллакдай ингичка оёклари билан тупроқ чангитиб, аравани судраб борар, ғилдираклар нола чеккан каби ҳазин ғийқилларди.

Аравада ўтирган чолнинг ингичка, буришиқ бўйнидаги чуқурчаси, оқ оралаган сочи Тиркашга кўриниб турарди. Дилорнинг отаси ҳеч қаёққа шошилмаётганини шама килгандай эшакни қистамас, бошини ташлаб, мудраб борарди. Эрталабдан бери чол Тиркашга бир оғиз ҳам гапирмади. Фақат аҳён-аҳёнда милки қизариб кетган кўзлари билан унга синчиклаб қараб қўяр, яна индамасдан тескари қараб оларди.

Араванинг кетида Тиркаш билан ёнма-ён келаётган Дилор унга қараб жилмайиб қўяр, аллақаёқдан синдириб олган тол хивичи билан йўл четидаги гиёҳларни савалаб

борарди. Унинг шапалоқ гулли қизил кўйлаги шафакда ловиллар, ўзи ҳам ўт бўлиб ёниб кетаётгандай кўринарди. Тиркаш шу топда кизнинг нима ўйлаётганини билолмас, аммо бир кўзини сал қисиб, истеҳзоли, жозибали жилмайшидан ўзининг гўзаллигидан, йигитни эргаштириб келаётганидан мамнун эканлигини кўриб турарди.

Куёш ер ортига юмалаб кетди. Оқшом шамоли уфқда ёниб турган шафак алангасини пуфлаб ўчирди. Ҳамон гилдираклар нола чекар, шалақ арава тепаликка чиқиб борарди.

Тиркаш қишлоқдан чиқиб кетаётганида ҳозиргидек кўнгли ғаш бўлишини ўйламаганди. У Қосим отанинг кўзига кўринишдан қўрқкан, Тентаксойдан чиқиб олгунча таниш шофёrlарнинг учраб қолишидан юрак ҳовучлаб турганди. Йўқ, ҳеч ким учрамади... У Дилорни энди ўзиники деб ўйлар, шу қиз учун дунёнинг нариги чеккасигача боришга ҳам тайёр эди. Лекин қишлоқдан узоқлашган сайин унинг қадами секинлашар, ўзи қилаётган гуноҳини энди тушунаётгандай бўларди. Гўё кимдир кўзга кўринмас нозик, жуда нозик иплар билан уни Тентаксойга боғлаб кўйган-у, бу иплар борган сайин таранг тортилар, яна бир қадам юрса, узилиб кетаётгандай бўларди.

Шалақ арава тепалик устига чиққанда тўхтади. Тиркаш тағин бурилиб орқага қаради. Пастда қишлоқни тасмадай ўраб олган сой ялтиллаб кўринар, аммо уйлар кўзга ташланмас, қуюқ дараҳтзор устига оқшом шарпаси кўнганди. Узоқда – катта йўл устида қуюқ чанг кўринди.

– Пода қайтяпти, – пи chirлади у. Бирдан кўз ўнги коронгилашиб, хотиралар қуюнидан боши айланиб кетди.

Бир вақтлар ўзи ҳам каттакон тарғил сигирни тонг-саҳарда подага кўшиб юборар, кечкурун сигирнинг ўзи эшикдан маъраб кириб келарди. Сигирни кўшни

келин соғиб берар, Қосим отанинг кампири ўлиб кетган, сўққабош эди. Чолнинг ўзидан бошқа овунчоғи йўқлигини, унинг умиди ёлгиз Тиркашдан эканини энди тушунди у.

Ўша, сувдан олиб чиқсан йилиёқ Қосим ота унга папка, «Алифбе» олиб берган, Тиркаш мактабга катнай бошлаган эди. Тонг-саҳарлаб шудринг қўнган далалардан мактабга юргургандари, ёзда колхоз боғида болалар билан узум узишгани, бултур ўнинчини битирганида мактабда ўтказилган кеча унинг хаёлида жонланди-ю, юраги гуппиллаб уриб кетди.

Тиркаш куз кечалари хирмонда ишлашни яхши кўйарди. У баланд хирмон устига чиқиб, чалқанча ётиб олар, назаридаги осмон борган сайин пастлашиб тушаётгандай бўлар, пахтанинг елкаларига илиққина, юмшоққина ботиши ҳам, салқин шамолдан жунжикиб, сесканиб кетиши ҳам – ҳамма-ҳаммаси жуда лаззатли эди.

У роҳат килиб ётганида пастдан машинанинг бўғик овози эшитилар, кабина эшиги тарақлаб очиларди.

– Ухлаб қолдингми, ҳой лўли!

Тиркаш шофёрларнинг қўполлигига парво килмас, ўзини шу қишлоқнинг бир ўзбеги, бир фарзанди хисобларди. У хирмон устидан сакраб тушарди-да, паншаха билан пахта ортарди...

Кейин тракторчига шогирд тушди. У омочларни тўғрилаб борар, палахса-палахса бўлиб кўчаётган тупрок иси, бензин хиди масти қилиб қўйгандай боши айланиб кетар, моторнинг гувиллаши ҳам, трактор атрофида парвонадай айланаётган қарғаларнинг қағиллаши ҳам гаштли туяларди унга.

Йигит ўша тупроқ исини, баҳор қўнғироғидан уйғонган ернинг илиқ нафасини, Тентаксойнинг тишни камаштириб юборувчи муздай сувларини ҳеч қачон, ҳеч нимага алишмаслигини, алиша оласлигини энди тушун-

ди... Тиркаш елкасига келиб тушган хивич зарбидан сесканиб кетди.

– Юрмайсанми?

Дилор бир қўлини биқинига тираб, бир қўлида хивич ўйнатиб жилмайиб турарди. Атроф қоронғилашиб қолган, шалақ арава аллақачон пастга тушиб кетганди.

Дилорнинг истеҳзоли жилмайиб туриши ҳам, ўтдай ёниқ кўзлари, кирра бурни ҳам биринчи марта хунук кўриниб кетди унга.

– Туртмасдан гапири! – деди у бўғилиб. Ғазабдан юзлари ловиллаб кетганини ўзи ҳам сезиб турарди.

– Бечора ошиқ! – Дилор бирдан қах-қах уриб кулиб юборди. Сукунат чўккан адирлар устидан оқшом шарпасидай сирли, бўғиқ акс садо келди.

Тиркаш бир силтаниб қизнинг хивичини тортиб олди-да, майда-майда қилиб ерга отди. Дилор ҳеч нима бўлмагандай ҳамон жилмайиб турарди.

– Кишлоққа қайтамиз! – Тиркаш жуда муҳим, азиз бир нарсани тушунтиromoқчи бўлгандай, қизнинг елкаларидан ушлаб, ўтинч билан силай бошлади. – Илтимос, Дилор, йўқ демагин! Кетишимиздан нима фойда, қаёққа борамиз? Жон Дилор, хўп дегин, – у қизни бағрига босиб, шивирлай бошлади: – Тентаксойга қайтамиз. У ерда менинг отам, ўртоқларим, тракторим бор, биласанми, – у негадир бўғилиб кетди. Томоғига тиқилиб қолган илиқ бир нарсани ютиб, аранг шивирлади, – биласанми, Дилор, у ерда менинг... менинг ватаним бор. – Қизнинг соч толалари яна юзига тегиб кетди. Яна ўша, кишини маст қилиб юборувчи майин ис гуркиради. – Дилор, хўп дегин, битта хўп дегин...

Қиз силтаниб чекинди. Энди у жилмаймас, кўзлари ўт бўлиб ёнарди.

– Ҳеч ким сени бошлаб келаётгани йўқ, ўзинг келяпсан, – у бирдан чинқириб юборди. – Сен лўли эмассан,

анқовсан! – кейин кўзлари қисилиб, киноя билан овозини пасайтирди. – Ким кўйибди сенга дуч келган қизга эргашиб юришни? Бор, қишлоғингга боравер! Сен билан ишим йўқ. Мен билан ҳам ишинг бўлмасин!

Дилор тупрок йўлдан пастга қараб чопиб кетди. Тиркаш унинг шамолда хилпираб узоклашиб бораётган кўйлагини кўриб турар, аммо нима бўлаётганига ҳали ҳам тушунолмасди. У бир нафас иккиланиб турди-да, қизнинг кетидан югурди. Тепанинг ярмига борганда, ҳаллослаб етиб олиб, кўлидан тортди.

– Дилор!

– Коч! – қизнинг кўзлари нафрат билан ёниб турарди.

– Кетма, Дилор!

– Коч, лайча!

Бирдан Тиркашнинг вужуди музлаб қолди. Бояги қайноқ ҳислар ўрнини аллақандай ёввойи куч эгаллади-ю, тарсакилаб юборди уни.

– Йўқол! – деди хириллаб, – йўқол!

У Дилорнинг кафти билан юзини ушлаб қолганини кўрди. Кейин кескин бурилди-да, қишлоқ йўлини мўлжаллаб, чопиб кетди. Бир марта ҳам орқасига қарамади.

Арслонбоб чўққисидан қип-қизариб ой чиқиб келар, тупрок йўл окариб кўринар, Тиркашнинг соясигача қалтиради.

## IV

Қиши эрта тушди. Ҳали ғўзапоялар йиғишириб олинмасдан туриб қор ёғди. Эртасига ҳаво чараклаб очилиб кетди.

Тиркаш қор кўрпасига бурканиб эндинина уйқуга кетган ерни чўчитиб трактор ҳайдар, қор босган далалар офтоб нурида кўзни қамаштириб ярқирап, яккам-дуккам ғўзапоялар тақдиридан нолигандай шумшайиб турарди.

Трактор ҳали яхламаган далада енгилгина сузиб, музёрап кемадай орқасидан қоп-кора из қолдириб борарди.

У тушликка чиқиш учун моторни ўчириб, кабинадан сакраб тушди-ю, пайкал бошидаги тутзор ёнида турган кизни кўриб қолди. Боя, моторга сув қуяётганида ҳам кўргандай бўлганди. Киз сариқ пахталик кийиб, бошига кўк рўмол ўраб олганди. Унинг бир кўлини биқинига тираб туриши танишдай кўринди йигитга.

«Ўткинчилардан бўлса керак». Тиркаш шийпон томонга бурилиб кетаётган эди, қиз қўл силтаб имо қилди.

Тиркаш кирза этиклари билан қор кечиб, беш-үн қадам юрди-ю, қизни таниб қолиб, югуриб кетди. Юраги яна ўша соғинч ҳислар билан жўш урар, этикнинг сирғанишига ҳам, гўзапояларга қокилишига ҳам парво қилмасди. «Дилор, Дилор!», – дерди у пичирлаб. Негадир қувончдан энтикар, нимага қувонаётганини ўзи ҳам билмасди.

У нафаси тикилиб югуриб келди-ю, Дилорнинг нозик, аммо чайир қўлларини кафтига олди.

«Кўли музлаб кетибди», – деб ўйлади қизнинг юзига тикиларкан. Дилорнинг ранги сўлгинлашган, кўзлари чўккан, аммо ҳамон жозибали табассум билан жилмайиб турарди. У исиб кетгандай пахмоқ рўмолининг тугунини ечаркан, тирсаги билан Тиркашнинг кўкрагига туртди.

– Ҳайдаб юбормайсанми?

– Қачон келдинг?

– Эрталаб.

– Бутунлайми?

– Бутунлай! – деди Дилор бепарво. Тиркаш қизнинг кўзларига бир қаради-ю, шу бир оғиз сўзга ишониш мумкинлигини тушунди.

– Жинни! – деди у кулиб.

Қизнинг елкасига оҳиста қўл ташлади-да, қор босган дала йўлидан қишлоққа – ўз ҳаётига бошлаб кетди.

---

---

## ҲУРКИТИЛГАН ТУШ

«Кўнгил вайрон бўлиши учун тақдирнинг  
ојизигина зарбаси кифоя».

С. ЦВАЙГ

Тишлари тўкилган кемшик бола эдим. Сой бўйидаги ўтлоқ биз – болаларнинг «катта еримиз» эди. Ҳар куни эрта билан ойим чийдухоба шимимнинг чўнтағига яримта зоғора, бир бўлак қайнаган лавлаги солиб берардидা, шоҳсиз, ювош эчкимизни етаклаб, «катта ер»га жўнардим. Овози дўриллаб қолган Меливой кўк кўзни айтмаса, ҳаммамиз ёш болалар эдик. ўтлоқ ёнидаги икки туп азим тол бизнинг овунчоғимиз эди. Баҳор келиши билан болалар тол новдаларидан хуштак ясашар, кизлар бўлса баргак тақиб, дараҳт соясида черта ўйнашарди.

Бир куни орамизга янги меҳмон – Ҳалима деган қизча кўшилди. Унинг қишлоғимизга келганини ҳаммадан аввал мен билдим. Кечкурун ойим дадамга айтган гапини эшитиб қолгандим.

– Ҳаким сассиқ шаҳарга бориб қизини топиб келибди. Хотинининг бошига итти кунини солибди. «Ўзинг-ку, шармандалик қилдинг... Майли, сен ўша топганинг билан бўлавер. Менга қизимни бер», – дебди...

Ҳаким сассиқ урушдан келгач, полизда бригадир бўлиб ишларди. Мен уни ёмон кўрардим: бир марта эчким полизига кириб кетганида мени икки тарсаки урган. Ойимнинг гапидан ҳеч нима тушунмаган бўлсан ҳам, Ҳаким сассиқнинг қизини кўргим келди. Эртасига кўрдим ҳам...

\* \* \*

Ўша куни эрталаб момақалдириқ бўлиб, жала қуйгани эсимда бор. Ойим одатдагидай эчкининг елин қопини боғлаб (бўлмаса боласи эмиб қўярди) арконни қўлимга тутқазди:

– Яхшилаб тўйғаз!

«Катта ер»га етиб келгунимча ҳаво чарақлаб очилиб кетди. Эчкининг арқонини ечиб, молларга қўшиб юбордим-да, тол тагида тўдаланиб турган болалар ёнига келдим.

Ўртада урушда ўлган дадасининг каттакон бекасам чопонини кийиб олган Меливой ёнбошлаб ётар, яланг оёқ болалар унинг атрофида ўтириб олиб, нимагадир хоҳолаб кулишарди.

– Ҳаким сассиқнинг қизини кўрдингми, Анвар? – Меливой якин келишим билан дўриллаб сўради. Кейин қўлидаги тол ёғоч билан имо қилиб кўрсатди. – Дадасига ўхшаган дароз экан.

Болалар тагин бараварига кулиб юборищди. Толнинг панасида турган новча қизалоқни энди кўрдим. Унинг катта-катта кўзлари маъюслик билан жавдирав, нима қилишини билмай, калишининг учи билан майсаларни эзгиларди.

Меливойдан ҳаммамиз кўркардик, у ҳеч кимни аямасди. Лекин хозир у қизни масхара қилиши алам қилди менга.

– Дароз бўлса сенга нима? – дедим аламимдан чиийиллаб.

Ҳалима ялт этиб менга қаради-ю, индамади. Меливой бирпас бақрайиб турди-да, таёфининг учи билан сой томонни кўрсатди.

– Бор, буқамни қайтариб кел! Сенинг галинг келди.

У ҳар доим молини бизларга қайтартиравди. Нимагадир бу сафар ўжарлигим тутди. Сой бўйига тушиб кетган қора буқага қараб қўйдим-у:

– Ўзинг қайтар! – дедим.

– Шунаками? – Меливойнинг кўк кўзлари олайиб кетди. Иргиб ўрнидан турди-ю, кўлидаги таёқни баланд кўттарди. Ҳозир елкамга калтак тушишини билиб, кўркувдан кўзларимни юмиб олдим. Аммо калтак тегмади. Бир маҳал кўзимни очиб қарасам, Ҳалима таёқни ингичка тиззасига тираб, синдирияпти.

– Бузуқнинг боласи! – деди Меливой унга қараб.

Ҳалиманинг лаби пирпираб, йиглаб юборай деётганидан бу ёмон гап эканлигини тушундим.

– Ўзинг бузуқнинг боласи! – дедим бақириб. – Кўк кўз! Кўк гарқа!

... Ўша куни Меливойнинг буйруғи билан «катта ер»дан ҳайдалдим. Эчкимни ҳам сойнинг нариги бетида боқадиган бўлдим.

\* \* \*

Болалар орасига қайтгим келарди-ю, «кўк гарқа»дан кўркардим. Фақат бир нарсага хурсанд эдим: Ҳалима ҳам ола сигирини мен билан бирга боқарди. Кейин билсам, у мендан уч ёш катта экан. Кун бўйи иккаламиз чиллак ўйнардик. Ҳалима бу ўйинда ўғил болалардан қолишмасди.

Ёзда тағин бир одат чиқардик. Ҳар куни пешинда сой бўйида олов ёқиб, кўрига иккитадан картошка кўумиб ейдиган бўлдик. Бир гал у, бир гал мен уйдан картошка олиб келардик.

Чўғда қоп-қорайиб пишган картошкани шоша-пиша артиб, оғзимиз куйишига қарамай еб олишдан лаззатлироқ нарса йўқ эди бизга.

Ҳеч эсимдан чиқмайди. Бир куни ўша тотли тушликни еб бўлиб, майсалар устига чалқанча ётиб олдим. Тубсиз осмоннинг бир чеккасида кўпикдай оппок булутлар оҳиста сузиб юрар, баланд-баландларда жаж-

жигина бир тўрғай турган ерида типирчилаб, шодон сайрарди...

Ҳалима ёнимда ўтириб олиб, ўтлардан «ажина ковуш» тўқир, узун-узун бармоқларининг шунчалик чақон ҳаракат қилишига ҳайрон қолардим. Бирпасдан кейин у ингичка, паст товушда ашула айта бошлади.

«Очил-очил оқ тошлар-а...

Мен онамни кўрайин-а...

Дийдорига тўяйин-а...»

Унинг секин хўрсинганини эшитдим. Зум ўтмай яна қайтарди.

«Ойижоним...

кўрайин-а

Дийдорига...»

Кейин бирдан жим бўлиб қолди. Алланимадан қўрқандай, секин бошимни кўтариб қарадим. Ҳалиманинг катта-катта, қоп-қора кўзлари жиққа ёш эди.

Нима қилишимни билмай, довдираф қолдим.

– Йиғлама, – дедим ялиниб. – Йиғламаги-ин...

Ҳалима қўлидаги «ажина ковуш»ни улоқтириб юборди-да, қизил чит қўйлагининг этагини қайриб, кўз ёшини артди.

Арпага ўроқ тушди. Энди бизнинг ҳам ишимиз қўпайиб қолганди, ҳар куни машоққа борардик. Ўша куни пешингача иккаламиз бир тўрвадан машоқ тердик. Ўроқчилар нариги адирга ўтиб кетишган, қизиб ётган ар-пазорларни қуёш ёндирарди.

– Юр, сойдан сув ичиб келамиз, – дедим тўрвачамни орқалаб.

– Полизга бориб қовун емаймизми?

– Даданг бермайди-да, – дедим ишонмай.

– Беради, беради, – Ҳалима қўлимдан ушлади. Чопиб кетдик. Сой бўйидан юриб, полиз ёнига етиб борганимизда тўхтаб қолдим.

– Қўрқма! – Ҳалима судрагудай бўлиб полиз ичига етаклаб кирди. Пушталар устида юмалаб ётган катта-ката қовун-тарвузларни кўриб, кўзим ўйнарди. Лекин, чайла ёнига яқин борганда қўрқа-писа яна тўхтадим. Чайла соясида Ҳаким сассиқ билан табелчи Тўлаш ака чордона куриб ўтирганча, коса қилинган босволдини ейишарди.

– Дада, бизгаям қовун берасизми? – Ҳалима аввал менга, кейин дадасига қараб кўйди.

Ҳаким сассиқ қизариб кетган кўзларини менга қадаган эди, ургани эсимга тушиб кетди. Ўшанда ҳам кўзлари шунақа қип-қизил эди.

Бирдан Тўлаш ака оғзини катта очиб, хохолаб кула бошлади. Яккам-дуккам тишлари орасида яrim чайналган оппок босволди бўллаги кўринди.

– Сассиқ! – деди у оғзини тўлдириб. – Тўйни бошлайверсанг ҳам бўларкан. Мана куёв болаем тайёр. – Кейин яна хохолаб кулди.

Ҳаким сассиқ лабининг бир чеккаси билан илжайиб кўйди. Ҳайрон бўлиб, Ҳалимага қарадим. У ҳам кўзлари жавдираф, атрофга аланглар, ҳов ўшандада – Меливойдан сўкиш эшиятганда қандоқ қилган бўлса, хозир ҳам ўшандай, калишининг уни билан ер чизарди.

Тўсатдан миямга бир нима урилгандаи бўлди. Улар мен билмайдиган, ёмон бир нарса тўғрисида гапиришаётганини тушуниб қолдим. Секин бурилдим-у, йиғлаганча чопиб кетдим. Катта-кичик қовунларни босиб, пушталар устидан сакраб-сакраб борарканман, елкамдан оғир бир нарса босиб тушаётганини анчадан кейин билдим. Бошоқ тўла халтам экан. Уни ҳам улоқтирдим-у, сой бўйига югурдим.

... Ақлимни таниганимдан кейин билсам, мен ширин, беғубор туш кўраётган эканман-у, Тўлаш бир оғиз гапи билан устимдан муздай совуқ сув куйиб, уйғотиб юборган экан. Мен бўлсам мана шу туш узоқ, жуда узоқ

давом этишини хоҳлардим. Ўша-ўша Ҳалимани бошқа кўрмадим, нимагадир кўришни хоҳламадим ҳам. Кейин эшитсан шаҳарга – ойисининг ёнига кетиб қолибди.

\* \* \*

Кеча Панорама кинотеатри ёнида Ҳалимани кўриб қолдим. Агар ўзи чақирмаса, танимасдим. У йўлкадан коляска етаклаб бораради. Қизик, Ҳалима мени қандай таниганига ҳайронман... Арғувон тагидаги скамейкада ўтириб гаплашдик. Ҳалима турмуш қурибди. Эри аспирант, ўзи врач экан.

– Бу – иккинчи ўғлим, – деди у аравачада ухлаб ётган ширингина чақалоқни кўрсатиб. Анчагача жим ўтирганимиздан кейин секин хўрсинди.

– Қандоқ яхши опа-ука эдик-а... Қаранг, ўн олти йил ўтиб кетибди.

Мен уни сизлашни ҳам, сенлашни ҳам билолмай, иккиланиб қолдим.

– Ҳалиям қўрга кўмилган картошкани яхши кўрасизми? – дедим анчадан кейин.

– Ҳалиям ёш боласиз-а, Анвар... – у қулди. Бу ўша – ўзимга таниш опаларча меҳрибон қулги эди.

Юрагимнинг бир бурчидаги согинч туйғуси жўш уриб кетди. Рост-а, қандоқ опа-ука эдик-а!.. Тўлаш ака ўшанда нимагаям шунақа деди-а?

---

---

## БАХТ

Уч соатдан кейин Янги йил киради. Уч соатдан кейин Мунира ўттизга қадам қўяди. Бу сафар ҳам у Янги йилни ёлғиз кутиб оляпти. Унчалик ҳам ёлғиз эмас. Нариги уйда жажжи Нилуфар ухлаб ётибди. Яхшиям баҳтига шу қақажон қизча бор экан. Ўз онасидан Мунирани яхши кўради. Ишдан келиши билан бўйнига осилади.

Бугун Мунира синглиси билан ўтиришмоқчи эди. Бўлмади. Сайёранинг одати шу ўзи. Бир гапни айтишга айтиб қўяди-да, охирида айниб қолади. Боласи беш ёшга чиқибди-ю, ўзи ёш болага ўхшайди. Боя қизчасини боғчадан олиб келди-да, Мунирага топшириб, кўчага югурди. Мунира нима гаплигини суриштирган эди, зинадан қайтиб чиқиб, «айноний ўзимнинг опажонимдан», деб у юзидан, бу юзидан ўпди-да, кетди-қолди.

Муниранинг бир ўзи яна мунғайиб қолаверди.

У секин-секин юриб, ошхонага кирди. Косадаги гуручни шошилмасдан юва бошлади. Гуруч юзига қалқиб чиқкан оппок сувни тўкаркан, негадир онасини эслади.

Мунира етти ёшидами, саккиздами опа-сингил баравар қўййутал бўлишганди. Ўшандада онаси унга гуруч ювилган сувни ичиргани Муниранинг эсида қолган. Гуруч суви аллақандай кўпикли, bemaza edi. Мунира-ку, ўша bemaza сувни уч-тўрт култум ичди-я, Сайёра «лўлилик» қилиб, ҳаммаёқни бузиб юборди. ўшандада ойиси «сенларни одам қилгунча ўзим адo бўламан», деб йифлаганди.

Умуман, ойисининг чехраси негадир ҳамиша маъюс кўринар, айвон бурчагида турадиган оёқ машинада иш тикаётганида ҳам, уй йиғиштираётганида ҳам бошини бир ёнга ташлаганча хаёлга чўмиб юрарди. У иш тикаётганида бир ашулани кўп қайтарарди. Қайта-қайта эшигани учунми, ўша сўзлар Муниранинг хаёлига муҳрланиб қолган:

«Ох, урарман, ох урарман,  
оҳларим тутгай сани,  
Кўз ёшим дарё бўлиб,  
балиқлари ютгай сани»...

Мунира мактабга қатнаб, эсини танигандан кейин, онаси нима учун «ох ургани»ни тушунди. У отасини эс-эс танир, баланд бўйли, мўйловли бу одамга тузук-куруқ меҳр кўйиб улгурган ҳам эмасди. Сайёра туғилганидан кейин кўп ўтмай отаси қаёққадир ғойиб бўлди. Мунира бу «сир-синоат»ни ҳам кейин, эсини танигандан тушунди: отаси уларни ташлаб кетган экан. У бир нарсани – онасига кўмаклашиши зарурлигини жуда эрта тушунди. Олтинчи синфда ўқиётганида оёқ машинада иш тикишни ўрганди. Саккизинчى синфни битирганидан кейин Олой бозори бикинидаги тикувчилик ательесига ишга кирди.

...Қозон қаттиқ-қаттиқ қайнаб, Муниранинг хаёли бўлинди. У гуруч солди-да, ошхона деразасини қия очди. Мусаффо кор ҳавоси ёпирилиб кирди. Дераза ортидаги дараҳтларнинг шохи қордан ишкомдек эгилиб кетган. Бу ҳам камлик қилгандек, оқ укпарлар тўзиб ётган пастак осмондан момик зарралар ёғилаверади, ёғилаверади. Гўё бутун табиат янги туғилган чақалоғу само уни покиза йўргракка ўраётгандек. Рўпарадаги тўрт қаватли уй деразаларида чироқлар машъала бўлиб ётибди. Шодон куй янграйди.

Ҳа, бугун байрам... Мунира сувни тортган гуруч устига товоқ ёпаркан, секин хўрсиниб кўйди. Бугун байрам, Янги йил киряпти. У оҳиста юриб, ётоққа кирди. Нилуфар соchlари тўзиганча ухлаб ётар, пешанаси терлаб кетганди. Мунира қизчанинг пешанасини кафти билан оҳиста артаркан, жилмайиб кўйди. «Шайтон-ей! Ҳали қўшни болалар билан роса чана учди. Совуқ элитган». Шу ондаёқ у арча чироқларини ёқиши кераклигини эслади-ю, илдам ўрнидан турди.

Қайси куни арчани безатишаётганида Нилуфар ҳадеб чирогини ёқиб беринг, деб харҳаша қилган, ўшандা Мунира Янги йил кечаси арчанинг чирогини Корбобо ёқиб беради, деб ишонтирган эди.

У тез-тез юриб меҳмонхонага кирди-да, чироқ маржони уланган симни илгакка тиқди. Шу ондаёқ қизил, яшил, сарик, яна кўпдан-кўп анвойи рангдаги жажжи чироқлар ёнди-ю, хона бирданига алланечук сукутбахш, муnis бўлиб қолди. Мунира сехрланиб қолгандек арча рўпарасида бир зум қотиб турди. Кейин диванга бориб ўтирди. Анча ўтирди. Ташқарида ҳамон куй садолари янграп, дераза ортидан ўтаётган одамлар шодон шовқин солишар, қаҳ-қаҳ уриб кулишар, буларнинг ҳаммаси ичкаридаги, мана шу хонадаги сукунатни, танҳоликни яна-ям чукурлаштираётганга ўхшарди. Қизик, бунақа кунда, байрам кунида ёлғиз қолсанг, ғалати бўларкан. Гўё бутун дунё бир тараф-у, ёлғиз ўзинг бир тараф.

Мунира олти йилдан буён Янги йилни бир ўзи кутади. Ҳар гал худди шунақа аҳволга тушади. Тўғри, у ҳам шу пайтда эри билан, бола-чақалари билан гавжум уйда ўтириши мумкин эди. Бўлмади... Ҳаёт шунақа экан. Инсон ҳамма орзусига бир йўла етавермас экан...

Зокиржон яхши йигит эди. Қадди-комати келишган, оғир-вазмин... Улар Зокиржоннинг «маршрутка»сида танишган эдилар. Мунира ҳар куни маршрут таксида

уйига қайтар эди. Зокиржон шу машинани ҳайдарди. Бир-бирларига юлдузлари түгри келиб қолдими, ё Муниранинг ўзи кўхликмиди, хуллас, «шофёр йигит» унга тинчлик бермади. Уйидан чикса, кўча бошида кутади. Ишдан қайтаётганда ателье рўпарасидаги бекатда машинаси билан пойлайди. Муниранинг ғаши келгандек бўлади-ю, аммо «шофёр йигит» йўлини пойлаб туришини жуда-жуда хоҳлайди... Мунира энди билса, ўша кунлар ҳаётининг энг ширин дамлари экан. Бирор интиқлик билан сенга талпиниб турганини хис этишдан каттароқ баҳт йўқ экан. Ҳа, Мунира баҳтиёр эди. Аммо баҳт билан баҳтсизлик доим етаклашиб юради. Тўсатдан онаси ўлиб қолди. Юрак дарди тутди-ю, «Тез ёрдам» машинаси етиб келгунча тамом бўлди. Фақат бир оғиз сўз айтди: «Синглингни хўрлама, болам. Отаси йўқ эди. Энди мен ҳам йўқман, сенга топширдим...»

Мунира онасининг руҳи олдида Сайёрани етим қилиб қўймасликка қасам ичди. Битта ирмоқ тўхтаб қолгани билан дарё суви қуримайди. Ҳаёт ўз йўлидан кетаверди. Ой ўтди, йил ўтди, бир куни Зокиржон дардини айтди.

– Тўйни тезлаштирасак бўлмайди. Уйдагилар қўймаяпти.

Мунира икки йўл орасида қолди. Сайёрани ташлаб қаёққа боради? Ўн олти яшар қизалоқнинг тақдири нима бўлади?

Мунира ростини айтди.

– Синглим ҳали ўзини эплай олмайди. Мен ойимларга ваъда берганман.

Орадан яна ой ўтди, яна йил ўтди. Улар ҳамон бир-бирларига талпинишар, аммо энди Муниранинг кўнглида қандайдир мавхум хавотир бор эди. Зокиржон билан кўришганида негадир кўнгли бир нимани сезаётгандек зирқиллаб турарди.

Бу орада Сайёра мактабни битирди. Зокиржон ўша таклифини яна қайтарди. Мунира яна ростини айтди.

– Синглим институтга имтиҳон топширмоқчи, кириб олсин-чи...

– Кейин-чи? – деди Зокиржон қандайдир бегона шиддат билан. – Кейин нима бўлади?

– Кейин... – Мунира тутилиб қолди. Кейин нима бўлишини ўзи ҳам билмасди. Бари бир, Сайёранинг қисмати бир ёқлик бўлмагунча тинчий олмаслигига ақли етиб турарди. – Ахир, сизниги синглимни эргаштириб боролмайман-ку, – деди Зокиржонга термилиб.

У Зокиржоннинг жаҳли чиққанини ҳеч кўрмаган эди. Шу куни кўрди.

– Нима, сиз мен билан яшайсизми, синглингиз биланми? Синглингиз сиз учун яшамаса керак, ахир?

– Нима қилай? – Мунира ерга қаради. – Бошқа иложим йўқ.

– Менинг ҳам бошқа иложим йўқ. Мен сизга ичкуёв бўлолмайман. Ёшим ўттиздан ошди. Шунча йил уйланмай юриб, маломатга қолганим ҳам етади.

Мунира ярқ этиб қаради-да, Зокиржоннинг кўзларида, ўзи учун қадрдон бўлиб қолган, кечалари тушига кириб чиқадиган оқил кўзларида ғазаб оловини кўрди. Кўрди-ю, кўнгли бўм-бўш бўлиб қолди.

– Мен сизнинг қўлингиздан тутиб қолаётганим йўқ. Йўлингиз очик.

Тамом. У кечалари синглисига билдирамай, кўрпага бурканиб йиғласа ҳам, Зокиржонни олисдан кўрганида юраги кўксидан отилиб кеттудек бўлса ҳам, тутқич бермади унга. Кеч кузда унинг тўйи бўлганини эшитди. Мунира эсдан оғиб қолсан керак, деб ўйлаган эди. Йўқ, одам чидар экан. Мунира чидади. У Зокиржонни айблай олмасди.

Сайёра ўқишига кирди. Ажаб, Зокиржон рост айтган экан. Синглиси Мунира учун яшамаслигини «исбот қилди». Эрта баҳорда Мунирани қучоқлаб йиғлади:

– Тўй қилмасак бўлмайди. Тушуняпсизми, опажон, бўлмайди.

Мунира тушунди. Тўй қилмаса бўлмаслигини, Сайёрганинг ўзи учун ҳам, пахта теримида ҳашарга бориши ганида уни яхши кўриб қолган учинчи курс талабаси учун ҳам ёмон бўлишини тушунди. Ўзи не умидлар билан йиғиб қўйган сепларининг ҳаммасини синглисига берди. Атайлаб Зокиржон билан бориб олишган узугини ҳам, таътил пулига олган гиламини ҳам, касса ўйнаб йикқан пулига харид қилган чинни сервизлари ни ҳам – ҳаммасини... Онасининг рухи шод бўлишини, синглиси баҳтини топганини ўйлаб қувонди. Елиб-югуриб хизмат қилди. Фақат куёвжўралар қарсбадабанг қийқириқ билан эшикдан кириб келишганида, «Тўйлар муборак»ни айтишганида нуқул хаёлига Зокиржон келаверди. Чидаб туролмади: кўзларидан тирқираб ёш чикиб кетди.

Синглисими узатганидан кейин у қандайдир ўйчан, одамови бўлиб қолди. Ўтиришларга борса, дугоналари зимдан бир-бирига имлаётгандек бўлади. Унга ширин муомала қилишса, кўнгли яримлиги учун етим боладек юпатишаётганга ўхшайди. У ишдан юпанч топди. Бутун меҳрини ишига берди. Файрати, ҳалол меҳнати билан обрў топди. Фақат кўнглининг бир чеккаси бўм-бўш. Гўё Зокиржон Муниранинг кўнглига номини ўйиб ёзгану ўзи гойиб бўлган. Ўзи бўлмаса ҳам, номи ўша ўйилган жой ҳар куни, ҳеч курса бир марта санчиб қўяди.

... Буёқда синглиси тагин бир «ишикал орттириди»: шошқалоқ бодомга ўхшаб «эрта гуллаб қўйиб, совуқ уриб кетган» кизларнинг қисмати шунаقا бўлади ўзи. Учинчи босқичда ўқиётганида (қизалоғи бир ярим ёшда эди) Сайёра йиглаб келди. Эри ўқишни битирибди. Қишлоғига олиб кетмоқчи эмиш. «Обкетса, жуда яхши, – деди Мунира. – Эр қаерда бўлса, хотин шу ерда бўлади-да!» «Эрим ўлсин, – деди синглиси бобиллаб, – ўёқдаям хотини бор экан! Менга билдирамаган экан, ўқищдан ҳайдалиб кет-

маслик учун менга уйланган экан, хоҳласанг, шу – иккинчи хотин бўлиб тураверасан, хоҳламасанг – катта кўча, деяпти!»

Ўша куни Мунира синглисини биринчи марта тарса-килаб юборди. Ўзи уриб, ўзи йиглади... Шу кеча онаси тушига кирибди. Ойиси негадир нуқул унинг бошини си-лар эмиш. Кўллари юмшоқ, иссиқ эмиш...

... Шундок бўлди. Сайёра «икки латта, бир сочиfini» кўтариб қайтиб келди. Қизиқ, турмуши бузилганига чандон қуюнмади ҳам. Ўқиши битириб, ишга кириб кетди. Мунира мана шу қизалоққа – Нилуфарга боғланиб қолди. Қақажон ҳам ўзининг онаси қолиб, Мунирага ёпишади. Аяжон дейди, эшиқдан кира солиб, бўйнига осилади. Шунақа пайтларда Мунира ўзининг ҳам баҳти очилиши, гўдак исидан маст бўлишини тасаввур қилиб, энтикиб кетади. Қизиқ, ҳар гал Янги йил кираётганда шуни ўйлади...

Ким билсин, балки ўша баҳт энди кириб келар. Ана, соат занги ўн марта вазмин жаранглади. Демак, икки соат қопти.

Нилуфар уйғонди шекилли, каравотчасининг ғичир-лагани эштилди. Зум ўтмай, эшик унсиз очилди-да, сочлари тўзғиб кетган қизалоқ кўзини ишқалаб чиқди. Бурчакка, арча томонга қаради-ю, бирдан қичқириб юборди:

– Вой, Қорбобо келдими, ая?

Мунира кулиб юборди.

– Келди.

– Арчанинг чирогини ёқдими?

– Кўряпсан-ку, Қорбобо келиб, арчанинг чирогини ёқиб кетди. Нилу уйғониб суюнсин, деди. – Мунира қизалоқнинг қўлидан тутди. – Юр энди, ювинамиз, ош сузамиз.

Нилуфар уч-тўрт қадам юрди-да, тўхтаб қолди.

– Сизга-чи, – деди тўсатдан. – Сизга нима обкелди Қорбобо?

– Менгами... – Мунира ўйланиб қолди. – Менга... Бахт олиб келди.

Нилуфарнинг лаби чўччайди.

– Нега мени уйғотмадингиз?

Мунира қизалоқнинг астойдил хафа бўлганини кўриб, кучоқлади.

– Нимайди?

– Қорбободан менам баҳт сўрардим.

Мунира кулиб юборди.

– Вой, пучуғ-эй, сен нима қиласан баҳтни?

– Сизга бераман! – Қизалоқ кўзларини катта-катта очиб, таъкидлади. – Кейин-чи, сизда-чи, кў-ў-ўп баҳт бўлади!

Муниранинг юраги қалқиб кетди. Қизчани бағрига бо-сиб, у юзидан-бу юзидан ўпаркан, кўзларидан тирқирағ ёш чиқиб кетди. Шу алпозда узоқ ўтириди. Унсиз йиглади. Бу – кувонч ёшларимиди, ўқинчми ўзи билмасди...

Остонада эса Янги йил эшик қоқиб турар, яхши ниятли кишиларга баҳт улашадиган, норасида гўдакларнинг орзусини мустажоб қиласидиган Янги йил кириб келмоқда эди... Умр эса ўтмоқда...

---

## ХАЁЛЛАРГА БЎЛАМАН ТУТҚУН

«Кўрмай десам, кўзим кўр эмас.  
Юрмай десам, оёғим бутун.  
Аммо қалблар ортиқ жсўр эмас,  
Хаёлларга бўламан тутқун».

МИРТЕМИР.

У кетди... Япроқлари оқшом шабадасида оҳиста сил-киниб турган бир туп ўрик тагидан бурилиб ўтди-ю, му-юлишда кўздан ғойиб бўлди. Қарғашойи кўйлагининг этагини, ўнг билагига илиб олган қизил сумкачасинигина кўриб қолдим.

У кетди... Кулокларим остида анхорнинг қиқир-қиқир кулгиси-ю, хўрсинишга тўлган қиз йифиси қолди.

... Кўзларимда ёш қалқидими?! Йўқ-йўқ, ахир, нега энди?

У кетди. У кетди-ю, хаёлимда ҳам ширин, ҳам аччиқ, ҳам қувноқ, ҳам аламли узуқ-юлуқ хотиралар қолди...

... Ўшанда мен биринчи босқичда ўқирдим. Биринчи имтиҳонни топширган эдим. Қизиқ, ёшлиқ экан-да! Биринчи босқич талабаларининг ҳаммасида бўладиган одат менда ҳам бор эди. Ўзимни жуда билимдон, гоҳо домла-лардан ҳам кўпроқ нарсани биладиган киши ҳисоблардим. Ҳа, мен мағрур эдим. Бунинг устига биринчи имтиҳондан аъло баҳо олдим. Мен шод эдим, аллақаёқларга учгим, баланд-баланд парвоз этгим келарди. Гавжум йўлкаларда борарканман, ҳеч кимни кўрмас, ҳеч нимани сезмас эдим.

Троллейбусга чиқдим. Бўш ўриндиққа ўтириб, китоб варақлай бошладим. Китоб ўқирдим-у, сатрлар мазмунни ўзим ҳам тушунмасдим. Хаёлларим олисларга етак-лаб кетарди мени. Ўзимга келиб, ўтирган қизга парво қилмабман. Бир вақт у пик этиб кулиб юборди.

– Одамга қарагингиз ҳам келмайдими, Эркин ака?  
Чўчиб ўгирилдим.

– Ие, Холида... – хижолатдан қип-қизариб кетган бўлсам керак, Холида яшнаб-яшнаб кулиб юборди.

Нокулай ахволда илжайиб, унга разм солдим. Ҳеч ўзгармабди. Доим ниманидир кутгандай болаларча жавдираф турувчи чарос кўзлари ҳам, чехрасига аллақандай соддаликками, бўшангликками ўхшаш ифода берувчи қалинроқ лаблари ҳам ўзгармабди. Бу ўша Холида эди. Бундан ярим йилча аввал ўзим билан бир партада – мактаб партасида ўтирган Холида эди. Ҳеч ўзгармабди... факат мени «ака» деб атаганига ҳайрон бўлдим. Мактабда бўлса ҳар доим «ҳе, бола» деб чақиради, шайтон қиз!

Хаёлимни йигиштириб олмасимдан Холида яна хужумга ўтди:

– Жа, талаба бўлиб... а? Ўқишилар яхши кетяптими?

– Ҳм! – дедим сўзимнинг ярмисини ютиб. Мен уни «сиз»лашимни ҳам, «сен»лашимни ҳам, билолмай, бир зум истиҳола қилиб турдим-да, факат, гапириш учунгина сўрадим: – Сиз қаерда ўқияпсиз, Холида?

Билмадим, Холида саволимни эшитмадими ёки эътибор бермадими, юзини четга буриб, у ёк-бу ёққа аланглай бошлади. Олдинроқда турган аёлни чақириб, жой берди. Мен ҳам туриб кетдим. Икковимиз ёнма-ён туриб, анчагача жим кетдик. Кейин Холида яна аввалгидай жилмайиб сўради:

– Шундай қилиб, журналист бўлар экансиз-да... Кўрсам майлими? – Холида кўлимдаги китобни олди. – Луи Арагон! Яхши ёзувчи бўлса керак-а?

Мен индамай бош силкиб кўйдим. Холида китобни варакларкан, ичидан зачёт дафтарим чиқиб қолди. У менга ёвқараш қилди. Куюқ қошлари бир тўлғаниб кўйди.

– Рухсатсиз кўрсам хафа бўлмайсизми?

Мен, аввалига, майли, дедим-у, кейин бирдан унинг қўлларига ёпишдим. Сурат! Ахир, дафтар ичидан ўзининг сурати бор-ку! Кўрса нима хаёлга боради? Битирувчилар кечаси синфдошларимиз билан сурат алмашгандик, Холиданинг суратини ўшандан бери ёнимда олиб юрардим. Нимага шундай қилаётганимни ўзим ҳам билмасдим. Фақат... фақат Холиданинг менга бошқачароқ қараб юришини болалар шама қилишарди ўшанда. Менда ҳам шу қизга нисбатан меҳрли, аллақандай ҳис ўйғонганди.

Лекин нима учундир шу топда унга суратини кўрсатгим келмади.

– Холида, кечирасиз, мумкин эмас, – дедим сунъий илжайиб. Дафтаримни чўнтагимга солиб қўйдим.

– Кечирасиз... Сизнинг ички ишларингизга аралаша олмайман. – Холида ҳазиллашяптими, чиндан гапиряптими билолмадим. Орага тушган совуқ вазиятни йўқотиш учун тайинлироқ сўз қидирар, аммо тилим калимага келмасди. Троллейбус Хадрага яқинлашаркан, «Ватан» кинотеатрининг катта-катта афишалари лип этиб қўриниб ўтди.

– Яхши кино кетяпти... Тушамизми?

Мен бу гапни ҳам орадаги нокулай вазиятни бузиш учун айтдим. Дабдурустдан кинога таклиф қилишим Холидани ўйлантириб қўйди. Унинг йўқ дейишини кутиб туардим. Аммо, йўқ демади. Елкасини учириб қўйди.

– Билмасам.

– Бўпти, юринг! – дедим қувониб...

Кинодан чиқиб, зиналар ёнидаги пастак арча тагида бир оз туриб қолдик.

– Эркин ака, биласизми... – Холиданинг ёноқлари қип-қизариб кетди. Бир ўрим сочининг учини тутамлаб туриб, тутилиб-тутилиб гапирди, – биласизми... Мен... сизга халақит бермайманми?

Шу топда у қўзимга жуда содда, шу билан бирга аллақандай сирли кўриниб кетди. Бу савол олдида ўзим ҳам эсанкираб қолдим.

– Йўғ-е, нимага энди?..

– Бўлмаса... келар ҳафтанинг шу куни, шу соатда, шу ерга келсам йўқ демайсизми?..

Холида баттар қизариб кетди. Қуюқ қайрилма киприклиари юзига тўкилди.

– Холида, келасизми, ростдан келасизми? – дедим севиниб.

– Мен кетдим! Хайр!

Холида ердан кўз узмай кескин бурилди-да, келиб тўхтаган троллейбусга қараб югорди. Сариқ жемперига қуйиб қўйгандек ярашиб турган бир ўрим йўғон қўнгир сочининг силкиниб бораётганини кўриб турдим. У троллейбус зинасига оёқ қўяркан, менга ўгирилиб қаради. Назаримда, мулойим, жуда мулойим жилмайиб қўйгандек бўлди. Шундагина, мен уни кузатиб қўйишим кераклигини тушундим. Ахир, биз у билан ёнма-ён маҳаллада турамиз-ку! Аммо, мен кечиккан эдим. Троллейбус бир силкиниб юриб кетди. Турган жойимда серрайиб қолдим. Ҳозир бўлиб ўтган гап-сўзлар қулоқларим остида дилрабо куй садоларидек жаранглар, шу куй мени бир умр сархуш қилиб қўяётгандай бўларди.

Келаси учрашувгача шу куй оғушида яшадим.

Чоршанба куни Холидани худди ўша ерда, кинотеатр зиналари ёнидаги пастақ, хонаки арча тагида кутиб олдим. Холида бу сафар ўзига сал оро берган, бошини яқинда ювган бўлса керак, узун соchlарининг нами ҳали куrimаган эди.

– Бугун кинога тушмай қўя қоламиз, хўп? – Холида қошини чимириб, чиройли жилмайиб қўйди.

– Ихтиёргиз...

Ҳали оқшом қўниб улгурмаган катта кўчадан Ўрдага – боф томонга юриб кетдик.

– Уйдагилар яхши ўтиришибдими, Холида? – дедим унинг қадамига қараб оҳиста борарканман.

– Раҳмат... – Холида анчагача жим қолди... Кўприқдан ўтиб, дараҳтзор орасига кирдик. Оқшом энг аввал шу ерга қўнади. Дараҳтларнинг текис шовиллаши безовта тўлқинлар овозига қўшилиб, беозор, оромбахш сукунатни чуқурлаштираётгандек бўларди...

– Ўтирамизми? – сув лабида турган пастак скамейкага имо қилдим.

Ўтиридик. Туб-тубидан қайнаб чиқаётган сувга тикилганча қолдик. Анчагача икковимиздан ҳам садо чиқмади.

– Эркин ака, сиз мени одобсиз қиз деб ўйлаяпсизми? – Холида жавдираган кўзларини кўзимга қадади. Ҳайрон бўлдим.

– Нега энди?

Холида анчагача индамади.

– Рост-да... ўзимдан-ўзим сизга... – Холида бошини янайм қўйироқ эгди. Қийналиб-қийналиб гапирди. – Лекин, нима килай?

Бутун вужудимни ҳали ҳеч сезилмаган, ҳали ҳеч синаб кўрилмаган аллақандай ёқимли титроқ қоплади. Ҳали ишқ нималигини билмаган юракда жуда нозик, шамчироқдек бир ўт – севгига чанқоқ ўт йилтиллаб тураркан. Мухаббат шабадаси бир марта, фақат бир марта сийпалаб ўтса, бу учқун ловиллаб кетаркан.

– Холида, нега ундей дейсиз? Ахир, мен сизни... сизни... Хаёлимни ёлғиз сиз олиб қўйдингиз-ку, ахир! Менга насиб бўладими, йўқми, деб хавотирланиб ўзим ҳам то-полмай юрган азиз бир нарсани тақдим қиласиз-у...

Мен яна анча-мунча гапларни айтгим, юрагимдаги ҳисларимнинг ҳаммасини тўкиб солгим келарди-ю, аммо шу ҳислар олдида ўзим ожиз эдим...

– Ростми? Шу гапларингиз ростми? – Холида қайрилма киприкларини кўтариб, кўзларимга тикилди. Энтикиб кетдим.

– Наҳотки, менга ишонмасангиз?

– Холида секин бош силкиди.

– Ишонаман... Лекин... Келинг, энди бир-биримиздан сир яширмайлик. Хўп?

– Сиздан нимани ҳам яширай?

– Ёлғонми? – Холида айёрлик билан қошини учириб қўйди, – ҳув, анунда, зачёт дафтaringизни нега тортиб олдингиз?

– Унда... унда сизнинг суратингиз бор эди.

– Ростми? – Холида яна ўша болаларча соддалик билан кўзларини жавдиратди...

Шу куни иккаламиз уйгача пиёда қайтдик.

Мен Холида билан хайрлашган дақиқадан бошлаб юрагимда сўнмас бир ўт алангалана бошлади. Бу ўт ҳеч тўхтамас, висол дамлари яқинлашган сайин кучаяр, фақат ўзини кўрсам сал босиларди-ю, хайрлашишимиз билан яна ловилларди.

Бу ўт икки йилгacha, йўқ, ундан кейин ҳам, шу кунгacha ҳам пасаймади. Лекин, гоҳо тақдир сенинг измингга эмас, сен тақдирнинг измига бўйсунишга мажбур бўлиб қоларкансан...

... Иккинчи босқичнинг охирги имтиҳонини топширган куним Самарқандга, вилоят газетасига амалиётга кетиш олдидан Холидани учрашувга таклиф қилгандим. Аммо у келмади. Ҳар гал беш дақиқа куттириб қўйса, аламимни папиросдан олардим. Бу сафар папирос ҳам дош беролмади. Худди ўша пастак скамейка ёнида бир соат турдим. Юрагимни чулғаган шубҳалар чигаллашиб кетди-ю, шаҳар кўчаларида анчагача айланиб юрдим. Ўша таниш хиёбонлар, ўша сокин анҳор, жуфт-жуфт бўлиб сайр килиб юрган ўша севишганлар бир дардимни ўн қиласарди.

Хаёлимда икки савол, икки муаммо ҳукмрон эди: Холиданинг олдига борайми, йўқми? Эҳтимол, унга бир нима бўлгандир? Йўғ-е, ахир, куни кеча ўзим кўрдим-ку! Агар у шунчаки ноз қилаётган бўлса-чи?

... Йўқ... Барибир мухаббат устунлик қилди. Холидарнинг кўчасига қандай қилиб бориб қолганимни ўзим ҳам билмайман. Уларнинг уйи тор кўчанинг ичидаги эди, аммо неchanчи эшик эканини билмасдим. Ҳар сафар уни кузатиб қўйганимизда кўча бошида хайрлашардик. Холиданинг ўзи ҳам уяларди, шекилли, кўча ичига киришимни хоҳламасди.

Бир лаҳза иккиланиб турдим-у, кўча ичига кирдим. Лекин йигирма қадамча юрар-юрмас тўхтаб қолдим. Иккала тавақаси ланг очиб қўйилган эшиқдан бир қўлида белкурак, бир қўлида каттакон пакир кўтариб Холиданинг акаси чиқиб келди. Мен унинг отини ҳам билмасдим. У биздан уч йил аввал мактабни битирган, ҳозир аллақандай идорада ишлайдиганини эшитгандим. У менга қайрилиб қарамай, пакирга симёоч тагига уйиб қўйилган кўмирни сола бошлади.

Яқинроқ келиб, салом бердим. У белкуракни ташламай, энгашиб турган кўйи елкаси оша менга қаради. Қаради-ю, кескин қаддини ростлади. Жингалак сочи тер аралаш пешонасига ёпишиб қолган, кўмир тегиб қорайиб кетган майкаси ҳам хўл бўлганди. Билмадим, саломимни эшитмадими, алик олмади. Яхшилаб таниб олмоқчи бўлгандай менга узок тикилиб қолди. Кейин пешона терини шахт билан сидириб ташлади-да, кўзимга тикилиб туриб сўради:

– Хўш, хизмат!

Эсанкираб қолдим. Ноқулай ахволга тушиб, нима дейишимни билмай тўғрисини айтиб қўя қолдим:

– Холидахон бормилар?

– Акаси керак эмасми, акаси! – унинг ранги ўчиб, белкурак ушлаган қўли асабий қалтирай бошлади. Мени еб

юбормоқчи бўлгандай, тишларини гижирлатиб таъкидлади:

– Қадамингни билиб бола! Кизларга осилгандан кўра бурнингни эпласанг-чи! Кимсан ўзинг! Дадангга ўхшаган сартарош бўласан-да!.. Эсинг борида туёғингни шиқиллатиб қол, жўна!

Кўз ўнгим қоронғилашиб, бутун вужудим ловиллаб ёна бошлади. Қулоқларим шанғиллаб кетди. Инсон учун бундан ортиқ ҳақорат, бундан ҳам уятли нарса борми? Ҳаёлимда энг муқаддас деб юрган уй шуми ҳали? Юрагимнинг энг чукур жойларида иззатини ардоқлаб юрган кишиларим шу бўлдими?

Мен энди бу кўчага ҳеч қачон қадам босмайман, ҳеч қачон!.. Яхши кўриш-ялиниш, ёлвориш деган гап эмас. Мен Холиданинг олдида гуноҳкор эмасман. ялинмайман ҳам...

Эртасига эрталаб Самарқандга жўнаб кетдим. Кетдим, аммо хаёлим шу ерда – Холида билан қолди. Ўзимча бу бемаънгарчилик учун Холиданинг мендан кечирим сўрашини кутардим. Ростдан ҳам бир ҳафтанинг ичида Холидадан кетма-кет иккита хат олдим. Иккала хатнинг ҳам мазмуни бир хил эди: «Мен сиз билан учрашишим кепрак. Тезроқ келиб кетмасангиз бўлмайди», дебди. Қаёққа бораман? Яна ўша уйгами?! Кимнинг олдига бораман? Мени шунчалик ҳақорат қилган одамнинг олдигами? Нимага бораман? Ялиниш-ёлвориш учунми?

... Холидага хат ёзиш учун уч марта қўлимга қофоз-қалам олдим-у, аммо ёзолмадим. Ҳар сафар қалам ушласам, кўз олдимда унинг акаси жонланар, назаримда, менга нафрат билан тикилиб турар, аямай ҳақорат қиларди.

Қайтиб борганимдан кейин Холида буларнинг ҳаммаси учун мендан узр сўрайди, деб юргандим. Йўқ, бутун хаёлим пучга чиқди. Амалиёт тамом бўлай деб қолганда, собиқ мактабдош дўстим Жавдоддан хат келди. Хат жуда қисқа эди:

«Холидадан умидингни уз! Эрга текканига ўн беш кун бўлди. Акасининг ўртогига тегибди...»

Хатни бурда-бурда қилиб улоқтиридим. Бевафо! Ярамас! Сотқин!

Йўқ, менинг нафратлашга, лаънатлашга ҳам ҳолим қолмаганди.

Барибир, энди ишлай олмаслигимни тушундим. Лашлушкинни йиғишириб, уйга қайтдим.

Автобусдан тушишим билан атайлаб Холидаларнинг кўчасига бурилдим. Негадир, уни шу ерда, шу кўчада учратишими га ишонардим. Ҳа, янглишмабман. Мен уни кўрдим. Фақат узоқдан, орқасидан кўрдим. У кўча эшик олдида тўхтаган яп-янги «Волга» машинасининг ёнида хаёл сургандек қимирламай туарди.

Бирордан чўчиган одамдек тўхтаб қолдим. Ичкаридан оқ кўйлак устидан қора бўйинбоғ таққан новча йигит чиқди. Билагидан ушлаб, Холидани машинага ўтқазди. Кейин ўзи рулга ўтириди-да, ҳайдаб кетди.

Чамадон бандини жон-жаҳдим билан қисганимдан бармоқларим қирсиллаб, кўлим титрай бошлади. Молпараст!

Яна қанча турганимни билмайман. Қуёш тиккага келиб, аёвсиз қизитарди. Асфальтдан кўтарилиган чучмал ховур кўнглимни беҳуд қила бошлади.

– Майли, – дедим ўзимни юпатиб. – Холида куюнишга, ўртанишга ҳам арзимайди! Менинг унга олиб берадиган машинам йўқ-ку, ахир?

Бу сўзлар билан юпана олмаслигимни билсан ҳам ўзимни овутишга тиришар, аммо Холидани унутишга қанча уринсам, унинг хотираси қалбимга шунча маҳкамроқ ўрнашиб борарди. Мен учун фақат бир нарса аён эди: Холида – бевафо!

... Шу кунгача мана шу фикр билан яшадим. Аммо, бугунги воқеалар бутун фикримни остин-устун қилиб юборди. Кўзим мошдек очилди.

... Бугун ҳам Холидани худди ўша биринчи сафардаги каби троллейбусда учратдим. Эшиқдан киришим билан орқа дераза ёнида турган Холидага кўзим тушди-ю, юрагим жис этиб кетди. Индамай кондукторнинг ёнига ўтиб олдим. Энди пул узатаётган эдим, орқадан Холиданинг товуши эштилди:

– Иккита билет беринг...

Титраётган қўлларимни яшириш учун шимимнинг чўнтағига суқдим. Йўқ, юрагимни рашк эмас, газаб ҳам эмас, аламли изтироб чулғаб олганди. Ўгирилиб қарамасликка ҳаракат қилиб, индамай туравердим. Аммо, Холиданинг ўзи қарашга мажбур қилди мени.

– Эркин ака, сизга ҳам билет олдим.

Елкам оша назар ташладим. У ҳалиям ўзгармабди. Фақат кўзлари, болаларча жавдираб тикилуви кўзлари энди эҳтиёт билан боқарди кишига. Рангим ўчиб кетганини ўзим ҳам сезиб турардим.

– Раҳмат! Ҳисобни тўғрилаб кўймоқчи бўлибсиз-да...

Холиданинг ҳам ранги учди, бурни қисилиб, лаблари пирпириб учди. Икки томчи ёш кўзларидан дув этиб юмалаб тушди-ю, кейин елкалари силкиниб-силкиниб, унсиз ийғлай бошалди.

Довдираб қолдим. Одамларнинг бизга ҳайрон бўлиб тикилаётганини кўриб, троллейбус тўхташи билан Холидани судраб тушиб кетдим.

– Ўзингизни босинг! – дедим қуруққина қилиб. У ёқ-бу ёққа аланглаб, тушган жойимизни танидим. Ўрда экан. Холидани қўйиб юбормай, сув бўйига олиб тушдим. Сарғиш қумни ялаб оқаётган сув қирғоғига этиб келганимиздан кейин кўлини кўйиб юбордим. – Ювениб олинг...

Холида ҳўл қумда чуқур-чуқур из қолдириб қирғоққа чўнқайди. Ювениб бўлгунича скамейкада ўтирдим. Деярли ҳеч нарса ўзгармаган. Оқшом сукунатини чуқурлаштириб шовиллаётган дараҳтзор ҳам, муюлиш-

даги бир туп ўрик ҳам – ҳаммаси ўша-ўша. Пастак скамейка ҳам ўз ўрнида турибди.

Факат, бир нарса етишмайди. Қани ўша, ширин ҳисларга етаклаган сухбатлар? Қани ўша мухаббат чўғини аллангалатган эҳтиросли сўзлар, қани? Қани ўша, болаларча маъсумлик билан жавдираган кўзлар, қани? Наҳот ҳаммаси ёшликнинг сирли сўқмоқларида тўзонли из қолдириб, ўтмишга сингиб кетган бўлса?

Холида ҳамон чўнқайиб ўтирганича ювинар, елкасидан ошиб тушган сочининг учи тўлқинлар юзидан ўйнаб, хўл бўлиб кетганди. Мен бўлсан унинг кўз ёшлари сувга кўшилиб оқиб кетаётганини ҳис қилиб турар, ўзим ҳам юрагимни ўртаб юбораётган ҳисларимни базўр босиб ўтирадим.

Нихоят, Холида қизил сумкачасидан рўмолча олиб, юзларини арта-арта ёнимга келиб ўтирди.

– Гапиринг, Эркин ака! – деди у қизариб кетган кўзларини менга тикиб.

– Нимани?

– Бир йигитга кўнгил қўйиб, бошқасига тегиб кетган қиз қандай таънага лойик бўлса, шуларни гапираверинг...

– Сизга айтадиган гапим битта – бахтли бўлинг.

– Ким?

– Сиз... Турмуш ўртоғингиз...

– Яна қанақа тилакларингиз бор?

Холиданинг гапи таъна бўлиб эшитилди. Юрагимда-ги изтироб ўрнини ғазаб эгаллади.

– Бўлгани шу!

Холида анчагача жавоб бермади. Хиёбон тепасида чироқлар лип-лип этиб, бирин-кетин ёнди.

Кутилмаганда Холида ҳорғин кулиб қўйди.

– Қайси куни туш кўрибман: иккаламиз шу ерда... йўқ, бу ерда эмас, бошқа жойда – каттакон дарё бўйида турганмишмиз. Ювинаман деб эгилсам, бошимдаги

рўмолим сирғалиб тушиб, сувга оқиб кетибди. Ҳув бирда менга кўк шойи рўмол совға қилгандингиз-ку, ана ўша рўмолмиш... Кўлимни чўзсан, хеч етмасмиш...

«Эркин ака, қаранг-қаранг, рўмолим оқиб кетяпти», десам индамай туравердингиз. «Жон Эркин ака, тутиб беринг рўмолимни! Уни ўзингиз олиб бергансиз-ку... Қаранг, энди уни бошқа одам тутиб олади», десам, индамай бурилиб кетибсиз. Бирпасда сизни ҳам, рўмолимни ҳам йўқотиб кўйибман. Уйгонсан, ёстигим хўл бўлиб кетибди... – Холида лабларини қимтиб бошини қуий солди. Шамол турди. Япроқларнинг ердаги сояси титрай бошлади. Холида илкис бошини кўтариб, кўзларимга маъюс табассум билан тикилди.

– Эсингиздами, Эркин ака, биринчи марта шу ерда ўтириб гаплашган эдик. Қизиқ, бирон марта бирбиrimизнинг қўлимизни ҳам ушламаганмиз...

У бирдан қўлимдан ушлаб олди. Қўлларининг енгил титраётганини сезиб турардим. Вужудимни тентакларча бир эҳтирос қоплаб олди. Бирпасда маст одамдек кўз ўнгим қоронғилашди.

Қизиқ, нима демоқчи у? Ахир, бу... бу... Борди-ю, пайти келиб менинг хотиним ҳам бировга шундай гапларни айтса... Холиданинг қўлини шахт билан силтаб ташладим. У шунчалар маъюс, аламли ўқинч билан тикилдики, кўзимни қаерга яширишни билмай қолдим. Мен ундан нима бўлса ҳам бир гап кутардим, аммо у ҳамон ҳайкалдек қотиб ўтирас эди. Анчадан кейин у хаво етишмагандек энтикиб-энтикиб гапира бошлади:

– Сиз мени... ўшанақа... ёмон аёл деб ўйлаяпсизми?

Холида бу сўзларни шивирлаб айтди. Аммо, шу тўртбеш оғиз сўз қулоқларимни батанг келтириб, чиппа битириб, кўйгандек бўлди.

– Рост... – Холиданинг кўзларида ёш йилтиллади. – Рост. Мажбуран қурилган турмуш хиёнат қилишга олиб

келса, эҳтимол. Лекин, мен ўз номусимни ҳеч нимага, сизнинг муҳаббатингизга ҳам алишмайман...

Мен нимадир демоқчи бўлдим. Аммо сўз тополмадим. Холида ҳам менга навбат бериб ўтирамди.

– Сиз мени... мени хиёнатчи, бевафо деб ўйлайсизми? Ўзингиз-чи?.. Ўзингиз нега менга шунақа бепарво қараб келдингиз?

Энди у йиғламасди. Мен бўлсам бир нима дейишга ожиз эдим.

– Ўша... ҳаммаси учун битта мен айборманми? Йўқ, муҳаббатимизнинг уволини иккаламиз баравар бўлишиб оламиз! – Холиданинг кўзлари ўт бўлиб чакнаб кетди. Аммо, бир лаҳзадаёқ яна ўшандай маъюс бўлиб қолди.

– Агар мени чиндан... ростдан ҳам яхши кўрганингизда атайлаб факультетингизга бориб, адрес топиб, Самарқандга ёзган хатларимга жавоб бермас-мидингиз? Менинг нима учун ўқишига киролмаганимни, уйдагилар бунга йўл кўйишмаганини билдингизми? Охири марта учрашувга боролмай қолган куним уйга совчилар келганини билдингизми? Ўшанда ёрдам бердингизми менга? Йўқ... – Холида ўқсиб-ўқсиб йиғлаб юборди. – Ўша куниёқ синглимдан уйингизга хат бериб юборгандим. Акам эшик олдида кўриб қолиб, хатни тортиб олибди... Ҳаммасини эшитдим... Ўша куни сиз уйга келган экансиз. Акам сизни хафа қилиби. Сиз бир гап билан аразлаб кетдингиз. Мен сизга ишонардим... Ўзимга ишонгандек ишонардим. Сиз бўлсангиз... Мен бир йўла ҳаммасидан айрилдим... Агар чиндан яхши кўрсангиз шунақа қиласмидингиз?.. Кейин... кейин мен ҳеч кимга ишонмай қўйдим. Энди менга барибир эди.

Холида чукур изтироб билан йиғлар, унинг ҳар бир сўзи юрагимни тилимлар, ҳар томчи ёши қалбим ярасига томар эди.

– Илтимос, йиғламанг! – дедим титраб-қақшаб. – Холида, йиғламанг! Йиғламанг!

Холида чукур уф тортди.

– Майли, ҳаммаси ширин тушдек ўтди-кетди. Энди қайтиб келмайди. Фақат, сиздан бир илтимос... Энди-ги мухаббатингизни – бошқаларга насиб бўладиган мухаббатингизни эҳтиёт қилинг...

Холида секин ўрнидан турди. Қизил сумкачасини билагига илди-ю, менга узоқ тикилиб қолди.

– Эркин ака, эсингизда бўлсин. Мен, барибир, сизни яхши кўраман. Умримнинг охиригача яхши кўраман. Эшитяпсизми, охиригача... – У яна йиғлаб юборди. Ке-йин аста бурилди-ю, мадори қуриган одамдай гандира-клаб юриб кетди.

Қаёққа? Нимага? Наҳотки, мен ёшлигимнинг умримнинг олтин дақиқалари билан абадий видолашсам! Ўрнимдан сакраб туриб кетдим.

– Холида!

Мен бутун хиёбонни янгратиб ҳайқириб юбордим, деб ўйлагандим. Йўқ! Бу сўз юрагимнинг туб-тубидан бўғиқ, аламли бир нидо бўлиб чиқди. Муюлишдаги ўрик ёнида унга етиб, билакларидан маҳкам ушлаб олдим. У ҳам, мен ҳам терак баргидек қалтирадик...

– Холида! Жоним. Қоракўзим. Сиз... Сиз...

Мен нима қилаётганимни ўзим ҳам билмас, нимадир дегим, алланималар деб ҳайқиргим келарди. Холида кўзларимга хотиржам тикилиб туриб, паст, аммо қатъий оҳангда гапирди:

– Қўлингизни тортинг. Мен бировнинг хотиниман!

– Холида, ахир тушунсангиз-чи! Мен...

Холида қўлимдан беҳол силтаниб чиқди-ю, япроқла-ри оқшом шабадасида оҳиста силкиниб турган ўрик тагидан бурилиб, муюлишда кўздан ғойиб бўлди. Қарғашойи

кўйлагининг этагини, ўнг билагига илиб олган қизил сумкачасини кўриб қолдим.

У кетди... У кетди-ю, ҳам ширин, ҳам аччик, ҳам кувноқ, ҳам аламли узук-юлуқ хотиралар қолди менда.

Шу хотиралардан бошқа нимам ҳам бор менинг? Ахир, мен муҳаббатимни эҳтиёт қилолмаган, асрай олмаган, ёлғиз яхши кўриш билан кифояланиб юрган одамман-ку!  
Шу баҳтимни аввалроқ асрасам бўлмасмиди!

... Кўзларимда ёш қалқидими? Йўқ-йўқ. Нега? Энди-ми?

---

---

## УЗУН КЕЧАЛАР

Ёш ёзувчи Марат Азизов нашриёт директоридан ранжиди. Шу йил унинг янги китоби чиқиши керак эди. Ди-ректор нашриёт режасидан чиқариб ташлабди. «Қофоз етишмаяпти», деди у ночор қиёфада.

Марат аввалги китоблари тез тарқаб кетганини билар эди. Ётиғи билан тушунтиришга харакат қилди. Барibir натижа чиқмади. «Вазирга учрашинг, – деди директор. – Буни мен хал қилолмайман».

«Одамлар ўқимай, йиллаб дўконда чанг босиб ётадиган китобларни чиқаришади, – деб ўйлади Марат иккинчи қаватга, вазирликка чиқиб бораркан. – Тағин қофоз етишмайди дейишади».

У вазирни танимас, аммо ёш ижодкорларни яхши кўришини кўп эшилган эди. «Хотиржам гапиришим керак», деб ўйлади у залворли эшикнинг қуббадор тутқицидан ушлаб тортар экан.

Қабулхона эшигидан юқоригача гулдор пойандоз тўшалган эди. Хонанинг икки четида қатор-қатор стуллар. Дераза тагидаги стол ёнида котиба ўтиради. У тирсакларини машинка қопқоғига тираганча аллақандай китоб ўқир, зангори дарпарда тутилган деразадан тушаётган қуёш нурида қизғишиңдий рўмоли, қисқа енгли атлас кўйлаги ловиллаб ёнарди.

– Мумкинми? – деди Марат ҳамон эшик тутқичини кўйиб юбормай.

Қиз китобдан бош қўтарди-да, негадир жилмайди.  
Унинг чехраси тиниқ, жилмайганида кўзларида алланечук жозибали бир ўт порлаб кетар эди.

– Келинг, – деди у секин.

«Чиройли қиз экан, – деб ўйлади Марат гулдор пойандоздан авайлаб юриб бораркан. – Нимагадир қабулхонада доим чиройли қизлар ишлайди». Шу пайт у қизнинг кўлидаги китобни таниб қолди. Зангори муқовасидан таниди. Бу ўзининг китобчаси, университетни битираётган йили чиққан қиссаси эди. Илгарилари у бирорнинг кўлида китобини кўриб қолса ҳаяжондан юраги гурсиллаб кетарди. Йўқ, кейин-кейин кўнишиб қолди. Ҳозир ҳам китобга қарамасликка ҳаракат қилиб, ёнбошдаги эшикка имо қилди.

– Домла бормилар?

– Қобил Қодирович шу ердалар, – қиз яна жилмайди. – Аммо бугун қабул йўқ. Чоршанба куни келасиз. Мен рўйхатга ёзиб кўяман. – У китобчани стол чеккасига кўйди-да, қалам-коғоз олди.

– Фамилиянгиз?

– Азизов.

– Исмингиз?

– Марат.

Қиз ёзишдан тўхтаб, ярқ этиб бир унга, бир китобчага қараб кўйди.

– Қаерда ишлайсиз?

Марат қизнинг шубҳаланаётганини кўриб, жилмайди.

Қиз қошини чимириб, совуқкина сўради.

– Касбингиз борми?

– Бор, – деди Марат. Кейин ийманиб айтди. – Ёзувчи...

Ёш ёзувчи.

Қиз қаламини стол устига қарс ташлади.

– Ҳазилни ёмон кўраман!

– Мен ҳам... – Марат шартта бурилди-да, пойандоз бўйлаб шахдам-шахдам юриб кетди. Хона ўртасига ет-

ганида эшик очилиб, қизғиш сочли сепкилдор қиз бош сукди.

– Ҳилола... – У Маратни кўрди-ю, қизариб кетди. Салом бериб йўл бўшатди.

«Оти Ҳилола экан-да», деб ўйлади Марат. Аммо котиба томонга бурилиб қарамади. Эшикни оҳиста ёпиб, чиқиб кетди.

– Ким у, Замир? – деди Ҳилола ҳозиргина ёпилган эшикка имо қилиб. – Танийсанми?

– Вуй, танимадингми? – Замира хона ўртасида туриб қолган, сепкилдор юзи ҳамон ловиллаб ёнар эди. – Марат Азизов шу-да! Курсимизда учрашув бўлганида кўрганман.

– Мен бўлсам... – Ҳилола хижолатдан қизариб, китобчани қўлига олди. – Ҳазиллашяпти деб ўйлабман.

– Уришдингми?

– Қаёқдан билай? – деди Ҳилола бўшашиб. – Мен Марат Азизов катта киши бўлса керак, деб юрадим.

– Вой, ҳали уйланмаган-ку. – Замира билағонлик қилиб, унинг қўлидаги китобни кўрсатди. – Шу китобда ўзини ёзган-да! У доим ўзининг бошидан ўтганларни ёзади. – Замира бир нафас хаёл суриб турди-да, сўради. – Кимда иши бор экан?

Ҳилола унинг кўзидағи айёр табассумни кўриб, атайлаб бепарво гапирди:

– Қобил Қодировичнинг олдига кирмоқчи экан.

Замира секин уф тортди:

– Мен вазир бўлсам, унинг илтимосига дарров хўп дердим... Чиройли-а?

Ҳилола ўзининг қизара бошлаганини пайқаб, дераза томонга қараб олди.

– Бор, хонангга чик!

Замира қарсак чалиб қулиб юборди.

– Эҳтиёт бўл, Марат Азизовнинг мухлислари кўп.

Ҳилола унга қайрилиб қарамас, аммо шу топда қилаётган тегажаклиги ёқар эди. У китобчани шошилинч вараклар, бир нарсани ўйларди: «Ўзининг бошидан ўтганларни ёзар экан-да». Ҳилола Маратнинг бошқа хикояларини ҳам ўқиган, ҳар гал янги қўшиқ эшитгандай роҳат қилиб, ҳаяжонланиб ўқиган эди.

«Нега чоршанбада келасиз дедим, – деб ўйлади у дераза ортида охиста силкиниб турган сарғиш чинор япроқларидан кўз узмай. – Душанбада ҳам қабул бор эди-ку».

\* \* \*

Чоршанба деган кун Ҳилоланинг хаёлида ҳеч қачон шунчалик кўп чарх урмаган эди. У тонг отиши-ю, кеч қиришини ҳеч қачон шунчалик орзиқиб кутмаганди. Ора-чора Замира кириб қолар, худди Ҳилоланинг кўнглидагини билиб тургандай Марат Азизовдан гап очар, ҳар сафар: «Эҳтиёт бўл, ёзувчининг муҳлиси кўп бўлади», деб қўяр эди.

Ҳилола парво қилмади. У ёзувчилар гўзалликни яхши кўради, деб кўп эшитган. «Шундок экан, бўпти-да, Ҳилола чиройли қиз».

Ўша куни у ўзига оро берди. Сочини чиройли қилиб турмаклади. Янги кофта кийди.

Марат кириб келганида у деразадан сершовкин кўчани томоша қилиб турар эди. Аммо эшикни очган киши худди шу – Марат эканлигини ички бир туйфу билан сездию бурилиб қаради. Юраги типирчилаб уриб кетганини, юзлари ловиллаб ёнаётганини пайқаб, беихтиёр жилмайди.

– Мумкинми? – Марат худди ўша кундагидек оқ кўйлак, қора шим кийиб олган, эшик тутқичидан ушлаб туарди.

– Келинг, – Ҳилола овози титраб, салом берди.

Марат бўш стулларга қараб сўради.

- Менинг навбатим келдими?
- Қобил Қодирович чет элга кетдилар, – деди Ҳилола хотиржам гапиришга уриниб. – Ўн беш кунлардан кейин келадилар.
- Майли, ўн беш кундан кейин келаман.
- У энди бурилиб кетаётган эди, Ҳилоланинг кўнглида аллақандай савол борлигини билиб тўхтади.
- Бир нима сўрамоқчимисиз? – деди қизнинг кўзларига тикилиб. Шу ондаёқ хаёлига яна ўша фикр келди. «Чиройли қиз. Ким билсин, ақли қанақайкин. Кўпинча қизлар ўзининг гўзаллигини пайқаса, ақлини ишлатмай қўядику...»
- Ҳилола қизариб-бўзариб, тортмадан китобчани олди.
- Шу сизнинг китобингизми?
- Марат индамай бош силкиди.
- Қанақа қилиб ёзасиз?
- Марат бегараз кулди.
- Стол ёнига ўтириб ёзаверади-да. – Шундай деди-ю, қизнинг ўзи билан гаплашгиси келиб турганини сезиб, юраги илиқ ҳаяжондан типирчилаб кетди. Ўша – биринчи марта кўрганидан буён бу қизни кўп ўйлаганини, аммо негадир унудишига ҳаракат қилганини эслаб, жилмайди. – Бу ҳам бир касб-да, Ҳилола.
- Бари бир тушунолмайман.
- Яхши, – деди Марат унинг кўришгиси келиб турганини сезиб. – Хоҳласангиз бугуноқ тушунтиришга ҳаракат қиласман. Кечкурун соат олтида Анҳор кўприги олдida кўришамиз.
- У қизнинг розилигини сўраб ҳам ўтиrmади. Бориши аниқлигини билиб, кескин бурилди-да, чиқиб кетди.

\* \* \*

Улар анҳор ёқалаб боришар эди. Сув жимгина окар, қоп-қора тўлқинлар устида қирғоқдаги чироқлар шодаси-

нинг акси силкиниб турарди. Қаердадир трамвайларнинг хорғин ноласи эштилади. Куз ҳавосида кеч очилган гулларнинг ўткир, нозик иси кезади.

– «Сўнган юлдуз шуъласи»да ўзингизни ёзганмисиз?

Марат таққа тўхтади-да, Ҳилоланинг кўзларига тикилди. Неон лампалар нури остида қизнинг чехраси бир оз рангсиз, аммо жозибали кўринар эди.

– Ким айтди сизга?

– Ўзим... – Ҳилола ёлғон гапирганидан уялиб, юзини ўғирди-да, секин-секин юриб кетди. – Мен ҳамма ёзувчилар ўзининг бошидан ўтганини ёзади, деб ўйлайман.

– Йўқ! – Марат кескин бош чайқади. – Унақа бўлса кундалик ёзиб қўя қолган маъқул эмасми?

Ҳилола тушунмади.

– Ҳаммасини ичингиздан тўқиб чиқарасизми? Бўлмаса ёзганларингиз ёлғон экан-да.

Марат анчагача индамай борди-да, сўради:

– Ўша китобдаги гапларга ишондингизми, ахир?

Ҳилола ювош бош силкиди.

– Мен Ферузани худди ўзимга ўхшатдим.

– Демак, ёлғон эмас экан-да.

Ҳилола бари бир тушунмади.

– Сиз ёзувчиларга маза! – деди ўйланиб. – Илҳом келганда китоб ёзасизлар. Ҳамма сизларни мақтайди...

– Илҳомнинг ўзи нима? – деди Марат унинг гапини бўлиб.

Ҳилола соддалик билан елкасини учирив қўйди.

– Билмасам... «Илҳом париси», «илҳом гулшани» яна алланималар дейишади-ку. – У ўгирилиб қараб, яна елкасини учирди. Шу топда шунчалик содда, шунчалик яхши кўриниб кетдики, Марат унинг билакларидан маҳкам ушлаганча қах-қах уриб, кулиб юборди. Жимжит боғ устида Маратнинг кулгиси жаранглаб, акс садо берди.

Қайсидир чинор шохида мудроққа кетган қушлар «гув» этиб, қоронги осмонга кўтарилди.

– Ҳаммаси мавҳум гап! – деди Марат қулгидан нафаси қайтиб. – Илҳом ҳаммада ҳам бўлади. Илҳом – тез, осон, маза қилиб ишлаш дегани. – Кейин у бирдан жиддийлашди-да, секин қўшиб қўйди. – Гоҳо ойлаб-йиллаб қийналиб, битиролмай юрган ишингизни бир кунда бажариб қўясиз. Шунақа ишлайсизки, ўзингиз ҳам роҳат қиласиз...

Қизғиш чироқ ёниб турган симёғоч тагидаги ҳарракка ўтиришди.

Ҳилола унга зимдан қараб қўйди. Марат оёқлари ни чалиштириб, тиззасига кафтини қўйганча, индамай ўтирар, сувга тикилиб ниманидир ўйлар эди. Ҳилола энди бояги гаплардан зерика бошлади. У Маратдан бошқачароқ, ўзи ҳам маъносини тушуниб етмаган сирлироқ гап кутар эди.

– Шу ерни жуда яхши кўраман, – деди Марат ўйчан овозда. – Нимагадир тинч, ёлғиз ҳис қилгим келади ўзимни. Шаҳарнинг шовқинидан безиб кетади одам.

– Дам олиш куни бизлар пахтага чиқамиз, – деди Ҳилола ишхонадаги янгиликни эслаб.

– Ҳа, куз келди, – деди Марат. – Пушкин айтган маъюс ва ўйчан фасл.

Ҳилола кечадан бери ўйлаб юрган саволини эслади.

– Ҳамма ёзувчилар аввал шеър ёзиб, кейин ҳикояга ўтади, дейишади. Сиз ҳам шеър ёзганмисиз?

– Ёзганман. Ҳалиям ёзаман. ўзим учун.

Ҳилола тушунмади.

– Нега «ўзингиз учун?»

Марат кулди.

– Чунки эълон қилишга ярамайди.

– Унда нега ёзасиз?

– Айтяпман-ку, шунчаки, кўнглимда борини қофозга тушириш учун.

Ҳилола унинг «ўзи учун» ёзган шеърини эшигиси келди.

– Шунақалардан биронтасини ўкиб бера оласизми?  
Мен учун!

Марат бир зум ўйга толди.

– Бўпти, – деди ниҳоят. – Фақат қулмайсиз. Куз ҳакида шунақа машқим бор эди... – Анча муддат ўйга толиб ўтириди-да, қандайдир паст, шикаста овозда ўқий бошлади.

Самода турналар шодаси  
Гоҳида ох чекиб ўтарлар.  
Самода булуутлар подаси  
Гоҳида ёш тўкиб ўтарлар.  
Билмадим, бу ненинг талқини,  
Боғларда эрта куз салқини...

Арғамчи учмоқда мезонлар,  
Дараҳтлар тўкмишлар охорин.  
Ингранар касалманд хазонлар,  
Ёд этиб ўткинчи баҳорин.  
Билмадим, бу ненинг талқини,  
Боғларда эрта куз салқини...

Тунларим уйқусиз ва серғаш,  
Ҳадикли тушларни кўрарман.  
Ҳар сахар турарман ва яккаш  
Ўзимдан оҳиста сўрарман:  
«Билмадим, бу ненинг талқини,  
Боғларда эрта куз салқини...»

Марат кўзларини сувга тиккан кўйи ўқиётган сатрларда аллақандай маъюс оҳанг, кузнинг мунгли манзараси кўриниб турар, Ҳилола хазон шитирлаган боғлар орасида юриб бораётгандек эди.

Марат жимиб қолди.

– Давоми-чи? – сўради Хилола.

– Давоми йўқ! – Марат қандайдир синик оҳангда кулди. – Айтдим-ку, шоир эмасман, деб. Сўнг негадир бошқа мавзуга ўтди. – Кеча университетда бирга ўқиган ўртогимдан хат олдим. Қишлоқда ўқитувчилик қиласди. Мактаб болаларини далага ҳайдаб ишлатадиган колхоз раисини район газетасида танқид қилган экан, ишдан ҳайдалибди. – Марат чукур хўрсинди. – Албатта, айб факат раисда эмас...

Хилола унинг эзилиб гапираётганини кўриб, ачинди.

– Дунёда ёмонлар кўп-да... Кўйинг, ўйламанг...

Марат тагин синик жилмайди.

– Ёмон одам... Сиз ҳали ёзувчиларга мазза, китобини ёзиб юраверади, дедингиз. Факат ўзининг дардини ёзган одам ёзувчи эмас. Аввало, бошқаларнинг дардини ўйлади. Ҳатто, сиз айтаётган ёмонларни ҳам тушунишга ҳаракат қиласди. Ахир туғилганида ҳамма ҳам пок бўлади-ку! Қаламкаш душманидан ҳам дўст ахтаришга уринади.

Хилола яна зерика бошлади.

– Кетайлик-а, – деди Марат унинг истагини пайқаб.

Кўприкдан ўтиб кетишаётганида Марат панжарага суюниб, тўхтаб қолди.

– Ана сиз! – деди болаларча хушчақчақ оҳангда. Хилола муздай темир панжарага кафтини босганча, ҳайрон бўлиб сувга қаради.

– Ана, ана, сузуб юрибсиз, – деди Марат сув юзида қалқиб турган ингичка ойни кўрсатиб. – ўша сизсиз-да!

Хилола, юрагида илиқ туйғулар уйғониб, Маратга меҳр билан қараб қолди. Энди у боягидек ўйчан, вазмин эмас, гўдакдек содда бўлиб қолган эди.

– Кино ёқдими? – деди Ҳилола елкаси оша бурилиб қараб.

У нафис пуштиранг жемпер кийиб олган, сочини ба-ланд қилиб турмаклаган эди.

Марат йўлкада сочилиб ётган хазонларни шитирлатиб босиб бораркан, орқага қараб қўйди. Санъат саройининг яхлит ойналаридан нур ёғилиб турарди.

– Йўқ, – деди у ўйчан овозда. Кейин яна хазонларни шитирлатиб босиб борди-да, ўша хаёлчан алпозда давом этди. – Бир аёлнинг эридан ажралишини оқлаш учун бутун қишлоқ аҳлини қоп-қорага чиқариш шартмикин?

Ҳилола кулди:

– Агар ўша қишлоқда аёлни тушунадиган одам бўлмаса-чи?

– Наҳотки? – Марат худди касбдошлари билан баҳслашаётгандек қизишиб кетди. – Наҳотки, бутун бошли қишлоқ қоп-қора бўлса? Наҳот, ўша хотиннинг ўз иззат-нафсини ҳимоя қилишга уринаётганини тушунадиган биронта одам топилмаса?

Ҳилола бир нафас жим борди-да, ҳозиргина экранда кўрган воқеалардан яна ҳаяжонланиб кетди.

– Сизнинг «Бир лаҳзалик қувонч» ҳикоянгизда ҳам шунга ўхшаш воқеа тасвиirlанган эди. Лекин, сиз унда хотинни эмас, эрни ҳимоя қилгансиз. – У жилмайиб Маратга қараб қўйди. – Ўша ҳикоянгиз менга ёқмаган.

Марат тўхтаб қолди. Ҳилола ҳам уч-тўрт қадам юриб борди-да, пастак арғувон соясида тўхтади. Марат унинг чехрасини аниқ кўрмаса ҳам, жилмаяётганини билиб турарди.

У бундан уч йил илгари журналда чиқсан ҳикоясини эслади. Институтни битирган ўқитувчи қиз курсдошига турмушга чиқади-ю, дала ҳаётининг романтикасига бе-

рилиб, эрининг қишлоғига жўнаб кетади. Аммо, қишлоқ ҳаётига кўниколмай, эридан ҳам, севгисидан ҳам воз ке-чиб, шаҳарга қайтиб келади. Ўша пайтларда танқидчилар хикоянинг ҳаётий асар эканини айтиб, мақташган эди.

– Нимаси ёқмади? – деди Марат имкон борича совуқкон гапиришга уриниб. Кейин секин Ҳилолани қўлтиқлаб олди. У бу қиздан ўзи излаб юрган фазилатни топганига қувонар, Ҳилола ўзининг ижодига қизиқа бошлаганидан шод эди.

– Айтдим-ку, – деди Ҳилола ҳамон жилмайиб. – Сиз эрни ҳимоя қилиб, хотинни қоралагансиз. Эр хотинни ўз ҳукмига бўйсундиришга нима ҳаққи бор? Қишлоқ эрининг ватани бўлса, шаҳар хотиннинг ватани эмасми?

Марат бошини куйи солганча бораркан, чуқур хаёлга толди. У хикояда эрни ҳам, хотинни ҳам ҳимоя қилмаган, факат шиорларда ёзиладиган гаплар пуч эканини, ҳаёт бўёқлари кўп эканини ёзган эди.

– Ёзувчи холис бўлиши керак, Ҳилола, – деди у хўрсиниб. – Мен ҳеч қачон бировни қоралаб, бировни оқламайман. Турмушда фақат оқ, фақат қора бўёқ бўлади деган гап ёлғон.

– Билмадим, – Ҳилола билагини унинг кафтидан бўшатди. – Ҳар ҳолда сиз йигит томонини олгансиз.

Катта-катта ойналаридан нур сочилиб турган трамвай бекатга келиб тўхтади.

– Хайр, – деди Ҳилола Маратнинг қўлини қисиб.

«Ким билсин, – деб ўйлади Марат ёйларидан чир-силлатиб чўғ сачратиб кетаётган трамвай кетидан қараб қоларкан. – Балки, чиндан ҳам тарафгарчилик қилгандирман. Балки, ноҳақдирман».

Унинг кўнглини доим тарк этмайдиган бир ғашлик, ўз ёзганларидан қониқмаслик туйғуси яна кемира бошлади.

Улар аргамчи учишарди. Қайиқча борган сайин баландроқ кўтарилиб тушар, Ҳилола кўркув ичидаги аргамчининг ён тарафидаги йўғон симларни маҳкам ушлаб олган, юраги гупиллаб уради. Ҳар сафар қайиқча тепага кўтарилаётганида Маратнинг қорача чехрасини, шабададан пешонасига ёйилиб тушган соchlарини, хаяжонданми, кувончданми, кисилиб кетган кўзларини кўрар эди. Аргамчи пастлаётганида эса, қўйлагининг этаклари шамолда кўтарилиб кетмаслиги учун энгашиб олишга ҳаракат қиласди.

– Бўлди! – деди у кулги аралаш қийқириб. – Бўлди, Марат ака.

Марат аргамчини янайм қаттиқроқ силкита бошлади, Ҳилоланинг боши айланиб кетди. Пастда навбат кутаётган бир тўда одамлар ҳам, аргамчи юкорилаганида аниқ кўринаётган дарахтларнинг учи, олисда, куёш ботиб кетган уфқда ёниб турган шафақ ҳам хира бир туманлик ичидаги айланада бошлади. Унинг кўз ўнгидаги фақат Маратнинг чехраси қолди.

– Бўлди... – деди у ялиниб. Кейин бир қўлини қўйиб юборди-да, беихтиёр Маратнинг елкасидан ушлаб олди. Маратнинг терлаган соchlари пешонасига текканини сизиб, хаяжон билан оҳиста шивирлади.

– Тўхтатинг...

Шу пайт Маратнинг лаблари унинг қулоғи остида сенкин пичирлади:

– Кўп соғинадиган бўлиб қолдим, Ҳилола.

Ҳилола унга қарамасликка ҳаракат қилиб, яна ялинди.

– Тушайлик...

Аргамчи секинлай бошлади. Ҳилола Маратнинг ўзига ҳамон тикилиб турганини билар, аммо йиқилиб кетишдан кўркиб, қўлини унинг елкасидан тортиб ололмасди.

Марат бу қизни чиндан ҳам кўп соғинадиган бўлиб қолган эди. Ҳилола унинг қалбидаги совуқ бир бўшлиқни тўлдира бошлаган, у кўпдан буён битмай келаётган ярасига энди малҳам топгандай эди...

Ҳилола пастга тушганидан кейин бир лаҳза оёқлари титраб туриб қолди.

– Ернинг қадри ўтди-а, – деди Марат қулиб. – Доим уни тепкилаб юрамиз-у, бир қадам узилсак, соғиниб қоламиз. Ҳар гал самолётга чиқишим билан шуни ўйлайман. – У бир нафас ўйланиб турди-да, сўради. – Қаёқка борамиз?

Ҳилола елкаларини учириб кўйди.

– Анхорни яхши кўрасиз-ку. – У Маратнинг гапини эслатиб, тегажаклик қилди. – Тинч, ёлғиз ҳис қилгингиз келади ўзингизни...

Уларнинг ҳарраки банд эди: бир жувон коляскадаги болакайни тебратиб ўтиради. Излай-излай бир оёғи шундоқ сувга ботиб турган ҳаррак топиши. Ўтиришлари билан Марат яна сувга тикилиб қолди.

Бир оздан кейин уларнинг ёнидан йўғон сочини битта қилиб ўрган қиз баланд пошналарини тақиллатиб ўтиб кетди. Нарирокқа бориб тўхтади-да, улар томонга қараб кўйди.

Марат қизнинг ҳаракатларини қузата бошлади. «Кутган одами келмабди», деб ўйлади у. Қиз уч-тўрт қадам у ёқ-бу ёққа бориб келди-да, туфлисининг ингичка учи билан йўлкада ётган тошни тепди. Тош чиллп этиб сувга тушди. Анхордаги чироқлар маржони чил-чил бўлиб кетди, нурли тасмадай силкина-силкина яна жойига келди. «Ҳикояга яхши деталь» деб ўйлади Марат.

– Яхши қиз эканми?

Марат бурилиб қаради-ю, Ҳилоланинг ўзидан кўз узмай ўтирганини кўрди. Аммо нимани сўраётганини дафъатан тушунмади. Кейин бирдан тушунди-да, бошини сарак-сарак қилди.

– Йўғ-е... Мен бутунлай бошқа нарсани ўйлаётгандим.

– Марат ака, – деди Ҳилола шубҳали оҳангда. – Институтни битиргунча ҳам ҳеч ким билан юрмаганмисиз?

Марат унинг кўзларида қатъий бир ифода кўрди-ю, қалбининг энг чуқур жойидаги ҳам аламли, ҳам соғинч туйгу яна түғён урди. Ҳа, у яхши кўрган эди. «Сўнган юлдуз шуъласи»да ўзининг ҳам натижасиз муҳаббати тасвир этилганди. Ҳозир ўша сўнган юлдузниң ёниқ шуъласи яна ярқ этиб кетди.

– Яъни, бирорни яхши кўрганмисиз, демоқчисиз-да, – деди у иложи борича хотиржам гапиришга уриниб. – Ҳа, яхши кўрганман!

– Кейин-чи?

Марат Ҳилоланинг овозида совуқ қатъият борлигини сезиб, янайм хотиржамроқ гапирди.

– Кейин узоқлашиб кетганмиз.

– Ундан кейин-чи?

– Ундан кейин яна иккита қизни учратдим. – Марат кулди. – Улар мендек довдирни ёқтиришмади.

Ҳилола бошини кўйи солганча ўтирас, изтироб чекаётгани билиниб туради.

Марат унинг қўлларини маҳкам ушлади-да, кафтини қаттиқ қисганча ҳаяжондан овози титраб, илтижо қилди.

– Ҳилола, қўйинг... Нима кераги бор шу гапларнинг! – У кафти билан қизнинг иягидан кўтариб, ўзига қаратди. – Ҳилола...

Ҳилола кўзларини чирт юмиб олди. Унинг қалби титраб, ҳозир Марат ўзини ўпишини билар эди. Энди унинг кархисида ёзувчи Марат Азизов эмас, оддий йигит Марат, мана шу «ғалати бола» қолган эди.

Мактабни битириш кечасида Бахтиёр деган бола Ҳилолани биринчи марта ўпган, тирноғининг учидан пешонасигача ўпид чиққан, сен бўлмасанг ўзимни

ўлдираман, деб йиғлаган эди. Ҳозир у Маратнинг ҳам ёлвoriшини, йиғлагудек ёлвoriшини кутарди.

Аммо Марат ўпмади ҳам, ёлвormади ҳам.

Ҳилола секин кўзларини очди-ю, Маратнинг бутунлай бошқа томонга қараб ўтирганини кўриб, хайрон қолди. Ўн қадамча нарида, коронги бурчакда елкалари туртиб чиққан бир чол ҳассасининг учи билан ариқчага тўлиб қолган хазонларни титкилаб турарди. Марат ҳамон Ҳилоланинг иягидан тутиб турар, аммо чолдан кўз узмас эди. У Ҳилоланинг ўзига қараётганини сезди шекилли, сўради:

– Биласизми, шу чол нимани ўйлаяпти?

Ҳилола ижирганиб, бош чайқади.

– Йўқ! Сиз ёзувчисиз. Сиз билинг!

Марат кулди.

– Мен ҳам билолмай қийналяпман-да! Балки, хазон бўлган умрини ўйлаётгандир. Балки, шу ерда биринчи бор севгилиси билан учрашгандир. Одам умри поёнига етиб қолганини пайқай бошласа, қилган хатоларини кўп эслайди-ку...

Ҳилола нохушлик билан юзини ўғирди.

Марат унинг кўнгли чўйканини сезди. Ҳилоланинг кафтини олиб, юзига босди.

– Ҳилола, менга ҳамроҳ керак, кўмакчи керак, – деди ҳаяжон билан. – Баъзан ўзимга ўзим шунчалик хунук, ожиз кўриниб кетаманки!..

Ҳилола унинг юзлари ловиллаб турганини сезди, кафтини тортиб олмади.

\* \* \*

Гоҳо, сутдек ойдин кечалари ҳовли ўртасидаги супадами, чорпоядами ётганингизда бирдан уйғониб кетасиз. Оппок нури билан сукунат селини ёғдираётган тўлин ойга тикилсангиз, тўсатдан юрагингиз кўксингизга

сигмай типирлаб кетганини ҳис қиласиз. Қандайдир сехрли, нотаниш оламга кириб қолгандек бўласиз.

Марат кўпдан буён ана ўша олам тасаввури билан яшар эди. Шу кеча уйғониб кетди-ю, бирдан ўзи кўпдан буён аниқ тасаввур қилолмай юрган оламни кўзгудек равшан кўрди.

Каравотдан сакраб турди-да, қўшни хонага, куз ҳавосида муздай бўлиб қолган, пастак шифтига қоғоз қоқилган хонага ўтди. Титроқ кўллари билан чирокни ёқди-ю, устига газета тўшалган жажжи стол қаршисига ўтирди. Бир ярим йилдирки, мана шу стол ёнига келишга юраги бетламай юрар эди. Бир ярим йилдирки, ўша сирли олам хаёлида тунлари уйқусиз кезиб чикар, аммо унга киролмай азоб чекар эди. Бу – ижод олами эди!

У бу оламга кириш учун Римнинг tengдоши бўлган Афросиёбни қаричма-қарич кезиб чиқди. Ўрта Осиёда яқингача аниқ фанлар йўқ эди, деган бемаъни даъвони рад этиш дардида бир ярим йил ёнди. Тарихнинг чанг босган сўқмоқларини киприклари билан авайлаб тозала-гудек бўлди.

Бир ярим йилдирки, бўлажак китобининг қаҳрамонлари унинг атрофида айланиб юрарди-ю, аммо тутқич бермасди. Мана, бугун улар бирданига ўз оёғи билан Маратнинг қалбига кириб келди. Марат уларнинг чехрасидаги ҳар бир тукигача, кўнглидаги ҳар бир ниятигача аниқ кўра бошлади. Мавхум бир оламда қочиб юрган қаҳрамонлар энди уни ўз ортидан эргаштириб кетди.

Марат шаршарадек оқиб келаётган фикр-туйғуларини тўкиб сола бошлади. Кўллари титраб эгри-бугри ҳарфлар билан ёза кетди.

Энди уни ҳеч ким, ҳеч нима бу азиз оламдан суғуриб ололмайди.

Эшик гийқиллаб очилганидан кейингина Марат тонг ёришиб қолганини билди. У ҳамон қоғоздан бош

кўтармай, кўз қири билан қараб қўйди. Остонада бошига тивит рўмол ўраб онаси тураг эди.

– Келинг, – деди Марат вазиятни ўзгартирмай.

Она унинг кетинг деган маънода айтганини тушунди. Ўғлининг одатларига аллақачон кўнишиб кетган эди. «Ўтиб дам ол» демокчи бўлдию бунақа пайтларда унинг ўжар, инжиқ бўлиб қолишини билгани учун шарпалай силжиб чиқиб кетди.

Онаси бир кўлида чойнак, бир кўлида қанд кўтариб кирганида Марат икки бобни битирган эди. Унинг кўзлари ачишар, кўп чекканидан бўлса керак, юраги санчарди.

\* \* \*

Хилола эшиқдан кириб келди-ю, дераза супачасига тирсаги билан таяниб турган Замирани кўриб, қувониб кетди. Қобил Қодирович ҳали ишга келмаган, қабулхона бўш эди. Та什қарида ҳаво булат бўлгани учун, оқиш қандиллар эрталабдан ёкиб кўйилибди. Замира унинг қаршиисига югуриб келди-да, кучоқлаб олди.

– Пальто олдим, – деди сепкилли юзи қувончдан кизарип.

– Вой, бир кўрай!

Замира дераза супачасида ётган ўроғлик қофозни очди.

– Кийиб кўргин, сенга ҳам лойик шекилли.

Пальто Ҳилолага лоппа-лойик келди. Бу – ўзи қачондан бўён орзу қилиб юрган тўқ кул ранг пальто эди.

– Қаёқда бор экан? – деди у ялингудек бўлиб.

Замира сарғиши қошларини учирив кулди.

– Ҳо-о, ёзувчи акангиз топиб берсин... – У яна тегажаклик қилди. – Топиб бўпти! Қофоз қоралашдан бошқа нарсани билмайди. Кеча қанақа бўлди? – деди у пальтони қофозга ўраркан.

Хилола ундан сир яширмас, кечаки ҳам висолга кетаётганини айтган эди.

– Яхши. – У Маратнинг кечаги гапларини эслаб, ширин жилмайди. – Ҳеч тушунолмайман бу болани! Бир карасанг, чолларга ўхшайди, бир қаrasang, ёш болага айланиб қолади.

– Янги ҳикояга қаҳрамон излаётгандир-да, – Замира жилмайиб туриб, уф тортди. – Ўртогим бечора!.. Кеча сен билан кўришган, бугун бошқаси билан учрашади. Ёзувчининг хотини битта бўлмайди. Институтимиизда учрашув бўлганидан кейин ҳам бир қиз Марат Азизовга хат ёзавериб, эси кетган эди.

Илгарилари Ҳилола Замиранинг ҳазилларига парво килмаса ҳам, бора-бора жаҳли чиқадиган бўлиб қолганди. Ҳозир яна ғаши кела бошлади.

– Хат ёса ёзверсин! – деди атайлаб бепарво оҳангда. – Менга нима??

Замира шодон кулганча, уни қучоқлаб олди.

– Ростини айтяпман-да, ўртоқжон. Мана! – У сумкасини титкилаб, буклоглик газета чиқарди. – Ёзувчининг қанақа одамлигини ёзганидан билса бўлади.

Ҳилола газетани бепарво қўлга олди. Бу – университетнинг кўп тиражлик газетаси эди. Учинчи сахифада Маратнинг «Изтироб» деган ҳикояси босилибди.

Замира чиқиб кетиши билан Ҳилола ҳикояни шошиб либ ўқий бошлади. Бу Маратнинг талабалик даврида ёзган ўртамиёна ҳикояси эди. Ҳикояда севгисига хиёнат қилган йигитнинг изтироблари тасвирланган экан.

Ҳилола ҳикояни ўқиди-ю, кўнглида оғир ғашлик уйғонди. Шу куни у кечгача қандай ишлаганини билмади.

\* \* \*

Марат таҳририятга тушдан кейин келди. Йўлакда мухаррирга дуч келиб қолди. Мухаррир совуққина саломлашди-да, ўтиб кетди.

Марат тушунди. «Уч кун ишга келмаганим учун ранжиган». Аммо у парво қилмади. Ҳозир дашном эшитишдан ҳам, ишдан ҳайдалишдан ҳам чўчимасди. Мана, тўрт кундирки, у ўзга бир оламда – ўз асарининг оламида яшапти. Тўрт кундирки, кеча-кундуз кулоги остида майин бир куй жаранглаб турибди. Бу куй унга куч бағишилаб, қалбини нурли туйғуларга тўлдириб юборяпти. Бу куй тўхтамагунча у ҳеч нимани тан олмайди!

Кечкурун Марат Ҳилола билан учрашиши кераклигина эслади. Ўша – охирги марта кўришганларида у янги спектаклга тушамиз деб ваъда берган эди.

Марат етиб келганида Ҳилола каттакон ойнаванд афиша олдида турарди. «Худди оқкушга ўхшайди» деб ўйлади у Ҳилоланинг қўлини қисаркан. Чиндан ҳам Ҳилола оқ кўйлақ, оқ кофта, оқ туфли кийиб олганди.

Марат, Ҳилола ўзининг оёқларига тезгина қараб қўйганини кўрди-ю, беихтиёр шими дазмолланмаганини эслади. «Соқол масаласи ҳам чатоқ бўлса керак», деб ўйлади у.

– Бугун театрга тушмаймиз!

Ҳилоланинг кўнгли бир қалқиб тушди.

– Нега? – деди овози титраб. Ҳилола оиласада кенжа қиз бўлганиданми, эрка эди. У кеча, дадасига жанжал қилиб, театрга кийиш учун атайлаб оқ кўйлақ олдирган эди.

– Нега? – деди Ҳилола алам билан Маратнинг кўзига тикилиб. Шу топда унинг кўзлари қизариб кетганини, ранги саргайиб, лабининг икки четида чукур-чукур чизиқчалар пайдо бўлганини пайқади.

Марат янги спектакль ҳам Афросиёб тарихи мавзусидан эканини эшишганди. У китобини битирмагунча биронта томоша кўрмаслик, биронта китоб ўқимасликка қарор қилган эди. Фикри чалғиб кетишидан кўрқарди.

– Ишим бор, – деди у, «Янги нарса ёзяпман» дегиси келмади. «Туғилмаган болага от қўйишнинг нима кераги

бор. Ким билсин, балки асар яхши чиқмас». У ёзаётганини бошқалар у ёқда турсин, ўзидан ҳам қизғанарди.

– Нима иш? – деди Ҳилола умидсиз оҳангда. У негадир Замиранинг гапларини эслади. «Бугун сен билан кўришади, эртага бошқаси билан...»

– Кетамиз, – Марат уни қўлтиқлаб олди-да, троллейбус бекатига бошлади. – Кейин, – деди жилмайиб. – Кейин айтаман, хўп?

Ҳилола троллейбусга чиқиб кетди. Марат эса ўз оламига йўл олди.

\* \* \*

Ниҳоят Марат қиссасига нуқта қўйди. Уч ҳафтадан бўён вужудини ларзага солиб, кеча-кундузнинг фарқига бормай ишлашга мажбур этган фикру туйгулари ниҳоясига етди. Кўп қаҳрамонлар тақдирни ўзи бошда ўйлаганидан ўзгачароқ бўлиб чиқди. Кўп қаҳрамонлар уни қўғирчоқдек ўйнатиб қўйди.

Марат қаттиқ толиққанини, ийқилгудек бўлиб қолганини шундагина пайқади. Аммо рухи тетик, кайфи чоғ эди. У яхши асар ёзганини биларди.

Шу кунлар давомида Ҳилола билан ҳам дурустrok гаплашмаганини, қиз ундан қачондир, негадир ранжиб қолганини туш каби гира-шира эслади. Вазир қабулига ҳамон кирмаганини, таҳририятнинг биронта ишини қилмаганини энди ўйлай бошлади.

Таҳририятда чиндан ҳам иш тўпланиб қолган экан. Марат боши билан шўнгиб кетди. Хатларни кўздан кечирди. Ёш қаламкашлар билан гаплашди. Кечга яқин Ҳилолага қўнғироқ қилиб, кўришишни илтимос қилди.

У энди плашини кийиб, чиқиб кетаётган эди, қўнғироқ жиринглаб қолди.

«Ёш шоирлардан биронтаси шеърининг тақдирини сўраса керак». У бир қўли билан плашининг тутгмаларини қадаркан, бошқа қўли билан гўшакни кўтарди.

Қандайдир нотаниш аёл овози уни сўради.

– Мен эшитяпман, – деди Марат охирги тугмани ҳалқадан ўтказаркан.

Гўшак узоқ вақт жимиб қолди-да, йиги овози эшитилди.

Марат ҳайрон бўлиб, жойига ўтириб қолди.

– Кечирасиз, кимсиз? – деди девордаги соатга тезгина қараб олиб. Ўн беш дақиқа қолибди.

– Сиз мени танимайсиз, – нотаниш овоз йиги аралаш хўрсинди. – Сиз билан маслаҳатли ишим бор.

Марат эртага келинг демоқчи бўлди-ю, айтолмади, кўнгли бўлмади.

– Келинг ҳозир, – деди яна соатга қараб, – иккинчи қаватдаман.

Марат гўшакни қўйди-да, чироқни ёқди. «Ҳилола кутиб қоладиган бўлди-да», деб ўйлади кўнгли ғаш бўлиб.

Бир оздан кейин эшик очилиб, остоңада кўхликкина қиз кўринди. Плашининг елкалари, қўлидаги ёмғирпўши хўл эди. «Ёмғир ёғаётган экан, – Маратнинг кўнглидаги гашлик кучайиб кетди. – Ҳилола хафа бўлади-да».

Қиз ичкарига киришга қўрққандек, ҳамон остоңада турарди.

– Ўтиринг, – деди Марат диванни кўрсатиб.

Қиз диваннинг бир чеккасига омонат ўтириди-да, қизарип кетган кўзлари билан унга қараб қўйди.

– Вактингизни олдимми?

– Нима бўлди, синглим? – деди Марат плашини ечиб, стул суюнчиғига ташларкан. – Нега хафа бўляпсиз?

Қиз унга бир қараб қўйди-ю, яна кўзларида ёш қалқиди.

– Мен сизни яхши биламан. – Қизнинг ўпкаси тўлиб ҳикиллаб қолди. – Сиз яхши, олижаноб одамсиз.

Марат гапининг давомини кутиб, индамай ўтираверди.

Қиз плашининг чўнтағидан рўмолча олиб, кўз ёшларини артди.

– Бир йигит бор эди. – Қиз юзини дераза томонга буриб олди. – Бир-биrimizни яхши кўрардик. Мен дарс тайёрлагани унинг ётоқхонасига бориб туардим... – Қиз жимиб қолди-да, бирдан хўнграб юборди. – У мени алдаб кетди. Армияга кетиб қолди.

Марат тушунди. Кўнглини кемираётган ғашлик бошини сирқиратиб юборди. У кафти билан пешонасини чангаллаганча сўради:

– Энди нима қилмоқчисиз?

Қиз ярқ этиб унга қаради.

– Ўзимни ўлдираман!

– Бўлмаган гап! – Марат қўлинин шартта туширди-да, совуққина гапирди. – Ўзини ўлдирадиган одам аввал эълон қилиб, кейин ўлдирмайди.

Қиз аччиқ ҳақиқатни шундоққина кўз ўнгига келтириб қўйган Маратга ҳайрон қараб қолди.

– Онангиз бормилар? – деди Марат бир оз юмшоқ оҳангда.

Қиз асабийлик билан кўл силтади.

– Улар нимани тушунарди? Эски одам... Эрга берамиз деб ётишибди.

«Қачондан буён сен янги одам бўлиб қолдинг! – деб ўйлади Марат ғижиниб. – Дуч келган одамга кучофини очиш янгилиг-у, номусли бўл дейиш эскиликми? Номуснинг қадрини мунча арzonлаштирмаса булар?

У сигаретанинг учини асабий эзғилаб чекди. Марат кўпдан буён шу гапларни ўйлаб юрарди. Мана, яна бир мисол. У ўзини босиб олди. «Бу қиз танбех эшитгани эмас, маслаҳат сўрагани келган-ку».

– Хат ёзяптими? – деди у хотиржам оҳангда.

– Эрга тегиб кетавер, дебди. – Қиз уф тортди.

– Нега шунақа деб ёзганини биласизми?

Қиз маъюс бош чайқади.

– Сизга ишонмаяпти!

Қиз бунисини ҳеч ўйлаб кўрмаган бўлса керак, киприкларини ҳайрон пирпиратди:

– Нега ишонмайди?

– Сиз ҳар сафар йиглаб ёзаверманг, – деди Марат унинг саволини эшитмагандек. – Энди сиз қанча ялиниб ёзсангиз, у шунча узоқлашиб кетаверади.

– Нима қилай бўлмаса? – деди қиз ўкинч оҳангидা.

– Эртага унинг хатларини олиб келинг, – деди Марат ўрнидан туриб. – Биргаллашиб жавоб ёзамиз. Мен айтиб турман, сиз ёзасиз.

У плашини кийди-да, эшикни очди.

– Келишдикми, эртага ёзамиз.

Қизнинг кўнглида умид чироги ярқ этиб кетди шекили, секин шивирлади.

– Раҳмат....

\* \* \*

Марат симёғоч тагида елкаларини қисиб, ёмғирдан жунжикиб турган Ҳилолани узоқдан кўрди-ю, юраги зирриллаб кетди.

«Плаш киймаган экан». У қоп-қора йўлкада ёмғирдан ялтираб ётган чирок нурларини босиб югуриб борди-да, Ҳилолани билакларидан тутиб, ўзига қаратди.

– Кечиринг!

Ҳилола Маратнинг қўлини силтаб ташлади. Унинг соchlари ҳам, пуштиранг жемпери ҳам ивиб кетган, ранги сўлғин эди.

– Кечиринг, – деди Марат яна ялинч оҳангда. Кейин плашини ечиб, Ҳилоланинг елкасига ташлади.

– Қочинг! Уятсиз! – Ҳилола плашни силтаб ташлади. Унинг ҳўл енги Маратнинг юзига шапиллаб урилди.

– Хайр! – Ҳилола кескин бурилди-да, сумкасини сил-китганча, кўлмак сувларни сачратиб чопиб кетди.

Марат нариги симёгоч тагида унга етиб олди. Муздай елкаларидан ушлаб, энтикканча шивирлади.

– Тушунсангиз-чи, ахир. Бир қиз билан гаплашдик. Бирор ёрдам сўраб турганида ташлаб кетолмайман-ку.

Ҳилола шартта бурилиб қаради. Унинг сўлғин юзидан ёмғирми, кўз ёшими оқиб тушар эди.

– Сизнинг қизларингиз кўп, – деди у овози титраб. – Одамларингиз кўп!

– Бугун шунақа бўлиб қолди-да, нима қилай? – Марат плашини яна унинг елкасига ташлади. Ҳилола тагин сил-таб юборди. Плаш лойқа кўлмак сувга тушди.

– Шилқимлик қилманг, – деди Ҳилола йиги аралаш. – Театрга борганда-чи, кутубхона олдида кўришганимизда-чи, музейга бормоқчи бўлганимизда-чи! – У яна чопиб кетди.

Марат эгилиб плашни олди. Ҳилоланинг қадам то-вушлари тез узоқлашиб бораарди. Шундагина у бу қизни севиб қолганини, қаттиқ севиб қолганини чукур хис этди. Юрагининг бир парчаси узилиб кетаётгандек яна унинг кетидан югурди. Боғ четида етиб олиб қўлидан тутди.

Ёмғир ҳамон шивалаб ёғар, Марат энди плаш лой бўлганини, уни Ҳилолага кийгизиб бўлмаслигини ўйлаб қийналарди.

– Ҳилола, унда, – деди нафаси қисилиб. – Унда мен бир нарса ёзаётган эдим.

– Нарса ёзаман деб ҳаммадан кеча қолинг. – Ҳилола энди йифламас, овозида темирдек қатъият бор эди.

– Бошқа иложим йўқ эди, – деди Марат ўйчан.

– Иложим йўқ денг?

Марат унинг титраб турган лабларига қараб, бошини куйи солди.

– Йўқ.

Ҳилола бундай жавобни қутмаган эди. У Маратнинг ялинишини хоҳларди.

– Бўлмаса, – Ҳилола овози қалтираб тақрорлади. – Бўлмаса мендан кеча қолинг!

Марат ҳамон бошини қуи солиб турар, асфалът йўлкага ёпишиб ётган ҳазонни туфлисининг учи билан эзгилар эди.

– Мен айтгандим, – деди у сокин оҳангда. – Менга дўст керак, ҳамроҳ керак, дегандим...

– Йўқ, айтсангиз-чи, ижодингиз учун мендан кеча қолинг. Ўзингиздан бошқа ҳеч кимни ўйламай қўя қолинг!

Марат унинг кўзларида ғазаб борлигини кўриб, кўнгли оғриди. Наҳотки у чиндан ҳам фақат ўзини ўйлаётган бўлса?! У шу кунгача бирон марта дурустроқ ўйлаб кўрмаган гапларни Ҳилоладан эшишиб ҳайрон бўлди. Ахир у одамларга ўхшаб башанг кийиниши, зиёфатларга боришни, уй-жой солишни шунчаки майда гаплар деб юради-ку. Наҳотки келиб-келиб энг яқин одами бўлиб қолган, қалбининг нурли бир парчасига айланган мана шу қиз унга таъна қисла.

– Айтиңг! – деди Ҳилола ҳамон лаблари титраб. Кўзларида совуқ ўт ялтираб кетди.

Шундагина Марат бу қиз уни ҳеч қаҷон тушуна ол-маслигини, ўзи ўйлаганидан кўра каттароқ эътибор талаб қилишини чуқур ҳис этди.

– Ҳилола, – деди қизнинг кўзларига қарамасликка ҳаракат қилиб. – Мен бошқача яшай олмайман, балки иккимиз ҳам адашгандирмиз. Сиз тўғри айтяпсиз. – У бир лаҳза ўйланиб турди-да, маъюс жилмайди. – Бир умрлик ташвишимга сизни шерик қилишимнинг нима кераги бор?

У кескин бурилди-да, чироқ нурида ялтираб ётган ҳалқоб устидан сакраб ўтди. Нарироққа бориб қайрилиб қаради. Ҳилола ҳалқоб олдида бошини қуи солиб турарди.

Марат томогини аламли бир ўт ёндираётганини пайқади-ю, плаш ушлаган қўлини баланд кўтарди.

– Хайр, – деди овози титраб. – Мендан ранжиманг. – У охирги сўзларини иложи борича хотиржам айтишга ҳаракат қилди. – Бахтли бўлинг, Ҳилола!

Ҳилола у томонга салгина эгилгандек, ишончсиз бир қадам қўйгандек бўлди. Аммо, Марат энди қайрилиб қарамади. Илондек ялтираб ётган йўлкадан ўз соясини босганча, секин-секин юриб кетди.

Ҳамон ёмғир савалар, даражатларнинг сарғайган япроқлари чироқлар нурида хира йилтиллар эди. Аллақаёқда хазон тутаётган бўлса керак, аччиқ бир ис димогини куйдиарди.

У плашини осилтирганча, кўлмак кечиб борар, боя таҳририятга йифлаб келган баҳти қаро кизнинг аччиқ қисматини ўйлар, ўзи эса қаёққа кетаётганини билмас эди.

---

---

## УМР САВДОСИ

Хуршида ишдан келса, Кумри хола айвон ўртасида чўқкалаб олганча қўрпа қавиб ўтирибди. Энкайиб олгани учунми, муштдек гавдаси янаем кичрайиб қолганга ўхшайди. Хуршиданинг онасига раҳми келди. Бечорага қийин. Бир йилдирки, Тўлқинжонни уйлантириш ташвишида. Тўй қилиш осонми? Гоҳ униси етишмайди, гоҳ буниси.

– Бўлди энди, ойи, чарчаб қоласиз, – деди Хуршида сумкасини айвон бурчагидаги стулга қўйиб. – Тўй эртага бошланаётгани йўқ-ку!

Кумри хола бошини кўтарди. Оёқлари увушиб қолган экан, оғриқдан юзи буришиб, тиззаларини уқалади.

– Кўнглим ғаш, болам, – деди тўсатдан.

Хуршида тушунмади.

– Нима бўлди?

– Эрталаб борсам, дарвозаси тақа-тақ ёпиқ. Аввал оқшомдан ётиб олиб, кеч пешингача ухлайди шекилли булар.

Хуршида кулиб юбормаслик учун тескари қаради. Кампир тувшмагур-эй! Бундан чиқди хўroz қичқирмасдан куда бўлмишникига борган. Ўзининг каллаи сахарлаб боргани билинмайди-ю, айбни қудаларга ағдаряпти. Нукул юлдузи чап келяпти-да шулар билан!

– Қиз бола деган кун ёйилгунча ётмайди, ялпайиб!! – Кумри хола писанда қилди. – Дарвозасининг олди супурilmagan...

Қумри холанинг одати шу. Саҳарлаб туриб олади. Хуршида эсини таниши билан униям шунга ўргатган. «Қиз бола уй жигадек тахт бўлиши керак, уят бўлади», деб аzonлаб ҳовли супуртиради.

– Келиннинг акаси ичаркан. Униям эшитдим! – деди Қумри хола ҳамон ўша тажсанг оҳангда. – Отасиниям оғзи шалоқ, дейишияпти.

Онасининг кейинги гапи Хуршидага ёқмади. Ўзик: «Уйланасанми, йўқми? Танлаганингни айт», деб Тўлқинжонни ҳоли жонига қўймади. Охири, Тўлқинжон ёқтирган қизини айтди. Қумри хола уч-тўрт марта совчиликка бориб «ок ўраб» келди. Аммо, негадир кейин айниб қолди. Гоҳ келинни дангаса дейди, гоҳ қуда холани эзма, дейди. Мана, энди акасининг ичиши баҳона бўлиб турибди.

– Келин ҳам ичарканми, ойи, бир сўрамапсиз-да, – деди Хуршида ачитиб.

Қумри хола ип қатимини шаҳд билан тортаркан, Хуршидага чақчайиб қаради.

– Таппи-таппидан узокқа тушмайди, билдингми?

– Бизлар ҳам оппоқ эмасмиз-ку, ойи! – деди Хуршида. – Қуда томон суриштиrsa бизлардан ҳам айб топар. Мана, мен... – У бир зум жим қолди-ю, хаёлига келган гапни қайтармади: – Мениям турмушим бузилган. Улар ҳам суриштириб юргандир. Қуёвнинг опаси нега эрдан чиқкан, деб. Гапни ковласа гап чиқаверади-да!

Қумри хола тўсатдан мунгайиб қолди.

– Сенинг турмушинг бузилган бўлса... Шу иш шунақа бўлганига... ўзинг сабабисан... Энди Тўлқиннинг турмуши шунақа бўлмасин, дейман-да, болам.

Онасининг бирдан бўшашиб қолиши, таскин оҳангидаги гапириши Хуршидага оғир ботди. Душманинг тош билан ургани нима-ю, дўстинг пахта отгани нима? Йўқ, онаси таъна қилаётгани йўқ. Ачиниб гапиряпти. Шунақа-ю,

бари бир қалампирни шакарга ботириб еган билан ширин бўлиб қолмайди-да.

Хуршида силтаб-силтаб игна тортаётган онасига бир зум қараб турди-да, индамай ичкарига кириб кетди. Шу топда у ойиси кетидан мўлтираб қараб қолганини хис қиласар, хис килган сайин юраги эзиларди.

Қиз бола бўйига етганидан кейин ғалати бўларкан. Ўз уйингда ота-онанг бағрида турасан-у, бари бир бу хона-дон эртами-индин сенга бегона бўлиб қоладигандек, гўё албатта қандайдир ўзгариш бўлиши шартдек туолавера-ди.

Хуршида, айниқса, совчилар келганида буни чукур хис қиласар, шунинг учун эшикдан узун-қиска бўлиб кириб келаётган хотинларни кўрса, аллақандай бегонаси-раб турарди. Бора-бора уларни кўрса ғаши келадиган бўлди. Қумри хола бўлса, совчилар билан очилиб-сочилиб сўрашар, куёв бўлмишни ипидан-игнасигача суриши-тиарди. Совчилар кетгандан кейин Хуршидага насиҳат қиласарди:

– Қизлик уй – бозор, болам! Шоҳ ҳам келади, гадо ҳам. Бошингда отанг бўлмаса. Муносиб жойингни топгин, дейман-да, қизим.

Хуршида тутакиб кетарди:

– Ҳеч қанақа бозор-позорни билмайман, тушундингизми? Менга даллол керакмас.

Шундай дерди-ю, ҳаётида бўладиган ўзгаришни кутиб юарди. Бу ўзгариш тўртинчи июнь куни бўлди. Шу куни у ўн тўққиз ёшга тўлган эди. Кечқурун ательеда бирга ишлайдиган дугоналарини уйга чақирмоқчи бўлди. Бозорга тушди. Чиллаки, гилос, янги помидор харид қилгунча кун қизиб кетди. Бир кўлида сумка, бир кўлида тўрхалта кўтариб, бекатга келди. Аксига олиб автобус ҳам келавермади. Бир маҳал қизил люкс «Жигули» осойишта силкиниб, Хуршидадан хиёл нарироқда тўхтади.

Хуршида қўл қўтартмагани учун ҳам эътибор бермади.  
Лекин ўша томондан овоз келди:

– Қаёққа борасиз, синглим?

Бир оздан кейин бояги савол яна қайтарилди:

– Сизга айтяпман.

Шундагина Хуршида бу гап ўзига тегишли эканини билиб, бурилиб қаради. Машинасининг рангига мос – қизил водолазка кийиб олган йигит бир оёғи ичкарида, бир оёғи ерда, шу томонга қараб турарди.

– Қаёққа борасиз? – деди у яна.

Хуршида «собственный» машинага ўтиришни умуман хушламасди. Ҳозир ҳам чимирилиб:

– Ҳеч қаёққа! – дедиу тескари қараб олди. У моторнинг гувиллашини, машина жўнаб кетишини кутиб турарди. Чиндан ҳам эшик қарсиллаб ёпилди. Аммо мотор гурилламади. Бояги йигит унинг рўпарасида пайдо бўлди.

– Кўлингизда юкингиз кўп экан, – деди Хуршидага жиддий тикилиб.

Хуршида унинг силлиқ тараалган соchlарига, чимирилиб турган қошига бир лаҳза қарадиу кўзини олиб қочди:

– Қанча сўрайсиз?

Йигит кулиб юборди:

– Савоб ҳам керак-ку одамга!

– Унақа бўлса ўтирумайман.

Йигит яна кулиб унинг сумкасига қўл чўзди:

– Бўпти, бензин ҳақини берарсиз.

Хуршида машинанинг паролон ғилоф қопланган орка ўринидигига ўтираркан, йигит сўради:

– Қаёққа ҳайдай?

– Кўкчага!

Хуршида энди уйга етгунча бир оғиз ҳам гапирмасликка аҳд қилди.

Анчагача индамай кетишиди. Хуршида йигитнинг рўпарадаги ойначадан ўзига қараб қўяётганини ҳис килар, шунинг учун кўчаларни томоша қилиб борар эди.

– Иссиққа қолиб кетибсиз? – деди йигит орқага бурилиб. Хуршида мўйлов қўйган йигитларни ёмон кўрарди. Аммо, хайдовчининг мўйлови ўзига жуда ярашиб тушганини ичидан тан олди. Индамай кетаверди. – Иссиққа қолиб кетибсиз, дейман? – Йигит яна саволини қайтарди.

– Шундок бўлди! Энди отимни сўранг! Қаерда ўқишимни сўранг! Иложи бўлса, йигитим бор-йўқлигини ҳам билиб олинг! – Хуршида бу гапларни шу қадар жаҳл билан бидир-бидир қилиб айтиб ташладики, ўзиям ҳайрон қолди.

Йигит бунақа зарбани кутмаган бўлса керак, анчагача жимиб қолди. Кейин орқасига қарамасдан секингина гапириди:

– Ўзининг туғилган кунида ўзи бозор қилган одамни биринчи кўришим.

Энди Хуршида эсанкираб қолди. Худди унинг юзини яхшиrok кўриб олгиси келгандек олдинга эгилди.

– Сиз... Қаёқдан биласиз? – деди кўзларини пирпирашиб.

– Мен ҳамма нарсани биламан! Телепатман. – Йигит орқасига қараб жилмайди. Шунда Хуршида унинг мўйлови ўзига ярашганини яна бир бор ҳис этди-ю, хаёлига келган фикрдан уялиб, кўзини олиб қочди. – Сиз ҳеч нимани айтмай қўя қолинг, – деди йигит ҳамон жилмайиб. – Отингизни ҳам, бугун неча ёшга тўлганингизни ҳам, ҳаммасини биламан. Сиз бўлса мени билмайсиз. Шуям инсофданми? Келинг, сиз ҳам мени таниб олинг. Отим – Анвар...

Хуршида қараса гап гап билану машина бошқа ёкка бурилиб кетяпти.

– Кўкча у ёқдамас, – деди у овозини баландлатиб. – Ўйулни билмайсизми?

– Биламан! Бир минутга!

Зум ўтмай машина пастак, ойнабанд магазин рўпарасида тўхтади. Анвар кўча четидаги цемент ариқчадан ҳатлаб ўтди-да, магазинга кириб кетди. Хуршида ўтираверишини ҳам, тушиб кетишни ҳам билмай турган эди, Анвар ичкаридан бир сават гул қўтариб чиқди. Хуршида шундагина бу гул магазини эканини билди.

Анвар негадир орқа эшикни очиб, саватдаги гулни шундоқкина Хуршиданинг оёғи тагига қўйди.

– Нима қиляпсиз? – деди Хуршида оёғини нари суриб.

– Туғилган кунингиз билан чин қалбимдан табриклиман. Илоё баҳтли бўлинг! – Анвар қўлини шунақа койилмақом қилиб кўксига қўйдик, Хуршида кулиб юборди:

– Артистмисиз, нима бало?

– Артист бўлсам, жон дердим. Эплолмайман. Аспирантман.

Анвар рулга ўтирдию машинани ғизиллатиб ҳайдаб кетди. Қизик, энди у Хуршидаларнинг кўчасига етгунча бир оғиз ҳам гапирмади. Фақат Хуршиданинг юкларини, саватдаги гулни тушираётганда секингина: «Яхши дам олинглар», деб қўйди.

Хуршида ҳеч қачон туғилган кунини бунчалик хушчақчақ нишонламаган эди. Қизлар билан роса ўйнашди, ярим кечагача хурсандчилик қилишди. У ора-чора негадир Анварни эслаб қўяр, аммо ўша заҳоти уни хаёлидан ҳайдашга уринарди. «Яхши йигит экан. Одамгарчилиги бор экан. Шу билан нима бўпти? Энди қайтиб кўришамизми, йўқми? Кўчада учраган бир одам-да!»

Шунақа деб ўйларди-ю, бари бир кўнглида ноаник умидга ўхшаш бир нарса айланаверарди. Кечаси меҳмонларни кузатагётганида худди ўша машина яна келиб қоладигандек беихтиёр атрофга аланглади. Эртасига, индинига, кўчаларда юрганида ҳам қизил «Жигули»

кўринса бурилиб қарайдиган бўлди. Орадан бир ҳафтами, ўн кунми ўтди. У энди Анварни хаёлидан чиқара бошлаганида яна кўришиб қолишиди. Хуршида узокдан келаётган қизил «Жигули»ни кўрди-ю, негадир юраги жиз этди. Машина унинг рўпарасига келиб тўхтади.

– Ўқишига кетяпсизми? – Анвар ўтирган жойида чўзилиб, эшикни очди. Хуршида иккиланиб орқа ўринидикқа ўтираркан, унга қараб кўйди.

– Ўқишига киролмаганман, ишлайман, эътиборингиз учун! – деди таъкидлаб. – Мен тўғримда ҳамма маълумотга эга одам шуниям билмайсизми?

Анвар кулди:

– Очигини айтсан, отингизниям билмайман.

– Қизиқ бўлди-ку! – Хуршида елка қисди. – Бўлмаса туғилган кунимни қаёқдан билдингиз?

– Кўзингиздан! – Анвар жилмайди... – Қалай, зиёфат яхши ўтдими?

Хуршида индамай бош силкиди.

– Ўша куни сизнинг баҳтингиз учун мен ҳам ичдим.

– Ёлғон! – Хуршида қўл силтади.

– Ёлғон гапирсан, ёрилиб ўлай!

Хуршида кулиб юборди.

– Кўйинг, ҳали бола-чақангизга керак бўласиз.

– Шунаками, а? Айта қолинг, сизга жудаям керакманми?

Хуршида гап суюқлашиб кетаётганлигидан ғаши келди-ю, аммо шунга яқинроқ мавзу давом этишини бари бир хоҳларди. Шунинг учун индамай кўя қолди.

Эртасига Анвар унинг ишдан чиқишини пойлаб турди. Ўзининг ишхонасига олиб борди. Кибернетика бўйича илмий иш қилаётган экан. Ҳозирча лабораторияда кичик илмий ходим бўлиб ишларкан. Хуршида аллақандай чизмалар, ялтироқ аппаратлар билан тўла нимқоронги хонага кириб қолди.

– Бизнинг ишимиз суратлар билан боғлиқ, – деб тушунтириди Анвар. – Хоҳласангиз, сизниям суратга тушираман...

Ўша кундан бошлаб у Анварнинг лабораториясига тез-тез бориб турадиган бўлди. Лабораториянинг ярим коронгилиги ҳам, турли вазиятларда суратга тушиш ҳам энди уни чўчитмас эди.

Уйда бўлса совчилар бозори қайнар, Қумри хола ҳар куни янги гап топиб кўярди. Куёв бўлмишнинг бири за-вуч эмиш, яна бири «пекарнийда» ишларкан. «Матасикли» бормиш. Тағин биттаси «пераводнийлик» қиларкан. Москвадан гилам олиб келаркан.

... Бир куни Хуршида онасининг рўпарасига ўтириб олди-да, очиқ-оидин қилиб айтиб кўя қолди:

– Қингир-қийшиқ совчиларингизга айтиб кўйинг, ойи! Менинг танлаганим бор. Эскилик сарқитидан қачон кутуласиз?

Онаси Хуршида кутгандек сапчиб тушмади. Факат сўради:

– Ким ўзи у? Қанақа одам?

– Яхши одам. Аспирант. Яқинда олим бўлади. – Онаси бирорнинг «матасикли»ни гапиргани учун Хуршида ҳам атайлаб қўшиб кўйди: – Машинаси бор, «Жигули».

Эртасига у уйига совчилар кўп келаётганини гап орасида қистириб кўйди. Анвар одатдагидек масалани кўндаланг кўйди:

– Бўпти, эртагаёқ ЗАГСга ариза топширамиз.

Ҳамма иш қўнгилдагидек кетаётганида Қумри холанинг қайсарлиги тутиб қолди. Иккала оёғини бир этикка тикиб турив олди.

– Менинг кўчада қолган қизим йўқ! Уйланадиган одам беш-олти марта совчи юборади, одам кўяди. Отини билмасам, зотини билмасам. Йўқ, бўлмайди!

Хуршиданинг бир кулгиси келар, бир жаҳли чиқарди.

– Нимага тушунмайсиз, ойи? Беш марта совчи юбориш деган қонун қаерда ёзилган? Анвар ака Қашқадарёдан келган. Ота-онаси ёшлигига ўлиб кетган экан. Даллонинг нима кераги бор?

– Ота-онаси бўлмаса, қариндош-уруғ бордир, ишхонаси, хўжайнилари бордир. Ўзим бoramан.

Хуршида кулди:

– Ишхонасига борганингиз билан нимани тушунардингиз? Кибернетикага ақлингиз етадими? Ўзим минг марта борганман ишхонасига, билдингизми!

Қумри хола бари бир бўш келмади:

– Сен эчки эмассанки, дуч келган одамга етаклатиб юборсан. Бўлмайди.

– Балки ҳали қалин ҳам сўрарсиз?

– Таг-тахтини суриштиrmай туриб бермайман! Бўлмайди.

Қумри хола бўлмайди, дегани билан тўй тўхтаб колмади. Анварнинг тогаси бор экан, ўша ўртага тушди. Тўй бошланди-ю, Қумри хола зада бўлган қушдек мунғайиб қолди.

Бахор кунлари ғалати: тўсатдан жала қуядио еркўкни шалаббо қилиб юборади. Кетидан ярқ этиб офтоб чиқади. Оlam яшнаб кетади. Замину осмон тароватли бир исдан – баҳор исидан маст бўлиб қолади. Хуршиданing ҳаётида ҳам шундай бўлди. У Анварни бутун вужуди билан севиб қолди. Мухаббати эвазига баҳт қуёши унга жилмайиб боқдио бутун дунё яшнаб кетгандек бўлди. Қизил лентани кўндаланг такиб олган ЗАГС мудирасининг нутқи, пешонасига қўғирчоқ кўндирилган машинада сайр қилишлар, гул иси май хидига қовушган чароғон ресторан... У баҳтиёр эди. Баҳт деган лаззатли туйфу ҳаётига шунчалик тез кириб келганига баъзан ўзи ҳам ҳайрон қоларди. Назарида онаси ҳам уни тушунгандек эди. Фақат тўйдан кейин Қумри хола Анварнинг Юнус-

ободдаги икки хонали уйига бормади. Умуман бормади. «Зиёни йўқ, ойим шунаقا бир ловиллайдилару ўчадилар», деб юпатди Хуршида эрини.

Тўйдан кейин бир ҳафта ўтгач, никоҳ сайлига чикишди. Августнинг ўрталари эди. Бунақа пайтда денгиз янги согилган сутдек илиқ бўларкан. Бир куни икковлари ойдин кечада чўмилишди. Қизиқ, Хуршида сузган сайин қўлининг учидан саҷраган томчилар худди марвариддек ярақлаб кўринарди. Бундай лаззатли манзарани худди шунаقا пайтда денгизда чўмилган одамгина билади. Хуршида қорайиб, янаям ҳусни очилиб қайтди.

Бир куни Анвар ишдан ташвишлироқ қиёфада келди.

– Чамадон тайёрланг, – деди тўсатдан.

– Яна қаёққа борамиз?

– Сиз эмас, мен кетаман. – Анвар энди осойишта тушунтириди. – Илмий ишим бўйича Ленинградга боришим зарур бўлиб қолди. Домла чақирибди.

– Анчагами? – Хуршида бирдан ичи хувиллаб қолгандек, эрига термилди.

– Нарі борса, бир ой.

Хуршида кузатиб қўймокчи эди, Анвар уни аяди. Вокзалга чиқартирмади.

Икки хонали каталакда Хуршида ёлғиз қолди. Ҳовлида, маҳаллада одамнинг ёлғизлиги билинмайди. Аммо каталакдек хонада бир кун танҳо қолган киши ёрилиб кетай дейди. Бунақа жойда қўни-қўшнилар нимагадир саломлашишдан нарига ўтмайди. Хуршида уч кунда сиқилиб кетди. Ишга борай деса, Анварнинг гапига кириб бўшаб олган. У ўз уйига борди. Қумри хола ҳалиям жаҳлидан тушмаган экан. Хуршида икки кун турган эди, секингина тушунтириди:

– Узатилган қиз уйга келиб ётиб олмайди. Қўни-қўшнилар ҳалитдан гап киляпти.

– Бўлмаса юринг бизникига, – деди Хуршида.

– Йўқ, болам. Оғзимга сўз олганман.

Хуршида умрида биринчи марта онасини ёмон кўриб кетди. Она деган ҳам шунчалик бемехр бўладими? У уйинга келди. Телевизор, билан андармон бўлди. Ҳар кун йилдек чўзилар, аксига Анвардан на хат, на хабар бор эди. Баъзан Дилбар деган ўртоғи келиб турар, аммо унинг ҳам ўзтириклиги бор эди. Кундузи ишга боради, кечқурун ўқишига...

Бир оқшом эшик жиринглаб қолди. Хуршида очиб қараса, «сим» рўймол ўраган аёл, дўппи кийган олти-етти ёшлардаги бола турибди. «Қишлоқдан келишибди, – деб ўйлади Хуршида аёлнинг ялтироқ рўмолига, беўхшовроқ осилиб турган жемперига қараб. – Адашган одамларга ўхшайди». У хамроҳ топилганига қувонгандай, беихтиёр ичкарига таклиф қилди.

– Келинглар! – деди йўл бўшатиб.

Аёл дадил ичкарига кирди. Бола шўхгина экан. Бирпасда югуриб бориб магнитофон қулогини бурай бошлиди.

– Ақбар, тек ўтири! – деди аёл жеркиб. Кейин Хуршидага қаради. – Сиз Хуршидахонсиз-а?

Хуршида ҳайрон бўлди.

– Мен сизни танимайроқ турибман, – деди ийманиб.

– Таниб қоларсиз. – Аёл хотиржамлик билан жемперини ечиб, стул суюнчиғига ташлади. Унинг беписандлиги, киноя қилиб гапириши Хуршиданинг ғашига тегди. «Ким ўзи бу? Нимага олифтагарчилик қиласди?»

– Кимсиз ўзи? – деди у қошини чимириб.

– Кетдими? – Аёл негадир илжайди. – Анча бўлдими?

– Ким кетади?

– Узум обкетдими, тарвузми?

Хуршида шахд билан ўрнидан туриб кетди.

– Менга қаранг! – деди таҳдид билан. – Майнавозчиликни йиғиштиринг! Кимсиз ўзи?

Аёл ўғлига қараб қандайдир нотабиий, асабий қийқириб кулди:

– Даданг Сибирга кетибди, ўғлим. Узум обкетибди.  
Шу ерда кутиб ўтиранг, сенга велосипед олиб келади.

Болакай кўзларини катта-катта очиб, онасига тикилди:  
– Қачон, буви, қачон?

– Унисини манави аячангдан сўрайсан! – деб аёл Хуршидани кўрсатди. Яна ўша файритабии оҳангда кулди. – Қачон қайтаман деган Ақбарнинг дадаси?

Хуршида ниманидир тушунгандек бўлди-ю, ичида бир нарса узилиб кетди. Бемадор бир ҳолатда эшикка суяниб қолди.

Аёл тантана қилгандек яна қийқириб кулди.

– Сизниям машинасига ўтқазиб, қўлга туширдими?  
Сизгаям аспирантман, дедими? Сизниям тўй бўлмасидан «ишингизни тўғрилаб» қўйдими? «Ҳеч кимим йўқ, етимман», дегандир? Бир ой ичида тўй қилдими? «Свадебний путешествия»га олиб боргандир, ҳойнахой? Энди илмий иш билан Ленинградга кетган бўлса керак.

Аёл ҳар гапи билан Хуршидага бир тарсаки тушираётгандек бўлар, бундан роҳатлангандек, ваҳшийларча қийқириб кулар эди:

– Ленинградда пишириб қўйгани йўқ! Новосибирскка кетган. Узум обкетган.

Хуршида бошидан хуши учиб бораётганини ҳис қилиб туар, юраги гурсиллаб урар эди.

– Ёлгон! – У ер тепиниб чинқириб юборди. – Ёлгон!  
Ёлғон!

Кейинги дақиқада у ваҳшийларча кулаётган хотинга ташланди. Бошидаги «сим» рўмолига чанг солди. Аммо, шу он изтиробга тўла бир чинқириқ янградиу Хуршиданинг қўллари ҳавода муаллақ қотиб қолди.

– Буви! Бувижон! – Боядан бери магнитофон олдида ўралашиб юрган болакай ўқдек отилиб келиб, онасига

ёпишди. Шундагина Хуршида аёлнинг кўзларидан оқиб тушаётган ёшни кўрди. Аёл негадир каловланиб ўридан турди. Бир кўли билан боланинг бошини силай бошлади, бир кўли билан Хуршиданинг елкасидан қучди.

– Пешонанг шўр экан, синглим! Кўзингга қарасанг бўлмасмиди? – Шундай дедио елкалари силкиниб, йиг-лаб юборди.

Ўша кечак тун бўйи икки «кундош» ҳасратлашиб чикишди. Бола ухлаб қолган, уй нимкоронги, аёлнинг овози ғамгин, аммо ўқтам эди. У асли андижонлик экан. Техникумда ўқиб юрганда Анварнинг кўлига тушибди. Эс-хушини йигиб олгунча, Анварнинг иккинчи хотинига айланиб қолибди.

– Сиз учинчисисиз! – деди у қандайдир киноясиз оҳангда. – Хоразмда ҳам хотини бор. Аммо ишни пишиқ қиласди. Законний ажрашади.

Хуршида ич-ичидан тошиб келаётган йифини аранг босиб ётарди. «Законний» ажрашганининг нима фойдаси бор? Бу билан дарди енгиллашармиди?

Анвар ҳеч қанақа олим эмас, сураткаш экан. Гоҳ у, гоҳ бу институт лабораториясида сураткаш бўлиб ишлаб юаркан. Кузда аллақандай шериклари билан Сибирь шаҳарларига бориб узум сотаркан. Манави кооператив уйлару машиналар, ресторанлару денгиз саёҳатлари шундан экан. Хуршида бу гапларнинг туш бўлиб қолишини жуда хоҳларди. Қани энди тўхтовсиз гапираётган мана шу хотин ҳам, диванда пишиллаб ухлаётган анави бола ҳам туш бўлса. Туш бўлсаю у уйғониб кетса. Йўқ, туш бунақа бўлмайди!

– Балки, бирон нарса тама қилиб келди, дерсиз. Йўқ, ҳеч нима керакмас. Тошкентда қариндошларимиз бор. Шуларнигига келувдим. Бу гапларни эшитиб қолиб, сизни огоҳлантириб кўйгим келди. Агар яхши кўрсангиз, маҳкам ушланг. Анвар туллак йигит.

... Она-бала зинадан тушиб кетаётганида Хуршида бирдан уйга югурди. Кеча болакай ўйнаган японча магнитофонни столдан юлкиб олди-да, зиналардан чопиб тушди.

– Ма, Акбар! – деди болага тутқазиб. – Бари бир шу... сеники.

Кундоши қаршилик қилган эди, қўймади.

– Бари бир менга керакмас. Энди керакмас.

Ловиллаб турган гулханга сув сепилса нима бўлади? Аччиқ, бўғувчан ҳовур кўтариладими? Ҳозир шундай бўлди. Хуршиданинг ловиллаб турган муҳаббатига сув сепилди. У ўзининг аччиқ ҳовурига ўзи бўғилиб қолди. Нима қилди у? Нима қилиб қўйди? Ширин гапларига учдими? Мўйловигами? Бир сават гулигами? Машина-сигами? Балки жарак-жарақ пулларига учгандир. Нимасига учди? Ҳаммасига! Машинасида катайса қилиш ёқармиди? Ёқарди. Жудаям ёқарди. Ресторанларга кириш, денгизга бориб чўмилиш, коронги лабораторияга кириб ўпишиш ёқармиди? Ёқарди. Ўзи-ку сураткашни аспирантдан, «учар»ни олимдан ажратолмас экан, нега суриштирмади? Нега онаси суриштираман деса, бир чек-кага йифиштириб қўйди? Эскилик сарқити, деб тўйга ҳам чандон аралаштирмади. Эскилик сарқити эмиш! Сарқит ким?! Ойисими, ўзими?! Ойисининг кўнгли бир нарсани сезгандирки, оёқ тираб олгандир.

У Анвар келса нима қилишини билмас эди. Албатта, бўйнига олмайди. Уйланганини ҳам, боласи борлигини ҳам айтмайди. Ана ўшандা боплайди. Шунаقا бопласинки, эркак бўлганига минг пушаймон қилсин.

Қизик, Анвар ҳеч нимадан бўйин товламади.

– Нима қипти? Аввалги хотинларим билан законний ажрашганман. Узум масаласи... Нима, мен ўғирлик киласяпманми? Одамларнинг ҳожатини чиқарайпман. Буям савобли иш... Илмий иш ҳам бўпқолар. Бирон

мирзақуруқ домлага «қуруғидан» чўзсам, уч ойда номзодлик диссертациясини ёзиб беради.

– Нега мени алдадингиз? – деди Хуршида аламдан тўлғаниб.

– Қизиқ экансиз, тўйни тезлаштиринг, деган менми, сизми?

Хуршида алам ичидаги уни тарсакилаб юборди, Анвар бир ранги ўчди-ю, индамади.

– Бўлдими? – деди кулишга харакат қилиб. – Аламингиздан чиқдингизми энди?

Хуршида бу одам билан ўрталарида каттакон жарлик пайдо бўлганини хис қилди. Бу жарлик икковларини икки соҳилга улоқтириб ташлади. Ким билсин, балки илгари ҳам жарлик бўлгандир-у, Хуршида кўрлик қилиб, нариги соҳилга қадам босгандир.

... Айвон томондан Қумри холанинг товуши келди.

– Тўлқинжоннинг тўйи юришиб қолди, овсинжон! Шунаقا-ю, кўнглим ғашроқ. Келиннинг акаси ичаркан. Отасиниям оғзи шалоқроқ дейишади.

– Синанг, ўргилай, обдан синанг. Қуш уясида кўрганини килади. Кейин куйиб, алангасига исиниб ўтирамнг, овсинпошша!

---

## ОҚ БУЛУТ, ОППОҚ БУЛУТ

*Бадиий асар ҳам тирик инсон каби түгилади. Унинг ҳам қысмати бўлади... Бу ҳикоянинг тарихи қизиқ. У бундан кўп йиллар аввал ёзилган. Аммо кейинчалик эълон қилинган китобларга киритилмаган. Сабаби шуки, кўп ўтмай яратилган «Икки эшик ораси» романida ҳам шунга ўхшаши тасвир бор: икки тигитчанинг жонини гаровга қўйиб, сувга калла ташлаши манзараси. Ёзувчи ўзини ўзи тақрорлашига ҳаққи йўқ. Лекин бу ҳикоядаги «ечим», хулоса бутунлай бошқача. Асар бугунги китобхонни ҳам ҳаяжонга солиши, ҳаёт ва муҳаббат деган сеҳрли нарса ҳақида ўйлашига умид қиласман.*

МУАЛЛИФ

Самолёт ёмғирдан қорайиб ётган бетон йўлкадан шиддат билан юргурилаб борди-да, бирдан муаллак тўхтаб қолгандек бўлди. Ёмғир томчилари муттасил чизик тортаётган иллюминатор ойнасидан ташқарига қарадим. Самолёт киялаб учиб борар, ердаги улкан резервуарлар, аэропортнинг йўлаклари липиллаб ортда қолар, олисда эса қорайиб турган ўрмон кўзга ташланар эди.

Зум ўтмай атрофни куюқ туман ўраб олгандек бўлди. Бунақа пайтда самолёт силкинавериб одамни безор қиласди. Ўзимни чалғитиш учун боя аэропортда олган газетани яна кўздан кечира бошладим. Аммо уни ўша ернинг ўзидаёқ ўқиб бўлгандим. Шунинг учун ҳафсаласизлик билан суюнчиқча бошимни қўйиб, кўзимни юмдим. Билмадим, қанча фурсат ўтди, бир маҳал ёнбош томондан аёл кишининг овози келди:

– Газетангизни кўриб берсам майлими?

Ёнимга келиб ўтирган аёлга эътибор бермаган эканман. Бурилиб қарадим. Қарадиму эсанкираб қолдим.

– Дилафрўзмисиз? Нима қилиб юрибсиз бу ерда?

У қуралай кўзларини сузиб, қандайдир босик, аммо ўқтам овозда кулди.

– Нима, самолётда сиздан бошқа одам учмаслиги керакми?

– Йўғ-е, мен... шунчаки, сизни бунақа вазиятда учратаман деб ҳеч ўйламагандим.

Дилафрўз тағин ўша, ўзининг гўзаллигини биладиган аёлларга хос босик, хиёл эркароқ овозда кулиб кўйди.

– Дуруст, танидингиз... Мен қариб қолган бўлсан керак, деб кўркувдим... – У бир зум ўйга толди-да, яна кулимсиради. – Кўришмаганимизга ҳам ўн саккиз йил бўпти.

Мен унга энди яқиндан, синчилаб карадим. Дилафрўз чиндан ҳам анча ўзгарган, тўлишиб, қандайдир виқорли аёлларга ўхшаб қолганди. Фақат кўзлари, кулганида ич-ичидан ёниб кетадиган қуралай кўзлари, ўзининг малоҳатига ишонган аёлларга хос хотиржам кулгуси ўша-ўша эди. Ҳозир унга шуни айтишим кераклигини билардим. Аммо оғзимдан бошқа гап чиқиб кетди:

– Мен сизни тушимда кўриб тураман. Ҳалиям...

Ҳа, мен уни ҳануз тушларимда кўриб туришим рост эди. Мен Дилафрўзни ҳар гал бир хил туш кўраман. У оппоқ кўйлакда бирдан пайдо бўлиб қолади. Қуралай кўзларида ўт ёниб, алланималарни гапиради, кулади... Кейин тўсатдан фойиб бўлади.

Ўшанда, ўнинчи синфда ўқиб юрганимизда у кунона тушимга кириб чиқарди. Сочлари чиройли турмакланган, оппоқ кўйлакда, кўзларида табассум... Бутун мактабда энг чиройли қиз шу – Дилафрўз эди. У бошқа мактабдан ўтган «янги» қиз бўлгани учунми, бир-бирини сенсираб гаплашадиган синфдошларнинг ҳаммаси уни сизлаб чақиради. Дилафрўз дарснинг биринчи куни оппоқ кўйлак кийиб, эшикдан кириб келганидаёқ уни

севиб қолдим. Кечалари уйкуга кетиш олдидан Худодан ёлғиз бир нарсани тилар эдим. Уни туш кўрсам, тушимда ақалли бир марта кўлидан тутсам... Эрталаб дарсга боргандা, ўзини кўрганда эса ундан қочишига уринар, худди аразлаган одамдек узокроқдан ўтишга ҳаракат қиласардим. Назаримда, Дилафрўз осмону фалакдан, оппок булатлар орасида сузиб юрган афсонавий малакка ўхшар, унга гапириш, тикилиб қарашиб гуноҳ эди мен учун.

Очигини айтганда, синфимиздаги болаларнинг кўпи ошиқ эди унга.

Ҳатто Абжал деган «атаман»имиз ҳам Дилафрўзниң шарпасини сезиши билан мулойим тортиб қоларди. Асли исми Абдужалил бўлса ҳам феъли ёмонлигидан Абжал деб лақаб олган бу бола кўпол, тўнкамижоз эди. Аммо бутун синф ундан ҳайикар, аллақандай безорилар тўдасига қўшилиб юришини билардик. Абжал билан фақат битта бола – тулкидек устомон Умар ошначилик қиласар, иккови доим бирга юришар, шунинг учун болалар унга «Дум» деб лақаб қўйишган эди.

Мұхабbat одамни чалғитади, дейишади. Ишонмайман. Мұхабbat одамга мислсиз куч-кудрат бағишилар экан. Ўша йили шу қадар яхши ўқий бошладимки, авваллари уч олса ҳам куюнмайдиган, беш олса ҳам суюнмайдиган мендек бепарвонинг бунчалик билагон бўлиб қолганига ўқитувчилар ҳам, уйда ақаларим ҳам ҳайрон эди. Мен бўлсам, дарсда қойилмақом қилиб жавоб берәётганимда беш олишни эмас, Дилафрўзни қойил қолдиришни ўйлардим.

Битириш имтиҳонлари чўзилгандан чўзилиб, ҳаммамизнинг силламизни қуритиб юборди. Болалар мияси ачиб кетганидан нолир, бу азоблардан тезроқ қутулишни тилар, мен бўлсам, имтиҳонлар янайам чўзилишини ичичимдан орзу қиласардим. Мактабни битирсак, Дилафрўз билан бир умр видолашадигандек...

Эсимда, ўша қуни кимё фани имтиҳонидан бир қун аввал йигилдик. Негадир ўқитувчимиз келмади. Кўпчилик тарқалиб кетди. Саратон иссигидан қизиб кетган, бўр иси анқиб турган синфда ўн чоғли бола қолдик.

– Яқинда имтиҳонлар тамом! – деди болалардан бири орзумандлик билан. – Кейин ҳаммамиз ҳар қаёққа «хушт!»

Парта устига миниб ўтирган Абжал дўриллаб кулди.

– Биз қаёққа кетсак ҳам Дилафрўзни обкетамиз! – Бу гапни у шунчалик беписандлик билан айтдики, ўрнимдан сакраб туриб кетдим.

– Нима-а? – дедим чўзиб. – Сен...

«Олиб кетасанми?» дейишга тилим бормади. Олиб кетиши у ёқда турсин, Дилафрўз мана шу Абжалнинг ёнига келишини тасаввур қилишнинг ўзи даҳшат эди мен учун.

Абжал боягидан ҳам беписандроқ оҳангда кулди.

– Ие, сен нега жириллайсан? Эшишиб қўй! Мен Дилафрўзхонни...

У ёғи қандок бўлганини билмайман. Бир маҳал иккамиз полда думалашиб айланга бошладик. Абжал сочимдан чангллаб туриб, бошимни уч-тўрт ерга урган эди, кўз ўнгим қоронғилашди-ю, ҳеч нима кўринмай қолди. ўзимга келганимда Низом деган ўртоғим суюб ўтиради. Амаллаб ўрнимдан турдим. Оғзим негадир шўртанг эди. Кафтим билан артган эдим, қўлим қон бўлди. Абжал йўл-йўл кўйлагининг йиртилган ёқасини ғижимлаганича кимёвий формулавалар ёзилган тахта олдида турар, хансираф нафас оларди.

– Агар яна битта гапирсанг, ё сен ўласан, ё мен! – Бу гапни шу қадар ишонч билан айтдимки, атрофни ўраб турган болаларнинг нафаси ичига тушиб кетди.

– Унақа бўлса бир ёқлик қилиш керак бу масалани. – Боядан бери охирги партада ўтирган «Дум» секин-секин юриб яқин келди. Қувлик билан ҳаммага бир-бир қараб

чиқди-да, елкасини учирив давом этди. – Дилафрўзни Абжал яхши кўришидан хабарим бор эди. Энди Эргаш ёндан чиккан ёнқозиқ бўлиб қолди. – У менга имо қилди. – Йигитчасига бирон чора топиш керак энди.

Низом ранги ўчиб, унинг олдига бостириб борди.

– Гапни айлантирма, «Дум»! Нима демокчисан?

– Бирон нарсадан гаров ўйнашсин, ора очик бўлади-кўяди!

– Масалан?

– Масалан... – «Дум» мушкул муаммо қархисида колгандек пешонасини тириштириди. – Масалан, Бўрижарга калла ташлашдан. Ким омон чикса...

– Думингни ликиллатма, «Дум»! – Низом нафрат билан ундан юзини ўғирди. – Эргаш яхши сузолмаслигини билиб, жўрттага айтяпсан.

Мен кафтим билан оғзимни артганча, уларнинг баҳсини бепарво эшишиб турардим. Гёё бу гапларнинг менга мутлақо алоқаси йўқдек. Факат «Бўрижар!» дейишганида бултур бир синфдошимиз темир йўл кўпригидан калла ташлаб, сувдан чикмагани эсимга тушди. Унинг жасадини бир хафтадан кейин аллақайси тўғондан топиб келишган эди.

– Хўш, нима бўпти? Гаровни эркак киши ўйнайди. – «Дум» хар эҳтимолга қарши Абжалининг яқинрогига бориб, овозини баландлатди. – Йигит деган дўппи тор келганида «вийт» деб қочмайди.

Секин ўрнимдан турдим.

– Кетдик.

Низомнинг ранги қув ўчиб кетди.

– Жиннимисан! Вей, ахмоқ бўлдингми?

– Ҳозирмас, – деди Абжал ҳамон кўйлагининг йиртиғини ғижимларкан. – Эртага соат ўнда, кўприк устида.

«Дум» қўли билан Низомга имо қилди:

– Низом сенинг секундантинг бўлади. Мен Абжалга секундантлик қиласман.

Ўша оқшом ярим кечагача хаёлан Дилафрўз билан гаплашиб ётдим. Қани энди бир марта кўрсам, охирги марта кўриб қолсам... Йўқ, у олисда эди. Оқ, оппоқ булатлар устида эди. Аксига олиб, ўша куни ақалли тушимга ҳам кирмади.

Эрталаб карахт бўлиб уйғондим. Бошим лўқиллаб оғир, негадир худди йиглаган одамдек кўзим ачишарди.

Кўчага чиқсам, дарвоза олдида Низом турибди.

– Борма! – деди қўл силтаб. – Биласан-ку, Абжал бандит! Тегирмонга тушса бутун чиқади. Нима, жонингдан тўйдингми?

Кўнглимнинг бир чеккасида Низом тўғри айтиётганини билиб турардим. Аммо ўзим ҳам тушуниб етмаган қандайдир қайсар туйғу нуқул олға итараарди. Қайтага яхши эмасми? Сен ўлиб кетасан, Дилафрўз ҳаммасини эшитиб, зор-зор йиглайди... Сени севмаганига, қадрингга етмаганига пушаймон бўлади. Абжалдан бир умр нафратланиб юради.

– Менга қара, Низом, – дедим совуқконлик билан. – Кўрқаётган бўлсанг бормай қўя қол, менга секундантнинг кераги йўқ.

Низом бора-боргунча мени ҳам, Абжални ҳам, «ҳамма ғалвани бошлаган» ўша «Дум»ни ҳам сўкиб борди. Менга бу гаплар таъсир қилас, хаёлим бошқа ёқда эди. Дилафрўз қаёқдайкин хозир? Нима килаётганийкин?

Кўприк устига етиб келганимизда ҳеч ким йўқ эди. Кун эрталабдан қизиб кетган. Ялтираб ётган темир йўл изиданми, корамойга беланган шпалларданми, чучмал хид анқиб, нафасни олгудек бўларди. Кўприк четига ўрнатилган лиқилдоқ панжарага суюниб, паастга қарадим. Юқорида ёйилиб оқаётган сув шу ерга – темир йўл остига келганида кескин тораяр, икки чети бетон-

лаб қўйилган ўзандан шиддат билан оқиб ўтиб, нариги томондан отилиб чиқиб кетар эди. Шунинг учун бўлса керак, юқоридан сарғайиб келаётган сув нариги томондан кўпикланиб, оппоқ оқариб чиқарди. Жарнинг у юзида сап-сариқ қамишзор кўзга ташланар, янаям нарироқда ботқоқлик қорайиб кўринарди. Терак бўйи пастлиқда аждардек вишиллаётган Бўрижарга қарашим билан юрагим орқага тортиб кетди.

– Қалай, юрагинг пўкиллаб қолмадими?

Дўриллаган овоз эгасини таниб, бурилиб қарадим. Абжал бир қўлида «портвейн» шишаси, бир қўлини белига тираганча кинояли илжайиб турарди. Нарироқда эса Низом билан «Дум» юзма-юз туришар, Низом қўлини пахса қилиб, жаҳл билан алланималарни тушунтирас эди.

– Кетар жафосида отиб оласанми? – Абжал шундай деди-ю, шишани чаққон очди. Боши устида баланд кўтарганча кулқиллатиб ича бошлади. У хар ютинганида дўрдоқ лабининг икки четидан қип-қизил вино сизиб тушар, кўйлагининг ёқасидан тошиб, пастга оқар эди. Турқи кўзимга шу қадар жирканч кўриниб кетдики, ижирғаниб юзимни ўгирдим.

Дилафрўзни шунга топшириб қўяманми? Шунга-я! Ундан кўра бир марта эмас, ўн марта чўкканим яхши эмасми? Абжал винони ичиб бўлди-да, кафтининг орқаси билан лабини артди. Шишани улоқтириб юборди. Шиша темир йўл четидаги қиррадор тошлар устига тушиб, чилчил синди.

– Қани, ташла тангани! – Абжал «Дум»га қараб қичкирди. – Ташла, толеимизни синааб кўрайлик!

«Дум» дарров жилпанглаб етиб келди.

– Мана бу 20 тийинлик, – деди қўлидаги тангани кўз-кўз қилиб. – Қаёгини танлайсан?

Абжал кайфдан қизарган кўзларини сузиб, кўл силкитди.

- Менга бари бир.
- Сен-чи?
- Менгаям!
- Бўлмаса бундай...

Узокдан эшитилган гудок товуши «Дум»нинг гапини бўлди.

– Шошма, поезд ўтиб кетсин! – деди у билағонлик билан. – Ҳаммаси қоидаси билан бўлиши керак... Эркак-часига...

Шиддат билан келаётган тепловоз яқинлашиб қолганда яна бир сигнал берди-да, вагонларни судраганча гулдураб ўтиб кетди. Йўл четидаги мазут сачраган, ковжираб қолган ўтлар силкиниб-силкиниб тагин қаддини ростлади. Зум ўтмай пастда яна Бўрижарнинг гувиллаши эшитила бошлади.

– Гап бундоқ, 20 тийин деб ёзилган томони тушса, Эргаш биринчи бўлиб калла ташлайди. Оркаси тушса – Абжал. – «Дум» шундай деди-да, тангани чириллатиб осмонга отди.

– Мана, Низом, сен ҳам кўр! – «Дум» шпалга тушган танга устига энгашди. – Қарасанг-чи!

Низом икки темир йўлнинг қоқ ўртасида караҳт бўлиб туарар, чамаси, бу гаровнинг шунчаки ўйин эмаслигига ҳалиям ишонмас эди. Мен бўлсам аллақачон хукм қилинган одамдек хотиржам эдим.

– Мана, ўзинг кўр! – деди «Дум» негадир қувониб. – «Чув» тушди. Биринчи бўлиб Эргаш ташлайди.

– Бекор айтибсанлар! – Низом жон ҳолатда бақириб юборди. – Сенлар Эргашни ўлдирмоқчисан!

Мен қизиб ётган рельсга ўтиридим-да, индамай туфлимнинг боғичини еча бошладим. Пайпоғимни ечаётганимда негадир Низом ҳам, у билан ғижиллашаётган «Дум» ҳам жимиб қолишиди. Туфлимни бир чеккага кўйиб, ўтирган жойимда бурилиб қарадиму беҳуш одам-

дек анграйиб қолдим. Ўн қадамча нарида Дилафрўз турарди. Худди ўша – тушларимда кўргандек оппоқ кўйлак кийган, соchlари чиройли турмакланган Дилафрўз турарди. У оқ туфлиси билан шпалларни битта-битта босиб, яқин кела бошлади. Нима бу? Оппоқ булутларнинг менга қилган сўнгги саховатими?

– Тинчликми? – деди у яқин келиб.

– Тинчлик, – «Дум» ноқурай илжайди. – Чўмилмоқчимиз.

Дилафрўз менга ўгирилди.

– Эргаш, сиз ҳам чўмилмоқчимисиз?

Мен шундагина ўзимга келдим. Унинг рўпарасида ялангоёқ, бемаъни алпозда ўтирганим учун мулзам бўлиб, секин ўрнимдан турдим.

– Шунаقا, – дедим иложи борича совуқкон оҳангда, – чўмилмоқчиман.

Дилафрўз кескин Абжалга бурилди.

– Нима, мен кўчада тушиб ётган чақаманми, орқамдан гаров ўйнайсизлар??

Дилафрўз Абжалга гапирди-ю, менинг ичим музлаб кетди. Унинг бу қадар шиддатли оҳангда гапирганини хеч эшиитмаган эдим. Кўзимни қаёққа яширишни билолмай қолдим.

– Ким етказди? – Абжал лабини бир чеккаси билан илжайди. – Ҳеч ким сизни чақиргани йўқ-ку!

Абжалнинг Дилафрўзга киноя қилиши вужудимни қақшатиб юборди.

– Менга қара, ўв! – дедим овозим титраб. – Гапни кўпайтирма. Бошладик!

Абжал оёгини рельс устига кўйганича туфлисининг боғичини еча бошлади. Шу пайт ҳеч кутилмаган воқеа бўлди. Дилафрўз «Дум» билан Низомнинг орасидан ўтди-да, Абжалнинг елкасига қўлини кўйди.

– Кулоқ солинг.

Абжал бошини кўтарди.

– Хўш?

– Мен... – Дилафрўз Абжалнинг бошига хиёл эгилди. Кўзларида аллақандай ўт ёниб турарди. – Мен сизни яхши кўраман. Шуни билмоқчимидингиз?

Кулокларим шангиллаб, кўз ўнгим коп-коронги бўлиб кетди. Гира-шира туманлик орасида Абжалнинг бир зум анграйиб қолганини, кейин қаддини ростлаганини кўрдим. Юрагим гурсиллаб ураётганини, оёкларимдан мадор кетиб бораётганини сезиб турардим.

Зум ўтмай киррадор тошлар устига чўккалаб қолдим. Кечалари тушимга кириб чиқадиган Дилафрўз шуми? Хаёлимда булуллар орасида сузиб юрадиган Дилафрўз шуми? Ҳозиргина осмонда учиб юрган Дилафрўз бирдан ерга тушди. Йўқ, ердан ҳам пастрокқа тушиб кетди... Ана, у кетяпти.

Абжалнинг, ҳамма ёмон кўрадиган, ҳамма жирканадиган Абжалнинг қўлидан тутиб кетяпти! Бундан чиқди, Абжал кеча бекорга гапирмаган, бундан чиқди илгариям...

Абжал унинг оппоқ билагидан тутиб борар, у эса тасмадек рельс устидан дорбозларга ўхшаб эҳтиёткорлик билан мувозанат сақлаб юриб кетар эди. Гўё бир умр шундай юрадигандек. Гўё Абжал бир зум қўлини қўйиб юборса, йиқилиб кетадигандек. Бир неча қадам юришгандан кейин у орқасига бурилиб қаради. Кейин яна... Мен юзимни чирт ўғирдиму бошимни чанглаб қолдим.

Анчадан кейин хушим ўзимга келди. Рўпарамда Низом турарди. У афтиимга тикилиб турди-да, қандайдир куруқ оҳангда сўради:

– Қалай, ўлишингга арзирканми?

– Сенга нима! – дедим жиннилардек бақириб. – Сенинг нима ишинг бор? Йўқол, тошингни тер!

Эртасига кимё имтиҳонидан уч олдим. Чиқсан, мактаб дарвозаси олдида япроқларини чанг босган олча та-

года Дилафруз илжайиб турибди. Кўзимга шу қадар хунук кўриниб кетдики, юзимни тескари ўгирдим. Шитоб билан ўтиб кетаётган эдим, чақирди:

– Эргаш...

– Нима! – дедим бақириб. – Абжал камлик қилиб колдими? Бирпас сабр қилсанг чиқади! – Шундай дедиму югуриб кетдим.

Кейин... ҳаммаси тамом бўлди. Мактаб ҳам. Мухаббат ҳам... Тошкентдек шаҳри азимда институтга киришга кўзим етмасди. Омадим чопдими, яхши тайёргарлик кўрдимми, ҳарқалай Темир йўл транспорти инженерлари институтига кирдим. Ора-чора Низомдан хат келиб турарди. Икки марта Дилафруз сени сўради, адресингни берайми, деган мазмунда ҳам ёзди. Кўнглимда қувончга ўхшаш бир нима йилт этгандек бўлди-ю, ўша заҳоти сўнди. Унинг Абжал билан етаклашиб кетаётгани, мен бўлсам аҳмоқона бир алпозда темир йўл четида анграйиб ўтирганим кўз ўнгимга келиб, «аравасини тортсин» деган мазмунда жавоб ёзиб юбордим. Шунда ҳам ҳар гал уни эсласам, юрагимнинг бир чети жиз этиб кўярди... Бора-бора жизилламайдиган бўлди... Тўртинчи курсни битирган йилим уйландим. Шунда ҳам қачондир кўнгил қўйган кишинингни унутиш оғир бўларкан, унинг қисматига бефарқ қарай олмас экансан. Дилафруз Андижон Тиббиёт институтида ўқиётганидан хабарим бор эди. Ўша йили у ҳам турмушга чиққанини эшитдим. Йўқ, юрагимда рашк ёки изтироб эмас, ўқинчга ўхшашроқ бир нарса уйгонди. Уйгонди-ю, сўнди. Фақат бир нарсага ҳайрон қолдим. Дилафруз Абжалга эмас, бошқа йигитга турмушга чиқибди...

Кейин булар ҳам унutilди. Фақат онда-сонда тушларимга оппоқ қўйлак кийган Дилафруз кирадиган бўлди.

Ўн саккиз йил оз муддат эмас. Дилафруз чиндан ҳам ўзгарган, аммо ўқтам кулгиси, куралай кўзларининг киборона бокиши ўша-ўша эди.

– Мен сизни тушимда қўриб тураман, – деб тақрорладим унинг қўзига тикилиб.

– Йўғ-е! – Дилафрўз кўзларидан ўт чақнаб кулди. – Наҳотки?

– Бу гапни сизга ёқиши учун айтаётганим йўқ. Бор гап шу.

– Қаранг-а, мен шунча ҳаракат қилсам ҳам сиз сира тушимга кирмайсиз.

Бу гапни у ярим ҳазил билан айтди. Бироқ, менинг кўз ўнгимда яна ўша совуқ манзара жонланди. Унинг Абжал билан етаклашиб кетгани-ю, мен аянчли қиёфада термилиб қолганим. Ҳарчанд ўзимни тутишга уринсан ҳам бундай паллада айтиш мумкин бўлмаган энг аҳмоқона гап оғзимдан чиқиб кетди:

– Абжални ҳеч кўрасизми?

У ярқ этиб қаради.

– Кимни-и-и? – деди чўзиб

Кулдим.

– Абжални-да! Эсингиздан чиқдими?

Дилафрўз кўзимга узоқ, синовchan тикилиб турди-да, негадир истехзоли кулди.

– Бошимга ураманми уни?! – деди қошини чимириб.

Эсанкираб қолдим.

– Ахир ўшанда...

Дилафрўзning кўзларига сезилар-сезилмас изтироб шарпаси соя солиб ўтгандек бўлди. Бироқ, зум ўтмай кулимсираб сўради:

– Докторлик ишингиз битиб қолдими?

– Сиз... сиз қаёқдан биласиз? – дедим баттар хайратланиб.

– Мен шунаقا билағонман! – Унинг гап оҳангига яширин истехзо бор эди. – Ҳаммасини биламан! Қачон номзодлик диссертациясини ёқлаганингизни, Гули билан тўйингиз ўн тўртинчи июнь, шанба куни бўлганини.

Тўнгич ўғлингиз май ойида туғилганини... Хотинингиз ҳамшира бўлиб ишлашини... Айтаверайми? – У қулди. Аммо бу сафар кулгусида ўқтамлик йўқ эди. Буни ўзи ҳам сезди шекилли, юзини ўгириб, бошини қуий солди...

Вужудим бирдан бўм-бўш бўлиб қолди. Самолёт ҳамон гувиллаб учиб борар, назаримда менинг қалбимда ҳам алланима гувиллаб жунбушга келган эди...

Нимага у сенинг ҳаётингни миридан-сиригача билади? Илмий ишингниям, қачон уйланганингниям... Нимага? Нега у Абжалнинг номини эшитганда ижирғанди? Демак, Абжалдан нафратланар экан-да?! Хўш, ўшанда кўприк устида ўзингни аянчли қиёфада колиб кетганингни ўйлайсан-у нега Дилафрўзни ўйламайсан? Ўшанда Дилафрўз учун, мактабнинг энг гўзал, энг мағрур қизи учун ўзи ёмон кўрган, ўзи жирканадиган одам билан кўл ушлашиб кетиш осон бўлмагандир? Ким учун қилди бу ишни? Шошма... ўшанда рельс устида амаллаб мувозанат сақлаб кетаётганида нима учун орқасига қайта-қайта термилиб қаради? Балки ўшанда унинг кўзларида инграган изтиробини пайқамай қолгандирсан? Балки эртасига мактаб дарвозаси олдида сени кутиб турганида ҳаммасини тушунтироқчи бўлгандир? Сен бўлсанг, уни ҳақорат қилиб, жўнаб қолгансан. У шундаям сени кечирган. Бўлмаса, нима учун Низомдан қайта-қайта суриштириди сени? Нимага сен билан учрашишни тилади? Нимага? Нимага хотинингдан тортиб болангнинг туғилган кунигача билади? Нимага? Нимага?

Бир-биридан аччик, бир-биридан армонли саволлар кетма-кет ёпирилиб келар, самолёт моторининг гувиллаши, миямда чарх ураётган саволлар – ҳаммаси аралаш-куралаш бўлиб вужудимни ларзага солар, Дилафрўз бўлса ҳамон нариёққа қараб ўтирас эди. Мен унинг юзидағи ифодани аниқ кўрмасдим. Аммо, кўрмасам ҳам ўзимнинг беписандлигим туфайли, ўзимнинг бефаҳмлигим туфай-

ли шунча пайтдан буён пайқамай келган туйғуларни энди аниқ сезиб турардим. Фақат... фақат энди кеч бўлганди. Ажаб, сендеқ «олим», сендеқ «зукко» эркакнинг бир аёл қалбини тушуниши учун ўн саккиз йил керак бўлибди! Ўшандаям тасодифан, тўсатдан... Демак, шунча йиллардан бери бежиз тушларингга кирмаган экан-да?!

Сен бўлса... Сен галварс бўлса...

Дилафрўз ҳамон бошини қуи солиб, нариёққа қараб ўтирас, назаримда у яна ўша оқ, оппоқ булувлар орасида учиб юрадиган малакка айланиб қолганди...

---

---

## ҚУЁШ ТАРОЗИСИ

Муроджон бугун тағин кеч қолди.

Насиба дераза рўпарасидаги пастак юмшоқ кресло-да ўтирад, оқшом тушиб қолган эди. Келин тушган уйнинг файзи бошқача бўлади. Деразалардаги нафис дар-пардалар, оёқ остидаги чўғдек гиламлар, деворда оҳиста чиқиллаб турган каттакон осма соат, нақшинкор араби гарнитур – ҳаммаси бу хонадонда яқинда тўй бўлганидан дарак бериб туради. Нариги уйда қайниси телевизорни бақиртириб футбол кўряпти. Ҳали қайнонаси эгачисини-кига кетди. Умуман, уларнинг хонадони гавжум. Аммо Муроджон ёнида бўлмаганидан кейин Насиба бари бир ёлғиз...

Муроджон кейинги пайтда айниди. Авваллари ишдан чиқа солиб уйга югуради. Йўқ, кейинчалик тез-тез кечи-кадиган, баъзан яrim кеча қилиб келадиган одат чиқарди. Тағин топган баҳонаси битта! Навбатчилик қиласмиш. ўлар энди, ҳар куни битта одам навбатчилик қиласверса. «Навбатчилик баҳона, дийдор ғанимат» бўлмасин тағин.

Насиба девордаги соатга қаради. Тўққиздан ошибди. Ташқарида қоронғи қуюқлашиб борар, аллақаерда курбақа курилларди... Бир вақтлар Муроджон икковлари боғларда атайлаб кун ботишини кутиб ўтиришар, оқшом қуюқлашиб кетганидан кейин ўпишишарди.

Уларнинг танишуви ғалати бўлди. Насиба билим юртининг тўртингчи курсида ўқирди. Қишида шамоллаб

қолди. Бир-икки қун парво қилмай ўқишига қатнаб юра-верди. Аммо кечаси тўсатдан иситмаси кўтарилиб кетди. Дадаси билан ойиси қўрқиб кетишиди. Кўшнининг машинасида касалхонага оборишиди. Ўпкаси қаттиқ шамоллаган экан. Уни Мурод Воҳидович деган дўхтир даволади. Насиба илгаријам бетоб бўлган, врачларга қаратганди. Аммо мана шу баланд бўйли, қотмадан келган врачнинг қўли баданига тегиши билан негадир қамчи еган отдек сесканиб кетди. Нариги каравотда ётган хотин унинг ҳолатини сезди. Пиқиллаб кулиб юборди. Дўхтир заҳаргина экан.

– Хотиржам бўлинг, кўзим учиб тургани йўқ, – деди қовофини солиб. – Чукур нафас олинг...

Насиба соғайиб чиқиб кетгунча ҳам Мурод Воҳидович билан тузук-куруқ гаплашмади. Айниқса, унинг қош-кўзлари попукдек Марзия деган ҳамшира қиз билан очилиб-сочилиб гаплашиб турганини бир-икки кўрганидан кейин ўзини бутунлай беписанд тутадиган бўлди. Агар Дилфузанинг тўйида яна учрашиб қолишмаса, балки унуби юборган бўлармиди...

Дилфуза Насибанинг жонажон ўртоғи. Шу қиз турмушга чиқадиган бўлди-ю, ЗАГСдан ўтиш маросимига Насиба ҳам борди. Тўгриси, дугонасининг баҳтига жуда ҳаваси келди. Умрида бунақа тантанани кўрмаган эди. Қиз томон салкам йигирма киши бўлиб боришиди. Куёв томондан ҳам анча йигитлар келди. ЗАГС мудираси келин-куёвни қутлаб, нутқ сўзлади. Куёв Дилфузага бриллиант сирға, олтин узук хадя қилганида ҳамма қарсак чалиб юборди. Насиба куёв томондан келган йигитлар орасида турган Мурод Воҳидовични ташқарига чиқишиганидан кейингина кўрди. Доим халатда юргани учунми Насиба эътибор бермаган экан. Бу гал ярашиқли кийиниб олган, соchlарини силлиқ тараган, галстук таққан Муроджон

унинг кўзига чўғдек кўринди. Бош силкиб, салом берди. Муроджон шу ондаёқ унинг ёнига келди.

– Сиз келин томонмисиз? – деди унинг кўлинин оҳиста сиқиб. Насиба индамай бош силкиди. – Мен куёв томонман. Демак, қуда эканмиз... – Муроджон кулиб қўйди.

Йўқ, у кўп ҳам заҳар эмас экан. Машинада шаҳар айланишганида ҳам, «Лаззат» кафесида ўтиришганида ҳам Насибанинг кўнглини овлашга ҳаракат қилди. Кафедан чиқишганида Муроджон жиндек конъяк ичиб олган эди. Ҳамма ҳамма билан, у Насиба билан.

– Яхшими? – деди Муроджон. Насиба тушунмади.

– Нима яхшими?

Муроджон келин-куёв томонга имо қилди.

– Шунақа дабдабалар ёқадими сизга?

– Албатта! – Насиба елкасини қисди. – Умрида бир марта бўладиган тўй...

– Менга ёқмайди. – Муроджон жилмайган кўйи илтимос қилди: – Кузатиб кўйсам майлими? Бари бир, ҳозир ҳамма тарқаб кетади.

Насиба индамади...

Улар тез-тез кўришиб турадиган бўлишди.

Бир куни икковлари далага чиқишиди. Шунчаки айлануб келиш учун. Шаҳар четидаги хўжаликка қатнайдиган автобусга ўтиришди-ю, ҳалқа йўлдан ўтгандан кейин дуч келган бекатда тушиб қолишиди. Ёз қуёши олис уфқда оловли бир туманлик ичига ботиб бораарди, Муроджон кўёшга тикилганча, чуқур ўйга толган эди. Унинг шу ўтириши Насибага нима учундир ғамгин кўриниб кетди.

– Нимани ўйлаётпиз? – деди унинг елкасига кафтини кўйиб.

– Ўйлаётганим йўқ. Орзу қиляпман, – деди Муроджон ботиб бораётган қуёшдан кўз узмай. – Тўйдан кейин иккаламиз денгиз бўйига борсак. Майли, қайси денгиз

бўлса ҳам... Ой чиқиб турган бўлса. Иккаламиз қирғоқда шундоқ ўтириб, ойдинда товланиб турган денгизни томоша қилсак...

Насибанинг юраги қувончдан орзиқиб кетди. Ширин жилмайиб, унинг елкасига бош қўйди.

Кейинчалик у ўша – Муроджон айтган манзарани кўп ўйладиган бўлди. Умрида денгизни кўрмаган эди. Аммо энди шовуллаб турган денгиз кўз ўнгига аниқ келадиган бўлди. Ана, тип-тиниқ тўлин ой нурида денгиз ойнадек ярақлаб турибди. Тўлқинлар шовуллаб қирғоққа урилади. Даҳшатли гувуллаб сурон солади. Аммо у кўркмайди. Унинг ёнида Муроджон бор. У Муроджоннинг кўксига бошини қўйиб ўтиради. Муроджоннинг юраги бир меъёрда гурс-гурс уради. Насибани аллалагандек бўлади.

Турмушга чиқаётган қизнинг орзусидек афсонавий нарса бўлмайди. Назарида, тўй ўтиши билан ўзга бир оламга кириб қоладигандек, худди бир сайёрадан бошқа сайёрага учеб кетаётгандек туюлади. Насибани ҳам шу олам асир этганди. Агар ўзи ойисига шипшитиб қўймаганида, Муроджон юборган совчилар дадасига ёқмаслиги тайин эди. Аввало, Муроджоннинг отаси йўқлиги қиз томонга унчалик маъқул келмади. Қолаверса, Насиба беш ўғил орасида ёлғиз эди. Дадаси қизига ўзгача меҳр қўйган. Кўп ийллардан буён адвокат бўлиб ишлайди. Топганини битта қизидан аярмиди? Куёв томоннинг қўли қисқароқ экан. Куёв бир ўзи ишласа, тағин укаси, синглиси бўлса... Насиба бунисини ҳам ўз зиммасига олди. Бир куни гап орасида Муроджоннинг кўнглини оғритмайдиган қилиб қистириб кетди:

– Дадамлар жуда қизиқлар-да, Муроджон ака. Сен ёлғиз қизимсан, дейдилар. Мендан орзу-ҳаваслари кўп эмиш. Эсингиздами, Дилфузанинг тўйи зўр бўлувди-а?

Муроджон уни юпатди:

– Кўнглингиз тўқ бўлсин. Уялтириб қўймайман.

Чиндан ҳам Насибанинг дадаси қуёв томондан хур-  
санд бўлди. Насиба Дилфузага ҳавас қилган эди. Худди  
ўшандай машинада сайр қилишди, худди ўша «Лаззат»  
кафесига киришди. Чиқиб келишаётганида у Муроджон-  
нинг қулоғига шипшиди.

– Яхшими?

– Нима? – деди Муроджон.

– Мана шунаقا дабдабалар ёқадими сизга?

Муроджон жилмайиб, унинг белидан қучди.

– Қанақа бўларкан! – деди Насиба бармоғи билан  
пўписа килиб.

Тўй ниҳоятда хушчақчак ўтди. Муроджон билан бир-  
га ишлайдиган Ислом ака деган пак-пакана одам бор экан.  
Шу киши тамадаликни айниқса боплади. Шунаقا қизик  
гаплар айтдики, тўйга ўз-ўзидан файз кўниб, ҳамманинг  
қулфи дили очилиб кетди. Аммо Насиба ўзга оламга –  
сирли оламга кириб қолгани йўқ. Ҳаёт ўз йўлида давом  
этарди. Муроджон ҳар куни ишга отланади. Насиба но-  
нушта тайёрлайди, кўлига дазмолланган рўмолча тутади,  
кейин қайниси билан қайнинглиси мактабга кетади. Ун-  
дан кейин қайнонасининг чой-нонини тайёрлаб беради-  
да, ўзи ҳам ишга жўнайди. Кунлар худди муттасил айла-  
наётган глобусга ўхшайди. Ҳар куни ўша манзара...

Энг ёмони бу эмас. Энг ёмони шуки, Муроджон айни-  
ди. Насиба буни дарров сезди. Тўйдан кейин икки ҳафта  
ўтмай, навбатчи эдим, деб кеч келди. Кейин ҳафтада икки  
маргадан «навбатчилик» қиласиган бўлди. Бора-бора ку-  
нора ярим кеча қилиб келадиган одат чиқарди. Насиба  
гапирса, тескари қарайди. «Ишим кўп, нима қилай?» –  
дейди. Аввалига Насиба тўй ташвишлари билан чарча-  
гандир, деб ўйлаганди. Йўқ, бу ерда бир сир бор. Мурод-  
жон биринчи марта навбатчиликни баҳона қилгандаёқ  
Насибанинг кўз ўнгига қилпанглаб турган Марзия кел-

ган, юраги жизиллаб кетган эди. Кейин шубҳалари янам кучайди. Бир куни қайнонасига секин гап очган эди, насиҳат эшиитди: «Эркак киши тирикчилик деб юради-да, болам, юрагингизни кенг қилинг», – деб юпатди.

Тирикчилик эмиш. Нима етишмайди! Рўзғори бут бўлса, ҳамма нарса етарли бўлса, тагин нима керак? Йўқ, бошқа гап бор. У киши айшини қилиб юрадилар, Насиба ўшўпрайиб уйда ўтиради. Мана ҳозир ҳам... Нима, ердан чиққанми?!

Унинг хўрлиги келди. Тағин денгиз эмиш. Ойдин кечалар эмиш!

У ўрнидан туриб кетди. Дераза олдига келди. Ташқари қоронғи бўлиб кетган, кўчадан ора-чора машиналар гувуллаб ўтиб қоларди. Нима қилсан? Уйига борсинми? Жуда яхши бўлади-да! Муроджон келсаки, уйда Насиба йўқ. Ҳа, зир югуриб қолмас экан-а! Ўшандা билади саёқ юриш қанака бўлишини!

У беихтиёр тошойна рўпарасига келди. Ойнадан қийғоч қошлари чимирилган, сурма тортилган кўзларида эҳтирос яширинган тиник чехрали қиз қараб турарди. У ўзининг аксига ўзи бир зум тикилиб турдида, сочини чаққон турмаклади. Қавиб тикилган нейлон халатини ечиб, атлас кўйлак кийди. Ҳозир айни вақтида! Қайнонаси йўқ, бирор йўлини тўсмайди. У айвонга ўтиб, ҳовлига тушди. Айвон пештоқидаги лампочка ёруғида ҳовлидаги атиргуллар сокин, хаёлий товланиб турарди.

У тез-тез юриб, дарвоза олдига келди. Бу хонадондан бир умрга чиқиб кетаётгандек, хўрсиниб эшикни очди. Ташқарига чиқди-ю, уйига боролмаслигини дафъатан тушунди. Йўқ, дадаси дарров сезади. Бемахалда борганидан тушунади. Тўй аниқ бўлганида, олдига ўтқазиб қўйиб, лўндағина қилиб тушунтирган эди. «Ўзинг хоҳлаб

қиляпсан шу ишни, билиб қўй, тўйдан кейин майда-чуйда гапларни қўтариб келадиган бўлсанг, дилингни сиёҳ қилиб қўяман».

Ўша сўзлар қулоғи остида тагин жаранглагандек бўлди-ю, бир зум тўхтаб қолди. Лекин шу ондаёқ бошқа бир фикрдан кўнгли ёришиб кетди. Ишхонасига боради! Қани кўрсин-чи, қанақа навбатчилик қилаётган экан Мурод Воҳидович! Ким уни ҳар куни ярим кечагача олиб ўтирас экан. Бошлиқларими ёки анови қўк кўз Марзиями?

У дуч келган машинага қўлини кўтарди. Оппоқ «Жигули» анча нарига ўтиб тўхтади.

– Бешинчи касалхонага! – деди Насиба орқа ўриндиқка ўтириб.

Ўрта ёшлардаги киши бир зум иккиланиб турди-да, индамай йўлга тушди.

Насиба бунақа пайтда касалхонага кириш қийинлигини биларди. Йўл-йўлакай қоровулга нима баҳона килишни ўйлаб борди. Лекин унинг омади чопдими, буёқдан қоровулхонага кириши билан у ёқдан «Тез ёрдам» машинаси чироғини лопиллатиб келиб қолди. Коровул чол оқсоқланиб бориб панжарали дарвозани очгунча, Насиба лип этиб ичкарига кириб олди. Ҳатто кинолардаги сингари чаққонлик қилгани учун кувониб ҳам қўйди. Ана, ўша биринчи қават, терапия бўлими. У ойнабанд эшикни очиб, ёп-ёруғ айвонга кирди. Вестибюль кимсасиз, чекка-чеккадаги скамейкалар бўш эди. Насиба юраги гупиллаб урганча тўхтаб қолди. Ҳозир худди ўша Марзияга дуч келса нима бўлади?

У энди йўлак томон юрган эди, оқ халат кийган нотаниш қиз ичкаридан югуриб чиқди.

– Ким керак сизга? – деди қошини чимириб. – Ҳозир отбой бўлади.

– Навбатчи врачни чақиринг. – Насиба атайлаб Муроджоннинг отини айтмади.

Ҳамшира қиз унга бошдан-оёқ яна бир қараб чиқди-да, ичкари кириб кетди. Насиба харчанд бепарво бўлишга уринмасин, яхши иш қилмаганини энди тушунди. Ўзидан-ўзи ижиргана бошлади. Нима кераги бор эди шу ёкка келиб? Муроджон нега келдинг деса, нимани баҳона қиласди? Сизни соғиниб келдим, дейдими?

Йўлакдаги эшиклардан бири шарақлаб очилди. Насиба шу ёкка қараб пилдираб келаётган оқ халатли пакана кишини кўриб, эсанкираб қолди. Бу – уларнинг тўйида косагуллик қилган худди ўша Ислом ака эди.

У яқин келиб саломлашди.

– Ҳа, келин? – деди қандайдир куруқ оҳангда. – Күёвни излаб кепсиз-да!

Насиба жуда ҳижолатли аҳволда қолди.

– Шундок ўтиб кетаётувдим, – деди овози зўрға чикиб. – Муроджон акам, навбатчиман, дегандилар.

– Муроджон акангиз навбатчи эмас! – деди Ислом ака унинг гапини бўлиб.

Насиба ярқ этиб қаради.

– Кечач... – деди тутилиб.

– Кечаям дежур бўлганмас! – Ислом ака тағин унинг гапини кесди. Насибага бу одамнинг гапидан кўра, сўзлаш оҳангги оғир ботди.

– Кечирасиз, – деди киноя билан. – Бўлмаса сиз биларсиз қаёқда юришларини?

– Биламан! Хоҳласангиз, оборишим мумкин.

– Майли. Мен ҳам билиб кўйсам зарар қилмас.

– Ҳовлига чиқиб туринг. Мен ҳозир... – Ислом ака шундай деди-ю, ўзининг паканалиги учун ер айбордек қарс-курс юрганча, ичкари кириб кетди.

Насиба ҳовлига тушди. Қандайdir мавҳум ўйлардан кўнгли бўм-бўш бўлиб, секин-секин дарвоза томонга юра бошлади. Қизик, бу нимаси? Нега бу одам у билан бунақа гаплашади? Ўтқазиб қўйгани борми?

Унинг орқасидан келган машина фийқиллаб тўхтади.

– Чиқинг, келин!

У Ислом аканинг овозини таниб, бурилиб қаради. Тўрт-беш қадам нарида сутранг тез ёрдам машинаси тўхтаган. Ислом ака автобус эшигини қия очиб, бошини чиқариб турарди. Насиба иккиланиб машинага чиқди. Шу ондаёқ димоғига дори ҳиди урилди. Машина ўртасига оқ чойшаб ёпилган йиғма каравот ўрнатилган экан. Насиба эшик олдидаги ихчам ўриндиққа ўтириди. Ислом ака машинанинг нариги бикинидаги ўриндиққа чўқди.

– Қаёққа борамиз ўзи? – деди Насиба унга тезгина қараб олиб.

– Ўзингиз айтдингиз-ку! Мурод Воҳидовичнинг олдига, – Ислом ака шофёр ўтирган кабина томонга энгашди. – Кетдик.

Шундагина Насиба шофёр кабинасининг деворида туйнукча борлигини кўрди.

Машина бир силкинди-ю, шиддат билан юриб кетди. У рўпарасидаги Ислом акага шубҳаланиб қараб қўйди. Ислом ака ўриндиқ ёнидаги тутқични ушлаганча, кўзини лўқ қилиб ўтирас, шифтдаги чироқнинг хира ёруғида юзидаги ифодани пайқаш қийин эди. Насиба беихтиёр кўзини олиб қочди. Деразадан ташқарига қаради. Машина чироқлар маржони ловиллаб ётган кўчадан елиб борарди. Анча юришди. Ислом ака ҳамон миқ этмай ўтирас, Насиба унинг ўзига тикилиб боратёганини билар, шунинг учун атайлаб кўчадан кўз узмасди. Бир маҳал шаҳар чеккасига чиқиб кетишаётганини кўрди-ю,

хавотирга тушиб қолди. Ана, Қўйлиқ бозорининг дарвозаси. Нарёғи далалар... Ана, қоп-қоронғи дала йўлига бурилишди. Насиба, юраги гурсиллаб урганча, ўрнидан туриб кетди.

– Менга қаранг, қаёққа кетяпмиз ўзи? – деди таҳдид билан. – Тўхтатинг!

Хира чироқ ёруғида Ислом ака кинояли кулиб қўйгандек бўлди.

– Мана, етдик... Ҳозир.

Машина ғийқиллаб тормоз берди. Насиба эшик тутқичини силтаб очиб юборди. Шу ондаёқ ичкарига тўзон ёпирилиб кирди. Ерга сакраб тушди-ю, туфлиси тўпифигача тупроққа ботиб кетди. Ислом ака эшиқдан бошини чиқариб, коронғи бўшлиққа қараб қичқирид:

– Машинани бир соатдан кейин юбораман!

Машина орқаси билан тисарилиб, бора-бора катта йўлга бурилди.

Насиба қоп-қоронғи зулматда, тупроқ кўчанинг қоқ ўртасида гаранг бўлганича туриб қолди. Ваҳима ичидаги атрофга аланглади-ю, йигирма қадамча наридаги чироққа кўзи тушди. Ёнгоқ шоҳига каттакон лампочка илиб қўйилган, унинг атрофида парвоналар муттасил айланарди. Шундагина у йўлнинг ўша томонида девори чала тикланган яккам-дуккам уйлар борлигини пайқади. Улар коронғида қандайдир сирли, ваҳимали туюларди. Насиба лампочка остида аллакимнинг шарпасини кўрди. Бошига қийиқчани чамбарак қилиб боғлаб олган, майкачан одам бир қўлида гишт қолипни ушлаганча шу томонга қараб турарди. У бир зум тикилиб турди-да, қичқириб юборди:

– Наси!

Насиба эрининг товушини таний олмади. Бу товушда ҳам ҳайрат, ҳам қўрқувга ўхшаш оҳанг бор эди.

Муроджон қолипни ерга улоқтирганча шу томонга югурди. Ўн қадамча югургандан кейин қаттиқ ҳатлади. Насиба ўртада ариқ борлигини энди идрок этди.

Муроджон югуриб келиб, қўлини олға чўзди. Чамаси, Насибанинг елкасидан қучмоқчи бўлди-ю, қўли лойлиги учун тегмади. Насиба эрини ҳеч қачон бунаقا ахволда кўрмаган эди. Қизил қийикча билан бошини боғлаб олган, эски майкали, почаси қайтарилган шими лой, яланг оёқларида балчиқ қотиб қолган эди.

– Тинчликми? – деди Муроджон унинг кўзига тикилиб. Кейин анча хотиржам овозда сўради: – Ким опкелди? Ислом аками?

Насиба ҳамон ҳайкалдек қотиб туарар, рўпарасидаги мана шу одам, лойга беланганд мана шу киши эри эканига – Муроджон акаси эканига ҳечам ишонгиси келмасди.

Муроджон унинг кўнглида кечаётган гапларни пайқади.

– Юринг, – деди қандайдир сокин овозда. – Машина бир соатдан кейин келса битириб қўяй. Лойим қотиб қолади.

У Насибани эргаштириб ариқ устига ўрнатилган тахта «якка чўп»дан олиб ўтди. Насиба шуурсиз бир тарзда ёнғоқ тагига келди. Дараҳт шохига илинган лампочка атрофида катта-кичик парвоналар ҳамон муттасил айланарди. Майдонча кафтдек теп-текис бўлиб кетган, нарироқда куриган ғиштлар девор қилиб тахлаб қўйилган. Қатор-қатор қилиб қуйилган хом ғиштлар чироқ ёруғида совуқ ялтираб туарди.

– Оз қолди. – Муроджон бир чеккада турган уюмдан кафти билан қолипга кум сепди. Кейин уста доиракашлардек қолипни айлантириб-айлантириб тўқди. Тез-тез юрганча берироқдаги гумбаздек лой олдига

келди. Чўнқайиб ўтириб олди-да, лойдан зувала ясаб, қолипга урди. Қолипдан отилиб чиқсан лой парчалари майкасига, пешонасига сачраганига парво қилмади. Ортиқча лойни сидириб ташлади-да, қолипни даст кўтарди. Икки елкасининг бўйни билан туташган ерида чуқурча пайдо бўлиб, яланг оёқ товоналари билан ерни гурс-гурс урганча юргилаб борди-да, қолипни бояги ғиштлар сафига элтди. Пақ этган товуш эшилди. У қолипни кўтарган эди, Ғиштлар сафига яна тўрттаси қўшилди.

Насибанинг тили энди калимага келди:

– Тузук, бунақа хунарингиз ҳам бор экан.

Муроджон қолипни қумга қорар экан, шу томонга қараб жилмайиб қўйди:

– Йигит кишига қирқ хунар ҳам оз... – Шундай деди-ю, яна чўнқайиб, лой зувала қила бошлади.

Насиба майдонча ўртасида ҳамон қаққайиб туаркан, бирдан ҳаммасини тушунди. У ҳали эрини кўргандеёқ ниманидир пайқагандай бўлганди... Энди ҳаммасининг тагига етди. Муроджон нима учун ўзгариб қолганини ҳам, нега ҳар куни «навбатчи» бўлишини, нима учун ярим кечада бурнидан тортса йиқилгудек бўлиб боришини, ҳаммасини тушунди. Нима учун Ислом ака ўзига бундай муомала қилганини, нима учун бу ерга олиб келиб, бир оғиз сўз айтмай ташлаб кетганини... – Бу билан нима демокчи эканлигини – ҳаммасини!

«Мана, келинпошша! Эрингнинг аҳволини кўриб қўй! Сени деб, сенинг орзу-ҳавасларинг деб эринг шу хунарни қиласпти». Йўқ, Ислом ака буни айтгани йўқ. Аммо...

Қандоқ уят! Қандоқ шармандалик! Хўш, бўлмаса нима қилсин? Ўғирлик қилсинми? Арзимас маош билан шохона тўй қилган одам нима қилсин?

Орзу-ҳавас эмиш! Умрида бир марта бўладиган тўй эмиш!

Насиба боши ғувуллаб бораётганини, кўнгли бехузур бўлиб кетаётганини ҳис этар, қулоги остида ҳамон қолипнинг ора-чора ерга пак-пак урилгани эшитилиб турарди. Гўё ер юзида шундан бошқа садо йўқдек, шундан бошқа оҳанг қуриб қолгандек.

У оёкларини судрагудек бўлиб борди-да, ёнғоқнинг ғадир-будур танасига суюнди. Шунда шамол турдими ё ўзининг шуури тиниқлашдими, ёнғоқ шохларининг шовуллаши эшитила бошлади. У кўзларини юмди. Негадир тасаввурида яна ўша денгиз шовуллаши жонланди. Ўша ойдин кечга, ўша денгиз, ўша тўлқинлар... Соҳилда Муроджон билан ўтиришибди.

Насиба сесканиб кўзини очди. Йўқ энди улар денгиз бўйига боришмайди. Ойдин кечада соҳилда ўтиришмайди. Мабодо, боришганида ҳам, беадад денгиз сатҳида ой нури ярақлаб турганида ҳам энди бу бошқа денгиз бўлади. Ой ҳам бошқа бўлади. Тўлқинлар ҳам, ҳатто Мурод акаси ҳам. Энди унинг юраги бир текис гурсиллаб уриб, Насибани аллаламайди.

Улар анча нарсага эга бўлишди. Тўй қилишди, ота-онаси хоҳлаганича, Насиба истаганча орзу-ҳавас кўришди. Ҳаммасини таомилдагидек, «қарс-бадабанг» қилишди. Ҳаммасини! Қизиқ устида бир нарсани унтиб қолдиришди. Қуёшнинг ўлчови бўладими! Нурнинг вазни-чи? Бахтнинг тарозиси-чи?

Денгиз эмиш. Ойдин кечалар эмиш?! Ана, лойга кўшилиб қолипга тушяпти. Қанча кўп тушса, қарзи шунча камаяди!

Насибанинг кўзларидан тирқираб ёш чиқиб кетди. У ёнғоқнинг ғадир-будур танасига юзини босганча, ўкраб юборди.

Бир маҳал Муроджон лойли кафти билан унинг сочи-  
ни силай бошлади.

– Наси! Нима бўлди сизга, Наси? – деди овози титраб.

Насиба кескин бурилди-ю, эрининг лой ёпишган, зах  
анқиб турган елкасига бошини ташлаганча, унсиз йиглар  
эди.

*1979 йил*

# ҚИССАЛАР



---

---

## БАХОР ҚАЙТМАЙДИ

Бўстон қишлоғига оғир-вазмин қадамлар билан куз кириб келди. Туманлик қўйнида жимгина мудраган тонглар, илк совуқ оғушида жунжиккан серюлдуз оқшомлар бошлианди. Ҳавога елпигичдай қат-қат булатлар чиқди. Қуёшнинг илиқ, тансиқ нурлари одамларга хуш ёқадиган бўлиб қолди. Ҳавода ёнғоқ хазонларининг ўткир хиди гуркиради. Ўз бўйи мева туғиши дардидага яшнаган боғлар, шодон шовуллаган теракзорлар хаётнинг мангу, бешафқат ҳақиқати олдидаги ўйчан, ғамгин бош эгди. Чор-атроф япроқларнинг мунгли шивир-шивирига тўлди.

Сумбула туғди. Қишлоқни ҳалқадай ўраб оқаётган анҳор бирдан тиниқлашди. Телба тўлқинлар энди жиловланиб, ювош бўлиб қолди.

Одамлар қиличини кўтариб келаётган қишдан чўчиғандай шоша-пиша ҳаракатга тушдилар. Кимдир чорбоғида ўтин арралади, кимдир қўшнисининг том сувоғига ҳашарга чиқа бошлади.

Ҳамма ягона бир ташвиш билан, куз ташвиши билан туриб, куз ташвиши билан ётадиган бўлди.

Фақат битта ҳовлида – қишлоқ чеккасида, шундоқкина анҳор ёқасида жойлашган ҳовлида сукунат ҳукм сурар, фақат бир киши ёлғиз ўз ташвиши билан банд эди.

У паст-баланд коялар орасидан от чоптириб бораётган-миш. Отелдек учармиш, тоғутошлар чирпирак бўлиборқада қолиб кетармиш. Бирдан ҳаммаёқни зулмат қоплабди. От алланимага қаттиқ қоқилибида, қоп-коронги жарликка мункиб кетиби. У отни бўйнидан маҳкам кучоқлаб олганча, шувиллаб пастга тушиб кетаётганмиш-у, ерга хеч ет-масмиш. Нафаси бўғзига тикилиб, даҳшатдан оёқ-кўллари тошдай қотиб қолганмиш...

– А-а-а!

Алимардон ўз овозидан ўзи чўчиб уйгониб кетди. Анчагача қаерда ётганини билолмай, кўзларини катта-катта очганча шифтга тикилиб қолди. Аъзойи бадани ўт бўлиб ёнар, пешанасини муздек тер босган, бир тутам сочи тер аралаш қошларига ёпишиб қолган эди.

У анчагача бехуш тикилиб ётди-да, вассажуфтлари сарғайиб кетган шифтни, токчадаги лаган-товоркларни, бурчакдаги шкаф устида турган, чақа солинадиган ганч мушукчани кўриб секин уф тортди. Хайрият, уйда экан!

Бир лаҳзадан кейин кўз ўнгидаги нарсалар тағин сий-рак туманлик ичida йўқолди-ю, яна алаҳлай бошлади. Зум ўтмай тағин кўзини очди. Бора-бора фикри тиниклашиб, шифтга тикилиб қолди. Қаердандир бир қалдирғоч уйга отилиб кирди. Шифт тагида айланана-айланана вассажуфтдаги узун михга келиб кўнди. Ғамгингина вижирлаб кўйди. Оқ-сарғиш бўйини буриб Алимардонга қаради. Мунчоқдек кўзларини тикиб, узоқ қараб турди-да, яна бир сайраб, қанотини ёзди. Лип этиб пастга шўнғиди, дебразанинг очиқ табакасидан ҳовлига отилди.

Алимардон кўрпа остидан қўлларини машаққат билан суғуриб олди. Тирсагига таяниб, секин дераза томонга ўтирилди. Терлаб ётган баданига совуқ шамол тегди. Бўғилиб-бўғилиб йўтала бошлади. Ҳар йўталганида на-

фаси оғзига тиқилар, қўз ўнгидаги хира ҳалқачалар пирпирав, қулоқлари шангиллар эди. Ниҳоят, секин-секин дамини ростлади, ҳовлига тикилганча бир текис, чукурчукур нафас ола бошлади.

Очиқ деразадан тип-тиник осмоннинг бир чеккаси кўриниб турарди. Чекка-чеккадаги азамат ёнгоқлар шовшув этиб, ўтиб кетган баҳорини эслагандай жимгина хаёлга толган, ўрикларнинг қондай қизарган япроқлари узилиб кетишдан чўчиб титраб турибди. Ёнгоқ шохидаги зағизғон сайдарди. Кейин ола қанотларини ёйиб, ҳавога кўтарилиди-ю, узун думини ликиллатиб, этақдаги молхона томига бориб кўнди. Том устига ёйиб ташланган маккажӯхориларни бир-икки чўқиган бўлди-да, яна қанотини ёйиб, ҳавога кўтарилди. Девор ошиб қўшни ҳовлига ўтиб кетди.

Алимардон шу ёзда онаси ўлганидан кейин ҳовлидан файз кетганини ҳозир, айниқса, чукур ҳис қилди. Онаси неча йилдирки, уни уйлантиришни орзу килар, аммо Алимардон унамас эди. Рост, у кўп қизларни кўрган, лекин ҳеч бири билан бирга бўлишни хаёлига ҳам келтирмаган эди. «Аввал консерваторияни битириб олай, у ёги ўзи топилиб кетади» деб ўйларди. Алимардон диплом ёқлашидан бир хафта олдин онаси қазо қилди. У орзусига етолмади: келинининг қўлидан бир пиёла чой ича олмади.

Алимардон юрагининг бир бурчида уйғонган чидаб бўлмас ҳасратдан энтикиб колди.

– Анвар ҳам келмабди, номард! – пичирлади у фижиниб. Алимардон бетоб бўлиб қолганидан бери гоҳ Анвар, гоҳ унинг онаси ҳар куни келиб, унинг холидан хабар олиб туришарди. Бугун келмабди. «Бирорнинг гўрига бирор тушармиди? Анварнинг мен билан нима иши бор!» У жаҳл билан кўзларини чирт юмиб, кўрпани бошига тортиди.

Яна қўзи илинаётган эди, гурс-гурс қадам товуши эшитилди. Алимардон кўрпани кўтариб қарагунча, аллаким дераза ёнидан лип этиб, эшик томонга ўтиб кетди.

«Анвар!» – Алимардон эшикнинг очилишини кутиб, бурилиб қараб ётди.

Анвар пастак эшикдан бошини эгиб кирди-да, кўлидаги қофоз халтани бир чеккага қўйиб, шимининг почасини қоқа бошлади.

Энгашиб турганча бошини кўтариб қаради-да, жилмайди.

– Тузукмисан?

Алимардон индамади. Кошини чимирганча тикилиб ётаверди.

Анвар ҳар келганида шундай жилмайиб карап, худди шундай паст, меҳрибон овозда ундан ҳол сўрар эди.

Ҳозир Алимардон унинг тез юрганини, кўйлагининг тугмаларини ечиб юборганини, ичидаги майкаси терлаб баданига ёпишиб қолганини кўрди.

Анвар туфлисининг боғичини шоша-пиша ечиб, тез-тез юриб унинг тепасига келди. Каравот ёнига чўқкалаб, пешанасига муздек кафтини қўйди.

– Иситманг йўқ-ку, – деди яна жилмайиб.

Алимардон унинг қўлини пешанасидан олиб ташлади. «Ёлғон айтятпти!»

– Йўлда ўлиб қолдингми, дегандим.

Анвар дўстининг бўғиқ овозидан унинг хафа бўлганини тушунди, кўз милкларининг чети тиришиб, қизариб кетди. Унинг сал нарсага қизариши ҳам, қизлардек торгинчоқлиги ҳам, чиройли чехраси ҳам кўпинча Алимардоннинг жигига тегарди.

– Кеч қолдим-а? Тўғрими? – деди Анвар узр сўраган оҳангда.

Кейин бегуноҳ кўзларини Алимардондан узмай, яна ўша паст, ўйчан оҳангда гапирди:

– Ишга бордим. Ҳеч иложини қилолмадим. Биринчи кун...

Алимардон унинг ўзига эмас, шифтнинг бир чеккасига қараб сўради:

– Ўша телестудиягами?

Анвар дўстининг гап бошлаганидан қувониб кетди.

– Ҳа. Биласанми, музика редакциясига! – У севинчдан чехраси ёришиб, ўрнидан турди. – Сен соғайишинг билан студияга борасан. Ҳозир у ердагилар ёш артистларга жуда муҳтоҷ экан. – У дўстига синчиклаб қараб қўйди.

Алимардон мийгида кулди-ю, индамади. Кўнглида гижинишми, адоватми, аллақандай хира бир туйгу уйғонди. Ўзидан олдин Анварнинг иш бошлагани, қувонч билан гапириши унга ёқмади.

Унинг ўзини ҳам шаҳардаги музика мактабига ўқитувчи қилиб тайинлашган, аммо ҳали иш бошламаган эди.

Анвар дўстини ранжитиб қўйганини пайқади шекилли, индамасдан бориб қоғоз халтани очди.

– Узум ейсанми? – деди турган ерида бурилиб қараб. Алимардоннинг жавобини ҳам кутмай ҳовлига чиқиб кетди. Зум ўтмай тўртбурчак патнисда икки бош узум кўтариб кирди. Яна каравот олдида чўккалади. – Ол, жуда ширин экан...

Алимардон кўз қири билан қараб қўйди. Сап-сариқ хусайнилар товланиб турар, шудрингдай сув томчилари таранг, текис узум доналари устида жилоланаар эди.

Анвар икки дона узумни узиб олди.

– Оғзингни оч!

Алимардон узумни карсиллатиб ер экан, беихтиёр жилмайди.

– Шаҳарда нима гаплар?

– Тинчлик... – Анвар қизларникига ўхшаш тимқора кўзларини сузиб қўйди.

Алимардон унинг қизиқ бир янгилик айтишга оғиз жуфтлаб турганини сезди.

– Гапиравер! – деди жилмайиб.

Анвар ялт этиб унга қаради.

– Муқаддам шу ерга – Бўстон гузаридаги дўхтирхонага ҳамшира бўлиб келибди...

«Ҳа, шунинг учун оғзи қулоғида экан-да!» Алимардоннинг кўнглида яна ўша чалкаш туйғу уйғонди. Анвар бу кизни яхши кўришини кўп гапирап эди. «Бу ёғи ҳам беш бўлибди... Қизиқ, бир хил одамларнинг иши ўз-ўзидан юришиб кетаверади. Меники-чи?» Алимардон ичидан хўрсиниб кўйди.

– Яхши! – деди хушчақчақ гапиришга уриниб. – Бизни келиннинг ўзи даволар экан-да?

– Айтдим унга... – Анвар бир шингил узумни унга тутқазди. – Бугундан бошлиб ҳар куни келиб туради. – У тўсатдан эсига тушгандек сўради... – Мастава қилиб берайми... Афtingни буриштирма, яхшилаб пишираман...

Салдан кейин Анварнинг ошхонада гурсиллаб ўтин ёргани эшитилди. Зум ўтмай дераза орқасида Анварнинг ўзи кўринди. У майкачан бўлиб олган эди.

– Ҳаммаёқ хазон бўлиб кетибди, супуриб ташлай, – деди у деразадан бошини суқиб. – Кейин молхона эшиги тагида ётган узун супургини олди-да, худди чалғида ўт ўраётгандай қуличкашлаб супура кетди.

Йирик-йирик ёнғоқ хазонлари қизғиши ўрик япроқларига кўшилиб, супургига эргашганча ҳавода ожизгина пирпираб учиб, анча нарига бориб тушар, ҳовлининг оппоқ сатҳи йўлакдай очилиб қолар эди. Анвар супургини файрат билан қаттиқ-қаттиқ силкитар, аммо зум ўтмай супурилган ерга яна хазонлар келиб қўнар, хуноби ошиб тағин орқага қайтар эди.

Алимардон япроқларнинг пирпираб учишини томоша қила-қила пинакка кетди...

Ошхона ичи тутунга тўлиб кетган эди. Ўтин ўчакишгандай ёнмас, ҳадеб тутар эди. Анвар чўнқайиб олганча бор кучи билан пуфлайвериб томоқлари ачишиб кетди. Бўғилиб йўтала бошлади. Энди тоқати тоқ бўлганида ўтин лов этиб ёниб кетди.

Анвар тутундан бўғилиб, ташқарига отилди. Кўзларини узоқ ишқалади. Қўлинини туширди-ю, кўча эшик олдида ўзига қараб турган Муқаддамни кўриб, хижолатдан юзлари ловиллаб кетди. Муқаддам қизил кўйлак кийиб олган, елкасини силкитганча ҳадеб куларди.

Анвар жилмайганча югуриб унинг олдига борди.

– Келдингизми? Қандоқ топдингиз?

– Ҳаммаёғингиз қоракуя бўлиб кетибди-ку! – Муқаддам эрка табассум билан унга қараб қўйди. – Қандоқ кираман, деб чўчиб турган эдим... Яхшиям ўзингиз бор экансиз!

...Муқаддам Анварга бошдан-оёқ қараб чиқди. Шу топда унинг чанг аралаш ис теккан қош-киприклари, майкачан бўлиб олиб, хижолатдан қизариб туриши ҳам кулгили, ҳам завқли эди. У Анварни ҳеч қачон ҳозиргидай содда, аммо кўнгилга яқин, дилкаш бир ҳолатда кўрмаган эди.

– Ошпазликни ҳам биласизми? – деди у Анварнинг қорайиб қолган пешанасига қараб.

Анвар жилмайиб кўйди-ю, Алимардон ётган уйга имо килди.

– Кираильик.

Кетма-кет уйга киришди. Девор олдидаги каравот ёнига Анвар биринчи бўлиб борди. Кўрпани кўтариб қаради-ю, Муқаддамга ўгирилиб шивирлади:

– Ухлаб қолибди-ку...

Муқаддам оёқ учида юриб келиб, bemornning устига эгилди.

Ранги бир оз синиққан, аммо кўркам чехрасида қатъият балқиб турган йигит кўзларини чирт юмиб ухлаб ётарди. Муқаддам бир қарашдаёқ унинг чимирилган қошларида, маҳкам юмилган юпқа лабларида, кулгичи чукур ботиб кирган иягидаги мағрур бир ифода борлигини пайқади. Негадир қип-қизариб кетди. Ўзининг ҳолатидан ўзи ийманиб, гуноҳ қилиб қўйган одамдек Анварга қаради. Анварнинг тикилганини кўриб, баттар қизарди.

– Уйготасизми? – деди секин.

Анвар яланғоч елкаларини қисди.

– Ўзингиз биласиз...

Муқаддам бир лаҳза ўйланиб қолди.

– Майли, – деди пичирлаб. – Безовта қилмай қўя қолайлик. Эртага эрталаб кела қоламан.

Анвар бу сафар ҳам елкасини қисди.

– Майли...

Муқаддам эшик олдига борганида яна бир марта ўгирилиб қаради. Токчалардаги чойнак-пиёлаларга, шкаф устидаги ганч мушукчага, тахмондаги кўрпачаларга бир-бир назар ташлади-ю, тағин каравотга тикилиб қолди. Бемор ҳамон қошини чимирганча қимир этмай ётар, чехрасида ўша қатъият бор эди.

– Бронхит эканми? – деди Анварга қараб. Анвар бир кўлини баланд кўтариб эшик кесакисидан ушлаганча гоҳ Алимардонга, гоҳ Муқаддамга қараб турагатди.

– Болалигидан шунақа, – деди Анвар ачиниш тўла паст оҳангда. – Сал шамолласа ўпкаси қисади. Қайси куни анҳорда чўмилиб, тағин шамоллаб қолибди. Ўжарда, ўжар. Касалхонага бормади. – У бир нафас жим қолдида, яна Алимардон томонга қаради. – Ҳали билмайсиз... Жуда ажойиб йигит. Шунақа овози борки, шунақа яхши ашула айтадики...

– Эшитдим... Доктор айтган эди. – Муқаддам Анварга қараб жилмайди. – Кетаверайми?

Анвар унинг кўзларидан ўзига қадрдон бўлиб қолган илиқ меҳрни сезди-ю, қувониб кетди.

– Овқат пишсин... Кузатиб қўяман.

\* \* \*

Улар анҳор ёқасидаги ёлғизоёқ йўлдан изма-из боришарди. Муқаддам олдинда кетар. Анвар уч қадамча орқада ундан кўз узмай борарди. Йўл кимсасиз бўлгани учун Муқаддам туфлисини ечиб, бармоқларига илиб олган, яланг оёклари остидан кўтарилиган чанг йўл чекка-сидаги сарғая бошлаган ўтлар устига чўкар, этагининг шамолидан силкинган ғумайлар оҳиста бош силкиб қоларди. У чор-атрофни томоша қилиб борар, Анвар унинг чехрасини кўрмаса ҳам қувончдан жилмаяётганини, ҳаяжонланаётганини сезиб турарди.

Кишлоқ устида кузнинг атлас либоси ловиллаб ёнади, уфққа туташиб кетган полизлар, токзорлар гоҳ қизгиш, гоҳ қаҳрабо рангда товланади. Олисда, осмоннинг ер билан туташган жойида оловли бир ҳовур ичида қуёш ботиб борарди. Каердадир бузоқлар маърайди, гузар томондан мактаб болаларининг қий-чув товушлари эшитилади.

Сўқмоқ бирдан ўнгга бурилди-ю, пастга анҳор устига шўнгигиб кетди. Муқаддам тўхтаб қолди. «Энди қаёққа борамиз?» – дегандай Анварга қайрилиб қаради.

– Яккачўпдан ўтамиз... – Анвар Муқаддамни четлаб ўтди-да, тик сўқмоқдан пастга югуриб тушиб, кирғоқдаги толнинг ғадир-будир, йўғон гавдасини қўли билан ушлаб қолди. Анҳор соҳилида эркаклаб кетган баланд-баланд ялпизлар яшнаб ётар, кирғоқдаги икки туп азим тол атрофга оқшом соясини ташлаган эди. Анвар бурилиб қаради-ю, терак бўйи баландликда ўзига қараб жилмайиб турган Муқаддамни кўрди. Юқорида ҳали қуёш нури сўнмагани учун Муқаддамнинг қизил кўйлаги офтобда

ярақлар, гўё унинг ўзи ҳам аланга оғушида ёнаётгандек эди.

У қўлларини ҳавода кенг ёзди-да, болаларча шодон оҳангда қичкирди:

– Ушланг, Анвар ака!

Анвар хушини йигиб олгунча, у чопқиллаб туша бошлади. Анварнинг юраги гупиллаб уриб кетди. У Муқаддамнинг ҳозир бағрига келиб урилишини билиб туарар, аммо кучоқлаб олишини ҳам, қўлидан тутиб қолишини ҳам билолмай иккиласарди. Анвар хушини тўплаб бўлгунча Муқаддам шиддат билан етиб келди. Анвар бирдан ўзини четга олди-да, унинг билагидан маҳкам тутиб қолди. Муқаддам кескин бурилганча унинг кўксига урилди. У негадир кўзларини юмганча хадеб кулар, Анвар эса ҳаяжондан нафаси тиқилиб, нима қилишини билмай қолган эди. Муқаддам унга ҳеч қачон шунчалик яқин турмаган, унинг соchlари ҳеч қачон Анварнинг юзига тегмаган эди. Анвар ҳаяжондан бўгилиб қолган, ўзи ҳам маъносини тушуниб етмаган алланимадан уялар эди.

Муқаддам кўлини тортиб олди-да, қошларини чимириб жилмайди.

– Ёмонсиз-а...

Анвар яна негадир ўзидан-ўзи уялиб, кўзларини олиб қочди.

Муқаддам туфлисини ялпизлар устига ташлаб, анҳорга оёгини осилтириб ўтирди. Анвар тикка тураверишини ҳам, унинг ёнига ўтиришини ҳам билмасди. Муқаддам елкаси оша бурилиб қаради. Худди унинг кўнглидагини билиб тургандай сўради:

– Ўтирмайсизми?

Анвар унинг ёнига ўтирди. Сувдан салқин, заҳаво гуркирар, нариги соҳилдаги тик қирғоқ, икки тол ўртасидан чўзилиб кетган ингичка яккачўпнинг сояси сув

юзида лопиллар, анхор тип-тиниң бўлгани учун сув тагидаги тол хазонлари аниқ кўриниб турар эди.

Муқаддам Анварга бир қараб кўйди-да, энгашиб, ҳовучлаб сув олганча оёгини юва бошлади. Анварнинг юраги боягидан ҳам қаттикроқ гупиллаб уриб кетди. Кулокларигача ловиллаб, юзини ўгирди.

– Бу ерда чўмилса бўладими?

Анвар ҳайрон бўлиб қаради. Муқаддам унга қарамасдан иккинчи оёгини ювар эди. Анвар муздек сувни ҳис қилиб, эти жунжикиб кетди.

– Совук-ку ҳозир...

– Совукмас пайтда-чи?

– Бўлади. – Анвар сув тагида силкиниб турган хазонлардан кўз узмай жилмайди. – Бу ерда кўп чўмилганман... Болалигим шу ерда ўтган...

Икковлари ҳам жимиб қолишиди.

Анхор юзи секин-секин қорая бошлади. Қаердадир чигиртка чириллади. Анхор бир шовуллаб, яна жимиб қолди. Анвар Муқаддамга бурилиб қаради. У тиззала-рини қучоқлаб олганча нариги соҳилга тикилиб ўтирас, Анвар унинг нималарни ўйлаётганини билмаса ҳам чуқур хаёлга толганини ҳис этди. Муқаддам унинг қараб ўтирганини сезди шекилли, секин сўради:

– Алимардон билан бирга ўсганмисизлар?

Анвар ўша беғубор хотираларни эслаб жилмайди.

– Иккаламиз шу ерларда сигир бокардик, – у бирдан кулиб юборди, – Алимардон ўшанда ҳам шайтон эди... Бир марта анхорнинг нариги бетидаги Собир чўлоқнинг полизига қовун ўғирликка тушганимизда мени роса дўппослатган... Мен чайла яқинига бориб, Собир чўлоқни пойлаб турдим. Агар уйғониб қолса ҳуштак чалишим керак эди. Алимардон ҳам қовунни олиб чиққанидан кейин ҳуштак чалиб, мени чақирмоқчи эди. – Анвар Муқаддамга қараб кулиб қўйди. – Ҳали ўтирибман, ҳали

ўтирибман Алимардоннинг хуштагидан дарак йўқ. Бир маҳал бирор елкамдан маҳкам ушлаб, тарсаки қўйиб юборса бўладими. Собир чўлоқнинг уйғонганини билмай қолибман... Уйга келсан, Алимардон аллақачон қовунга тўйиб, ухлаб ётиби. Ишини битириб, индамай кетаверган экан.

Муқаддам елкаларини силкитиб, қаҳ-қаҳ уриб кулди.

– Сиз ўшанда ҳам бўшгина экансиз-да...

Анвар ювош жилмайди.

– Ким билсин...

Аста-секин оқшом қўна бошлади. Тол шохлари соядай қорайиб колди. Шабада турди. Япроқлар дув тўкилиб, сув юзига чипиллаб туша бошлади.

– Дадам ўлганидан кейин биз шаҳар ҳовлига кўчиб кетдиқ, – деди Анвар ўйчан овозда. – Шунда ҳам мен ўнинчини битиргунча Бўстондан кетмадим. Мактабни битираётганда одам бошқача бўлади-ку... Мен шоирликни орзу қилгандим.

– Шоир бўлолмадингиз! – Муқаддам кулги тўла овозда унинг гапини кесди. Кейин юпатди: – Майли, журналист бўлдингиз-ку!

– Ким билсин ҳали... Ишни энди бошладик-ку! – Уяна дўстини эслади. – Алимардон консерваторияни яхши битирди. Кўрасиз, ундан яхши бастакор, яхши қўшиқчи чиқади...

Икковлари тағин жимиб қолишиди. Муқаддам бемалол ўтирад, кетгиси келмаётганга ўхшар эди. Анвар кеч бўлиб кетаётганини қўриб ийманар, бу йўл камқатнов бўлса ҳам бирор ўтиб қолишидан: «Бу ерда нима қилиб ўтирибсанлар?» – дейишидан истихола қиласарди. Атрофни фира-шира коронфилик ўради. Сув юзига илк юлдузлар шўнғиди.

– Кетамизми? – деди Анвар ўрнидан туриб. – Қаранг, коронғи тушиб кетди.

У Муқаддамни қўлидан ушлаб, лопиллаб турган яккачўпдан эҳтиёт билан олиб ўтди.

– Катта анҳор экан... – Муқаддам қиргоққа чиқиб енгил нафас олди. – Оти нима?

– Қонқус... – деди Анвар йўл бошлар экан.

Муқаддам таққа тўхтаб қолди.

– Қонқус?!

Анвар унинг орқада қолиб кетганини овозидан пайқади-ю, ўғирилиб қаради. Муқаддам беш-олти қадам орқада тураг, қоронғиликда гавдаси элас-элас кўринарди.

Анвар қайтиб келиб шивирлади:

– Юринг! – Бир неча қадам босгандан кейин тушунтирди. – Эски ном-да...

Муқаддам оппок сўқмокдан авайлаб қадам ташлаб бораркан, яна сўради:

– Нега унақа?

– Ҳар хил гаплар бор, – Анвар унга қараб қўйди. – Биттаси менга айниекса ёқади... Бир вактлари бу ердан катта дарё ўтган, дейишади. Дарё бўйида шаҳар бор экан... Бир куни шаҳарга душман хужум килиб қолибди. Шаҳар одамлари дарёнинг кўпригини бузиб ташлашибди... – У яна Муқаддамга бурилиб қаради. – Дарёнинг кечув жойи бор экан-у, уни шу шаҳардаги икки йигитдан бошқа ҳеч ким билмас экан. Иккала дўст битта кизни яхши кўришар экан.

Қамал бўлмасидан бир ҳафта илгари қиз йигитлардан бирига – ўз севганига теккан экан. Иккинчи йигит дўстидан қандай қилиб бўлмасин қасос олишга, қизни кўлга киритишга қасам ичган экан. Душман шаҳарни ўраб олиши билан ўша йигит хоинлик қилибди. Дарёдан сузиб ўтиб, душман саркардасига сирни айтибди: «Агар сен ракибимни ўлдириб, севгилимни менга топширишга ваъда берсанг, йўлни кўрасатаман», – дебди. Саркарда рози бўлибди. Душманлар кечувдан ўтиб, шаҳарни босиб

олишибди. Қизнинг севгилиси урушда ўлибди. Саркарда хоинни чақириб, май тутибди. «Хизмат ҳақингни ол», – дебди. Хоин май ичиб, охирги тилагини айтибди: «Мен сенинг буйруғингни бажардим. Энди сен ҳам менинг шартимни бажар. Одамларингга айт, севгилимни олиб келишсин». Саркарда кулибди. «Севгилингни кўриш сенга насиб қилмайди, ҳозир ичганинг май эмас, заҳар! Ўз дўстига хиёнат қилган одам менга дўст бўлолмайди. Сен кон қусиб ўласан!» – дебди. Хоин чиндан ҳам қон қусиб ўлибди.

Анвар жимиб қолди. Унинг қадам товушлари сўқмоқ устида текис гурсиллай бошлади.

– Қиз-чи, қиз нима бўйти?

Анвар Муқаддамнинг овозини эшитиб бурилиб каради-ю, унинг ваҳимада катта-катта очилиб турган кўзларини қоронғиликда аниқ кўрди.

– Севгилисингин ўлганини эшитган замони ўзини дарёга ташлаган экан.

Муқаддам қўркув тўла кўзларини терак бўйи пастликда жимгина оқаётган анҳорнинг қоп-қора сувларига тикди.

– Тезроқ юрайлик...

– Майли. Мен ҳам тезроқ қайтишим керак... Алимардон хуноб бўлиб ўтиргандир.

\* \* \*

Алимардон уйғонди-ю, ўзидан бир неча қадам нарида турган қизни кўрди. Қиз бош яланг, соchlари турмакланган, оппоқ ҳалат кийган эди. У катак-катак дастурхон ёпилган стол устида биқирлаб қайнаётган ялтироқ стерилизатордан пинцет билан игналарни авайлаб олар, совутиш учун бўлса керак, бир чеккага қўяр эди. Қиз ёнламаси тургани учун Алимардон унинг чехрасини яхши

кўролмас, аммо деразадан ёғилаётган тонг нурида қирра бурни, силлик, хушбичим юзининг бир томони, майин тукли лаблари аниқ кўринарди.

«Муқаддам, – деб ўйлади у қиздан кўз узмай. – Анварнинг куйиб юрганича бор экан».

У кўп қизларни кўрган, аммо бунақа жозибадор қизни учратмаганди. Юраги гупиллаб ура бошлаганини сезиб, бошини кўтарди. Қиз каравот ғичирлаганини эшитиб, бурилди.

– Уйғондингизми? – Қиз жилмайганида узун, қайрилма киприклари тулашиб, яна ҳам чиройли бўлиб кетди.

«Фариштадай экан...» – Алимардон ҳам беихтиёр жилмайди.

– Сиз Муқаддамхонсиз-а? – у яна нимадир дейиш кераклигини ўйлаб сўради. – Анвар кетдими?

– Мен келсан, кетган эканлар, – деди Муқаддам яна шприцларни олиб. – Ишга кетган бўлсалар керак...

«Келганига анча бўлган экан-да...» – Алимардон нима учун қувонаётганини ўзи билмаса ҳам қиздан кўз узолмай қолди.

Муқаддам флакондаги дорини шприцга тортиб олдида, игнасини юқори кўтарди. Игна учидан тизиллаб дори отилди.

– Билагингизни чиқаринг... – деди у Алимардонга қарамай.

Алимардон унинг уялаётганини сезиб турарди.

– Кўрқаман-да, – у атайлаб кўрпага бурканиб олди. Кўрпа тагидан мўралаб қаради-ю, Муқаддамнинг қизариб кетганини, ўзини жиддий тутишга уринаётганини пайқади.

– Бўлинг! – Муқаддам ҳамон игна учидан отилаётган доридан кўз узмай, қуруққина буюрди. – Чанг қўнса, шприцларни бошқатдан қайнатишга тўғри келади.

Алимардон ҳамон ундан кўз узмай, кўйлагининг енгини шимарди.

– Ўлуб қолсам, ўзингиз жавоб берасиз!

У уколнинг оғриғини сезмади ҳам. Тепасида энгashiб турган Муқаддамга тикилиб ётаверди.

Муқаддам авайлаб дори юборар, кўллари билинраб билинмас титрар, Алимардоннинг эмас, ўзининг жони оғриётгандай лабининг бир бурчини қимтиб турарди. Алимардон унинг оппоқ юзидан кўз узолмас, халатининг очик ёқасидан кўринаётган бўйнидаги холи ҳам, кундуздай қошлари ҳам юрагини ўртар эди.

– Мана, бўлди. – Муқаддам игна ўрнини спиртли пахта билан артиб жилмайди. – Шунга қўрқиб ўтирибсиз....

У секин-секин стол олдига юриб борди-да, ингани чиқариб, стерилизатор қопқогига ташлади.

Алимардон унинг ҳар бир ҳаракатини диққат билан кузатар, мияси ғувиллаб кетган, чалкаш туйғулар ичидаги тўлқинланар эди.

Муқаддам анжомларини йиғиштириб бўлгунича у бир қарорга келди-ю, чақириди:

– Нима қилиб қўйдингиз... – деди ҳаяжондан овози титраб. – Ҳамма ёғим олов бўлиб ёниб кетяпти-ку!

– Нима? – Муқаддам чўчиб ўгирилди. Унинг чехрасида кўркув бор эди.

– Ишонмасангиз пешанамни ушлаб кўринг!

Муқаддам шошилиб келиб унинг пешанасига кафтини босди. У энди гапиришга оғиз жуфтлаган эди, Алимардон бўйнидан маҳкам қучди-ю, силтаб пастга тортди, лабларидан, юзидан ўпа бошлади.

Муқаддам бир лаҳза гангид колди. У ўзини йўқотиб қўйган, Алимардоннинг оғушида талпинар, аммо чиқиб кетолмас эди. Қизик, шунча ойлардан бери Анвардан кутуби юрган кескин ҳаракатларни Алимардон қиласи, бу айёр йигитни уриб юборишини ҳам, индамаслигини

ҳам билмасди. Аммо Анварни эслashi билан силтаниб қаддини рослади-да, Алимардоннинг юзига тарсаки туширди.

– Уятсиз! – У кўз ўнгини тўсган ёш пардасидан ҳеч нимани кўролмай, тусмоллаб стол ёнига борди.

Шоша-пиша стерилизаторни йигиштираётганида орқа томондан Алимардоннинг бўғиқ овози келди.

– Кечиринг...

Муқаддам ёшли кўзлари билан унга қаради.

Алимардон каравотда маъюс бош эгиб ўтиради.

– Кечиринг, Муқаддам, – деди у бўғиқ оҳангда. Кейин унга тик қараб туриб, таъкидлади: – Мени, ифлослик қиляпти, деманг. Сиз бари бир менини бўласиз!

Муқаддам кўксини тошириб юбораётган йигидан бўғилиб, ташқарига отилди.

Кўча эшик ғийқиллаб очилиб ёпилганидан кейин, Алимардон ўзини ёстиққа ташлади. Виждонининг тубтубида енгил бир азоб уйгонди.

«Яхши бўлмади... – У шифтга бир лаҳза тикилиб ётди-да, ўзига тасалли берди. – Нима бўпти?! Қизлар ҳам мард йигитларни яхши кўради. Ўша латтадан кам жойим борми?!»

... Шу куни пешинда Иқбол хола ош олиб келганда Алимардон у билан совукқина саломлашди. Анварни сўрамади ҳам...

\* \* \*

Муқаддам Анвар акаси билан нурли кўчадан борарди. Салқин сезилиб қолган, олди одамлар ёмғирпўш кийиб олишган эди. Каттакон шаҳар серюлдуз куз осмони тагида чироқларини яшнатиб ётар, йўлкалар у ёқдан-бу ёкка шошилиб ўтаётган кишилар билан гавжум эди. Одамлар ётиш олдидан шаҳар кезишади, чекка-чеккалардаги газсув дўконлари олдида навбат кутиб тўдаланиб туришади.

Чор-атроф сайилчиларнинг ғовур-ғувури, трамвай-троллейбусларнинг шовқини билан тўлиб-тошган.

Улар йўловчилар дарёсига қўшилиб жимгина боришар, симёғочлар тагида ўз сояларига етиб олишар, учтўрт қадам юришлари билан соя яна олдинга ўтиб кетар, келгуси симёғочга яқинлашган сайин орқага чекинар эди.

Мехмонхона ёнидаги ер ости йўлидан ўтиб, гулзор майдонга чиқишиди. Энг чеккадаги скамейкага бориб ўтиришди. Бу ерда ҳамма нарса – баланд-баланд бинолар пештоқидаги афишалар ҳам, шовуллаб отилаётган фаввора ҳам камалак нурида товланади. Мехмонхонанинг еттинчи қаватидаги ресторандан оркестр садоси, мастона кийқириқлар эшитилади. Тошкент ўзининг ташвишию кувончи, нурларию зулмати билан яшайди.

Муқаддам зимдан Анварга қараб қўйди. У фавворадан кўз узмай ўтирас, чехраси сув ичидаги айланадиган нурлар аксида гоҳ кизарип, гоҳ кўкариб қўринарди.

– Алимардонни кўриб турибсизми?

Муқаддамнинг юраги зирқираб кетди. Анварнинг ўзига қарамай гапирганидан шубҳага тушиб, иккиланиб қолди: «Сезибди! Айтайми, йўқми?» У яна бир лаҳза иккиланиб турди-да, ички бир ишонч билан ўзига далда берди: «Билса нима!»

– Ҳа бориб турибман... – У шундай деди-ю, икки юзининг ловиллаб кетганини сезиб, тилини тишлаб қолди.

Анвар ўгирилиб қаради. Унинг кўзларида ювош табассум бор эди.

– Тузукми?

– Яхши... – Муқаддам елкаларини учирив қўйди. – Ўзингиз бормадингизми ҳеч?

– Иш кўпайиб кетди, – деди Анвар чарчоқ оҳангда, – эртадан-кечгача югур-югур... Ҳали бастакор билан учраш, ҳали шеърларни муҳокама қил... Телевизорни

кўраверарканмиз-у, томошаларни тайёрлаш қанчалик машаққатли бўлишини билмас эканмиз.

Муқаддам унинг сидқидилдан гапираётганини пайқади.

Йўқ, Анвар қувлик-шумлики билмайди!

У Анваринг ўйчан кўзларига қараб, охиста хўрсинди. Ўша кундан бери ўзининг кўнглида уйғонган муаммога жавоб топгандек бўлди. «Ўзимнинг Анвар акам яхши!» – У хаёлида шундай деди-ю, аммо кўнглининг бир чеккасини аёвсиз кемираётган бир куч тагин жунбушга келди. Муқаддам бу муаммонинг нима эканлигини тушуниб етолмас, аммо бир нарса аниқ эди: у Алимардоннинг нимасидир Анвардан устунроқ, кучлироқ эканини ҳис этар эди. Кўпдан буён Анварнинг алланимаси ўзига ёқмай келаётганини пайқаган, лекин бу нарса нима эканини аниқ билмас эди. Алимардонни учратганидан кейин билди. Анвар бўшанг экан, латта экан!

– Кетамизми?

Муқаддам унинг ювош овозини эшитди-ю, нима деганини пайкамай, саволомуз қараб кўйди.

– Кеч бўлиб кетди, – деди Анвар нокулай жилмайиб. – Уйингиздагилар хавотир олишади.

Улар тор кўча бошидаги каттакон харсангтош олдидиа хайрлашдилар. Кун бўйи тош устида писта сотиб ўтирадиган хотин аллақачон уйига кетган, чор-атрофда писта пўчоқлари сочилиб ётарди.

Анвар хайрлашиб қўл чўзаркан, Муқаддамнинг кўнглидаги бояги хижиллик йўқолди. Хаёлида яна ўша юпанчли, тиник фикр уйғонди: «Йўқ, ўзимнинг Анвар акам яхши!» Муқаддам унинг кўлини узок қисиб турди-да, ишонч тўла кўзларига қараганча, хўрсиниб кўйди.

Кўча ичкарисидан аллакимнинг қадам товушлари эшилди. Анвар дарров кўлини тортиб олди.

– Хайр...

Муқаддам шартта бурилди-да, қоронғи күча ичига шўнгиф кетди.

Ажаб, қиз боланинг қалби ловиллаб ёнса-ю, йигит киши ҳадеб бўшашаверса...

Анвар Муқаддамнинг нимадандир кўнгли чўкканини сезди шекилли, кетидан гапириб қолди:

– Алимардондан хабар олиб туринг...

Муқаддам эшитса ҳам индамай кетаверди. Анварнинг қулоқлари остида кескин, асабий пошна садолари узоқ вакт қарсиллаб турди. Бора-бора қадам товушлари сусайиб, тинчиб қолди.

\* \* \*

Муқаддам амбулаторияга кириб келганида анчагина одам тўпланиб қолган эди. У бири боласини овутаётган, бири тинимсиз йўталаётган bemorлар орасидан ўтиб, йўлак охиридаги эшикни очди. Тўрдаги стол қаршисида соchlари оқарган доктор ўтиради. Муқаддам ишга келган биринчи куниёқ бу аёл қишлоқда Ҳури дўхтири деб танилиб кетганини, одамлар уни қаттиқ хурмат қилишини эшитганди. Унинг ўзи ҳам бу аёлнинг оналардай меҳрибон муомаласини яхши кўриб қолганди.

– Мен келдим, опа... – деди у ичкари кириб.

Доктор ёзаётган касаллик варакасидан бош кўтариб, жилмайди. Ташқарида ёмғир ёғаётгани учун чироқ ёқиб қўйилган, стол устидаги шиша банкага солинган термометрлар ялтираб кўринарди.

– Бугун яна хонадонларга қатнайсиз, – деди доктор.

«Яна Алимардоннинг уйига бораманми?» – деб ўйлади Муқаддам. Ўша кунги воқеани, кеча Анвар акаси билан совуқ хайрлашганини эслади-ю, чойшаб тўшалган диваннинг бир чеккасига бўшашиб ўтириди.

– Бошқа одам борса бўлмайдими? – деди у чойшабни фижимлаб. Хури опа ўзига синчиклаб қараб турганини хис этса ҳам бошини кўтармай ўтираверди.

– Ким боради?

Муқаддам кўз қири билан қаради-ю, докторнинг кўзларидан ажабланаётганини пайқади.

– Хадича опангиз боролмайди-да, – деди доктор хотиржам оҳангда.

Муқаддам ўзининг лов этиб қизариб кетганини сезди. У ишга келган кунидан Хадича таътилга чиқиши керак эди. Аммо Муқаддам ҳали тажрибасиз бўлгани учун оғироёқлигига қарамай, у ҳамон қатнаб турар, иш ўргатарди.

Муқаддам стол устидаги шиша банкага, ташқарида деразага охиста урилаётган ёмғир томчиларига журъатсиз қараб қўйди-да, шивирлади:

– Уяламан...

Доктор шу кадар бегараз қах-қах уриб юбордики, Муқаддам беихтиёр бошини кўтариб қаради.

Доктор кула-кула халатининг енги билан кўзларини артди.

– Техникумда ибн Синонинг гапини айтишмаганмиди? Бемордан сесканган табиб – табиб эмас. Сиз биронвга она, биронвга опа, биронвга сингил бўлишингиз керак.

«У-чи, – деб ўйлади Муқаддам. – У шундоқлигини билармикан?» Алимардоннинг чиройли чехраси, чимирилган қошлиари кўз ўнгига келди-ю, ҳам кўрқинчли, ҳам алланечук эркаловчи туйғулар ичидаги иккиланиб, ўрнидан турди. Эшик олдига етганида негадир ўзининг ҳам ўша ёққа талпинаётганини сезиб, ҳаяжон ичидаги тутқични ушлади.

– Айтинг, навбатдаги одам кирсин, – деб қолди доктор унинг кетидан.

...Ёмғир ҳаммаёқни эзид юборган эди. Кишлоқ жимиб қолган, пахса деворлар заҳ босиб кетган, ҳали

кўмилмаган токлар эгри-бугри қизғиши гавдасини яши-ролмай, иймангандай осилиб ётарди. Чор-атрофда ёмғир аралаш намиққан хазон хиди гуркирарди.

Муқаддам таниш, пастак эшик тагига етганидан ке-йингина тез юрганини, юраги аллақандай қарама-қарши туйгуларга тўлиб-тошганини пайқаб қолди. Эшикни қия очиб, ҳовлига кирди-да, ерда ётган бир қарич ёнғоқ чўпини олиб, туфлисига ёпишган лойни сидириб тушириди.

Ҳовлидаги нарсалар деярли ўзгармабди. Факат ёнғоқлар яп-яланғоч бўлиб қолибди. Шохларининг уч-учидаги битта-яримта япроқлар ёмғирдан ивиган танини кўтаролмай, ожиз силкинади. Молхона томидаги маккажўхорилар йиғиб олинибди, қамиш бўғотдан сизиб тушаётган йирик-йирик томчилар ора-чора яраклайди.

У девор тагидаги қуруқ йўлқадан уч-тўрт қадам юриб, тўхтаб қолди. Ичкаридан рубоб овози эшитилди. Аввалига хиссиз, эринчоқ тингиллаб турди-ю, кейин бирдан жўшкин садоларда жаранглаб кетди. Муқаддам бир нафас қулоқ солиб, бу куйни аввал ҳеч қаерда эшифтмаганини сезди. Ҳа, бу куй янги куй эди. Унда эндиниа ердан бош кўтарган бойчечакларнинг нозик шивирлаши ҳам, тантанавор баҳор шалолалари ҳам, қуёшдай тиник туйгулар ҳам бор эди.

Муқаддам беихтиёр жилмайди. «ўзи чаляпти». У куй оғушида эркаланиб, яна уч-тўрт қадам юрди. Энди дераза ёнига етганида куйга худди торларнинг ўзидай тиник бир овоз қўшилди. У қўшиқнинг биринчи сатрларини яхши англаб ололмади-ю, кейин аниқ эшита бошлади:

...Яхши қол, эй дилбарим, дилда қадар, кетмақдаман,  
Ишқ аро энди холим зеру забар кетмақдаман.  
На ишончу, на қувончу, на кўнгилдан очма гап,  
Барчасидан ушбу кун йўқдир самар, кетмақдаман!

Овоз шу қадар тиник, дилрабо эдики, Муқаддам ҳаяжондан энтикиб кетганини сезди. Қўшиқ уни аллалар, ширин туйгуларга гарқ этарди. У ёқасидан муздек сув қуюлиб кираётганини анчадан кейин сезди. Бўғотдан бир қулочча чиқариб қўйилган тарнов тагида тўхтаб қолганини билиб, дераза олдига яқинроқ борди. Ичкари коронғироқ бўлгани учун Алимардоннинг юзини аниқ кўролмаса ҳам, унинг каравот ёнида тик турганча рубоб чалаётганини кўрди. У ўз куйидан ўзи маст эди, дераза томонга қайрилиб ҳам қарамасди.

Мен қуёш юзлимга деб тун кечалар бердим юрак,  
Оқибат отганда тонг қондир жигар, кетмақдаман.  
Шунча кунлар ўтди, аммо сўрмадинг ҳолимни бир,  
Охирида ҳол сўраб келсанг магар, кетмақдаман.

Муқаддам тўхтаб қололмади. Тез-тез юрди-да, йўлакдан ўтиб, эшикни очди. Алимардон уни кўриб, бир лаҳза тўхтади. Лекин зум ўтмай яна рубоб жаранглади. У қўшиқнинг охирги байтини Муқаддамдан кўз узмай айтди:

Келганингда дедиларки, бу йигит кони заар,  
Кетмагимдан охир, айт, борми заар, кетмақдаман?

У негадир енгил хўрсиниб жилмайди.

– Муқаддам...

Муқаддам унинг қувонч тўла кўзлари парпираб кетганини, хўрсинганини сезди.

– ... келдингизми? – деди Алимардон, худди унинг албатта келишини билгандай.

Муқаддам ёмғирпўшини эшик олдидаги михга илди.

– Чалаверинг...

– Эшитасизми? – Алимардон шодлик тўла кўзлари билан унга бошдан-оёқ разм солиб чиқди. – ўтилинг. Ивиб кетибсиз...

Муқаддам катак-катақ адёл тўшалган каравотнинг бир чеккасига ўтириди. Алимардон унинг ёнига оғир чўқди-да, қошларини чимириди.

– Чалайми?

Муқаддам индамасдан бош силкиди. Пастак шифт остида яна торлар нола чекди. Алимардоннинг қўллари пардадан пардага енгил кўчар, тошқин садолар текис парвозв этар эди.

Куй тамом бўлгандан кейин Алимардон унга яна қошларини чимириб қараб қўйди.

– Раҳмат! – Муқаддам унга меҳр билан тикилиб қолганини пайқаб, дарров кўзларини яшириди.

– Ўша куни шунақаям урган экансизки, уч кунгача юзим ловиллаб юрди. – Алимардон кулди.

– Яхши чалар экансиз, – деди Муқаддам унга яна тезгина қараб олиб.

– Сиз куйдан ҳам яххисиз...

Муқаддам унинг қўллари чаккасидаги соchlарига текканини сезиб, чўғ теккандай сесканди. Аммо туриб кетмади.

– Мана шу ашула сиз учун ёзилган... – Алимардоннинг овози негадир титраб кетди. Муқаддам хавотирланаб унга ўғирилди-ю, шу ондаёқ Алимардоннинг қайноқ, титроқ лаблари ўзига ёпишганини ҳис этди. Муқаддам ожиз талпинар, аммо унинг оғушидан чиқиб кетолмасди. Бу дақиқалар унга ҳам лаззатли, ҳам азобли туюларди. Анчадан кейин у каравотдан сакраб турди-да, тескари қараб, қўллари билан юзини яшириди.

– Яхшимас, нима кераги бор, Алимардон ака... – деди бўғиқ овозда.

Шу ондаёқ елкаларига яна унинг оғир қўллари тушганини пайқади. Силтаниб, бурчакдаги шкаф тагига бориб олди. У юзларини кафти билан яширганча турар, оёқларидан мадор кетиб, қалтирарди.

– Муқад...

У Алимардоннинг овозини яна қулоқларининг тағида эшишиб, кафтини туширди-да, унинг аллақандай ҳаяжонли, ўт ёниб турган бежо кўзларини кўриб қўрқиб кетди.

– Кўйинг! – У Алимардоннинг кўкрагидан итариб юборди. – Худо ҳаққи, тегманг...

Лекин Алимардоннинг бақувват қўллари белига чирмашганини кўриб, даҳшат ичидаги шивирлади:

– Қочинг, ҳозир додлайман!

Икковлари гандираклаб бориб шкафга урилишди. Шкаф устидаги ганч мушукча ағдарилиб, Алимардоннинг елкасига, ундан ерга тушди-да, чил-чил бўлди.

– Қочинг! Уятсиз! – У Алимардоннинг юз-кўзига урар, типирчиларди. Яна бир лаҳзадан кейин Муқаддам каравотга учеб тушди. – Нима қиляпсиз? – деди қўрқувдан кўзларини катта-катта очганча пичирлаб. Кейин кучи борича юлқина бошлади.

Алимардон уни бўшатмас, ҳадеб бир гапни қайтарарди:

– Муқад... Бари бир бирга бўламиз-ку... Муқад...

Муқаддам кучли эди. У узоқ олишди. Кейин бирдан бўшашиб-ю, жимиб қолди. Ҳозиргина ўзи шилиб ташлаган Алимардоннинг юзларини силаб, кўзларини чирт юмиб олди. Энди у ҳеч нимани ўйламас, унга ҳамма нарса бари бир бўлиб қолган, факат қўрқарди...

...Ярим соатлардан кейин у гандираклаб ўрнидан турди. Токчага суюб кўйилган ойна олдига секин-секин борди. Кўзгудан соchlари паришон тўзғиган, юзлари сўлгин бир қиз қараб турарди. Шу топда у ўзининг қадри бирданига пасайиб кетганини юрак-юракдан ҳис қилдию ўқраб-ўқраб йиглади. Алам ичидаги орқасига ўгирилиб қаради. Алимардон каравотга қўлларини тираганча бошини куйи солиб ўтиарарди.

Муқаддам чидаб туролмади.

– Энди нима бўлади, Алимардон ака?

Бирданига ўзига яқин, азиз бўлиб қолган кишисининг кучогига ўзини отди. Унинг тиззаларидан қучоклаб, юзларини яширди.

– Дадам сўйиб ташлайди мени!

Алимардон унинг соchlарини силаб, хўрсинди.

– Бўлди... Йигламанг.

Унинг овози негадир ҳиссиз, совуқ эди.

... Анчадан кейин Муқаддам чил-чил бўлган мушукчанинг синик бўлакларини босиб ўтиб, ёмғирпўшини кийди. Эшикдан чиқиб кетаётганида яна бир қайрилиб қаради. У мана шу пастак уйга, қошини чимириб ўтирган Алимардонга ўзининг бир умр боғланиб қолганини ҳис этар, кетгиси келмасди.

\* \* \*

Тўсатдан келиб теккан ўқнинг зарби анчадан кейин билинаркан.

Муқаддам эшиги тагига етганидан кейингина ўзи қилиб қўйган гуноҳнинг бутун даҳшатини ҳис этди. Бу юқ шундай оғир эдики, борган сайин унинг икки елкасидан қаттиқроқ эзар, ерга букиб, мажақлаб ташлаётгандай бўларди.

«Дадам сўйиб ташлайди!» У зах ҳиди анқиб турган кесакига суянганча лабларини маҳкам тишлаб, мункайиб қолди. Эшик гўрдай совуқ оғзини ланг очиб, қорайиб турарди. Зулмат қуюқлашиб борар, пастак булутлар қопқора этакларини судраб шаҳар устида кезиб юрар, ҳамон ўша совуқ, лоқайд томчиларини пуркар эди.

Муқаддам елкасидан муз ўтиб кетганини сезиб, секин мўралади. Ичкаридан тиқ этган товуш эшитилмас, факат тарнов ғамгин шовулларди. Унинг қадам босишга мажо-

ли қолмаган, ичкарига кириши биланоқ пичоқ қўтариб турган дадасига рўпара бўладигандай юраги зирилларди. У неча йиллардан бери ўқитувчилик қилиб, одамларга тарбия берган, пенсияга чиққанидан кейин ҳам маҳалла раиси бўлиб, элга бош-қошлиқ қилиб юрган, маҳалла-кўй «Қори ака» деб орқа-олдидан қаттиқ хурматлайдиган отаси ёлғиз қизининг шармандалигини кечирмаслигини биларди.

Йўлак томондан гурс-гурс қадам товушлари, кейин йўтал овози эшитилди.

«Дадам!» – Муқаддам юраги узилиб тушгандай тагин кесакига суюниб қолди.

– Муқад! – У дадасининг йўғон овозини эшитиб, бошини қўтарди, коронғида унинг қалин, ҳали оқ ораламаган соқолини, қуюқ қошлари тагидан синчиклаб тикилиб турган кўзларини аниқ кўрди. – Нима қилиб турибсан? – Дадасининг баланд овози яна унинг кулоқларига михдай қоқилди.

– Ўзим, – деди Муқаддам бепарво гапиришга уриниб. – Ишдан келдим.

– Кир уйга! Шалаббо бўлиб кетибсан-ку!

Дадаси уни четлаб ўтди-ю, уч қадамча нарига бориб, қўлидаги соябонини очди. Боши устида қўтарганча тез-тез юриб, зулмат кўйнига сингиб кетди.

Муқаддам саросима ичиди ҳовлига мўралади. Равон айвондан ёғилаётган нур кафтдаккина ҳовлини, бир туп ўрикнинг ёмғирдан қорайиб кетган пастак шохларини ёритиб турарди.

Муқаддам девор тагига ташлаб қўйилган япалоқ гиштлар устидан сакраб-сакраб ўтиб, айвон эшигини шарақлатиб очди.

Токчадан алланимани олаётган Анзират хола чўчиб ўтирилди.

– Келдингми?... Ёмғир ҳам эзилди-ей...

Муқаддам онасининг касалманд юзига, шишиб кетган қовокларига қаради-да, кўзларини яширди.

– Йигладингми? – Онаси лаганин кучоқлаганча унинг олдига келди. – Нима бўлди?

Муқаддам даҳшат ичида эшикка ёпишди.

– Лобарларникига чиқаман...

\* \* \*

Уй ичи қоронги эди. Шифтдаги қандил ташқаридан тушиб турган ожиз нурда хира ялтирап, ёмғирнинг шивир-шивири эшитилиб турар, қаердадир соат чиқилларди.

Муқаддам болалиқданоқ қадрдон бўлиб қолган бу уйга кўп чиқар эди. Шодлигини ҳам, аламини ҳам мана шу уйда, мана шу Лобарга тўкиб соларди. Аммо ҳозир у нима дейди? Қандоқ гапирсинг?

Муқаддам шифтга тикилганча ётар, хаёличувалашиб кетган, нимани ўйлаётганини ўзи билмасди.

Лобар ётган каравот ғичирлади. Қоронгидаги унинг уф тортгани эшитилди.

– Муқад...

Муқаддам индамай ётарди.

– Муқад... – деди Лобар яна секингина.

– Нима дейсан? – деди у жеркиб.

– Ухлаганинг йўқми?

Муқаддам индамади.

Яна Лобарнинг хўрсингани эшитилди.

– Ўлсин! Бошимни ювган эдим, сочим ҳеч турмаяпти.

Муқаддам қарамаса ҳам Лобарнинг туриб ўтирганини, семиз кўлларини иягидан ўтказиб, сочини ўраётганини аниқ тасаввур этди.

Анчадан кейин тағин каравот ғичирлади. Лобар яна уф тортди.

– Жаҳонгир мени қишлоғига олиб кетаман, деяпти...

Муқаддам сарғиш жингалак сочли, серҳаракат, хушчақчақ йигитни эслади. Жаҳонгир Лобарни яхши кўрар, якинда улар билан баравар ўқишни битириб, фель-дешер бўлган эди.

– Тегавер, – деди Муқаддам бепарво.

– Вой, опам турибди-ку..

– Бўлмаса сабр қил!

Муқаддам тескари қараб олди. Яна жимлик чўқди. Қаердадир чиқиллаётган соат Муқаддамнинг азобли дақиқаларини лоқайдлик билан битта-битта санай бошлиди. Ташқарида ёмғир қаттиқроқ шивирлади.

– Муқад...

– Нима, нима?!

– Вуй, мунча, а! – Лобар сирли пичирлади. – Нимани ўйлайпсан?

Муқаддам индамай ётаверди.

Лобарнинг пиқиллаб кулгани эшитилди.

– Биламан... Анварни...

«Анвар!» – Муқаддамнинг мияси зирқиллаб кетди. Елкасидан босиб ётган юк устига яна бир тоғ ағдарилди. «Анвар!» – деди у пичирлаб. Елкалари аввалига секин-секин титради. Кейин силкиниб-силкиниб йиғлаб юборди. У бугун негадир Анварни эсламаган экан. Шунча йиллик қадрдон Анвар акасини, Анвар акажонини ўйламаган экан.

Муқаддам овозини чиқармаслик учун кўрпачага бурканиб олди. Бир вақт Лобар кўрпани тортқилаётганини сезиб яна ҳам қаттиқроқ бурканди.

– Қоч! – деди нафаси бўғзига тикилиб.

– Вой, жинни, нега йиглайсан?

– Якинда мен ўламан, Лобар! – у ҳайратдан оғзи очилиб қолган ўртоғига тик қараб қичқирди. – Ўламан! Эшитдингми?!

Алимардон эрта уйғонди. Ёмғир тинганидан бери ҳаво тиниқлашиб, ерлар селгиб қолган эди. У ювингани анхор бўйига тушди. Ҳали қуёш чиқмаган, сув юзида нозик туман пардаси силкиниб турарди. Алимардон сирғанчик соҳилдан авайлаб юриб, пастга тушди. Қумлоқ соҳилга чўнқайиб, муздек сувни кафтига олди-ю, совуқдан бармоқлари зирқираб кетди. Кейин билакларини шимариб олганча, пишқириб-пишқириб ювина бошлади. Бир зумда қўллари, бўйни қип-қизариб кетди. Шимининг тиззаларига сув сараб, шалаббо бўлди.

Кўнглида алланечук бир енгиллик сезиб сакраб турди-ю, бир чеккада, хўл ўтлар устида ётган сочиқ билан узоқ артинди. Қирғоқдан юкорига чиққунча қуёш кўринди. Ёнғоқларнинг ялангоч шоҳида чумчуқлар сайради. Ердан майин ҳовур кўтарила бошлади.

У енгил қадамлар билан ҳовли томонга юриб кетди.

Уч кундан бери Алимардон шод, руҳи тетик эди. Бутунлай соғайиб қолди. Бешёғочдаги музика мактабига бориб, дарс бера бошлади. Фақат ўша кундан бери Муқаддам кўринмаётгани кўнглини хижил қилиб турарди. Кеча ишга кетаётганида гузардаги дўхтироҳонага киргиси келди-ю, тагин айниди: «Нима, ялиниб кираманми?» У яхши иш қилмаганини, бир қизни баҳтиқаро қилиб кўйганини билар, уни соғинарди. «Бари бир уйланишим керак!» – ўша кундан бўён унинг хаёлида шу фикр чарх уради.

Хозир ҳам елкасига ташлаб олган сочиқнинг бир учидан ушлаганча шудринг босган сўқмоқдан юриб келаркан, яна Муқаддамни ўйлади: «Бугун дўхтироҳонага кираман!» У кўча эшикни очиб ҳовлига кириши билан ўртадаги сўрининг темир панжарасига суюниб турган Анварни кўрди-ю, сесканиб тўхтаб қолди. Кўнглида

уйғонган қўрқувми, уятми, аллақандай тушуниб бўлмас бир туйғудан ранги ўчиб кетганини ўзи ҳам сезиб, Анварга зимдан қараб қўйди. У Анварнинг ҳозироқ келиб ёқасидан олишини, уриб юборишини кутарди. Аммо Анвар ҳамон сўри панжарасига тирсагини тираганча, оёқларини чалиштириб, хотиржам турарди.

«Билмабди! Ниманинг маъносига тушунарди бу!» Алимардон Анварнинг ҳолидан хузур қилиб ич-ичидан кулиб қўйди.

– Қачон келдинг!

Анвар секин-секин юриб келиб қўлини узатди. У куёвлардек ясаниб, янги костюм-шим кийибди. Кўкиш ялтироқ галстук тақиб олибди.

– Яна совуқ сувга ювиндингми? – деди у ёлғондакам пўписа қилиб.

– Нима қипти? – Алимардон кулди. – Сенга ўхшаб ойимкиз бўлайми?

– Ким, ким шунака? – Анварнинг кўзлари аламдан қисилиб кетди. – Қаҳрамон-эй! Бир ой инқиллаб ётмагин тагин...

– Бўпти! – Алимардон унинг ҳеч нимадан хабари йўқлигига тамоман ишонди-ю, елкасига шапиллатиб уриб қўйди. – Ҳазил, ўрток, уйга кирайлик.

– Йўқ... – Анварнинг кўзларига жиддият чўқди. – Эртага эрталаб студияга боргин... Концерт бор. Сен ҳам чиқасан.

Алимардон кўпдан ўйлаб юрган орзуси чиндан ҳам рўёбга чиқаётганидан қувониб, юраги гурсиллаб уриб кетди. Ялт этиб Анварга қаради-ю, атайлаб талмовсиради:

– Кўйсанг-чи!

– Ҳазили йўқ! – Анвар астойдил тайинлади. – Мен дастурга киритиб қўйдим.

Алимардон ўзига соддалиқ билан тикилиб турган дўстига қараб, яна атайлаб бепарво гапирди:

– Мени бошларига уришармиди?  
– Кутаман! – Анвар яна жиддият билан тайинлади-да, кўлини чўзди. – Хайр!

Унинг учи ингичка туфлиси селгиб қолган ҳовлида билинар-билинмас из қолдириб, кўча эшигига етганидан кейин Алимардон истеҳзоли табассум билан шивирлади: «Галварс!»

\* \* \*

Тушга яқин Анвар уни телестудия эшиги олдида кутиб олди. Яна энг аввал Алимардоннинг кўзи унинг чиройли галстутига тушди.

– Рубобинг қани? – деди Анвар Алимардоннинг қуруқ келаётганини кўриб.

– Бошимни қотирмасанг-чи, нима деб чиқаман? – У ичида жон деб турса ҳам атайлаб тихирлик қилди.

– Майли, юравер-чи... – Анвар уни милиционер турган вестибиюлдан олиб ўтиб, кенг, ёруғ йўлакка бошлаб кирди. Пояндоз тўшалган зиналардан иккинчи қаватга кўтарилишди. Тепасига «Музика редакцияси» деб ёзилган эшик олдида тўхтаб қолишиди.

– Юравер! – Анвар эшикни очиб, уни бошлаб кирди. Чоғроқ хонага ҳам худди зиналардагига ўхашаш кимматбаҳо гилам тўшалган, бир-бирига қаратиб кўйилган иккита стол бўш турарди.

Анвар юмшоқ ўриндики креслони Алимардоннинг олдига сурди.

– Ўтириб тур-чи...

– Сенинг столинг қайси?

– Ана... – Анвар бепарволик билан девор олдида-ги столни кўрсатди. – Ҳозир тор топиб келаман. – У тез чиқиб кетди.

«Шунака жойда ишларкан-да!» – Алимардон се-кин уф тортиб кўйди. Шу топда негадир унинг Ан-

варга яна ҳасади келди, аммо нимагалигини ўзи ҳам билолмади.

Яна бир неча дақиқадан кейин Анвар садаф пардалари ярақлаб турган яп-янги тор кўтариб кирди. «Ажойиб тор экан! – Алимардон чолғунинг у ёқ-бу ёғини айлантириб кўраркан, тагин билинтиrmай уф тортиб кўйди. – Пайти келсин, албатта, оламан!»

– Энди репетиция хонасига кириб машқ қиласан...

...Алимардон студия залининг бир чеккасидаги стулга ўтирганча навбат кутарди. Бу ерга киришдан олдин қанчалик кўрқкан бўлса, энди навбат тегишини шунчалик орзикиб кута бошлади. Кимдир кўшиқ айтар, аллақандай қизлар рақс тушар, аммо у ҳеч кимни кўрмас, ҳеч нимани эшиитмас эди. Шу топда хаёлида ёлғиз бир фикр чарх урап: «Ҳозир мени ҳамма кўради. Бутун республика кўради!»

Ниҳоят, пультда ўтирган қизнинг: «Навбат ёш хонанд Алимардон Тўраевга», – дегани эшитилди.

У бошқа ҳеч нимани эшиитмади. Юзлари ловиллаб ёнаётганини, қулоқлари шанғиллаётганини ҳис этиб, се-кин ўрнидан турди. Оператор камерани аста-секин унинг олдига суриб кела бошлади. Ҳозир табассум қилиши ке-раклиги тўсатдан хаёлига келди-ю, камеранинг қизил чироқларига қараб жилмайди. Торни секин-секин чер-та бошлади. Кейин завқ билан, ҳарорат билан чалишга тушди. У яхши чалаётганини, тор ўзининг кўлида бул-булдай сайраётганини билар, билган сайин завқ билан чёртарди. Куй тамом бўлиши билан у кўшиқни, ўша – Муқаддамга айтиб берган – «Йигит қўшиғи»ни бошлаб юборди. Унинг овози жимжит студиянинг баланд шифт-ларига тегиб жаранглар, бугунги концертда ўзи ғолиб чиқаётганини, ажиб бир оҳангда айтаётганини билиб турарди.

Кўшиқ тамом бўлди-ю, у боягидай табассум билан оҳиста бош эгиб қўйди...

Йўлакка чиқиши билан Анварга дуч келди. Анварнинг кўзлари шодлиқдан чақнар, унинг қўлини маҳкам кисиб, ҳадеб бир гапни тақрорларди:

– Жуда яхши чалдинг, дўстим! Жуда яхши.

Алимардон дўстининг шодлиқдан чақнаб кетган юзига қараб мийигида кулиб кўйди. Шу ҳам чалиш бўптими? Ҳали шундай кунлар келадики, Алимардон Тўраев деган номни эшитганида бутун мамлакат ҳайратдан ёқа ушлаб қолади.

– Кетамизми? – деди у Анварга бепарво қараб.

– Юр... Мен ҳам Бўстонга боришим керак.

– Муқаддамнинг олдигами? – у қах-қах уриб юборишидан ўзини аранг тийиб, кўзларини сузди. – Майли, юравер...

Кўчада қуёш порлар, ҳаво илиқ, хузурбахш эди.

Алимардон такси тўхтатгиси келди. Анварнинг хай-хайлашига қарамай, кўччанинг ўртасига тушиб қўл кўтарди, аммо машиналар тўхтамас, уни майна қилгандай ғизиллаб ўтиб кетарди.

Нихоят, бир «Волга» ўн қадамча нарига ўтиб тўхтади. Икковлари кетма-кет югуриб боришли.

– Қаёққа, биродар? – шопмўйлов таксичи машинанинг кия деразачасидан мўралади.

– Бўстонга обориб кўйинг! – деди Алимардон нафасини ростлаб ололмай.

Ҳайдовчи кулди.

– У ёкка «собственный» машинангизда борасиз, ука!

Алимардон парпарондай елиб кетган машинанинг орқасидан қараб, тиишларини ғижирлатиб қолди: «Бўпти! Ўз машинамда борганим бўлсин!»

Кишлоқ ёмгирдан ювилиб, яшнаб кетган эди. Деворлар тагида адашиб бош кўтарган мунис майсалар эртага кор остида қолишидан бехабар яшнаб туради.

Алимардон олдинда кетар, Анвар дўстининг текис талпинаётган баланд гавдасига қараб борар, Алимардоннинг телевизорда чиққанида, бунда ўзининг ҳам хизмати борлигидан шод эди.

Катта кўчанинг муюлишидаги тут тагига етганда Алимардон бурилиб қаради.

– Дўхтирохонага бораман, деганмидинг?

Анвар ҳам тўхтаб, соатига қаради.

– Муқаддам кетмагандир ҳали?..

– Кўришинг шартми?

Анвар унинг чехрасида бир қалқиб ўчган масҳарали табассумни ўзича тушунди.

– Согиндим, – деди секин. Зах ерга ёпишиб ётган тут хазонларини оёгининг учи билан титкилади. Кейин дўстига қараб, оҳиста хўрсинди. – Сен билмайсан-да... Ҳеч тушуниб бўлмайди бу қизга. Икки хафтадан бери гаплашмай кўйди. Нима бўлаётганини ўзим билмайман. – У бошини баланд кўтариб, куз осмонида кезиб юрган бир парча булутга тикилди. Унинг кўзларида ширин бир орзуми, энтикувчан табассумми бор эди.

Алимардон яна боягидай масҳарали кулди. У энди бу кўймижоз ошнасидан оладиганини олиб бўлган, студиядагилар билан танишиб олган, яна телевизорда чиқиш учун Анварнинг ёрдами керак эмасди.

– Мен уйланяпман, – деди хотиржамлик билан.

Анвар ярқ этиб бурилиб қаради. У севинишдан кўра кўпроқ ҳайрон қолди.

– Кўйсанг-чи ҳазилингни!

Алимардоннинг юзида яна ўша қув табассум қалқди.

– Ҳазили йўқ, – деди совуққина қилиб.

– Шайтон-эй, нега айтмадинг? – Анвар энди ишонди. – Қачон? Кимга?

Алимардон ҳозир унинг юрагига бигиз санчишидан завқланар, ич-ичидан тошиб келган қулгисини аранг босиб турарди. Овозини иложи борича бепарво қилиб, қошини чимириди.

– Муқаддамга...

– А? Қайси Муқаддам? – Даҳшатга тўлиқ қисқа бир ҳайкириқ ҳавода фарёд солди. – Қайси Муқаддам?!

Анвар оёқларининг учигача музлаб кетганини ҳис қилиб, Алимардоннинг бепарво кўзларидан маъно излар эди. Алимардон тагин бир марта кулиб кўйди.

– Ўша ўзинг билган Муқаддам-да! – У оёғининг учида кескин бурилиб кетаверди.

Алимардон бошини ғоз тутиб борар, жаҳонда ҳеч нима ўзгармагандек, ҳамма нарса кўнгилхушлик билан бораётгандек эди.

У тутзор кўча ичига кириб кетганидан кейингина Анвар ўзига келди. Юрагини тилимлаб ташлаган хабарни ҳазилга йўйишга ҳаракат қилгандек шуурсиз жилмайди. Югуриб бориб, Алимардонни елкасидан ушлаб, ўзига қаратди.

– Овсар! Шунақа нарса билан ҳазиллашадими одам?!?

Алимардон ҳайрон қолгандай қошини чимириди.

– Ўзинг биласан, ҳазилни ёмон кўраман.

Анвар унинг бехазил гапираётганини тушунди. Бирор бехосдан «онанг ўлди», деганда киши кандай ахволга тушса, ҳозир у ҳам худди шундай ахволда қолди. Аъзойи бадани япроқдай қалтирай бошлаганини ҳис этиб, Алимардоннинг ёқасига ёпишди.

– Ёлғон айтасан, мараз!

Алимардон ҳузур килиб кулди.

– Бор, ишонмасанг ўзидан сўра! – У Анварнинг кўлини ёқасидан олиб ташлаб, дона-дона қилиб таъкидлади: – У

менга тегади, билдингми?! У менга тегишга мажбур! Мен уни ўзимники қилиб қўйдим!

– Тухмат!

Анварнинг кўз ўнги қоронғилашиб кетди. Қошини чимириб турган Алимардон ҳам, яланғоч тутлар ҳам, осмонда кезиб юрган бир парча булат ҳам чирпирак бўлиб айланиб кетди.

У Алимардоннинг башарасига қачон мушт туширганини билолмай қолди. Ўзига келганида, Алимардон кафтининг орқаси билан қоп-қора қонга бўялган оғзини артар, пастак тутга суюниб олганча ҳадеб тупуради.

Анвар заранг ерни қарсиллатиб тепганча югуриб кетди. Мактабдан қий-чув кўтариб чиққан болалар орасидан, сўриларда чойхўрлар чордана куриб ўтирган чойхона олдидан югуриб ўтди-ю, деразаларига оппок дарпардалар тутилган дўхтирхона эшигига бориб қолди. Шиддат билан йўлакка отилиб кирди. Навбат кутиб ўтирган одамларнинг хайхайлашига қарамай, тепасига «Муолажахона» деб ёзилган эшикни шахт билан силтаб тортди. Қарши томондаги деразанинг бир тавақаси даранглаб очилиб кетди.

– Муқаддам!

Унинг ҳайқириги бутун дўхтирхонани жаранглаби юборди. Устига оқ чойшаб ёпилган столга тирсангини таираганича кафтини пешанасига босиб ўтирган Муқаддам ўрнидан турди-ю, оёкларидан мадор кетгандай яна ўтириб қолди. Унинг ранги қув ўчиб кетган, кўзларида даҳшат бор эди.

Анвар қўксини тўлдирган нидони ялинчоқ ингроқ оҳангда айтди:

– Муқаддам... Айтинг... Ростми?

У Муқаддамнинг йўқ дейишини кутиб турар, шу бир оғиз сўз учун бутун борлигини беришга тайёр эди.

Ваҳимали сукунатга тўлиқ бир неча дақиқа ўтди.

Муқаддам кафти билан юзини тўсиб, йиглаб юборди.  
– Рост...

Анварнинг кўз ўнгидаги яна ҳамма нарса чирпирак бўлиб кетди. Оёқлари ўз-ўзидан бўшашиб, гандираклаб кетди-ю, эшикка суюниб қолди. Бу ердаги ҳамма оппок нарсалар бирданига қоп-қора тусга кирди-да, бошини солинтирганча ташқарига қараб судралди.

У бирданига ҳаммасини тушунди. Муқаддам нима учун ўзига бегона бўлиб қолганини ҳам, энди хеч қачон қайтиб келмайдиган, умрбод насиб этмайдиган азиз бир нарсасидан жудо бўлганини ҳам, ўзининг соғдиллиги, очиқкўнгиллиги ўз бошига бало бўлиб ёғилганини ҳам – ҳамма-ҳаммасини тушунди. Фақат бир нарсани тушуна олмасди. Шунча йиллик қадрдан дўсти нима учун хиёнат қилди унга? Шунчалар абллаҳлик қилишга уни нима мажбур этди экан?! Дунё пайдо бўлганидан бери нима учун одамлар боши устида хиёнат деган қоп-қора шарпа кезиб юради? Одамлар бунчалик қабиҳликни қаёқдан ўрганишаркин?!

У елкасига келиб тушган қақшатқич зарбадан мункиб кетгандай бошини қуйи солиб борар, кишлоқ оқшом тараффудини кўрар, чойхона гавжум, мактабдан қий-чув солиб болалар чиқиб келишарди. Олисда – уфқ этагида күёш ботиб борар, дараҳтлар учида қонли шафак ўйнарди.

\* \* \*

Шанба оқшомида Бўстон кишлоғи ажиб бир жозиба кашф этди. Бу оқшом ой ҳам эрта чиқди. Тўлиб, қипқизариб, яшнаб-яшнаб чиқди. Ноғоранинг шодон такатуми илик куз хавосини титратди. Гужгон ўйнаган юлдузлар тўйхона устида пасайиб рақс тушди.

Анвар Қонқус устидаги яккачўпда оёқларини осилтириб узоқ ўтирди. Анхор жимжит, сув юзида юлдузлар қалқиб оқар эди.

Ноғорачи йигит уста экан! Шундай берилиб, шундай терга ботиб чалдики, осмон пардасини йиртиб юборгудай бўлди. Ўз касбини яхши билар экан! Боплаб чалар экан! У фақат бир нарсани билмади. Ноғора чўпи билан ноғорани эмас, худди ўзига ўхшаш бир йигитнинг қалбини савалаётганини билмай қолди.

Шу куни ажойиб воқеа бўлди. Кимнингдир кўнглида баҳор гуллади. Кимдир кимгадир интизор бўлди. Кимнингдир қалбига кор ёғиб чиқди.

Тўйга бутун қишлоқ йифилди. Фақат анҳор ўз ўзанидан чиколмади. Конкус тун бўйи ғазаб билан, алам билан тўлганиб оқди.

\* \* \*

Ҳаёт шунақа экан. Гоҳо кимнингдир мотами кимгадир байрам бўларкан!

Алимардон икки ойгача ана шу байрам роҳати билан гашт қилиб яшади. Муқаддам ўзи ўйлаганидан ҳам яхшироқ, меҳрибонроқ чиқиб қолди. Анвар бўлса ундан бутунлай узоқлашиб кетди. Телестудияда тўсатдан дуч келиб қолса, тескари бурилиб кетадиган бўлиб қолди. Аммо Алимардон парво қилмасди, бир вақтлар ўзига қадрдон бўлган бу йигитни энди бир пулга ҳам олмас, ўз кувончи, ўз баҳтидан маст эди.

У шу икки ой ичидаги тўрт марта телевизорда чиқди. Ҳа, энди унинг омади юриша бошлаган эди. Узок сафарга чиқаётган одам бирон нарсасини унутиб қолдиришидан чўчиб, ўзини қанчалик текширса, Алимардон ҳам шунчалик пухта тайёрланарди. Ёнгоқзор боф устида ҳар сахар унинг янгроқ, дилбар овози парвоздар этар, у қўшиқ бошлаганида табиатнинг ўзи ҳам тан бериб қулоқ солгандай бўлар, сўқмоқлар ҳам, анҳор ҳам бир нафас сукут саклаб тингларди.

Алимардон ҳар ҳафтада янгидан-янги қўшиклар машқ қилар, шеърларга ўзи куй басталар эди.

Навбатдаги байрам арафасида уни яна студияга чақиришиди. Шу куни Алимардон ўз кучига икки марта ишонч ҳосил қолди. Мусиқа таҳририятига кириб бориши билан Анварнинг ёрдамчиси – касалманд мухаррир йигит унга учта конверт топшириди.

– Сизга экан.

Алимардон хайрон бўлиб, конвертлардан биттасини очди.

Оддий қора қалам билан ёзилган хатнинг биринчи сатрларини ўқиди-ю, хаяжондан кўз ўнги жимирилашиб кетди. У кўпдан орзу қилиб юрган ниятига ета бошлага-нидан маст, шод эди. Хатнинг охирги сатрларини ўқиркан, кўллари қалтираб кетди. «Биз Алимардон Тўраевнинг ажойиб овозини ҳар куни эшитсак деймиз...»

Мактуб ана шундай сўзлар билан тугалланган эди.

Шу куни у бешта қўшиқ айтди. Ҳар қайсисини ўзгача завқ билан, ўзининг дилбар оҳангি билан юрак-юракдан куйлади.

Концертдан кейин студия буфетига кирди. Икки қадах конъяк ичди. Бугун унинг руҳи тетик, кайфи чоғ эди. Шаҳар янги либос кийган, кўчалар чароғон, ранг-баранг афишаларнинг оловли жимжимаси салқин ҳавода камалакдек товланади. У троллейбус бекатига чиққанида таниш бир овозни эшитиб, тўхтаб қолди.

«Ўзим! ўзимнинг ашулас!» У тўрт қаватли бинонинг овоз келаётган деразасини топди. Қўшиқ биринчи қаватдаги ёрқин шуъла тушиб турган деразадан қуилиб чиқиб, қанот қоқарди. Алимардон хаяжон ичиде секин-секин юриб, дераза тагига борди. Дераза пардалари тушириб қўйилгани учун ҳеч нима кўринмас, аммо ичкарида одам қўплиги соялардан билиниб турарди. Чамаси, бирон-бир кеча бўлаётган бўлса керак, ичкарида босинқи

ғовур эшитилар, аммо қўшиқ товуши баралла, тиник янграр эди. Бу Алимардоннинг ўша биринчи «Йигит қўшиги» эди.

«Магнитофонга ёзиб олишган экан», деб ўйлади Алимардон нафас чикармай. У бу бино талабалар ётоқхонаси эканини эслади. «Бошланди! Талабалар ёқтиридими, оммалашиб шу!» Алимардоннинг лабларида қувноқ табасум ўйнади. Ҳозир кириб: «Ўша қўшиқни айтган Алимардон Тўраев мен бўламан», деса ишонишармикан?..

У ёнғоқзор боғкўчага алламаҳалда етиб борди. Ҳали ой чиқмаган, аммо осмонда жимжима юлдузлар чараклайди, оёқ остида хазон қирсиллайди. У пастак эшикни тақиллатаркан, негадир зарҳарханда билан жилмайди. «Алимардон Тўраев! Дурустроқ дарвозаси ҳам йўқ!»

\* \* \*

Эрталабдан бери эзила-эзила ёққан ёмғир тушга бориб қорга айланди. Аввалига битта-яримта учқунлар ҳавода эринчоқлик билан кезиб юрди-ю, кейин бирдан тезлашиб кетди. Йирик-йирик лайлакқор қиялатиб уриб берди.

Алимардон дераза олдида тик турганча, биринчи қорнинг ёғишини томоша қиласади. Ҳаммаёқ табиатнинг улуғвор, аёвсиз ҳақиқати олдида кути ўчгандай жимжит бўлиб қолди. Ёмғир ёғаётганда шодон шовуллаган тарнов ҳам, бўғотдаги чумчуқлар ҳам бир нимадан чўчигандай овозсиз қотди. Ҳовлидаги сўрининг панжаралари, молхонанинг томи оппоқ бўлиб қолди. Ҳовли этагидаги азамат ёнғоқлар тақдирга тан бергандай маъюс бош эгди, яккамдуккам япроқлар совуқдан дилдирай бошлади.

Бора-бора оқшом қўнди. Юракни эзувчи, кўнгилга ғашлик солувчи ғира-шира оқшом қўнди.

Нариги уйда Муқаддамнинг оёқ машинани шатиллатиб иш тикишга ўтиргани эшитилди. У оғироёқли бўлганидан бери кечалари хеч кимга сездирмай, чақа-лоқчага атаб кўйлакчалар тикадиган одат чиқарганди.

Кўча эшик тақиллади. Алимардон негадир чўчиб тушди. Эшик сукунат қўйнида янада қаттиқроқ гурсиллади. Муқаддамнинг машина шатиллатищдан тўхтагани эшитилди. Аммо Алимардон ундан олдинроқ ҳовлига тушди. Куёвликдан ёдгор бўлган бекасам чопони билан юзини қордан пана қилиб, йўлакка борди. Пастак эшикнинг ҳалқасидан ушлаб тортди.

Гира-шира коронгиликда икки киши турарди. Улардан бири новча, бош яланг, ёмғирпўш кийиб олган, совқотган бўлса керак, турган ерида ҳадеб депсинарди. Иккинчиси пакана, семиз, калта пальто кийиб олган, аммо чехраси аниқ кўринмасди.

«Йўлдан адашганлар бўлса керак». Алимардон эшикни каттароқ очиб таклиф қилди:

– Келинглар.

– Сизни топадиган кун бор экан-ку, Алимардон ака! – Новча йигит эски танишлардай куюқ сўрашди. Шериги ҳам қишлоқ одамларига хос тавозе билан қўшқўллаб унинг кафтини қисди.

Алимардон хеч нимани тушунмаган бўлса ҳам, яна таклиф қилди:

– Марҳамат...

– Йўқ, ака, – новча йигит яна дилкашлик билан шанғиллаб гапирди. – Биз бир хизмат билан келган эдик.

Алимардон улар тўйга айтиб келишганини тушуни-ю, атайлаб ўзини гўлликка солди.

– Қанақа хизмат?

– Мана шу дўстимиз, – йигит шеригига имо қилди. – Укасини уйлантираётган эди. Энди катталик эмас, эркалик, ака, бир хизмат қиласиз-да!

Шериги ҳам қўшқўллаб таъзим қилди.

– Энди йўқ демайсиз-да, ака! Хизмат ҳақингиз қанча бўлса розимиз. Олисдан келдик.

Алимардон «қанча берасиз» демоқчи бўлди-ю, айтмади.

– Йўқ... – у кескин бош чайқади. – Мен тўйга юрмайман... Ҳеч борган эмасман...

Тўй эгаси астойдил ялина бошлади:

– Хўп денг энди, ака. Оққўргон деган жойдан дараклаб келдик, йўқ деманг...

Алимардон йигирма қадамча нарида, тумшуғи билан деразага қадалай деб турган «Волга»ни энди кўрди. Қорнинг қалин пардаси ортида унинг ранги кўринмас, шарпадай аранг кўзга чалинарди.

– Машина ўзингизникими?

Тўй эгасининг кўнглида умид уйғонди шекилли, кувониб кетди.

– Ўзимиздан, ака, ўзимиздан! Бирпасда етказиб олиб бораман.

– Йўқ, бўлмайди, – Алимардон тағин бош чайқади. – Эртага ишга боришим керак.

– Хўп денг, ака, биз ҳам тушунадиган одаммиз. Хафа килмаймиз... – У Алимардоннинг ўйланиб туришини ўзича тушунди. «Фалонча берамиз», деб катта пулни айтди.

Алимардон яна бир таранг қилса, қадри ошишини билуб ноилож қиёфада елкасини қисди.

– Боролмайман, дедим-ку, иложим йўқ.

Тўй эгаси бир лаҳза ўйланиб туриб, кўл силтади.

– Майли, ака, – деб икки хисса кўпроқ «закалат» ваъда қилди.

Алимардон жилмаяётганини яшириш учун уф тортди.

– Ҳеч қўймадингиз-да!... Қайтиб келишим нима бўлади? Мен ҳам ишлик одамман.

– Ўзим келтириб қўяман...

Алимардон яна юзини қордан пана қилиб, айвонга кайтди. Муқаддам унинг хаяллаб кетганидан хавотир олиб бўлса керак, эшик олдида турарди.

– Ким? – деди у эрининг кўзига тикилиб.

Алимардон бепарво қўл силтади.

– Мехмонга чақириб келишибди.

– Борасизми? – Муқаддам секингина, хуркибина сўради. Энди у турмушни тушуна бошлаган аксари хотинлардай ювош бўлиб қолганди.

– Албатта!

Кетма-кет уйга киришди. Муқаддам шифонъердан кийимларини олиб бериб турди. Алимардон бир оғиз ҳам гапирмай эшикка томон йўл олди. Фақат айвонга чиққанида бурилиб қаради:

– Эшикни занжирлаб ол!

У йўлда ҳам чурқ этмади. Машина қор бўрони орасида шиддат билан олға учар, хавода парпираган учқунлар олд томондаги ойнага чирсиллаб урилар, бир жуфт шуъла оқиши зулматни ёриб бораарди.

Алимардон суюнчиқقا ўзини ташлаганча йўлдан кўз узмай кетар, мана шу кўримсиз, тўпорида бор машина ўзида йўқлиги алам қиласарди унга.

Бир соатчадан кейин чироқлар нурида чараклаб ётган тўйхонага кириб боришди. Каттакон уй одамлар билан лиқ тўлган, меҳмонлар тўрут томондаги девор тагида чордана қуриб ўтиришар, дастурхон тўкин, арақ иси гуркирарди.

..Алимардон қўшиқ бошлиши билан ҳаммаёқ сув куйгандай жимиб қолди. У ўз овозининг сехри билан тўйхонани ром этганини сезиб, завқ билан ашула айта бошлади. У қўшиқ айтар, қўпол этиқ, чопон кийган одамлар бошини секин-секин чайқаб, хузур қилиб эшитишар, шу топда дераза ортида ҳам бола-чақа, хотин-ха-

лаж тўлиб кетганини Алимардон билар, билган сайин завқланар эди.

Кўшиқ тугаши билан: «Яша!», «Барака топ!» – деган қийқириқлар еру кўкни қоплади. Унинг олдида одамлар тизилиб кетди. Улар қадоқ кўллари билан унинг чаккасига пул кистиришга навбат кутишарди. Алимардон кўпдан буён шу қадар эҳтирос билан куйламаган эди. Шу қадар кўп ичмаган эди. Ҳа, у бугун маст бўлди. Аммо нимадан маст бўлганини ўзи ҳам билмади: майданми, олқишибданми, пул исиданми...

\* \* \*

Ташқарида шамол увиллайди, қор учқунларининг деразага чирсиллаб урилиши аниқ эшитилиб туради, аллақаерда ёнғоқ шохи аянчли инграйди. Муқаддам кўрпага ўралиб олганча, даҳшат ичида қорнинг шитирлашига қулоқ солиб ётар, муздек зулмат мўралаб турган деразага қарашга ботинолмас, юрагининг гуп-гуп уриши ўзига ҳам аниқ эшитилаверди.

Девордаги кўкиш тун чироғи ўлимтик нур сочади, ялтироқ капгирли соат гоҳ қаттиқ, гоҳ секин чиқиллади, вақт имиллаб ўтади.

Кизик, балогатга етган қиз мухаббатни эмас, мухаббатнинг ўзи уни излаб топади, деганлари рост экан. Муқаддам неча йиллардан бери Анвардан мухаббат излаб юрарди. Бирданига Алимардоннинг севгиси уни излаб топди. У тўй олдидан қанчалик куйиб-ёнган, изтироб чеккан бўлса, тўйдан кейин шунчалик қувонч билан яшай бошлади. Отаси ҳам тўйга дарров рози бўла қолди. Алимардон унга бир дунё баҳт ҳадя этди.

Муқаддам ҳамон гузардаги дўхтирихонада ишлар, ҳамкасб дугоналари унинг баҳтига хаваси келганини яшириб ҳам ўтиришмасди. Мухаббат тўшакда уйғонади,

деганлари шу бўлса керак-да! Бора-бора Анварни унуди. «Ўзимнинг Мардон акамни ҳеч кимга алишмайман!» Бўйида бўлганини сезганидан бери хаёлига шу фикр маҳкам ўрнашди. Аммо худди ўша кундан бошлаб тағин бир нарсани кўп ўйладиган бўлиб қолди.

Муқаддам бир вақтлар болалигига шаҳар ҳовлисинг йўлагида қизалоқлар билан чирчира ўйнашни яхши кўрарди. Ҳар куни уларнинг ҳовлисига қизлар тўлиб кетар, кечгача копток ўйнашарди. Ўйиннинг қизик қоидаси бор эди.

Кимки чирчирни элликкача етказмай, коптокни қўлидан қочириб юборса, ўйиндан чиқиб кетарди.

Кейинги кунларда унинг назарида Алимардон акаси ҳам худди коптоқдай қўлидан чиқиб кетаётганга ўхшарди.

Аёл киши эркакнинг, оз бўлса-да, ўзидан совишини дарров пайқайди. Муқаддам Алимардон акасининг аввалидай очик-сочиқ муомала қилмаётганини сезиб туарди. Кейинги пайтларда эри кўп ичадиган, сал нарсага жеркиб ташлайдиган одат чиқарди. «Еганинг олдингда, емаганинг кетингда, мен билан ишинг бўлмасин», деган гапни кўп қайтарадиган бўлиб қолди. Ахир, одам дунёга факат ейиш-ичиш, кийиниш учун келмайди-ку! Наҳотки, Алимардон акаси шуни билмас! Муқаддам шуларни ўйлаган сари, эри кун сайин ўзидан узоклашиб бораётганини ҳис қилас, бундан даҳшатга тушарди. Ҳозир ҳам ўша бешафқат туйғу юрагига бигиздай санчилди-ю, қалтираб кетди. «Йўқ, йўқ... ўзим ҳам вахима бўлиб қолибман» У кўрпага бурканди, ўзини мажбур қилиб кўзини юмди...

Муқаддам депсиниб уйғониб кетди. У ухладими, йўқми, билолмади, аммо вахимали бир туйгудан неғадир вужуди титрай бошлади. Кўрпадан секин бошини чиқариб, қулоқ солди. Ҳамон шамол увиллайди, қор учкунлари ҳамон зулмат қоплаган деразани савалайди. Бирдан ташқарида аллаким додлагандек бўлди. Муқад-

дам оёқ-қўллари бўшашиб, кўзларини катта-катта очганча, тахта бўлиб қолди. Бояги овоз тағин қайтарили.

– Машина-ку, – деб пичирлади у кўркув ичиди, – уй орқасидан машина ўтапти.

Шу пайт кўча эшик қаттиқ тақиллади.

«Мардон акам!» – Вужудига хузурбахш илиқлик югорди. Алимардон акасининг занжирни тез-тез тақиллатишига ўрганиб қолган эди.

Муқаддам қушдай енгиллик билан сакраб турди, чироқни ёқди. Бошига Алимардон акасининг беқасам чонини ёпганича айвонга чиқаркан, йўлакай девордаги соатга қараб олди. Соат миллари тўрт яримни кўрсатар эди.

Муқаддам ҳовлига тушган замони совук ҳаво нафасини қайтариб юборди. Калиши қорга тўлиб чиқди. Шу пайт эшик тағин қаттиқ тақиллади. У оёғининг игна санчиб ачишишига қарамай югорди. Тийфана-тийфана эшик тагига етиб келди.

– Ким? – деди ҳуркович оҳангда.

– Оч!

Муқаддам Алимардон акасининг овозини таниб, дарров занжирни тушири.

Алимардон энгашиб эшиқдан киаркан, унга урилиб кетди.

– Ўлиб қолдингми? – Унинг оғзидан гупиллаб арақ иси келди.

«Ичибди!» – Муқаддам индамасдан эшикни тагин занжирлади.

Кетма-кет айвонга чиқиши. Алимардон телпагини ечиб, пальтосининг елкасига кўнган корни қоқаркан, қошини чимириб, Муқаддамга қараб кўйди. Унинг юзлари қизариб кетган, қисқа-қисқа нафас оларди.

– Битта чақирганда очсанг бўлмайдими? – деди у телпагини бурчакдаги диванга ташлаб.

Муқаддам унинг саволига савол билан жавоб берди:

– Тўйга бордингизми?

Алимардон унга елкаси оша қаради.

– Ҳа! Ёқадими?

Эрининг боя йўлакда айтган гапи Муқаддамнинг юрагини ўртаб юборган, икки йўл ўртасида ўтирган оғироёкли хотинига ўлимни раво кўргани ҳамон вужудиди ни титратарди.

– Йўқ! – деди у овози титраб. – Ёқмайди!

– Ёқмаса... – Алимардон кинояли жилмайиб, қошини чимириди. – Ёқмаса... Кета қол! Уйинг яқин...

– А?! – аламли бир ҳайқириқ Муқаддамнинг бўғзига тиқилиб қолди. Кўзлари бирдан жиққа ёшга тўлди. Титроқ кўллари билан эрининг бўйнига маҳкам осилиб, йиглаб юборди. – Қайтариб олинг сўзингизни... Жон Мардон ака, қайтариб олинг!..

Яна бир неча дақиқадан кейин у эрининг забардаст елкасидан маҳкам кучоқлаб бағрига босар, ҳозир уни бирор тортуб олаётгандай кўйиб юборгиси келмасди.

«Маст-да, кайф устида айтиб юборди, – дерди у ўзига-ўзи тасалли бериб. – Эртага ўзи пушаймон ейди...»

\* \* \*

Анвар машинка хонасидан чиқди-ю, ёруғ йўлакдаги гулдор пояндознинг бир чеккасидан бошини қуий солганча юриб кетди. У иш кўплигидан хурсанд, факат меҳнат билан овунар эди.

Бир йўла ҳам севгилисидан, ҳам дўстидан жудо бўлиш оғир экан. Алимардон билан Муқаддамнинг тўйи ўтганидан бери у одамларга ўзгача бир синчковлик, ички алам, ишончсизлик билан қарайдиган бўлиб қолди. Боғларда сайр килиб юрган ошиқ-маъшуқларни кўрганида, уларнинг сирли шивирлашаётгани қулоғига

тасодифан чалиниб қолганида ғаши келарди. «Бир-бирининг кўзига тикилиб алдашяпти», – деб ўйларди у жирканч бир туйғудан ижирганиб. – Мана шу киз ҳозир бу йигитнинг қулогига шивирлаяпти. Эртага лаби совумасдан туриб, бошқасини ўпса ажаб эмас...»

Иқбол хола ёз келиши билан тўй харакатини бошлаб юборди. Узоқ холаваччасининг Эътибор деган қизини ҳадеб мақтайдиган бўлиб қолди. Анвар онасининг гапларини эшитганида заҳарханда кулиб кўя қоларди. «Ростда, мақтаса-мақтайвермайдими, унга нима!»

Бугун эрталаб ҳам онаси ҳадеб гапиравериб, унинг жаҳлини чиқариб юборди.

Анвар онаси билан аччиқлашиб қолди. «Уйланмайман, вассалом!»

У ҳозир ҳам йўлакдан оғир-оғир қадамлар билан бораркан, ўша дилхунликни эслади. «Нима қилсин, ахир, онасида нима гуноҳ? У ҳам тўй кўрсам, орзуларим ушалса дейди-да...»

Анвар мусиқа таҳририяти эшигига етганда, аллаким чақирганини эшитиб, тўхтаб қолди. Бурилиб қаради-ю, йўлак муюлишида, каттакон тошойна олдида турган Алимардонни кўриб, юраги сирқиллаб кетди. Алимардон кора костюм кийиб олган, сурбетларча илжайиб, сигарета чекиб турарди.

Анвар ўшандан бери у билан гаплашмас, кўргани кўзи, отгани ўки йўқ эди. Уни одамларга нафрат билан қарашга ўргатган, бутун орзуларини чил-чил қилган, энг улуф баҳтини тортиб олган мана шу эмасми?! Дўст бўлиб қўйнига кириб, юрагини юлиб олган шу эмасми?!

Анвар кўли асабий қалтираётганини сезиб, ушлаб турган қофозни икки буклаб шимининг чўнтагига солиб олди-ю, унинг яқин келишини кутиб турди.

Алимардон ҳеч нима бўлмагандай жилмайиб яқинлашди-да, қўл узатди.

– Чақирсам ҳам қарамайсан... Шунчалик қасдинг борми?

Анварнинг кўзига у ҳозиргина ўлжасини еб, лабини ялаб турган бўридай кўриниб кетди. У билан пачакилашиб ўтиргиси келмади.

– Кўлингни торт!

У овози титраб кетганидан афсусланиб, юзини чирт ўгириди.

– Вой-бў! – Алимардон яна ҳеч нима бўлмагандай кулди. Унинг бепарво кулгиси Анварнинг юрагини ўртаб юборди. Ўзини ғолиб ҳис қилаётганини овозидан билиб, азоб чека бошалди. – Қачон уйланасан?

Анвар нафрат билан бурилиб қаради-ю, Алимардоннинг ҳамон кулиб турган кўзларига тўқнаш келди.

– Ишинг бормиди? – деди у ғазабдан кўзларини қисиб. Алимардон яна кулди.

– Тўйингда бир хизмат қилай деган эдим-да...

Анвар бир нафас иккиланиб турди-да, айтмаслигим керак, деб турган гапи оғзидан чиқиб кетди.

– Аввал катта пул бераётганларникига бориб турчи...

Бу гап Алимардонга шунчалик таъсир қилишини билмаган эди. Алимардоннинг кўзларидағи табассум бирдан ўчди. Атрофга сергакланиб қараб олди-да, кинояли оҳангда гап қилди:

– Нима, студия хўжайнларига чақмоқчимисан?

Қизик, бу нарса Анварнинг хаёлига ҳам келмаганди. У тўсатдан кўнглида бир енгиллик ҳис этди-ю, яна айтмаслиги керак бўлган фикрни айтиб юборди:

– Хотиржам бўл, хоинликни ёмон кўраман. Лекин ўзинг қанотинг чиқмасдан туриб узоққа учмоқчисан, бола! Эҳтиёт бўл, шўнғиб кетмагин тағин.

Кенг йўлакда яна Алимардоннинг ғолиб кулгиси янгради.

— Айтавер, қўрқадиган жойим йўқ. Телевизорга чиқмасам, бир ерим камайиб қолмайди. Аллақачон эстрадага ишга кирганман.

Анварнинг қулоқлари шангиллай бошлади. Унинг охириги гапларини эшифтмай, бурилиб кетаверди. У ўзини босиб ололмас, ҳадеб титрарди.

\* \* \*

Ёзга чиқиб Алимардон ишни катта қилиб юборди. Ота-бобосидан қолган пахса деворли бир уй, бир айвонни буздириб, янги, саккиз хонали, олди ойнабанд айвонли уй солдирди. Пул бўлса чангала шўрва, деб бежиз айтишмаган экан. Ўша пастак, эски эшикни олдириб ташлаб, ўрнига яхши ният билан машина кирадиган дарвоза қурдирди. Баҳорда Анвар унга «бир куни шўнгигб кетасан», деганда янглишган экан. Алимардон пастга эмас, кун сайин юқорига парвоз эта бошлади. Толе унинг олдида ҳамма гулшанларнинг дарвозасини баравар очиб юборди. Энди Алимардон Тўраевнинг номи кунора радиода янграр, телевизор экранидаги қошини хиёл чимириб, жилмайиб турган чиройли чехраси тез-тез кўриниб қолар, дилрабо овози билан одамларнинг юрагини ларзага солар, ҳар бир уйнинг деразасидан унинг тиник овози эшитилар, магнитафон ленталари Алимардоннинг кўшиқлари билан тўлиб кетган эди. Одамлар бир-бирини: «Юринг, фалончининг тўйига Алимардон Тўраев келармиш», деб шоширишар эди. Ҳа, у камолот погоналаридан тез, ишонч билан кўтарилиб борарди.

Бугун концерт йўқлиги учун Алимардон уйда қолди. Кун бўйи ўз хонасидан чиқмай, янги кўшиқ машқ қилди.

Режиссёр, томошабинлар олдида ўзингизни яхши тутолмайсиз, деб койиганидан бўён у тошойна қаршисида туриб, ашула айтишни қайта-қайта машқ қилар эди. Ҳозир

ҳам худди саҳнага чиқаётгандек енгил одимлар билан юриб, бурчакдаги тошойна олдига келди. Кўзгудаги ўз аксига қараб оҳиста таъзим қилди-да, майин жилмайиб кўйди. Кейинги ойларда у тўлишган, салобатли бўлиб қолган, кўзларида баҳтиёрлик нури барқ уриб туради.

Уйнинг яқинда сирланган, бўёқ иси анқиб турган шифти остида тор садолари титраб кетди. Алимардон торни завқ билан берилиб-берилиб черта бошлади, бармоқлари пардалар устида кўз илгамас илдамлик билан кўчар, гўё куй ўз-ўзидан қуюлиб келарди. Яна бир лаҳздан кейин тор садоларига унинг ширали овози уланиб кетди:

Дарё тўлкин, сувлар тошқин, ўтолмасман...

Отим ориқ манзилимга етолмасман...

Отгинамни ориқ қилган шу сойнинг тоши,

Рангинамни сариқ қилган ул қалам қоши...

Алимардон қадим замонлардан буён ҳалқ тилидан тушмай келаётган бу сатрларда ўзгача бир жозиба, яширин, иболи туйгулар борлигини дарҳол пайқаб олган, ўзи басталаётган куйда мана шу покиза туйғулар бутун гўзаллиги билан ярқ этиб кўринишини хоҳлар, юрак-юракдан тўлқинланиб айтарди:

Рангинамни сариқ қилган ул қалам қоши...

У ҳамон тор чертаркан, орқа томондан Муқаддам келганини пайқади. Аммо чалишдан тўхтамади. Ниҳоят, кўшик тугади.

– Нима гап? – деди Алимардон Муқаддамнинг ўзига эмас, ойнадаги аксига қараб.

Муқаддам озиб, қорайиб кетган эди. Алимардон унинг елкалари осилиб тушган кўйлагига, ичига чўккан кўзларига бир лаҳза тикилиб қолди. Баҳорда Муқаддамнинг боласи тушган, ўшандан буён кўзларидан

ана шундай маъюс бир ифода аримайдиган, камгап, ғамгин бўлиб қолганди. Аммо Муқаддам ҳар қанча ўкинмасин, Алимардон парво қилмасди. Нима қипти? Фарзанд билан давлат – қўлнинг кири. Келаверади ҳам, кетаверади ҳам. Ишдан қолмаслик керак.

– Нима дейсан? – Алимардон кескин бурилиб қаради-ю, хотинининг лаблари пирпирай бошлаганидан, қўпол гапириб юборганини сезди. – Халақит бермагинда, – деди майнироқ қилиб.

Муқаддам эридан кўз узмай туриб ютинди. Чамаси, бир амаллаб ўзини босиб олди шекилли, бўғиқ оҳангда, шивирлагудек бўлиб гапирди.

– Овқат совиб қолди.

– Ҳозир, ҳозир, – деди Алимардон бетоқат бўлгандек шошилиб.

Муқаддам индамасдан бурилиб кетди. Унинг шиппаги айвонда шап-шап қилиб турди-да, нариги хонанинг эшиги очилгани эшитилди. Алимардон тагин торни қўлига олди. Ҳамма нарсани унутиб, қўшиқни қайтадан бошлади.

\* \* \*

Алимардон участкасини даранглатиб битириб олди. Қовун пўчоқ ерга тушди. Заъфарон қанотларини унсиз силкитиб, яна куз кирди. Кўчалар устида чинорларнинг йирик-йирик япроқлари капалакдай пирпиради. Оқшомлари йўлкалар четида ёқилган хазоннинг юпқа тутуни ҳавода узоқ кезиб юрадиган бўлди, боғлар, хиёбонлар жимиб қолди. Шахарликларнинг кўпи теримга – ҳашарга жўнаб кетгани учун Тошкент хийла осуда, трамвайларда одам сийрак.

Алимардон трамвайдан тушди-да, Эстрада театри томонга енгил, дадил қадамлар билан юриб кетди. Қуёш эн-

дигина ботган, концерт бошланай деб турар эди. У оёғи остида кирсиллаган хазонларни босиб-янчид бораркан, театр биносининг олдидағи ойнабанд тахта қаршисида бир зум тўхтаб ўтди. Каттакон, рангли афишада бугун концерт берадиган артистларнинг номи ёзилган эди. У ўз расмини топди. Унинг номи артистларнинг энг охирига майда ҳарфлар билан тиркаб қўйилган эди.

Алимардон лабларини қимтиб ютинди. Касса олдида уймаланишган одамларга бир қаради-да, яна ўшандай енгил қадамлар билан театр биносини айланиб ўта бошлади.

Ёш чинор дараҳтлари қалин хазон тўккан кичкинагина боғчадан ўтиб, театрнинг орқа эшигидан ичкари кирди. Шошилмасдан цемент зиналардан кўтарилди. Йўлаклар нимқоронғи, залдаги ҳашамлар бу ерда кўринмас, деворлар заҳ эди. Каердадир доира тараклар, пианино товуши эшитилиб турарди.

«Репетиция қилишяпти», деб ўйлади у саҳна томонга юриб бораркан. Яна бир йўлакдан ўтиб, ёнбошдаги эшикни тақиллатди. Ичкаридан йўғон, босинқи овоз эшитилди:

– Киринг!

Алимардон овоз эгасини таниди: «Зуфар Ходиевич! Ҳозир уришади!»

У эшикни шахт билан очди. Жажжигина хона биллур қандилдан ёғилаётган нурга тўлган, деворлардаги кекса артистларнинг суратлари рамкалар ойнаси ярақлаб турарди.

Зуфар Ходиевич каттакон стол орқасида креслога оғир гавдаси билан чўкиб ўтирас, сигарет тутатар, оппок, сийрак соchlари чироқ нурида ялтилларди. Унинг хиёл очик лабларидан оғзидағи уч-тўрт тилла тиши кўриниб турар, чехрасида чарчоқ бир ифода бор эди.

– Яна кеч қолдингизми? – Зуфар Ходиевич кафти билан тамаки тутунини ҳайдаб койиди. – Шу одатингизни қачон ташлайсиз?

Алимардон индамай тураверди. У театр бадиий раҳбарининг қаттиқўллигини, унга гап қайтарол-маслигини билар, аммо унинг ёшларни яхши кўришидан ҳам хабардор эди. У Алимардонни ишга олаётганда ҳамма шароитни яратиб беришга, гастролларга олиб чиқишга ваъда берган эди. Чиндан ҳам ваъдасини бажарди. Алимардон ёз бўйи республиканинг ҳамма вилоятлариға бориб келди...

У тагин нима деркин, деган хаёлда Зуфар Ходиевичдан кўз узмай тураверди.

– Гримхонага кирмайсизми? – деди Зуфар Ходиевич тагин ўша койиган оҳангда.

Алимардон ҳеч нима демай, кескин бурилди-да, чиқиб кетди.

У саҳна чеккасига суриб қўйилган парда олдига борганида концерт қизиб кетган эди. Яна иккита но-мердан кейин конферансъе қиз шошилиб келиб, унинг кулоғига шипшиди: «Тайёрмисиз? Чиқинг!» У Алимардоннинг жавобини ҳам кутмай саҳна ўртасига бориб эълон қилди:

– Навбат ёш хонанда Алимардон Тўраевга!

Гулдурос қарсаклар зални титратиб юборди. Унинг назаридаги одамлар қўшиқнинг номини эшишишга ҳам тоқат қилмай, ўзини кўришга ошиқардилар. Алимардон енгил, ишончли қадамлар билан саҳна ўртасига – микрофон олдига етиб борди. Ҳамон ҳавони қарсаклар титратар, у юриб эмас, мана шу қарсаклар қанотида учиб саҳнага чиққандек эди. Алимардон бир вақтлар саҳнада қай ҳолатда кўринишни орзу қилган бўлса, ҳозир худди ўша ҳолатда эди. У чуст дўппи, қора костюм-шим кийиб олган, оппок кўйлагининг қраҳмалланган ёқаси тагида чиройли ялтироқ галстук ёниб туради. У бир вақтлар телестудияда илк бор кўлига ушлаб томоша қилганидан ҳам яхшироқ тор кўтариб туради.

Алимардон қошини бир оз чимириб жилмайди-да, оҳиста таъзим қилди. Зал яна гувуллаб кетди. Торнинг жозибадор янгрок садолари кунгурадор шифтларга урила бошлагач, зал секин-секин тинчib қолди. Алимардон ўзи басталаган янги қўшиқни айта бошлади. Чехрасида хамон ўша табассум билан завқланиб, юрак-юракдан эриб айтди.

Қўшиқ тугаши билан зал яна денгиз тўлқинидай гувиллаб кетди. Алимардон оҳиста бурилиб кетаркан, тағин бир марта таъзим қилди. Аммо зал тинчиш ўрнига баттар тўлқинланиб, одамлар ўрнидан туриб кетди. Конферансъе қиз уни қўлидан енгилгина тутиб, яна микрофон олдига етаклаб борди.

– «Йигит қўшиғи!» – деди у жарангдор овозда.

Зал сув қўйгандек жимжит бўлиб қолди. Алимардон яна табассум билан, завқ билан куйлади.

Қўшиқ охирлаши билан шифтлар тағин ларзага келди. У бу сафар чукур таъзим бажо этди-да, парда орқасига ўтиб кетди.

Конферансъе навбатдаги қўшиқчи номини эълон қила бошлаган эди, томошибинлар гувуллаб, тартибсиз карсак чалиб юборишиди. Зум ўтмай қарсаклар бир меъёрда такрорланувчи гурс-гурс этган овозга айланиб кетди. Одамлар навбатда чиқаётган хонандаларнинг пешанасига мих қоқаётгандай баравар қарсак чалишар, Алимардоннинг ўзини талаб қилишарди.

Алимардон ҳаяжонланиб кетди. Конферансъенинг эълон қилишини ҳам кутмай, тез-тез юриб сахнага чиқиб борди. Залга эмас, сутдек оқиш нур тўкиб турган қандилларга қараб, янги қўшиқ бошлади.

У олқишилар остида сахна четига чиқиши билан Зуфар Ходиевичнинг ғазабдан чақнаган кўзларига тўқнаш келди.

– Инсоф борми сизда? Санъаткорлик одоби борми?

Алимардон индамади. Унинг кўзларига дангал тикилиб туриб, масхарали кулиб кўйди.

Зуфар Ходиевич ўзини босиб ололмас, Алимардон бемалол илжаяр, пастда эса зал ҳамон гувуллар, Алимардонни талаб қилиб қий-чув кўтараарди.

Алимардон мана шу саҳна тез кунда бутунлай ўзиники, ёлғиз ўзиники бўлиб қолишини ҳозир аниқ билди.

\* \* \*

Алимардон саҳна чеккасида, оғир зангори баҳмал парданинг тирқишидан зални кузатиб туарди. У ҳар сафар саҳнага чиқишдан олдин шунаقا – бир чеккада туриб зални томоша қилади, кўнгли шодон туйғуларга лиммолим тўлиб кетади.

Залдаги каттакон қандил ҳали ўчмаган, томошабинлар қаторлар ўртасидаги йўлакдан шоша-пиша ўтиб, ўз ўринларини кидиришарди, ҳали очилмаган саҳна томонга орзиқиб қараб-қараб кўйишарди. Улар ҳар хил: ёш, қари, эркак, аёл... Қандайдир бир ярим-икки йил ичида бутун Ўзбекистонни ҳайратга солиб кўйган Алимардон Тўраевни кўришга, дилдор овозини эшлишишга узоқяқиндан келган одамлар шулар.

Алимардон мийигида кулиб кўйди. Ҳа, у шод эди! У чиндан ҳам бутун Ўзбекистонни забт этганини билар, билган сайин қувонарди. Одамлар унга маҳлиё бўлиб қолганга ўхшарди. Унинг концертига энг чекка қишлоқлардан келишар, икки ҳафта илгари олиб кўйилмаса чипта топилмас, шунда томошабинлар ўн баробар баҳосига бўлса ҳам олиб тушишарди.

Алимардон ўзининг нима учун бунчалик тез танилиб кетганлигини билади. У одамларнинг юрагини қитиқлаш сирларини ўрганиб олди. Кўшиқдаги ҳар бир янги оҳанг томошабиннинг завқини тошириб юборишини, ҳар бир

ҳаракат олам-олам олқиши ҳадя этиши аниқлигини тушунив қолди. Ўзи басталаётган куйларда қувонч билан изтироб, муҳаббат билан садоқат – ҳамма-ҳаммасини мұжассам этишга уринди. Ҳар бир ашулада такрорланmas оханг бўлиши, қўшиқларнинг ҳар бир сўзи тингловчининг юрак-юрагига етиб бориши учун ҳаракат қилди. Шу туфайли шинавандалар уни эҳтирос билан олқишлийдиган бўлдилар.

Алимардон тўйларга ҳам кўп қатнайди, аммо арzon-гаровга эмас.

Залда гулдурос қарсаклар янгради. Алимардон яна парда тирқишидан мўралади. Олдинги қаторлар лик тўлган, орқароқда эса жойини тополмаган томошибинлар зир югуришар эди. У соатига қараб кўйди. Томоша бошланишига беш минут қолган. У бурилиб кетаётганида яна зал гувуллай бошлади.

Мана, икки йилдирки, Алимардон шу қарсаклар хавосида учиб юрибди. У худди ойга ўхшарди. Кун сайин тиниқлашиб, кун сайин ёрқинлашиб, баландлаб борарди. Унинг силлиқ таралган сочи устидан чуст дўппи кийиб, кошини хиёл чимириб, табассум қилиб турган сурати аллақачон ҳаммага таниш бўлиб қолган, афишалар номи ўқлоғидай ҳарфлар билан ёзилиб чиқар эди.

У pardозхонага кириб, ўзини яна бир марта кўзгуга солди-да, торини кўтариб қайтиб чиқди.

Саҳна пардаси секин-секин очила бошлади. Залдаги катта қандил ўчди. Чекка-чеккадаги эшиклар устида ёниб турган қизил чироқларгина қолди.

Конферансъе эълон қилгандан кейин Алимардон сахнага чиқди. Кунгурадор шифтлар қарсак садоларидан титраб кетди, бутун зал ҳаяжондан ларзага келди. Алимардон ҳар тарафга қараб таъзим қилди. Олқишилар яна ҳам кучайиб кетди. Шу кўйи беш дақиқагача тўхтамади.

Алимардон торини кўксига босиб, томошабинларга зимдан караб кўйди. Фира-ширада ҳаяжондан қизарган чехралар кўринарди, орқа катордагилар ўрнидан туриб кетган, ҳамма баравар чапак чалар эди.

Тор садолари юракларни зириллатиб тилга кирганидан кейингина зал секин-секин тинчий бошлади. Ўша ондаёқ Алимардоннинг тиниқ овози осуда парвоз этди:

... Рангинамни сариқ қилган ул қалам қоши...

У кўзларини хиёл юмиб олганча қўшиқни завқ билан айтди. Ашула тугамасданоқ зал титраб кетди. Унинг сахнадан жилишига хеч йўл кўймасдилар.

Концерт охирлаб қолганида у чарчади. Боши қизиб, тор симлари узра сурилган бармоклари зирқирай бошлади. Аммо иккинчи бўлим тамом бўлгунича бисотидаги янги қўшиқларнинг ҳаммасини айтди. Унинг дилрабо овозида гоҳ васл қувончи янграр, гоҳ хижрон изтироблари инграр, гоҳ шодон ҳазил оҳанглари мавжланарди.

Ниҳоят, конферансъе концерт тамом бўлганини эълон қилди. У томошабинлар билан хайрлашиш учун сахнага чикқанида ҳаммаёқ яна денгиз тошқинидай гувуллаб кетди.

Саҳна четидаги зинадан гулдаста кўтарган қатор-қатор одамлар чиқиб келишарди. Энг аввал, унинг олдига каттакон гулдаста кўтарган чиройли жувон етиб келди. Алимардонни кучоқлаб, кўлига гул тутқазди. Шу ондаёқ у чаккасида аёлнинг титроқ иссиқ лабларини туйди. Димоғига аллақандай хушбўй атири иси гупиллаб урилди.

Алимардон қайрилиб қарагунча, бошқа одамлар уни ўраб олди. У кучогига тўлиб, кўз ўнгини тўсиб қолган гулларни қаерга қўйишини билмас, шу тобда оёғининг тагигача гулга тўлиб кетган эди.

Парда ёпилганидан кейин гулларни конферансъе қизга топширди-да, нимқоронғи, тор йўлакдан ўтиб,

ховлига чиқди. Галстугини ечиб, чўнтағига солди-да, ёқасидаги тугмаларини тушириб, намхуш куз ҳавосидан тўйиб-тўйиб нафас олди.

Асфальт йўлкалар қорайиб қолганини, шивалаб ёмғир ёғаётганини шундагина билди.

Пошналари билан қоронғи сукунатни чарсиллатиб тит-ратганча йўлкадан ўтиб, боғ чеккасидаги темир панжара олдига келди. Панжаранинг пастак эшикчасини очиб, ичкари кирди, «Волга»сининг моторини гуруллатди.

Алимардон машина ҳайдашни мактабда ўқиб юрган кезларида ёқ амакисидан ўрганиб олган эди. Ўшанда ғалати ишлар бўлганди.

Бир йили колхоз раиси унинг амакисини анҳор ёқасидаги катта бокқа қоровул қилиб қўйди. Ўша йили узум яхши бўлди. Ёзда Алимардон ҳар кеча катта боғда ётиб қоларди. Бир кечада чайлада ухлаб ётганида амакиси уйғотди: «Дарвоза ёнида машина турипти. Узумларнинг яхши-яххисидан танлаб уз...» – деди. Алимардон энди оғиз очмоқчи эди, амакиси гапиртирмади: «Айтганимни қиласвергин, машина ҳайдашни ўргатаман». Икковлари қўлчироқ ёкиб, ишкомга киришди. Амакиси машинани ҳайдаб кетар экан, тайинлади: «Ҳеч кимга айтма. Велосипед олиб бераман!»

Ўша кундан бошлаб Алимардоннинг иши юришиб кетди. У кечалари амакиси билан ишком оралаб, кундузлари машинадан чиқмайдиган бўлди.

Кузда у еттинчи синфга соат такиб, велосипед миниб бораидиган бўлди.

Келгуси йил ёзида Алимардоннинг яна омади келди. Аммо энди у пишиқ бўлиб қолган эди. Амакисидан узум ҳақининг ярмисини талаб қиласиган бўлди. Ҳамма иш силлиқ бораётган эди-ю, кузда лоп этиб амакиси қамалиб кетди. Алимардон амакисининг шалтоғига ўзи ҳам тойиб кетишидан қўрқарди. Хайрият, ҳеч нима қилмади. Лекин

энди уларни катта бокқа яқин йўлатмай қўйиши. Қизиқ, амакиси ўн йилга қамалганини эшитганида ачинмади ҳам. Баҳонада ўзининг бир нималик бўлиб қолгани, машина ҳайдашни ўрганиб олганига суюнди.

«Волга» сотиб олганида, бир вактлар машина ҳайдашни ўрганиб қўйгани яна қўл келди. Наридан-бери ҳайдовчилик курсини битириб, гувоҳномалик бўлиб олди. У янги уйланганида Муқаддамни қанчалик яхши кўрган бўлса, энди машинасини ҳам шунчалик суряди. Ҳозир ҳам фараларнинг ёрқин нурида асфальт йўлакни ёритиб, машинани авайлаб катта кўчага олиб чиқди. Театрдан қайтаётган томошабинлар тўдасини ёриб ўтди, шиддат билан елиб кетди.

Муюлишга етганда икки қаватли уй олдида турган оқиши «Волга»ни кўрди. Машинанинг эшиги очилиб, оқ ҳалат кийган киши тушди-да, кафти билан чироқдан кўзини пана қилиб чекинди. «Тез ёрдам» экан, деб ўлади Алимардон йўлдан кўз узмай бораркан. Бир лаҳзада четлаб ўтишни ўлади-ю, шу ондаёқ фикридан қайтди. Тезликни пасайтирмасдан елиб бораверди. Иккала машина ёнма-ён келганида йўл ўртасидаги ҳалқоб сув сачраб кетди. Алимардон «Тез ёрдам»га ёпишиб турган кишининг ҳалати расво бўлганини, орқадан қўл силтаб алланима деб койиганини кўриб қолди. Лекин парво қилмади. «Жон керак бўлса, четроқ турсин-да!»

\* \* \*

Анвар Бўстонга қандай келиб қолганини ўзи тушунмасди. Ким билсин, балки ўтмиш хотиралари билан хайрлашиш учундир...

Коронғи тушиб қолган, ҳаво булут, юракни қон қилиб юборувчи куз ёмғири бошланай-бошланай деб турарди. У қишлоқ кўчаларидан ўтиб бораркан,

ҳаммаёқ ўзгариб кетганини кўрди. Аввалги эгри-буғри тор кўчалар ўрнида янги асфальт йўл очилган эди. Негадир унга қишлоқнинг анча ўзгариб қолган янги манзараси ёқмади. Аввалги боғ-роғларнинг кўпи йўқ бўлиб кетибди. Кишининг нафасини қайтарувчи шаҳар ҳавоси сезилиб қолибди. Бир пайтлар ўзининг болалиги ўтган ховли ўрнида тўрт қаватли уй қурилибди. Ёнғоқзор кирқилиб кетибди.

У кўча четидан секин-секин юриб бораркан ҳозир Муқаддамни кўришини билар, аммо қай ҳолатда учратишни, ўзини кўрганда унинг қандай аҳволга тушишини тасаввур эта олмас эди.

Ҳар одамда ҳам бошқа ҳеч кимда топилмайдиган бирон фазилат бўларкан. У Эътибордан – онаси кўп эслайдиган қиздан Муқаддамда йўқ бир фазилатни топди. Эътибор Ядро институтида ишлар, жиддийлиги, оқила қиз эканлиги билан Анварга ёққан эди. Анвар бу қиз ўзини яхши кўриб қолганини билар, аммо ўзи уни севадими, йўқми, билолмас эди... Бари бир, энди ҳамма нарса ҳал бўлган, ортиқча иккиланиб ўтиришнинг ҳожати йўқ эди.

У хаёл билан Алимардоннинг эшигига келиб қолди. Алимардон янги уй согланини эшитган, аммо бунчалик деб ўйламаган эди. Пишиқ ғиштдан болохонадор қилиб солинган каттакон уй қаддини баланд тутиб турар, деразаларига темир панжаралар тўсилган эди.

Анвар пештогида чироқ ёниб турган жимжимадор дарвоза олдига етганида, бирдан юраги гупиллаб кетди. Шундагина кўнглининг бир чеккасида кул босиб ётган чўғ ҳамон ўчмаганини, бу ерга бекор келганини англади. Аммо ички бир куч – Муқаддамни кўриш орзусими, бошқа бир нарсами, мажбур этди-ю, эшикни тақиллата бошлади. Кейин дарвоза чеккасида оппоқ тугмача турганини кўриб, хижолатда тугмачани босди.

Ичкаридан калишнинг шап-шап этган товуши дарвоздага яқинлашди. Зум ўтмай аёл кишининг товуши эшитилди.

– Мардон ака...

«Муқаддам!» – Анвар юрагининг аллақаерида нозик бир тор жаранглаб кетганини сезди. «Нега келдим? Майна бўлганими? Ё мақтанганими, қасос олганими?»

У томоги қуриб, ютинолмай қолганини, лаблари ўз-ўзидан пирпирай бошлаганини пайқади-ю, қатъий пи-чирлади:

– Кетиш керак!

Йўқ, у кечикканди. Дарвоза ичига ўрнатилган эшик фийқиллаб очилди.

– Вой!

Анвар Муқаддамнинг бирдан чўчиб кетганини, хуркиб бошини ичкари тортганини кўрди. Иккови бир-бирларига тикилиб қолишли. Анвар бир қараашдаёқ унинг ранги уччиб кетганини, эшик тутқичидан ушлаб турган қўли титраганини сезди. Шундан кейингина унинг анча ориқлаб, қорайиб қолганини, кўзларида аввалги шўхлик учқунлари йўқлигини пайқади. Муқаддам бошига рўмол ташлаб, гулдор халат кийиб олиби.

Чамаси, у Анвардан кўра илгарироқ ўзига келди. Юзига илиқ бир қизиллик югурди-да, жилмайиб салом берди.

– Келинг.

У эшикни очиб, икки қадам орқага чекинди.

– Келинг, – деди яна секингина.

Шу топда Анварнинг кўзи унинг тугмалари очиқ халатига тушди. «Иккиқат экан!»

Кизик, Анвар ўзида хали ҳеч сезилмаган ажиб бир енгиллик ҳис этди. Бу одам ўзига бутунлай бегона эканлигини, керак ҳам эмаслигини бутун вужуди билан тушунди-ю, қалбида қайта ловиллаган ўт тўсатдан сўнди. У қандайдир лоқайд, хотиржам бўлиб қолди.

– Алимардон қаерда? – деди босиқлик билан.

Муқаддам ҳам унинг кўнглидан кечганларни тушунди шекилли, яна жилмайди. Бу табассум севгили киши-сига эмас, кўпроқ сингилнинг акасига қарашидай эркин, сокин эди.

– Концертда эдилар...

– Шанба куни тўйга боринглар.

Анвар Муқаддамнинг чехрасида бир лаҳза ғам сояси-га ўхшаш аллақандай ҳайрат пайдо бўлганини пайқади. Аммо шу ондаёқ у яна жилмайди.

– Табриклайман...

Анвар бу ерда узок турмаслиги кераклигини билиб, тезгина хайрлашди-да, жўнаб кетди. У Муқаддам орқасидан тикилиб турганини билар, шунинг учун қайрилиб қарамас эди. Анчадан кейин эшикнинг тарақлаб ёпилганини эшитиб, ўгирилиб қаради. Остона бўм-бўш эди.

– Иккикат экан... – у юрагининг ярасига малҳам то-пилганидан шод бўлгандек, яна бир бор пи chirлади.

Шивалаб ёмғир ёға бошлади. Ҳавода тупроқ иси гур-киради. У Конкус бўйига келганда ёмғир тезлашиб кетди. Қишлоқ ўзгача тус олган бўлса ҳам анҳор ўзгармабди. Қирғоқда ҳамон ўша қамишзор шовуллаб ётар, сув ҳамон жимгина оқар эди. Анҳор бўйидаги толлар ҳам жойида турибди. Фақат биттасининг каттакон шохи синиб тушиб, бир учи сувга осилиб қолибди. Тўлкинлар ғира-шира зулмат қўйнида тол шохларига урилиб шовуллайди, ёмғир томчилари анҳорга унсиз шивалаб тушади.

Анвар ёмғирдан сирғанчиқ бўлиб кетган яккачўп устида анчагача сувга тикилиб турди-да, авайлаб юриб, нариги соҳилга ўтиб олди. Охирги марта анҳорга қараб қўйди-да, тез-тез юриб кетди.

Алимардоннинг таъби тирриқ бўлиб келди. Машинасини ҳовлига олиб кирди-да, ўртадага цемент майдончада тўхтатиб, ерга тушди. Ёзлик шийпон пештоғидаги чирокни ёқди. Резинка ичакни водопровод жўмрагига улаб, машинани юва бошлади.

Ёмғир шивалаб ёғар, уст-боши шалаббо бўлиб кетган, нафаси кисар, аммо ўжарлик билан резинка ичакни кўйиб юбормасди.

– Лоақал пальто кийиб олсангиз-чи, шамоллаб коласиз!

Алимардон хотинининг товушини эшитиб, бурилиб қаради. Муқаддам бир тавақаси очилган дарвоза олдида эрига ачиниб қараб турарди. У ўтган сафар қўрқиб қолгани учунми, энди бўйида бўлганидан бери ўзини айниқса эҳтиёт қилас, ишдан ҳам бўшаган эди.

– Пальтоингизни олиб чиқайми? – деди у ҳамон дераздан қараб тураркан.

– Керакмас! – Алимардон резинка ичакнинг учини қаттиқ кисди. Сув тизиллаб отилиб, машина эшигига ёпишган лойни ювиб туша бошлади.

Дераза тавақаси оҳиста ёпилди.

– Билганини қилмайдими! – пи chirлади Муқаддам ўкинч билан. У диванга бориб ўтирди-да, чала қолган каштасини тика бошлади. У ўзини алаҳситишга, кўнглидаги ўкинч соясини хайдашга ҳаракат қиласарди.

Мана, тўйдан буён икки йил ўтибдики, шу азоб. Алимардон ҳамиша у айтганининг тескарисини қиласади. Бир оғиз ортиқча гапириб кўрсин-чи! Ўша қиши кечасида айтган гапини қайтаролмайди дейсизми?

Нима қилсан? Дардини кимга айтсан? Отасигами? Ё онасигами? «Ўзинг кўнгил кўйиб теккансан», дейишмайдими?

У баҳорда боласи тушганидан кейин жуда чўкиб қолган эди. Йўқ, хайриятки, толе яна фарзанд ато қилди. Фақат эрининг инсофга келмагани ўртайди Муқаддамни. Бугун Анвар келиб кетганидан кейин Мардон акасининг силтаб-силтаб гапириши нимагадир яна оғирроқ ботди унга...

...Алимардон машинасини гаражга киритиб қўйгунча яrim кечадан ошиб кетди. У ваннага тушди. Шалаббо бўлиб кетган кийимларини алмаштириди-да, ўз хонасига кирди.

Деворга қимматбаҳо гиламлар қоқилган, шифтдаги каттакон биллур қандил уй ичини муnis, эркаловчи нурларга тўлдирган эди.

Алимардон дераза олдида турган рояль қопқофини очиб, чала бошлади. Машхур «Оккүш кўли» балетининг жўшқин оҳанглари хонани тўлдириб юборди. Алимардон ундан ҳар гал янги оҳанг топар, куйнинг сехрли оламига кириб кетарди.

Бир маҳал у эшик очилганини кўриб, ёнламаси бурилиб қаради. Эшик олдида Муқаддам туар, афтидан, бир нима демоқчи бўлар, аммо эрига халақит беришдан чўчир эди.

– Нима гап? – деди Алимардон ниҳоят нотадан бош кўтариб.

– Ўртогингиз келди...

Алимардон киприкларини пирпиратди:

– Ким?

Муқаддам бир нафас жим қолди-да, секингина айтди:

– Анвар.

– Ки-и-м? – деди Алимардон чўзиб. Кўзлари чақнаб кетди. Муқаддам индамай тураверди.

– Нима хизматлари бор экан?! – деди Алимардон жеркиб.

– Тўй қилаётган эмиш. – Муқаддам эрига хотиржам тикилиб туриб, қўшиб қўйди: – Шанба куни...

Алимардон унинг кимга уйланаётганини билгиси келди-ю, сўрамади. «Менга нима?» У Муқаддамнинг билинар-билинмас доғлар пайдо бўлган чехрасидан маъно уқмоқчи бўлгандай, кўзига қараб туриб сўради:

– Қачон келди?

– Ҳали, – деди Муқаддам яна ўша оҳангда.

Алимардон индамасдан рояль устига эгилди. Энди чала бошлаган эди, хотинининг нозик кафти елкасига текканини сезиб тўхтади.

– Борасизми? – Муқаддамнинг қайноқ нафаси унинг қулоғи остида пичирлади. – Тайинлаб кетди. – Муқаддам унинг соchlарини бармоқлари орасига олиб силади. Чамаси, у айниқса бугун эрининг ўзига меҳрибонроқ бўлишини хоҳлар, бу нарса жуда мухимдек туюларди.

Аммо Алимардон унинг кўлини силтаб туширди.

– Кўп суйкалаверма!

Муқаддамнинг хўрлиги келиб, кўзида ёш халқаланди. «Нега ҳадеб жеркийди? Нимага хор қиласи? Ахир у ҳам умид билан уйим-жойим деб юрибди-ку!»

Муқаддам эрининг атайлаб шундай қилаётганини пайқади-да, бир амаллаб кўз ёшини ютиб юборди. Шунча пайтлардан буён юрагининг қайси бир кўчасида яшириниб ётган қайсар ғазаб туйғуси лоп этиб юзага чиқди.

– Нимага силтайсиз? – деди лаблари пирпираб.

Алимардон нотадан кўз узиб қаради-да, унинг гапини эшиитмагандай, эрмак қилиб кулди.

– Анвар акангизни меҳмон қилдингизми?

Муқаддам ғазабдан титраб пичирлади:

– Ҳа! Қилдим!

Алимардон боягидан ҳам ёйилиб кулди.

– Йиғлаб кўришгандирсизлар?.. Бир вақтлар яхши кўпардингиз... Соғиниб қолгансиз...

Муқаддам унинг юзига тарсаки қўйиб юборгиси келди-ю, зўр-базўр ўзини тийди. Алам билан ер тепиб чинқирди.

– Бўлди!

У жаҳлдан оёқ-кўллари қалтираб, эрининг тепасида турар, бошқа пайт бўлса йиглаб юборган бўлар, лекин кўз ёши ҳам, ўқинчи ҳам аллақаёқка йўқолган, унинг кўнглида фақат ғазаб қолган эди.

– Ҳаммани ўзингизга ўхшатманг! – деди кўзлари ёниб.

Алимардоннинг ранги бир оқарди-ю, аммо яна ўша эрмак қилувчи кулги билан ўзини босди.

– Майли, бораман, ўша қўймижоз акангизнинг тўйига... Сизнинг ҳам кўнглингиз қолмасин...

Муқаддам ижирғаниб, юзини бурди.

– Борманг! Ҳеч ким сизга зор эмас!

Алимардон стулдан секин турди-да, унинг худди қулоғи тагида таъкидлади:

– Мана шунинг учун ҳам бораман. Албатта, бораман!

Муқаддам қайрилиб қарамай, эшикни қарсиллатиб ёпиб, айвонга чиқди. Ҳамон ёмғир шивалаб ёғар, ховлидаги ёнгоқлар, ўртадаги шийпон захкаш зулмат кўйнида мунғайиб кўринар эди.

Муқаддам айвон деразасининг муздек қиррадор раҳига пешанасини босди. Шу топди унинг кўнглида умид ҳам, қувонч ҳам қолмаган. Алимардон билан ўзининг ўртасида каттакон жарлик ётганини, бу жарлик кун сайин чукурлашиб бораётганини сезиб турарди.

\* \* \*

Концерт кеч тамом бўлди. Алимардон ҳар галгидай бу сафар ҳам буфетга кириб, конъяк ичди. У фойега чиққанида ярим кеча бўлиб қолган, театрнинг чироқлари ўча бошлаган эди. У ташқарига чиқиб кетаётган эди, гар-

деробхонада бир аёл тикилиб турганини сезиб тўхтади. Катта қандиллар ўчгани учун фойе нимкоронги, ҳеч ким йўқ эди. «Ким экан бу?»

Аёл илгакка осиқлик ёмғирпўшини олмоқчи бўлар, аммо бўйи етмас, оёғининг учида чўзилиб талпинарди. У Алимардонга бурилиб қаради-да, кўмак кутгандай жилмайиб қўйди. Алимардон бу тиниқ чехрани, бу илиқ табассумни қаердадир кўргандек бўлди-ю, аммо эслай олмади. «Дўндиқ экан!» Унинг юраги гурсиллаб уриб кетди. Аёл яна ёмғирпўшига талпинди-да, унга бурилиб жилмайганча, уф тортиб қўйди.

«Атайлаб киляпти. Гардеробчи аллақачон кетиб қолган. Бу атайлаб кечиккан». – Алимардоннинг хаёлига шу ўй келди-ю, тез-тез юриб, аёлнинг ёнига борди.

– Олиб берайми?

– Майли... – аёл унга қараб, тагин жилмайиб қўйди.

Алимардон плашини илгақдан чиқарди.

– Қани, қўлингизни узатиб юборинг...

Аёл ҳамон ўша табассум билан қўлини орқасига чўзди. Алимардон плашни кийгизди-да, бир лаҳза кўлларини унинг елкасига қўйиб, туриб қолди. Аёл ҳам унинг оғушидан чикишни хоҳламагандай суюниб турганча тугмаларини қадар, негадир бармоклари қалтирас эди.

«Барно қиз экан», деб ўйлади Алимардон унинг елкаси оша чехрасига назар ташлаб. Аёл чиндан ҳам барно эди. Жажжигина қабариқ лаблари, попукдай қош-кўзи нихоятда ўзига ярашар, чиройли қилиб турмакланган сочининг бир чети пешанасида ярим доира ясад, орқага қайрилиб кетган эди.

– Кузатиб қўйсам майлими? – сўради Алимардон у билан ёнма-ён эшик томон юриб бораркан. – Бир ўзингиз... Кеч қолиб кетибсиз.

Аёл унга шўх бир назар ташлади-ю, индамади. Алимардон шу боқишданоқ унинг рози эканлигини билди.

Икковларининг қадам товуши паркетга урилиб, жимжит шифтлар остида акс садо бериб турди-да, бора-бора тинди.

Ҳаво очилиб кетган, салқин шамол эсар, телевидение минорасининг қир учida пуфакдай тўлин ой осилиб турарди.

– Бирпас туринг, мен... ҳозир... – Алимардон тез-тез юриб, театр биносини айланиб ўтди-да, машинаси турадиган темир панжара ичига кирди. Шоша-пиша чўнтағидан калит олиб, машина эшигини очди. Моторни гуриллатиб, кўз очиб-юмгунча ташқарига чиқди.

Аёл фараларнинг ёрқин нурида кўзини пана қилиб четлашди. Алимардон ўтирган ерида чўзилиб, ўнг тарафдаги эшикни очди.

– Ўтиргинг.

Аёл ёмғирпўшини шилдиратиб, унинг ёнига ўтирди.

– Сизни қаердадир кўрганга ўхшайман, – деди Алимардон йўлдан кўз узмай бораркан.

– Сиз биздақаларни кўрармидингиз!

Алимардоннинг кўнглидаги умид ишончга айланиб, жилмайиб кўйди.

– Отингиз нима?

– Клара...

Алимардон катта кўчага чиқиб олиш учун машинани чапга бурган эди. Клара сурилиб келиб унга урилди. Шу кўйи қайта нари сурилмади. Алимардон баданига тегиб турган ёш, тарагт вужудни сезиб, хаяжонланиб кетди, юраги орзиқа бошлади.

Шу топда кўчалар айниқса кезишли бўлган, милиционерлар мотоцикл-ю, сув сепадиган машиналардан бошқа ҳеч нима йўқ, икки қатор чироқлар маржони машина истиқболиги югуриб келарди...

Хадрага етгандан кейингина қаёққа боришини сўраши кераклиги Алимардоннинг эсига келди.

– Қаёққа борасиз, Клараҳон? – деди хотиржам оҳангда гапиришга уриниб.

– Чилонзор...

– Йўлимиз бир экан.

– Биламан.

Алимардон унга кўз қири билан қараб қўйди.

– Қаёқдан биласиз?

– Сизни билмаган одам борми? – Машина ичи гирашира коронги бўлса ҳам Алимардон Кларанинг чиройли кўзларини сузиб қўйганини пайқади.

– Фақат сиз ҳеч кимни билмайсиз... – Клара бир лаҳза жим кетди-да, негадир армонли оҳангда кулди. – Ҳар сафар концертингизга тушаман. Берган гулларимни оласиз-у, қайрилиб ҳам қарамайсиз.

Алимардон концертда ўзини ўпган аёлни эслади. «Ха, шу экан-да...» – У индамай кулиб қўя қолди.

Беш қаватли панелли уйлардан бирининг олдига етганда Клара секингина шипшиди:

– Чапга юрасиз...

Машина парча-парча ой нури сочилиб ётган йўлакдан дарахтлар орасига қириб тўхтади. Бир эшикдан Алимардон, наригисидан Клара тушди.

– Раҳмат, – Клара қўйл чўзди.

Алимардон унинг чиройли, дўмбок кўлинини авайлабгина қисаркан, вужудида тағин енгил титроқ уйғонганини сезди.

– Зинангиз коронги экан, – деди у қоп-кора оғзини ланг очиб турган йўлак эшигига қараб. – Чикқани қўрқмайсизми?

– Сизга бари бир эмасми? – Клара ҳамон унинг кўлинини қўйиб юбормас, ойдинда чехраси бир оз рангсиз, аммо жозибали кўринарди. Алимардон унинг қўйиб юборгиси келмаётганини тушунди. Боядан бери хаёлида чарх ураётган фикр яна ғимиirlади. «Беш кунлик дунёда хотинга хиёнат қилмаган эркак борми?»

Шартта қўлини бўшатиб, асабий харакатлар билан машина эшигини қулфлади-да, қайтиб келди, уни кўлтиқлади.

– Юринг.

Икковлари қоп-коронги цемент зиналардан чиқиб боришаракан, Алимардоннинг кўнглида кўркувгами, ғашликками ўхшаган туйғу уйғонди.

– Уйингизда ким бор? – деди қоронғида қаттиқ шивирлаб.

Клара пиқ этиб қулди.

– Шунақа кўрқоқмисиз?!

Учинчи қаватдаги эшиклардан бирини очишиди. Клара «чик» этиб чироқни ёқди. Уй шинамгина, дид билан бетатилган эди. Бурчакда, дераза олдида магнитола турар, карши томондаги девор тагида диван-каравот қўйилган, бериги бурчакда каттакон шифонъер бор эди.

– Ўтириңг, – Клара ўртадаги стол ёнида турган стулини унинг олдига суриб қўйди. Алимардон ўтирмади. Девордаги ранг-баранг суратларни томоша қила бошлади. Булар журналлардан кесиб олинган расмлар, киноюлдузларнинг суратлари эди. Бирдан у ўртада ўзининг суратини кўриб қолди. Бу ўша – афишаларда чиқсан расми эди.

Алимардон ҳам қувонч, ҳам завқ билан унга бурилиб қаради. Аммо Клара атайлаб магнитола устида куйманар, тасмаларни танлаган киши бўларди. Алимардон яна суратларни томоша қила бошлади. Куйироқда Кларанинг сурати осилган эди. У кора қош, соchlари жингалак йигитга суюниб турарди.

– Бу... акангизми? – У «Эрингизми?» демоқчи бўлди-ю, атайлаб айтмади.

Клара елкаси оша бепарво қараб қўйди.

– Ҳа... акам...

Алимардон хеч қайси сингил акаси билан бунақа туриб суратга тушмаслигини билгани учун мийигида қулди.

- Яхши акангиз бор экан. Қаерда ҳозир?
- Ўлган... Музика эшитасизми? – Клара унинг жавобини кутмасданоқ, магнитолани буради.

Денгиз тўлқинидай тиниқ куй янгради. «Штраус... Мовий Дунай вальси», деб ўйлади Алимардон. Ҳар гал шу куйни эшитса, негадир қуёшнинг туманли нурларига тўлган ўрмон, ундан пастроқда ўзининг тўлқинларини оҳиста судраб оқаётган мовий дарё кўз ўнгиға келарди. У ҳозир ҳам кўзларини юмиб, хузур қилиб тинглай бошлади.

- Ўтириңг, – деди Клара унинг елкасига оҳиста туртиб. – Ҳозир қахва қайнатамиз. Ичасизми?

Алимардон ўзи билмаган ҳолда бош силкиб кўя қолди.

...Клара шифонъернинг тошойнаси олдига бориб, ўзини ойнага солди. Алимардон унинг кўзгудаги аксини кўриб турарди.

- Қараманг, – Клара ширин жилмайиб, бармоғи билан пўписа қилди. – Уят бўлади.

Алимардон тентакларча бир эҳтирос вужудини ёндира бошлаганини сезиб, истамай тескари ўгирилди. Лекин зимдан унинг ҳаркатларини кузата бошлади. Клара аёлларга хос чиройли харакат билан сочини орқасига ташлаб юборди. Кейин ўз эри олдида тургандай бемалол ечина бошлади. Алимардон унинг мармардай оппоқ, таранг елкаларини кўрди-ю, беихтиёр ўрнидан турди. Югуриб бориб маҳкам қучоқлаб олди.

- Қочинг! Тегманг! – Клара негадир кўзларини яширап, аммо борган сайин унинг пинжига кириб борарди.

... Шу кечада Клара негадир йиғлади. Ким билсин, балки тўнгич севгисини эслагандир...

Алимардон тонг қоронғисида зулмат зиналардан тушиб кетди. Унинг кўнгли ғаш, баданига аллақандай ифлос бир нарса ёпишиб қолгандай эди.

Машинасига ўтириди-ю, локайдлик билан ҳайдаб кетди.

Яна ярим соатдан кейин Алимардон уйда, диван-каравотда чалқанча ётар, Муқаддам унинг тепасида кўзига тикилиб ўтиради. У ич кўйлак устидан халатини кийиб олган, соchlари паришон, кечаси билан ухламаган бўлса керак, кўзлари қизариб кетган, чехраси ҳорғин эди. Алимардон хотинининг оёқларига, халат остидан кўтарилиб турган қорнига, озғин, ҳорғин чехрасига қараб ижирғанди. «Оёғи мунча ингичка! Товуқникига ўхшайди. Уйлананаётганимда кўзим қаёқда эди!»

У чуқур уф тортиб, тескари бурилди.

– Тўйдамидингиз? – деди Муқаддам ниҳоят уй ичида-ги ўлик сукунатни бузиб.

«Қайси тўйни айтяпти? – Алимардон бир лаҳза ўйланиб қолди-ю, бирдан миясига урилди: «Ҳа-а! Бугун Анварнинг тўйи эди-ку!» – У лабларини қимтиб олди. Бир лаҳза юзлари уятдан ловиллаб кетганини сезди. Лекин шу ондаёқ ўзига тасалли берди. «Нима, ўтқизиб кўйибдими менга?! Тўйи менсиз ҳам ўтаверади!»

– Ҳа, тўйда эдим! – деди жеркиби.

\* \* \*

Биринчи қор ёғиши билан Алимардоннинг эски дарди кўзиди. Бронхит тўшакка михлаб қўйди. Аксига олиб, бу йил қиши жуда каттиқ келди. Қора аёз еру кўкни қаҳрига олиб қақшатар, кечалари даҳшатли совуқдан дараҳтларнинг шохи қарсиллаб синарди. Кейин гупиллатиб қор ёғди.

Муқаддам ой-куни яқинлашиб қолгани учун унинг ҳолидан яхширок ҳабар ололмасди. Охири Алимардон касалхонага тушди. Докторлар вактинча қўшик айтмаслиги, ичмаслиги кераклигини айтишди. Лекин Алимардон соғайиб чиққанидан кейин Гаграга – курортга йўлланма олган жойида айниди: декабрь ойида театр Японияга гастролга бориши керак эди.

У яна ишини бошлаб юборди.

Алимардон ҳамон ойга ўхшар эди. У кун сайин тиниклашиб, кун сайин ёркинлашиб, заминдан узоклашиб бораарди-ю, бир нарсани билмасди. Ой энг баланд нуқтасига етгандан кейин пастга шўнғишига мажбур бўлишидан бехабар эди.

У ҳамон аввалгидай қошини бир оз чимириб, табассум билан қўшиқ айтар, залнинг олдинги қаторида қўзлари ёниб ўтирган жувонлар ўзини хаёлан қучоклаётганини билиб туар, деярли ҳар ҳафта Клара билан учрашар, янги-янги жазманларни топар, аммо энди аввалгидек ўзидан-ўзи жирканиб юрмас эди.

Фақат янги куйлар басталаш ҳам, олқишлиар ҳам кўнглига сиғмай қолди. «Одамлар борини ҳазм қилиб турсин-чи!» Қизиқ, негадир одамлар ҳам уни аввалгидай олқишиламас, шифтни кўчириб юборгудек қасрак чалишмасди.

Алимардон ишга жўнаётганида бугун ўзи учун ҳам энг мудҳиш, ҳам энг қувончли кун бўлишини ўйламаган эди.

У рулга ўтиргиси келмади. Троллейбусдан тушганида оқшом қўнган эди. Майдалаб қор ёғар, театр олдидағи боғча бутунлай кўмилиб кетган, пастак дараҳтлар юкининг оғирлигидан нолигандай бош эгиб туарди. Унинг ўпкаси совуқ ҳавога тўлиб, яна нафаси қисди. Бир лаҳза тўхтаб қолди.

Боғ устидаги чироқлар бирин-сирин ёнди. Ҳаммаёқ алланечук гўзал, жозибадор бўлиб кетди. У кўпдан буён ўзи билан ўзи овора, табиатга мана шундай назар солмаган эди. Ҳозир ажиб бир манзарани кўрди. Ҳавода учқунлар кезар, чироқларнинг қалпоғи остидан элак-элак қор қуюлар, жимгина кузатиб турган одамга қор ерга тушаётгандек эмас, ернинг ўзи секин-секин осмони фалакка кўтарилиб кетаётгандек туюларди.

Унинг ёнида қўнғироқдек кулгу садоси янграб кетди. Боғ ичкарисидан тиззагача қор кечган қиз югуриб чиқди. Унинг рўмоли ҳам, пальтоси ҳам қорга бурканган, чироқ нурида қип-қизариб кетган чиройли чехраси яшнаб кўринади. Зум ўтмай унинг кетидан бир йигит югуриб чиқди. Йигитнинг ҳам пальтоси, кепкаси қорга бурканган.

Йўлка четида йигит қизни қувиб етди. Қўлидаги юмалоқланган коптоқдай қорни баланд кўтариб, қизнинг пешанасига яқин олиб келди.

– Нима қилай, – деди кулиб. – Қани, нима қилай?

Қиз ҳамон қўнғироқдек кулар, сокин боғ унинг шодон қахкаҳаси билан тўлган эди.

– Бўлди, – қиз кула-кула кафти билан юзини тўсди. – Бўлди, Марат ака, тавба қилдим...

Йигит қорни улоқтириб юборди-да, бурилиб қараб, йўлка ўртасида турган Алимардонни кўриб қолди. Қизни оҳиста қўлтиқлаб олди. Уларнинг бир-бирига монанд гавдаси чироқлар нурини кесиб ўтиб қоронгилик қўйнига сингиб кетди.

Алимардон севишганларнинг кетидан узок қараб қолди. Шу топда унга алам қиларди: ўзининг хеч қачон шундай юрганини, энди хеч қачон юролмаслиги алам қиларди.

У ёлғизоёқ из тушган йўлдан юриб, боғдан чиқди. Театрнинг баланд пештоғида камалакдай нур порлар, чироқ остида яшнаётган афиша ойнаси ичида ўзининг сурати узокдан яккол кўриниб турарди. Касса олдида одам сийрак эди.

Алимардон тез-тез юриб, орқа эшикдан ичкари кирди. Коронги йўлакдан ўтди, учраган ҳамкасларининг саломига бошини билинار-билинмас қимирлатиб алик олиб, гримхона эшигини очди. Шошилмасдан кийинди.

Яна чорак соатдан кейин Алимардон Тўраевнинг номи зал устида қанот қоқди. У қарсаклар оғушида торини

кўтариб, саҳнага чиқиб келаркан, нимқоронғи залга зимдан назар ташлаб кўйди. Одамлар сийраклигини кўрди-ю, ҳафсаласи қайтди. Шундок бўлса ҳам ўша – одамларга таниш табассумни чеҳрасига қалқитиб чиқарди.

Зал устида тор садолари парвоз этди. Кетидан Алимардоннинг майин овози юмшоқ қанот силкиди. У биринчи қўшиқни яхши айтди. Лекин иккинчисининг авжига чиққанида нафаси қисила бошлади. Шунда ҳам қайсарлик билан учинчи ашулани бошлади. У нафаси бўғзига тиқилиб қолаётганини билар, пешанасидан тер куюлар, аммо қўлида тор бўлгани учун артиб ололмасди.

Бир амллаб қўшиқни тугатди-да, парда орқасига ўтди.

Конферансъе қиз саҳнага чиқиб келаётган эди, жаҳл билан шивирлади:

– Бошқасига гал беринг!

Қиз ҳайрон бўлиб тўхтаб қолган эди, жеркиб берди:

– Нега анқаясиз? Бошқа одам чиқсин.

Конферансъе қиз тушунди шекилли, тез-тез юриб, микрофон олдига борди.

– Мутал Қодиров! – деди у баланд овоз билан.

Қорачадан келган, жингалак сочли, озғин йигит Алимардоннинг олдидан ўтиб, саҳнага чиқди.

Алимардон саҳна орқасига ўтиб кетаётган эди, гулдурос қарсакни эшитиб тўхтаб қолди. Одамлар гувуллаб чапак чалиб, ёш хонандани олқишлишарди.

«Иблис!» – Алимардон парда орқасидан секин мўралади. Мутал микрофон олдида туриб томошабинларга енгилгина таъзим қиласарди.

«Иблис!» – деди Алимардон яна пицирлаб. У мана шу ёш бола ўзи билан рақобат қила бошлаганидан ғазабланар, унинг консерваторияни битирганини, ажойиб овози борлигини, одобли, билимдон хофиз эканини билар, аламдан қақшар эди.

Алимардон унинг овозини эшитмаслик учун тез-тез юриб, нимқоронғи йўлакка чиқди. Ёнбошидаги хонани тақиллатмасдан кириб борди. Зуфар Ходиевич бошини куйи согланча стол устидаги аллақандай қофозларни ковлаштириб ўтирар, уй ичи тамаки тутунига тўлган эди. Зуфар Ходиевич уни кўрди-ю, оғир, каттакон гав-дасини аранг кўтаргандай шошилмасдан ўрнидан турди.

– Келинг, азизим! – У Алимардоннинг кўлини ўзининг юмшоқ кафти орасига олиб қисди. – Бутунлай соғайиб кетдингизми?

Алимардон ўтирмади. Зуфар Ходиевичнинг тилла тишларига тик қараб сўради:

– Японияга қачон кетамиз?

Зуфар Ходиевич хижолат чеккандай бир унга, бир стол устидаги қофозларга қараганча жимиб қолди.

– Биласизми, – деди анчадан кейин узр сўраган оҳангда. – Бизлар Мутал Қодировни ёзиб қўйган эдик.

«Нима?» – Алимардоннинг кўзига мана шу тор хона зиндондек кўриниб кетди. Ёш хонанданинг қорача чехраси кўз ўнгига келди-ю, аламдан тишларини фижирлатди.

Зуфар Ходиевичнинг гапларини анчадан кейин эшитди.

– Сиз Болтиқ бўйига бордингиз. Бошқа республикаларда бўлдингиз... Ёшларга ҳам йўл беришимиз керак... – у бир лаҳза ўйланиб турди-да, кўшиб қўйди: – Уч кундан кейин Тожикистонга гурух боради. Ўзингиз бош бўласиз.

Алимардон шартта бурилди-да, эшикни қарсилатиб ёпиб чиқиб кетди.

«Аблаҳ! – у Зуфар Ходиевичнинг юзига айтотмаган гапини пичирлаб ўзича тақрорлади. – Аблаҳ! Аллақандай сўтакка алиштириб ўтирибсанми мени! Ҳали шундок додингни берайки, Театринг менсиз бир соат ҳам кун кўролмайди!»

Шу кетганича уйга етганида ўзига келди. Дарвоза пештоғидаги чироқ ёқилмаган, деразалар зимистон эди. У қўнғироқ тугмасини узоқ босиб турди. Ичкаридан садо чиқмади.

«Ўлиб қолганми бу?» – Алимардон ғазаб билан яна узоқ босди. Ҳамон сукунат хукм сурар, қор уйни ҳам, Муқаддамни ҳам, ҳаётнинг ўзини ҳам оғир юки билан босиб қолгандай эди.

Бирдан унинг эсига тушиб қолди. «Калит! Калитни топиш керак!» Муқаддам у ёқ-бу ёққа чиқса, калитни дарвоза пештоғидаги тешикчага қўйиб кетгувчи эди. Алимардон қоронгида тимирскилаб калитнинг темир ҳалқасини топди. Тортиб олди-да, дарвоза ўртасига ўрнатилган эшикни очди. Қор босган йўлакдан ўтиб, айвонга, ундан ётокқа кирди-да, чироқни ёқди. Уй ичи нурга тўлди. Бурчакдаги тошойна, девордаги гиламлар яшнаб кетди. Диван-каравот бўш, Муқаддам йўқ эди.

«Қаёққа даф бўлибди!» – У ўз хонасига ўтди. Рояль қопқоғи устида турган бир варак оқ қофозни кўриб қолди, шошилиб борди. Юлиб олди-да, эгри-бугри қилиб ёзилган сўзларни ўқиди:

«Мардон ака, мени еттинчига олиб кетишди».

Тўсатдан унинг хаёлига яшиндай фикр урилди:

«Еттинчи тугруқхонага кетган!»

У машинани гараждан олиб чиқаркан, пичирлади: «Еттинчи.. Еттинчи... Қаёқда эди?.. Ҳа, Чилонзорда. Чилонзорда!»

Алимардон машинани елдириб кетди. Қор тинган, аммо йўллар кўмилиб кетган, кўчалар сирғанчиқ эди. У тугруқхона эшигига етиб келганида яrim кечадан ошганди.

Алимардон машина эшигини қарсиллатиб ёпиб, ёргулур тушиб турган эшик олдига борди. Ойнага ёпиштириб қўйилган рўйхатни шоша-пиша ўқиб чиқди. Тўраева де-

ган фамилия йўқ эди. У шиддат билан эшикни тақиллата бошлади.

Эшик ёnidаги жажжи дарча очилиб, оқ халат кийиб олган кампирнинг юзи кўринди.

– Нима дейсиз, болам? – деди кампир хаста оҳангда.

– Билиб чиқинг-чи, Тўраева нима бўлди экан...

Кампир Алимардоннинг илтижо билан тикилиб турган кўзларига қараб раҳми келди шекилли, дарчани очик қолдириб, бурилиб кетди.

Алимардон анча кутди. Совук кучайган, атроф жимжит, узокларда трамвайлар қийқиллар, туннинг қаҳратон сукунатини бузишга аҳд қилгандай нола чекарди.

Анчадан кейин ичкаридан шип-шип этган қадам товуши эшитилди.

Алимардон тоқат қилолмай, дарчадан бошини сукди.

– Ха?!

Кампирнинг семиз юзи шодликдан ёришиб кетган эди.

– Ўғил муборак бўлсин, болам, ўғил! – деди у овози титраб. – Ҳозиргина кўзи ёриди. Ўн олтинчи палатада ётибди.

Алимардон титроқ қўлларини чўнтағига солди-да, илашиб чиққан пулни кампиррга узатди. Кампирнинг гапларини эшитиб ҳам ўтирмай, зиналардан чопиб тушиб кетди.

Машинани ғизиллатиб уйга қайтаркан, юраги нурли бир туйғудан тўлиб-тошган эди.

– Отини Шавкат қўйман, Шавкат! Шавкатли кунларимдан хотира бўлсин! – дерди у пицирлаб.

\* \* \*

Аёл киши бир бева қолганида, бир кўзи ёриганида кўнгли нозик бўлади, дейишади. Бир ҳафтадан буён дадаси билан онаси, гоҳо Лобар туғруқхонага галма-гал ке-

либ-кетишар, аммо Мардон акасидан дарак йўқ эди. Рост, у чақалоқ туғилган куннинг индинига бир марта келиб кетди. Муқаддам дераза олдига келиб ҳовлида турган эри билан имо-ишоралар қилиб гаплашди. Алимардон хурсанд кўринарди. Бошидаги кубанкасини ечиб олиб ҳадеб силкитар, жилмаяр эди.

Лекин ўшандан бери дараги йўқ.

Қайси куни онаси эринг Тожикистонга кетибди, деб гап топиб келди. «Нима, бир сафар гастролга бормаса, бирор уришармиди? Уйда ҳеч ким бўлмаса? Бу ёқда паҳлавондек ўғил кўрган бўлса?.. Арзимабдими?» Палатадаги хотинлар Муқаддам Алимардон Тўраевнинг хотини эканлигини билиб қолиб, ҳар куни суриштиришар. «Ўртоғингиз келса бизларга кўрсатасиз», деб илтимос килишар эди.

Муқаддам дераза олдида тик турганча шуларни ўйлар, ўйлаган сайин кўнгли чўкарди.

Ҳовли кий-чув бўлиб кетди. Муқаддам дарпардани суриб мўралади. Неча кунлардан бери бугун қуёш чараклаб кетган, қор зарралари нурли кукунлардай яраклаб кўзни олар, дарахт шохларига қўнган учқунлар дув-дув тўкилиб тушарди.

Пишиқ ғиштдан баланд қилиб ўралган девор тагидаги тепаликда болакайлар чана учишарди. Ана, бўйнини ола-була шарф билан ўраб олган қизалоқ, укаси бўлса керак, беш-олти ўшлардаги болакайнин чанага ўтқазди-да, тепаликдан итариб юборди. Чана уч-тўрт қулоч сурилиб пастга тушди-ю, ёнбошига бурилиб ағдарилди. Болакай муқкасидан йиқилиб, қорга думалаб кетди. Бир амаллаб кордан чиқди-да, опасига қараб йиглай бошлади.

Муқаддам унинг дўмбоққина қўллари билан кўзини ишқалашини кўрди-ю, завқланиб кулиб юборди. Юқоридан опаси чопиб тушди. Болакайнинг телпакчасини ечиб, қорини қоқа бошлади. Бирон нарса ваъда қилиб

овутди шекилли, укаси ҳали ёши қуримаган кўзларини катта-катта очиб, жилмайиб кўйди.

Мана, яна тўрт йилми, беш йилми ўтиб унинг ўғли ҳам худди шунаقا йиқилиб-сурилиб, катта бўлиб қолади. Кейин жажжигина папка кўтариб мактабга боради. Ундан кейин... Муқаддам ширин хаёллар огушида хузур килиб, дераза рахига суюнди. Энди адаси ҳам инсофга кириб қолади. Ота бўлди, ахир. Аввалги ўдагайлашларини ташласа ажабмас... Шундай дейди-ку, унга ҳам қийин, ахир. Иши оғир, кўпчиликнинг кўнглини олиш осонми?

...Йўлақдан йиғи товуши эши билди. Муқаддам чўчиб ўгирилди. У оналарга хос ички бир сезги билан шунча чақалоқ орасидан ўғлининг овозини – баланд, азamat йигисини дарров ажратиб оларди.

Димогига оқ дока тутиб олган ёш ҳамшира қиз чақалоқни кўтариб кирди. Муқаддам унинг қўлидан ўғилчасини олди, меҳр билан бағрига босди. Чақалоқ кўзларини чирт юмиб, жаҳл билан йиглар, ҳалитдан билиниб қолган қоши чимирилиб кетган эди.

«Худди адасининг ўзи, – ўлади Муқаддам унга жилмайиб тикиларкан. – Жаҳлини кўрмайсизми бунинг!»

Ҳамшира қиз эмиб бўлган чақалоқни Муқаддамнинг қўлидан олаётганида, ийманиб сўради:

– Кийимларингизни олиб келайми?

Муқаддам бугун кетиши кераклигини эрталаб доктордан эшигтан эди.

– Майли, – деди хўрсиниб. – Ойимлар келгандирлар...

Унинг хўрлиги келди. Ҳозирги ҳолатини атрофдаги-лардан яшириш учун тескари қараб кийинди. Бир амлаб ўзини хушчакчақ кўрсатиб хайрлашди-да, йўлакка чиқди.

Иссик адёлга ўралган ўғилчасини кўтариб олганча секин-секин юриб, йўлақдан ўтди. Туғруқхонанинг оғир, ойнабанд эшигини очиб, қор босган цемент зиналарга оёқ қўйди-ю, бирдан қувончдан қичқириб юборди:

– Мардон ака!

Алимардон зангори «Волга»сини кўча томонга буриб қўйганча, машина эшигини ланг очиб ўтиради. Унинг бир оёғи машина ичида, иккинчиси ерда турар, ёнбоши билан руль чамбарагига суюнганча, сигарет туатар эди.

У Муқаддамнинг овозини эшитиб, бурилиб қаради. Бирдан чехрасида қувончли табассум чараклаб кетди. Машинадан сакраб тушиб, кўлларини олдинга чўзганча келди.

– Қаний, қаний! – У болаларча шодлик билан чақалокқа талпинар, ҳадеб жилмаяр эди.

Муқаддам ўғилчасини унинг қўлига тутқазди.

– Худди ўзингиз... – деди бирор эшитиб қолиб уят килишидан чўчиб шивирлаб.

Алимардон чақалоқни беўхшов қучоқлаб олганча, бир кўллаб юзини очди.

Чакалоқ биринчи марта кўраётгани учун куёшдан кўзлари қамашиб, секин-секин юмиб-очар, қаёққадир жавдира бтиклимоқчи бўлар, Алимардон билан Муқаддам эса қувончдан кулишар, шу топда улар жаҳондаги энг баҳти одамлар эди.

– Қўйинг, – деди Муқаддам чақалоқнинг юзини бер-китиб. – Шамоллатиб қўясиз!

\* \* \*

Тақдир деган гапни одамлар ўзини юпатиш учун ўйлаб топган бўлса керак. Бошимизга оғир ташвиш тушса унинг оқибатини кўрамиз-у, сабабини суриштириб ўтирамаймиз. Қисматдан нолиб қўя қоламиз. Кўпдан буён худди шу қисмат измимиздан кувиб юрганини, уни ўзимиз эргаштириб юрганимизни бўйнимизга олишдан қўрқамиз.

Алимардон ҳам ўз тақдирини ўзи эргаштириб юрганидан бехабар эди.

Эрта баҳор кунларидан бирида у концертга бормади: катта магазиннинг мудири қизини узатаётганини айтиб, кўярда-кўймай уни тўйга олиб кетди. Алимардон бу «ўғил бола» йигит билан кўпдан улфат эди. Бир нафас иккиланиб турди-да, рози бўлди: «Бир сафар концертни менсиз ҳам ўтказиб кўришсин-да!»

У эртасига эрта билан репетицияга ҳаммадан илгари етиб борди. Машинасини энди панжара ичига кўйиб чиқаётган эди, ўзига қараб секин-секин юриб келаётган Зуфар Ходиевични кўриб, тўхтаб қолди. Зуфар Ходиевич ёмғирпўшини ечиб, елкасига ташлаб олган, бўйнида костюмига монанд жигарранг шарфи осилиб ётар, оғир гавдасини кўтаролмагандек хиёл эгилиб, вазмин-вазмин қадам ташлаб келарди.

«Ҳозир яна дийдиёсини бошлайди», – деб ўйлади Алимардон ғижиниб. Кеча ўйлаб қўйган баҳонасини, тоби қочиб қолганини айтишга оғиз жуфтлаб турган эди, Зуфар Ходиевич унинг бармоқларини ўзининг юмшоқ кафтлари орасига олиб қисди-да, жилмайиб сўради:

– Машина яхши юриб турибдими?

«Нима демоқчи бу?» – Алимардон ўзининг ҳолатига мос бўлмаган тетик оҳангда кулди.

– Отдек!

– Кетдик бўлмаса! – Зуфар Ходиевич оҳиста юриб келиб, машинанинг орқа эшигини очди-да, ёмғирпўшини ўриндиққа ташлади. – Бир далаларни айланиб келайлик. Ҳавонинг тиниқлигини қаранг! – У қўзларини хиёл қисиб, қуёш чараклаб ётган осмонга, панжаранинг нариги ёғидаги яккам-дуккам япроқ ёза бошлаган садақайрагчага қараб кўйди.

– Қаёққа борамиз? – деди Алимардон кабина пеша-насидағи кафтдек ойнадан кўриниб турган Зуфар Ходиевичнинг аксига қараб.

– Захариқдаги қирга чиқсакмикан, – деди Зуфар Ходиевич муштугига сигарет қистиаркан.

Алимардон машинани елдириб бораркан, рақибининг биринчи бўлиб мушт туширишини кутиб турган боладек сергакланиб, унинг гап бошлишини кутар эди. Аммо Зуфар Ходиевич шаҳардан чиқишгунча бир оғиз ҳам гапирмади.

Бетон ётқизилган катта кўчага чиқишгандан кейин ўткинчи машиналар сийраклашиб қолди. Алимардон сочини тортқилаётган майин шамолдан роҳат қилиб, ёнбосидаги кия дарчани очиб кўйди.

– Ойнани тушириб кўяверинг, Зуфар ака! – деди орқасига бурилиб қараб.

Зуфар Ходиевич худди шуни кутиб тургандек, эшик ойнасини туширди.

– Баҳор яхши-да! – деди атрофига аланглаб. – Бунақа пайтда ҳаммаям ёшлигини эсласа керак...

«Кайфияти жойида-ку». – Алимардон мамнун жилмайиб кўйди-да, газни босди.

Улар йўлдан беш чакиirimча узоқдаги баланд адир устида тўхтадилар. Икковлари баравар машинадан тушишди. Ҳавода эндигина эриб битган қор ҳиди кезар, ҳали селгимаган ердан бош кўтарган майин майсалар олис уфқларгача гилам тўшаб ташлаган, онда-сонда қуёш парчасидай қоқигуллар ярақлаб кўриниб қоларди.

Алимардон кўксини баланд тутганча, тўйиб-тўйиб нафас олди. Кўклам қувончи бутун борлигини ларзага солди-ю, югуриб пастига тушиб кетди. Шу топда унинг кўнгли болаларча шодликка лиммо-лим тўлган, юмшоқ майсалар силкиниб турган ер устидан қанот чиқаргандек учиб борарди. Анча жойга боргандан кейин чарчади. Шундоқ майса устига ўзини ташлади-да, чалқанча ётиб олди. Кўзларини ярим юмганча қуёшга, беғубор осмонга тикилиб узоқ ётди. Атроф жимжит, баланд осмонда

муаллақ сузаб юрган якка-ёлғиз бургут ҳам қанот силки-  
мас, бутун коинот туғилиш гашти билан хузур қилаётган  
табиатни сукунат хукмига топширгандай эди.

Анчадан кейин у оғир-оғир қадам товушини эши-  
тиб, бурилиб қаради. Зуфар Ходиевич яқин келиб,  
ёмғирпүшини ерга ташлади-да, ёнбошлади. Чамаси, у  
чарчаган шекилли, чуқур-чуқур нафас олар эди.

Яна узоқ вақт икковларидан садо чиқмади. Алимар-  
дон қайрилиб қарамаса ҳам, Зуфар Ходиевич муштуғига  
сигарет кўндирилганини, гугурт чизганини билиб ётди.

– Тўй яхши, ўтгандир?..

«Бари бир гап очди-я», деб ўйлади Алимардон ву-  
жузи қақшаб. Ҳозирги қувончидан нишон ҳам қолмади.  
Бошини кўтариб бурилиб қаради. Зуфар Ходиевич  
ёмғирпүшига тирсагини кўйиб ёнбошлаб ётар, сигарет-  
нинг тутунига ўйчан тикилиб қолган эди.

Алимардон ўзи ўйлаб кўйган баҳона фойдасиз экан-  
лигини тушунди-ю, ростини айтди:

– Қалин ўртогим эди, ҳеч кўймади. – У бир нафас жим  
қолди-да, айбдор оҳангда қўшиб кўйди: – Биламан, Зуфар  
ака, одамлар концертга мени деб киришади. Кеча келма-  
ганим ёмон бўлди.

– Шунақами?.. – Зуфар Ходиевич ҳамон сигаретдан  
кўз узмай, негадир кулди. Алимардон бу кулгига хар  
галгидек жаҳл ҳам, заҳарханда оҳанг ҳам йўқлигини сез-  
ди. – Йўқ, Алимардон, одамлар концертга сизнинг ашу-  
лаларингизни эшлиши учунгина келмайди. – У Алимар-  
доннинг кўзларига ўйчан тикилиб, яна қайтарди: – Факат  
сизни деб келмайди...

Алимардон кейинги пайтларда одамлар ўзини илга-  
ригидай олқишли маётганини эслади-ю, қайсарлик билан  
қошини чимириди.

– Бўлса бордир, концерт менсиз ҳам ўтдими ахир? Зу-  
фар Ходиевич унинг киноясини пайқамагандек хотиржам

ўтиарар, унинг кўзларида Алимардон ҳали ҳеч кўрмаган бир туйғу – ачиниш тўла туйғу бор эди.

– Бу даргоҳда ўттиз йилдан бери ишлайман, – деди у ҳамон ўша сокинлик билан. – Истеъдодини қурбон қилган кўп санъаткорларни кўрдим. Сиз ҳам шундай бўлманг, дейман-да...

Алимардон ҳали ҳеч кимдан эшитмаган, аммо юрагининг бир бурчи билан сезиб юрган ҳақиқатни бирдан ҳис қилди-ю, шиддат билан қаддини ростлаб ўтириб олди. Зуфар Ходиевич сигарет қолдигини улоқтириб ташлади. Муштугини шимининг чўнтағига солиб, Алимардонга қараб қўйди.

– Ўзингиз айтинг, бир йилдан буён лоақал битта янги қўшиқ айтдингизми? Томошаларингизда одамлар нима учун кун сайин камайиб бораётганини ўйлаб кўрдингизми?

Йўқ, Алимардон буларни ўйламаган эди. Аммо гирашира тушунарди. Шундай пайтларда ҳар доим ўзини битта нарса билан юпатарди. Ҳозир ҳам шуни айтди:

– Менга ҳақиқий томошабин керак. Санъатни тушунадиган томошабинлар керак.

Зуфар Ходиевич яна кулди. Аммо бу кулги истеҳзоли эди.

– Энг баланд қарсак чаладиган, полни тепкилаб олқишлийдиган, гул тутадиган томошабинларми?

– Балки шунақадир, – деди Алимардон хотиржам гапиришга уриниб.

– Худди шунаقا, энг қаттиқ қарсак чаладиган томошабинлар сизни энг аввал унугтади. Ҳақиқий томошабинлар ҳақиқий санъатни олқишлиайди.

«Бўлмаса меники қанақа санъат экан? Бўлмаса нима қилиб театр мени боғлаб олган?» – деб ўйлади Алимардон ғижиниб. Лекин ўзини босиб олди-ю, кулди:

– Мутал Қодировнинг санъатиними?!

Зуфар Ходиевич ўрнидан турди-да, увшган оёкларини уқалай-уқалай, яна сигарет тутатди.

– Сизнинг санъатингиз ҳам яхши санъат эди. Ажо-йиб эди! Ўзингиз уни тарбиялай олмадингиз. Айниб кетдингиз. Кўшиқларингизнинг ҳаммаси бир-бирига ўхшайдиган бўлиб қолди. – У бирдан гапидан тўхтади-да, шиддат билан Алимардоннинг устига эгилди. – Сиз истеъдодингизни чакана пулладиган бўлиб қолдингиз. Енгил-елпи мақтовлар овозингизни бўғиб кўйди.

Алимардон ижирғаниб, юзини ўғирди.

– Бўлмаса нима қилиб ушлаб турибсиз мени? Нимага?

– Кечаги қилингиз учун сизни аллақачон ҳайдаш керак эди. Мен ачинганимдан гапиряпман. Раҳбар сифатида эмас, дўст сифатида айтаяпман...

– Раҳмат, – деди Алимардон ўрнидан туаркан. – Мен ҳеч кимнинг шафқатига зор эмасман...

У йўл-йўлакай бир оғиз ҳам гапирмади. Уйга қайтди-ю, тўппа-тўғри иш кабинетига кириб кетди. «Чучварани хом санабсан! – деб ўйлади у Зуфар Ходиевичнинг гапларидан бўғилиб. – Хали шунака кўшиқлар ёзайки, ўзинг ҳам, ўша эркатойинг Мутал ҳам ёқа ушлаб қолларинг... Шундоқ ашулалар айтайки, залларингни томи кўчиб кетсин!»

У шу куниёқ янги куй топишга киришди. Ажаб, ҳарчанд уринса ҳам кўнглида на бир нурли туйғу, на илҳомбаҳш оҳанг топилмади. Охири чарчади. «Боши кесилган товуқдай питирлаб, нима қиласман, – деб юпатди у ўзини-ўзи. – Шунча қўшиқлар ҳам етади. Аввал борини ҳазм қилиб туришсин... – Диванга ёнбошлади-да, хотиржам жилмайиб кўйди. Шу топда ҳамма нарса бари бир эди унга.

Шавкатжон талпинчоқ бўлиб қолди. У уй бурчагида-ги беланчақда майкаchan ётар, ҳадеб қийқириб кулар эди.

Алимардон бармоғи билан унинг жажжи қорнини қитиклар, Шавкат дўмбоқ оёқ-кўлларини баравар силкитиб илжаяр, ҳали тиши чиқмаган оғзини очиб, қийқирганча дадасига талпинарди.

– Муқад! Қара, қарагин! Оёгини велосипед қиляпти! – Алимардон деворга осиғлиқ гиламни тозалаётган хоти-нига қичқирди. – Кўрсанг-чи, бунингни!

Муқаддам қўлидаги хўл латтани ташлаб, яқин келди. Шавкат онасини таниди: янам қаттиқроқ қийқириб, қўлчаларини силкита бошлади.

– Вой сен-эй! – Алимардон яна бармоғи билан унинг қорнини қитиқлади. – Кулишини қара, кулишини!

– Кўйинг! – Муқаддам унинг қўлини суриб ташла-ди. – Болани қийнаманг!

Икковлари бир-бирларига қараб жилмайиб қўйиши.

Эшик қўнғироги жиринглади. Муқаддам йўлакка югуруди. Оёғига дуч келган калишни илиб, ховлига тушди. Ерлар селгиб қолган, аммо ҳали ҳавода эриган қориси гуркирарди. У цементланган йўлакдан ҳалқоб сув-ларни босиб ўтиб, дарвоза эшигини очди.

– Вой, Лобар!

У қувончдан чехраси яшнаб кетган дугонасини кучоклаб олди. Лобар ёмғирпўш кийиб олган, бошидаги ҳиндий рўмоли чараклаган қуёш нурида ярқиллаб турарди.

Муқаддам унинг дўмбоқ қўлидан ушлаб ичкарига судради.

– Йўқ, кирмайман... Эринг бўлса кирмайман. – Лобар қайсарлик қилиб эшик олдида туриб олди. Унинг оқсариқ юзи қизарип кетган эди.

– Эсинг борми, юрсанг-чи!

Лобар яна қўлини тортиб олди. Туфлисининг учи билан ҳали қуриб улгурмаган ерни чиза бошлади.

– Тўйга борасанми? – Унинг чехраси яна ҳам қизариб кетди.

– Вой, ростданми? – Муқаддам уни маҳкам кучоклаб, у юзидан-бу юзидан ўпиб олди. – Ўша... Жаҳонгиргами?

Лобар қувончини яшиrolмади шекилли, уялган бўлди.

– Ҳа... – деди секин бош силкиб.

\* \* \*

Келинлар тушган автобус Ойнатоғ қишлоғига кунботар чоғи келиб тўхтади. Ёнбош томондаги тик кўтарилиб турган сип-силлик чўққи ботаётган қуёш нурида тарғил аланга бўлиб ёнар, бутун қишлоқ унинг шафакида оловланиб кўринарди. Алланечук афсонавий, ҳазин бир манзара ҳали куртак ёзмаган дов-дараҳтларга ҳам, пастак уйлар устига ҳам оловли соя ташлаб турарди.

«Ойнатоғ деганча бор экан!» – Муқаддам автобус де-разасидан мўралаб, атрофни томоша қила бошлади.

Қишлоқ кичкинагина эди. Ярмигача тошдан девор урилган лой томли уйлар, эчки қийлари сочилиб ётган шағал, эгри-бугри кўчалар, катта-катта чинорлар ҳазин, ўйчан туйғулар уйғотарди унда. Қаердадир сой шовуллар, тоғ унгурларида ҳали қор эримаган бўлса керак, тезак иси аралаш совуқ шабада эсиб турарди.

Муқаддам қўпдан бўён – бир вақтлар ўқувчилик пайтида синфдошлари билан саёҳатга чикканидан бери тоғни қўрмаган, шунинг учунми, бу ернинг ранг-баранг манзараси унга қувонч баҳш этарди. Аллақаерда радио карнайи шангиллайди, сигирлар маърайди, қишлоқ ахли оқшом тараддуудида елиб-югуради.

Кўча ичкарисида сурнай товуши эшитилди. Муқаддам ёнида ўтирган Лобар ўзининг қўлини маҳкам ушлаб олганини сезиб, бурилиб қаради. У оппок рўмолга бурканниб, энгашиб олган эди.

– Куёвлар келишяпти, – деди Муқаддам рўмол устидан унинг қулогига шивирлаб.

Лобар унинг қўлини тагин ҳам маҳкамроқ қисди.

– Кўрқаяпман.

Улар бошқа гаплаша олишмади. Гулдаста кўтарган йигитлар автобусни ўраб олишди. Пастдан ҳаяжонли қаттиқ-қаттиқ товушлар эшитилди.

– Келин тушмайдими?

– Олиб тушсанг-чи, Жаҳонгир!

Олд томондаги эшикдан каттакон гулдаста кўтариб куёв чиқди. У жингалак сарғиш сочи устидан чуст дўппи кийиб олган, кўкиш кўзларида ўт чақнаб жилмаяр эди.

Лобарни бир қўлидан куёв, иккинчисидан Муқаддам ушлаб, пастга олиб тушишди. Тор кўча одамлар билан тўлиб кетган, оёқ остини кўриб бўлмас, ҳали қуримаган силлиқ тошлар устидан сирғаниб-сирғаниб боришарди. Икки томондаги пастак деворлар ортидан хотин-халаж мўралашар, бақириб-чақириб, келинни кўрсатишар эди.

Муқаддам бир қўлида Шавкатни кўтариб олгани учун кийналар, аммо Лобарнинг билагидан маҳкам тутиб борарди.

– Эҳтиёт бўл, қоқилма! – дерди у ҳадеб бир гапни такрорлаб.

Кичкина эшикдан кириб боришганида йигитлар қийчув кўтариб «Тўйлар муборак»ни айтишди. Аллаким сочқи сочди. Кейин сурнай эзиб-эзиб нола чекди.

Бунақа пайтда ҳар бир жувон ўзининг келинлик дамини эслайди. Муқаддам ҳам ўзининг илк ёр-ёр билан Алимардон акасиникига кириб борганини эслади-ю, ҳаяжонланиб кетди.

Ҳовли ўртасида ловиллаб ёниб турган гулхан ёнидан ўтиб, тўрга чиқишиди. Ҳамма чапак чалиб, келин-куёвни олқишилади.

Муқаддам стол олдига ўтирганидан кейингина атрофга разм солди. Каттакон ҳовлининг тўрт чеккасидаги столларга меҳмонлар тизилишди. Ҳаво салқин, этак томондан – шовуллаётган сойдан совуқ шамол эсади. У шамоллаб қолишидан чўчиб, Шавкатни бағрига босди.

Тўй қизиб кетганида Шавкат ухлаб қолган эди. Муқаддам уни ҳамон бағрига босиб ўтирас, ора-чора Лобарни овқат ейишга қистаб қўярди.

Тоғ устида йирик-йирик юлдузлар ёнди. Қопкора тиник осмонда улар гавҳар доналарида яшнаб кўринади, жуда паст тушиб қолганга ўхшайди. Негадир Муқаддамнинг кўнгли хижил бўла бошлади. У уйига кетгиси келарди.

Келин тарафдан келган қиз-жувонлар ўртасида шивир-шивир гап юриб қолди.

– Автобус кетаётганмиш...

Муқаддам Лобарни билагидан оҳиста тутиб, секин шипшиди:

– Мен ҳам кетаман.

– Ётиб қоламан, демаганмидинг? – Лобарнинг астойдил хафа бўлгани овозидан билиниб турарди.

Муқаддам чиндан ҳам Мардон акасига «Бугун қайтмайман» деган, ҳозир ҳам бекарорлик қилиб, Лобарни ташлаб кетгиси келмас, аммо кўлида ухлаб колган Шавкатни ўйлабми, кўнглида тушуниб бўлмас бир гашлик ўйғонгани учунми, фикридан қайтган эди.

– Йўқ, кетмасам бўлмайди.

У секин сирғалиб чиқди-ю, ташқарига йўл олган хотинларга эргашди.

Чорак соатлардан кейин автобус чироқлари пасту баланд тоғ ўйлларини авайлаб пайпаслаганча юриб кетди.

Муқаддам ўз дарвозаси олдига ётиб келганида тун ярмидан оққан, ой аллақачон ботиб кетган эди. Деразаларда ҳам, дарвозада ҳам чироқ кўринмасди.

– Аданг ишдан келмабдилар, – деди Муқаддам худди тушунадигандай Шавкатга қараб. У йўлда уйғонган, аммо фингшимай жимгина келаётганди.

Муқаддам дарвоза пештогидаги тешикчага чўзилиб, қўл сукди. Калит йўқ эди.

«Ташлаб кетмабдилар-да, – деди у пичирлаб. – Вой, эсим қурсин, ўзимда ҳам бор-ку». У кетаётганида қалитнинг биттасини ташлаб кетганини, иккинчисини ёмғирпўшининг чўнтағига солиб олганини эслади.

Ҳаво очик бўлгани учунми, салқин шамол эсиб турарди. Муқаддам боланинг шамоллаб қолишидан чўчиб, шоша-пиша эшикни очди. Гиштин зиналардан айвонга чиқди. Чирокни ёқди.

Худди шу пайт ётоқхона ичидаги чироқ ёнгани эшик ойнасидан кўринди. Ичкаридан калит шикирлаб, эшик ланг очилиб кетди.

Муқаддам кўркқанидан орқага чекинди. Болани ташлаб юборай деди. Эшик олдидаги кийимдаги Алимардоннинг гавдаси кўринди.

– Одамнинг юрагини ёриб юборай дедингиз! – Муқаддам эркалаш оҳангига тўлган овоз билан Алимардонни койиди. Кейин жилмайиб, Шавкатни баланд кўтарди. – Мана, бизлар келдик...

У Алимардоннинг чехрасига қаради-ю, кўрқиб кетди. Эрининг турқи шу топда даҳшатли бўлиб кетганди. Унинг ранги кув ўчган, негадир титрар, кўзларининг қорачиги кичрайиб, дум-думалоқ бўлиб қолганди. Нихоят, унинг тили калимага келди:

– Муқад...

Муқаддам ҳайрон бўлиб, ичкарига мўралади. Аввалига ҳеч нима тушунмади. Диван-каравот устида қўрқувдан шумшайиб ўтирган ярим-ялангоч хотинни кўрди-ю, бирдан ҳаммасига тушунди.

– А-а-а! – деб қичкириб юборганча, даҳшат ичида орқасига чекинди. Айвоннинг бурчак-бурчаклари, жимжит ҳовли изтиробли чинқириқдан ларзага келди.

– А-а-а!!

Шавкат қўрқиб кетиб, чириллаб йиглай бошлади. Муқаддам уни бағрига босганча ҳовлига отилди...

... Алимардон турган ерида ҳайкалдай қотиб қолган, хозир нимадир қилиш кераклигини, қандайдир муҳим, жуда муҳим бир иш қилиш зарурлигини билар, аммо ўйлаб топа олмасди. Ҳа, топди! Шавкатни олиб қолиши керак!

У ўзи қилиб юрган ишлари учун қачондир жавоб беришга мажбур бўлишини ҳис қилас, аммо бу кун худди шу бугун етиб келишини билмаган эди. «Келмайман деб кетган одам қайтиб келишини ким билибди?» Бирлаҳзада унинг хаёлидан бир кечалик ҳузур учун Кларани уйига олиб келиб, кечирилмас хато қилиб қўйгани, энди ҳаммаси тамом бўлгани чақмоқдай яраклаб ўтди. Бу хато бошқа бир фожиани бошлаб келишини, Муқаддам уни ҳеч қачон кечирмаслигини энди аниқ тушунди. Охирида энг катта фожиани ҳам тушунди. Йўқ, у ўғлини – ўзи учун шу қадар яқин бўлиб қолган, юрагининг бир парчасига айланган Шавкатни энди ҳеч қачон кўролмаслигини ўйлади-ю, зинадан яланг оёқ пастга отилди. Йўқ, ялиниб-ёлвориб бўлса ҳам тўхтатиб қолиш керак!

Алимардон зах ерда сакраб-сакраб Муқаддамнинг кетидан югурди. Дарвоза тагида етиб олди.

– Муқад... – деди ҳаллослаб.

Муқаддам кескин ўгирилиб қаради. У энтикиб нафас олар, қоронғида ўт бўлиб ёниб турган кўзлари чараклар эди.

– Муқад... – деди Алимардон қўл чўзиб. – Мен...  
– Қоч, виждансиз! Йўқол, ифлос! Ювуқсиз! – деди  
Муқаддам чинқириб. Бирдан қўлидан Шавкат сирғалиб  
тушиб кетаётганини сезиб, кўтариб маҳкам бағрига бос-  
ди.

Эшикдан отилиб чопиб чиқиб кетди. У йиглагиси  
келар, аммо йифлай олмас, туртиниб-туртиниб чопиб бо-  
рар, бола чириллаб йигларди. Бир маҳал оёғи тойиб кет-  
ди. Аммо Шавкатни кўйиб юбормади. Чўккалаб олгани-  
ча болани маҳкамроқ бағрига босди. Беихтиёр орқасига  
қаради. Каттакон уй ваҳима ичиди қорайиб кўринар, бит-  
та, факат битта деразадан ифлос нур тўкилиб турарди.

Шундагина у Шавкатнинг бошига юзини босганча  
ўксисб-ўксисб йиглаб юборди. Ҳа, у сезар эди. Эрининг  
саёклигини, ўзига хиёнат қилаётганини сезарди. Аммо  
бу хаёлдан даҳшатга тушиб, ўзини алдар, уни пок деб  
ўйлашга мажбур этарди.

Бир вактлар мана шу уйга ёр-ёр билан кириб келгани-  
ни ҳалигина орзиқиб эсламаганмиди!

Ҳа, бу ювуқсиз бошидан уни баҳтиқаро қилган эди.  
Охирида хам баҳтсиз қилди! Шунча йиллардан бери  
бир сўзини икки қилмай ҳукмига бўйсуниб келганида,  
вакти келиб аллақандай хотинлар билан тўшагини ҳаром  
қилишини билганида эди!

Мунчалар шўр бўлмаса бу пешонаси!

У ҳамон ҳиқиллаб-ҳиқиллаб борар, қаёққа кетаёт-  
ганини ўзи билмас, уйига қайтай деса, баджаҳл ота-  
сининг ғазабидан кўрқар, осмони фалакда осилиб тур-  
ган юлдузлар совуқ кўз ёш тўкиб юм-юм йиглар, факат  
Шавкат овуниб қолган эди. У онасига нима бўлганини  
тушунмоқчидаи коронфида кўзларини жавдиратиб борар-  
ди.

Күёш баҳтидан энтикканларга ҳам, ғамидан бағри кон бўлғанларга ҳам баравар нур сочаверар экан. Уч ҳафтадан бўён Муқаддамларнинг ғам юкини кўтаролмай жимжит бўлиб қолган кафтдек ҳовлисида баҳор гуруллайди. Тип-тиник, чуқур осмонда тоғдек булутларни кўчириб юрган кўклам сабоси эл қатори бу ҳовлига ҳам илиқ томчилар пуркаб ўтди. Ҳовлидаги бир туп ўрик шохларида қинидан чиққан довуччалар мўралади. Бурчакдаги ошхона томида чучмомалар очилди. Ҳовузча олдида Муқаддам қизлигига дадасига жанжал қилиб этирган бир тахта ўсма яна жонланиб қолди. Мана шу ўスマлар суви бир вақтлар унинг кундуз кошида яшнаган эди.

Энди-чи? У ўсманни нима қилсин? Кимга? Нимага? Ким учун қўяди?

Муқаддам афсус билан хўрсиниб қўйди. У Шавкатнинг яктакчаларини ювиб ўтирас, илиққина офтоб елкаларини қизитар, жомашовдаги оппоқ кўпик сачраб-сачраб кетарди.

Муқаддам ҳеч нимани ўйлагиси келмас, аммо ғамгин хаёллар юрагини гижимларди.

Чиққан қиз чифириқдан ташқари, дейдилар. У қайтиб келган кунидан бошлаб Анзират холанинг бошига тоғдай ғам тушди. Она ҳар куни уни койийвериб чарчади. Муқаддам бўлған гапларнинг ҳаммасини айтиб берди. Энди ҳеч қачон қайтиб бормаслигини ҳам айтди. Рост-да, нимага борсин? Қайси қилган яхшиликларига? Тўйдан кейин уч-тўрт ой ўйнаб-кулгани бўлмаса...

Энди ўйлаб қараса, Алимардон уни қилча ҳам қадрламаган экан. Нима қилса ўзи учун қиларкан. Муқаддам унга бир оқсоқ бўлиб қолган экан.

Йўқ, хечам қайтиб бормайди. Елкасининг чуқури кўрсинг ўша уйни!

Муқаддамларнинг хонадони ўша кундан бошлаб яна бир қўркинчли воқеани кутиб яшарди. Отаси бир ойча илгари Бойсунга – узоқ бир қариндошлариникига кетган, уйдаги гапдан бехабар эди. Она-бала эрта-индин қайтиши керак бўлган отани юрак ҳовучлаб кутишарди...

Ичкаридан бола йигиси эшитилди. Муқаддам шошапиша қўлининг кўпигини бир чеккада ётган сочиққа артиб югорди. Ойнабанд айвоннинг эшигини шарақлатиб очиб кирди.

Анзират хола икки букилганча Шавкатни беланчакдан олмоқчи бўлар, дока рўмоли сирғалиб елкасига тушиб қолган, оппоқ соchlари тўзғиб кетганди. У овозини барадла кўйиб Алимардонни қарғарди.

– Худоё йигит ўлсин. Йигитгина ўлмаса рози эмасман. Боланинг кўз ёши кўр қилмаса, рози эмасман!

Муқаддам йифлаётган Шавкатни онасининг қўлидан олди-да, бағрига босди.

– Унгаям боккан бало бордир, йигитгина ўлгур! – Анзират хола боланинг хўл таглик кўрпачасини алмаштириди-ю, Муқаддамга зарда билан қараб кўйди. Муқаддам онасининг толиқкан чехрасига, касалмандликдан милклари шишиб кетган кўзларига, оппоқ соchlарига қараб туриб, раҳми келди. Шунча йиллар азоб чекиб, ўзини катта қилгани етмасми? Кексайганида, энди роҳат кўраман деганида, кўргани шу бўлдими!

– Кўйинг, – деди бир онасига, бир ўғлига қараб секингина, – Қарғамант. Нима фойдаси бор...

– Тағин қарғаманг дейди-я! Ҳали отанг келса, кўрасан томошани! – Анзират хола жаҳл билан бурилиб, ташкарига чиқиб кетди. Ҳовли томондан унинг оҳ чеккани эшитилди. – Эй, фалак!

Муқаддам онасининг биргина шу ноласидан умр бўйи кўрган машақатларининг бутун даҳшатини сезиб, юраги зирқираф кетди. Ўзи ҳам билинтирмай уф тортиб

кўйди. Кўкракка талпинган Шавкатининг қўнғир сочларини силади. У жимгина, тўйиб-тўйиб эмар, кўзларини сузиб турар, аммо қошлари чимирилиб кетган эди. «Худди ўшанинг ўзи! – Муқаддам беихтиёр жилмайди. – Қошкўзи ҳам, ўжарлиги ҳам...» – У энгашиб, ўғлининг юзидан авайлаб ўпди.

\* \* \*

Муқаддам Шавкат уйғонмасдан ишларини битириб олиш учун елиб-югурап эди. Анзират хола юраги қон бўлиб кетганини айтиб, эрта билан қўшниникига чиқиб кетди. Муқаддам идиш-товоқларни ювди, ҳовли супурди. Ўсма олдида тўпланган ахлатларни пакирга солаётганида тўсатдан эшик тақиллаб қолди. Муқаддам таниди. Таниди-ю, қўлидан супурги тушиб кетди. «Ўша! – Муқаддам унинг эшик қоқишини яхши билади. – Ўша!»

У овоз чиқаришдан чўчигандек бир лаҳза нафасини ютиб, туриб қолди.

Эшик яна тақиллади.

Муқаддам оёқларидан мадор кетиб, қалтираб бораётганини сезар, ўзини босиб олишга уринар эди. Нихоят, у секин-секин бориб, занжирни туширди. Алимардонни кўрди-ю, бегона эркак қаршисида тургандек бармоқлари билан кўйлагининг ёқасини ғижимлаб, кўкрагини яширди.

Алимардоннинг кўзлари бир оз чўккан, аммо тик қараб турар, Муқаддамнинг кўнглидагини билиб олмоқчига ўхшарди. Нихоят, Муқаддам унга бошдан-оёқ разм солиб чиқди. Алимардон эшик кесакисини ушлаб олган, кўк костюмининг енгидан чиқиб турган олтин соати ярақларди. Бу соатни яқинда икковлари биргалашиб олишган, Муқаддам ўз кўли билан унинг билагига солганди.

– Мана, мен келдим, Муқад...

У бу сўзларни шундай майнин айтдики, Муқаддам унинг хеч қачон бундай мулойим, ялинчоқ оҳангда гапирганини эшитмаган эди. Йўқ, эшитганди, бир вақтлар, келин бўлмасидан илгари...

Муқаддам яна кўз ўнги хиралашиб кетаётганини, бир оғиз гапирса овози титраб кетишини билиб индамади. Яна унинг қўлларига, бармоқларининг устини майнин тук қоплаган қўлларига қаради. Қачондир бу қўллар унинг соchlарини силаган. Майнин-майнин силаган. Силаб туриб баҳтига чанг солган... Бу қўллар ўша хотиннинг ҳам соchlарини силаган-да. Ўша хотиннинг ҳам елкаларини сийпалаган-да...

Муқаддам ғазабдан бўғилиб, пичирлади:

– Нега келдингиз? Нима керак сизга?!

Алимардон Муқаддамга таниш, ўша маъноли оҳангда кулди.

– Бўл энди, Муқад...

Муқаддам аламдан лабларини тишлаб, деворга суюниб қолди.

«Бўл энди...» – У келинчак пайтида эрининг худди шу сўзларини, худди шу оҳангда кулиб айтганини ҳар кеча эшитарди. Ким билсин, яна кимлар эшитмади экан бу сўзларни...

Унинг вужудини бирдан ғазаб ёндириди-ю, нафрат билан пичирлади:

– Кетинг!

Шу топда у Алимардоннинг ялинишини, ёлворишини истар, ўша уйга бари бир қайтиб бормаслигини билиб турса ҳам, шунча изтироблари ҳаки уни тиз чўқтиришни, қасос олишни хоҳларди.

Аммо Алимардон ялинмади. Унинг кўзларига хотиржам тикилиб турди-да, секин таъкидлади:

– Бола бор, эсингни йиф...

Муқаддам ғазаб ичида қўллари қалтираб, эшикни қарсиллатиб ёпди-да, занжирлаб олди. Нима килаётганини ўзи ҳам тушунмай, уйга отилиб кирди. Ухлаб ётган Шавкатни даст кўтарди-ю, бирор тортуб олиб кўяётгандек маҳкам бағрига босди.

\* \* \*

Шавкат туғилганидан бери Муқаддам уйқуси қуш уйқусидек зийрак бўлиб қолган эди. Ҳозир ҳам у энди кўзи илинганида кимдир шип-шип юриб ёнига келганини сезди-ю, уйгониб кетди. Бошида онаси энгашиб турарди. Уй ичи қоронги бўлса ҳам у онасининг чеҳрасидаги хавотирни пайқади. Кўйлагининг кўкрак тугмаларини қадаркан, онасига тикилиб сўради:

– Нима бўлди, ойи?

Анзират хола жавоб бермади. Ташқарида шамол гувуллаб, деразанинг очиқ қолган бир тавақаси ҳийқиллар, уй ичидаги суқунатни чуқурлаштиришга қасд қилгандай, хорғин инграр эди.

Муқаддам Шавкатни уйғотиб юбормаслик учун эҳтиёт билан ўрнидан турди.

– Нима бўлди? – деди тағин шивирлаб.

Она Муқаддамга гўдакликдан таниш бўлиб қолган хавотирли овозда пичирлади:

– Даданг келди... – Унинг юраги орқасига тортуб кетди, кўрқа-писа айвон томонга қараб кўйди. – Кўчадан эшитиб, уйингга борибди. Эринг билан гаплашибди. Авзойи ёмон...

Муқаддам турган ерида қотиб қолди. Бир вактлар қизалоқлик пайтида гуноҳ қилиб кўйса, дадаси уни калтаклар, ўшанда онаси худди ҳозиргидек титраб-қақшарди. Муқаддамнинг вужудини енгил титроқ қоплади. У дадасининг қаҳри қаттиқ эканини, «Қизинг эридан чиқиб келди»,

деган иснодни кўтара олмаслигини билар эди. У айвон томонга қараб кўйди. Қия очик эшиқдан уй ичидаги гиламга нур тўкилиб турар, аммо дадаси кўринмасди. Ташқарида ҳамон шамол гувуллайди, ўрик шохлари аянчли инграб, бир-бирига қарсиллаб урилади, битта-яримта ёмғир томчилаётган бўлса керак, дераза ойналари чирсиллайди.

Муқаддам яна бир нафас иккиланиб турди-да, се-кин-секин бориб, эшикни очди. Тўрда, девор тагидаги кўрпачада ўтирган отасига салом берди. Лекин овозини ўзи ҳам аранг эшитди. Дадаси ўsic қошлари остидан унга бир қараб кўйди-ю, алик олмади. Унинг озғин, се-ражин юзида қон қолмаган, ияги титраганидан қоп-қора соқолининг учи билинар-билинмас силкиниб турар, кўкимтири томирлари бўртиб кетган қўлини мушт қилиб олганча, хонтахтага тираб ўтиради.

Муқаддам отасидан кўз узмай, оёқ учida юриб келиб пойгаҳга чўйкалади. Онаси ҳам шарпадай силжиб келди-ю, эридан кўз узмай, икковларининг ўртасига ўтириди.

Ота ҳамон индамас, хонтахтанинг юпқаланиб кетган қиррасига тикилганча ўтиради. Муқаддам мана шу даҳшатли сукунатнинг тезроқ тамом бўлишини кутар, нима бўлса ҳам отаси тезроқ гапиришини хоҳлар, ҳозир порглаш рўй беришини билиб, азобланарди. Онаси гапир, аҳволини сўра, дегандай Муқаддамга имлаб кўйди. Аммо Муқаддам ҳозир отасининг аҳволини сўраса, баттар ловиллаб кетишини биларди. Шунинг учун индамай ўтираверди.

Нихоят, отаси унга қошини чимириб қараб кўйди.

– Эринг билан нега уришдинг?

Муқаддам дадасининг атайлаб юмшоқ гапирганини тушунди. Лекин жавоб бермади.

Онаси кўркув ичидаго гоҳ қизига, гоҳ эрига қараб шошилиб гапирди:

– Сув бир лойқаланмасдан тинмайди... Эртага ўзингиз обориб құясиз, бинойидай бўлиб кетади. – У Муқаддамга қараб хўп де, дегандай имлади.

Муқаддам бунақа гаплардан фойда чиқмаслигини билиб, паст, аммо қатъият тўла оҳангда юрагида борини айтди:

– Йўқ, ойи, мен қайтиб бормайман!

Она бечора олазарак бўлиб қолганини сезди-ю, яна қайтарди:

– Бекорга овора бўлманглар...

Отаси хонтахтага янайм пастроқ мункайиб, кўзларини тағин бир нуктага тикиб тураверди.

Орага яна ўша таранг сукунат чўқди. Ташқаридаги шамол кучайиб кетди. Энди шамол муттасил ғувиллар, ўрик шохларининг вахимали вишиллаши аниқ эшитилиб турар, бўғотнинг аллақаери қирсиллар, шифтдаги лампочка секин-секин лопиллаб, дадасининг соясини хонтахта устида у ёқ-бу ёққа силкитарди.

– Эринг билан гаплашдим. – Дадасининг овози сукунатда жаранглаб эшитилди. У ўзини босиб олди шекилли, анчадан кейин босиқ овозда қўшиб қўйди: – Қилмишидан пушаймон бўлиб ўтирибди. Ялиниб борсам, ўзи келмади, деяпти.

Ўзининг тўшагида ётган ўша жувон Муқаддамнинг кўз олдига келди-ю, ҳали эскирмаган, ҳеч эскирмайдиган алами яна ловиллаб кетди. «Қилғиликни қилиб қўйиб нега ялинади?!» – Бояги кўркув аллақаёққа йўқолиб, ўрнини чидаб бўлмас нафрат эгаллади.

У индамай юзини ўғирди.

Яна онаси ўртага тушди.

– Урмаган, сўкмаган эр борми, болам? Битта болангни тирик етим қиласанми?

Муқаддам яхшилик учун ёлғон гапирган онасига маъносизгина қараб қўйди-ю, индамай ўтираверди.

– Авлодимизда эридан чиқиш одати йўқ, – деди отаси бўғиқ оҳангда. – Бутун маҳаллага ҳалитдан гап тарқалиб кетибди... Қайсарлик қилма, ёпиғлик қозон ёпиғлигича қолсин. Бошқа илож йўқ.

Муқаддам киноя билан кулиб қўйди. Бошқа илож йўқ эмиш?.. Нима, бирор ундан ўтганини билармиди?

Онаси ота-болани муросага келтириш, Муқаддамнинг шахтини қайтариш учун тағин ўртага тушди:

– Ўзинг кўнгил қўйиб теккансан, қизим... Бирор сени мажбур қилгани йўқ.

Муқаддам аёвсиз ҳақиқатни шундоққина рўпарасига келтириб қўйган онасига ярқ этиб қаради. «Ўзим! ўзим! Ҳаммасига ўзим айборман! – У ўқинч билан бошини қуий солди. – Кўнгил қўйиб... Кўнгил қўйибми, мажбур бўлибми?!» – У аллакачонлардан бери шу саволни ўйлар, аммо жавоб тополмасди. Боягина Алимардонни қовура бошлаган нафрат оловининг бир чети энди ўзини ҳам куйдирив ташлади. Онаси яна алланималар деди.. Аммо Муқаддам эшитмади. Энди унинг юрагини бешафқат бир кўл ғижимлар, лекин бу кўл Алимардонникими, ўзининг кўлими – ажратса олмас эди.

– Эртага у келади.

Муқаддам дадсининг сўзларини ярим-ёрти эшитди-ю, бурилиб қаради.

– Нима?!

– Эринг келиб, олиб кетади, – деди отаси юмшок, лекин қайсар оҳангда. Кейин яна ҳам юмшокроқ қилиб қўшиб қўйди: – Уят бўлади. Гуноҳини бўйнига олиб турибди-ку. Илож қанча?

– Мен бормайман, – дадаси қанака оҳангда гапирган бўлса, Муқаддам ҳам худди ўша оҳангда жавоб берди.

Отасининг қалин қоши остидаги кўзлари чақнаб кетди. Энди унинг қони қайнай бошлаган, ўз ҳукмига

бўйсумаганларнинг жазосини берувчи асаблари таранг тортила бошлаган эди.

– Борасан! – деди чўрт кесиб. – Бормасанг, ўзим обориб қўяман.

– Бормайман!

– Борасан!

Отанинг қони гупиллаб кетди. Лекин Муқаддамнинг вужудида ҳам худди шу ота қони айланарди. У мўмин-қобил онасига эмас, отасига тортган эди.

– Бормайман! – деди у отасига тик қараб.

– Ҳай, дадаси, бола қўрқади! – она даҳшат ичиди эрининг титрай бошлаган қўлларига ёпишди. – Кўйинг... Кўйинглар...

– Борасан, итвачча, борасан!

Муқаддам сакраб ўрнидан турди.

– Бормайман! Бекорга овора бўласизлар!

Отанинг кўзлари чакнаб кетди. Махсили оёги билан хонтахтани тепиб юборди. Хонтахта Муқаддамнинг шундок олдидан учиб ўтиб, кавшандозга бориб тушди-ю, қарсиллаб синди.

Она чиркиллаб, эрига ёпишди. У алланима деб ёльвар, аммо Муқаддам эшитмас эди.

– Йўқол кўзимдан, кўрнамак!

Муқаддам жаҳолатдан қақшаётган отасининг олдига тик юриб келди.

– Ҳайдамасангиз ҳам кетаман! – У кўксини тўлдириб келаётган йигини аранг босиб, нимкоронги уйга отилиб кирди-ю, ўғлини кўрпаси билан юлқиб, каравотдан олди. Шавкат фингшиб йиғлай бошлади. Муқаддам яна шиддат билан отилиб чиқди. Ўғлини маҳкам бағрига босиб, айвон эшигига етди.

Она энди эрини қўйиб юбориб, йиғлаганча Муқаддамга ёпишди. У йиги аралаш бир нималар дер, Муқаддамни олиб қоладиган танҳо умиди шудек Шав-

катга талпинар, боланинг кўрпачасидан тортқиларди. Муқаддам ҳеч нима эшитмади. Айвоннинг ойнабанд эшигини қарсиллатиб очди-да, ўзининг осуда дамлари кечган уйига бир қараб қўйди. Шу қарашда кўзларидан ёш тирқираб кетди.

– Тегма! Кетсин! – ҳайқирди отаси турган ерида япроқдай қалтираб. – Эл-юрт олдида шарманда қилғандан кўра, йўқолиб кетсин!

Муқаддам гиштин зинадан ховлига сакраб тушди. Қаттиқ шамол нафасини қайтариб юборди. Рўмоли пир-пираб, елкасидан сирғалиб учиб тушди, соchlари ёйилиб кетди.

Йўлак олдида онаси унга етиб олиб, билагига ёпишди.

– Жон болам, эсингин йиф, жон болам! – деди у йифлаб.

Муқаддам онасининг изтироб тўла йигисини эшитиб, қайрилиб қаради. Аммо тўхтамади. Пастак дарвозадан бошини эгиб, кўчага отилди, югуриб кетди.

Кўчаларда шамол ўкирар, симёгочлар учидаги лампочкалар шиддат билан лопиллар, чопиб бораётган Муқаддамнинг соясини у ёқдан-бу ёққа иргитар эди.

Тошкент! Одамларнинг баҳтини қанчалик бағрикенглик, сахийлик билан кўксига сифдирса, баҳтсизлигини ҳам шунчалик бағрикенглик, бепарволик билан қаршилади!

Муқаддам кўксини тўлдирган йифидан довдираб кўча бўйлаб бораркан, ўзини якка-ёлғиз, ожиз ҳис этар, одамлар аллақачон уй-уйларига кириб кетишган, қайси бир деразаларда чироқлар ўчган, кимлардир баҳтидан энтикиб ҳаёт гаштини сурар, қайси бир деразалардан куй ёғилиб чиқар, кимлардир ўз оқшомини шодликка тўлдирган азиз бир одами билан суҳбат қуарарди. Фақат у ёлғиз эди. Унинг қадам товушлари асфальт йўлкада қарсиллар, шамол аралаш қулоқни тешиб юборгудай олис-олисларга тарқалар эди. Ҳа, у билади! Отаси жаҳл устида шундоқ

қилаётганини, зум ўтмай пушаймон бўлишини, бутун умидлари шу қизидан эканини билади. Онаси ҳозир алам ичига зир титраб, кўркувдан бехуш бўлиб қолганини ҳам билади. Лекин отаси, онасига бўлган меҳрдан кўра ўз-ўзига бўлган нафрат зўр чиқиб, етаклаб кетяпти уни! Қаёққа? Мана шуни билмайди у...

Муқаддам катта кўчага чиқаверишдаги пастак уй тагида ётган харсангтошга кўзи тушди-ю, бирдан ҳуши жойига келгандай тўхтаб қолди. Ўғлининг йиғлаётганини, ўзининг соchlари тўзиб кетганини энди пайқади. Чироқ нурида унсиз боқиб турган бу тош унинг кўзига олтин бўлиб кўриниб кетди. Илик, азиз хотиралар қуюни тўсатдан ёпирилиб келди-да, секингина тош устига ўтирди.

Бир вақтлар эри урушда ўлган хотин шу тош устида ўтириб, писта сотарди, Муқаддам қизалоқ дугоналари билан доим шу ерда ўйнарди.

Кейин... Кейин у оқшомлари ўзини кузатиб келган Анвар билан худди шу ерда ўтиргувчи эди...

Бирдан унинг кўз ўнгида ҳозирги эмас, ўша ўз Анвар акасининг уятчан, хаёлчан қиёфаси жонланди...

Мана, ҳозир ҳам ҳаммаёққа писта пўчоғи сочилиб ётиби. Чекка-чеккада оқариб ётган папирос қолдиқларини шамол эрмак қилиб пилдиратяпти...

Ўзи ҳам бир вақтлар Анварнинг муҳаббатини эрмак қилган экан. Дунё ўзи шунақа экан. Киши ўзини ардоқлаганларга озор бераркан-у, озор берганларни ардоқларкан...

У ўғли қўксини тортқилаётганини сезиб, эгилиб каради. Шавкат овуниб қолган, аммо узун-узун киприклиари орасида ёш ялтираб тураг, жажжи қўлчалари билан онасининг сийнасига ёпишиб олган эди. У ўғлига бир қарашдаёқ ҳамма андуҳлари изсиз йўқолиб кетди. Кўкси қуёшдай ягона, қуёшдай ёрқин оналик меҳри билан

тўлиб-тошди. Шавкатни маҳкам бағрига босиб, негалигини ўзи ҳам тушунмай, жилмайиб қўйди.

Кўча ичидан шошилинч қадам товушлари эшитилди. Аллаким ҳаллослаб югуриб келарди. Муқаддам шошилиб, қўксини яширди. ўғлини бағрига маҳкамроқ босиб, ўрнидан турди.

– Муқад!

Муқаддам зулмат ичидан чиқиб келаётган аёлни дафъатан таний олмади. Кейин тикилиб турди-ю, қичкириб юборди:

– Лобар!

Лобар югуриб келиб, уни қучоқлаб олди. У ҳарсиллар, тез чопганидан ранги ўчиб кетган эди.

– Жинни! – деди у Муқаддамга ўқрайиб. – Эсинг борми ўзи?! Нима қилиб ўтирибсан, Анзират холамни ўлдирмоқчимисан? – У Шавкатни кўтариб олмоқчи эди. Муқаддам бермади.

– Қўявер ўзим... – Муқаддам унинг келинлик латофати барқ уриб турган чехрасига, атир хиди гуркираётган атлас либосига қараб туриб, лоқайд сўради:

– Қачон келдинг?

– Вуй, одамнинг ўтакасини ёриб юборай дединг! – Лобар нафасини ростлаб жилмайди. – Ойим касалликларини эшитиб келган эдим... Узоқ йўл, энди келиб тургандим, холам йиғлаб чиқдилар... – У йўл бошлар экан, шамолдан юзини пана қилиб Муқаддамга қараб қўйди. – Жинни бўлиб қолдингми?

Муқаддам сирдош дугонасининг худди шу пайтда учраганидан кўнглида бир иликлик уйғониб, унга эргашди. Лобарнинг шамолда хилпираётган этакларига, шошилиб қадам босишига қараб бораракан, дафъатан хаёлига қизиқ бир фикр келди. Бу хаёл умид чироғи сингари олдинга этаклагандай бўлиб кетди.

– Лобар, қишлоғингларда менга иш борми? – деди шошилиб.

Лобар таққа тўхтаб, бурилиб қаради. Яна юзини кафти билан шамолдан пана қилиб, узоқ қараб қолди.

– Нима, кетмоқчимисан? – деди ишонкирамай.

– Иш бўлса, бораман! – Муқаддам Шавкатни ўнглаб кўтариб, ўжар, қатъий оҳангда яна такрорлади: – Бутунлай кетаман!

Лобар унинг аниқ айтаётганини тушуниб, тағин бир нафас туриб қолди.

– Иш топилади, – деди ўйланиб. У дугонасининг ўз ёнида бўлишидан қувона бошлаган эди. – Ростдан қайтиб келмайсанми?

– Бутунлай кетаман! – Муқаддамнинг ўзи олдинга ўтиб, юриб кетди.

Зум ўтмай улар кўча ичига киришди. Икки жуфт пошна садоси шамол қанотида узоқ қарсиллаб турди.

Муқаддам бу кўчаларда ўзининг қадам товушлари энди янграмаслигини биларди.

\* \* \*

Каттакон зал ҳам, балконлар ҳам томошабинлар билан лиқ тўлган. Чекка-чеккадаги эшиклар устида ёниб турган қизғиши, ўйчан нур остида одамларнинг чехраси шодон, ҳаяжонли кўринади.

Алимардон торини қўтариб олганча, сахна чеккасига суриб қўйилган зангори баҳмал парда орқасидан залга тикилиб турар, ижирғанар эди. Кунгурадор шифтлар остида Мутал Қодировнинг майин, дилқаш овози оҳиста парвоз этар, одамлар уни ҳаяжондан энтикиб тинглашарди. Алимардоннинг назарида юзларча одамлар шу топда бир оҳангдан тебраниб, бир оҳанг оғушида тўлғанаётгандек эди. Баҳор сувларининг жарангдор кулгуси ҳам, илиқ қуёшнинг эрка нурлари ҳам, юрак тўлқинлари ҳам – ҳамма-ҳаммаси шу оҳангда мужассам эди.

Залда даҳшатли қарсак кўтарилиди-ю, Алимардоннинг юраги зириллаб кетди. У биринчи қаторда ўтирганларга вахима билан қараб кўйди. Одамлар бараварига қарсак чалишар, Алимардоннинг рақибини олқишлишарди.

Алимардон Муталнинг залга қараб енгил таъзим қилиб кўйганини кўриб турди. У томошабинларга яна бир марта ташаккур билдириди-да, саҳна четига чиқди. Конферансъе қиз тез-тез юриб микрофон олдига борганида, қарсаклар яна кучайиб кетди. Аммо қиз хеч кимга парво қилмай, баланд овоз билан қичқирди:

– Навбат таниқли, севимли хонандамиз Алимардон Тўраевга!

Алимардон торини қўлга олиб, чехрасига таниш та-бассумни қалкитди-да, саҳнага чиқа бошлади. Аммо қарсак илгариgidан ҳам кучайиб кетди. Аввалига у одамлар мени олқишилаётиди, деб қувонди. Лекин микрофон олдига келганидан кейин чапак товушлари бир меъёрда гурс-гурс урилаётганини кўрди-ю, бир нафас қотиб қолди. Одамлар норозилик билан қарсак чалишар, залнинг чекка-чеккаларидан хуштак овозлари эшитилиб қоларди. Нима гап? Одамлар уни хайдашяптими? Муталнинг ўзини талаб қилишяптими?

У вахима ичида бир залга, бир бўзрайиб қолган конферансъега жавдираб қарай бошлади, аламдан лаблари титради. Шунда ҳам ўзини-ўзи мажбур қилиб, қайта жилмайди. Томошабинларга қараб таъзим қилди-ю, торини кўтарди. Зал устида торнинг аламли садолари жаранглай кетди. Жаранглади-ю, шу ондаёқ гумбурлаган чапак товушлари остида кўмилиб қолди. Одамлар ҳайдашар эди уни!

Алимардон бирдан чалишдан тўхтади. Ситам тўла кўзлари билан залга тикилиб қолди.

«Бу қандоқ шармандали! Бу қандоқ шармандали!»

Бир вақтлар момақалдироқдек гумбурлаб, одамларнинг юрагини ларзага солган, чақмоқдек чақнаб, киши-

ларнинг қўзини қамаштирган Алимардон Тўраевнинг кисмати шу бўлдими? Саҳна гулшанида қаноти капалакдек товланган Алимардоннинг умри шунчалар киска бўлдими?!

Ҳар сафар қийқириб олқишилаган томошабинлар кани? Балки ўшанда энг қаттиқ қарсак чалиб олқишилаган одамлар ҳозир ҳам энг қаттиқ қарсак чалиб уни ҳайдашаётгандир?! Наҳотки, Зуфар Ходиевичнинг гаплари тўғри чиқкан бўлса!

У залга – ўзининг энг ширин, энг баҳтиёр дамларини бағрига яширган қадрдан залга, ночор термулиб турган тилсиз деворларга, мунис қандилларга охирги марта қаради-да, бирдан кўзларига ёш қуюлиб келди.

Турган ерида шартта бурилди-ю, чопганча саҳна четига чиқди. Ундан йўлакка ўтди-да, торини тўшалган пойандозга улоқтирганча, югуриб кетди.

Театр этагидаги боқقا киргандагина ўзига келди. Чор атрофда баҳор яшнар, табиат ўзининг мангуну, бузилмас қонунига амал қилиб, кўкламни етаклаб келган эди. Боф устида оромбаҳш шабада эсад, ҳавода кўкатлар иси анқир, кўклам шамоли майин япроқларни силкитар, ёмғир сувини эмиб тўйган ер эмин-эркин нафас оларди.

Ҳа, ер юзида қайта туғилиш, қайта гуллаш, қайта ҳаёт бошланган эди. Ёлғиз унинг – Алимардон Тўраевнинг баҳори ўтган эди.

Одам ўзи баҳтиёр пайтида ўзгаларнинг баҳтсизлигини тушуна олмас экан. Муқаддам уйидан қон-қақшаб чиқиб кетаётганида Алимардон унинг муштипарлигини тушунмаган экан. Мана, бугун ўзи баҳтсизлик нима эканини пайқаганида бирданига тушунди. Ҳаммасини тушунди. Шу топда олдида бирон-бир юпанчи, бирон-бир суюнчиғи қолмаганини ўйлади. Ўйлади-ю, бутун вужуди билан мункиб кетди. Шу топда ўғлини, ўзининг ягона юпанчиғини бағрига босиб-босиб эркалатгиси,

ўзи ҳам кимгадир эркалангиси, дардлашгиси келиб кетди!

Начора? Ҳаёт ниманики тақдим этган бўлса, ўшандан ортифини қайтиб олмайди.

«Аҳмоклар! – деб ўйлади у ўзини саҳнадан қувиб чиқарган одамларни ўйлаб. – Молфаҳмлар! Шулар санъаткорнинг дардини билармиди? Санъат нималигини тушинармиди?»

У бошини қуии солганча секин-секин юриб борар, аламдан тишларини ғижирлатарди. У одамлардан нафраташланар, куни кеча бир нафаслик ором учун чаккасига пул кистириб, бугун ўзини саҳнадан ҳайдаган енгил-елпи томошибинларни кўрарди-ю, чинакам санъатни қалбининг тўрида сақлашга қодир чинакам шинавандалар озмунча эмаслигини билмас, билишни хоҳламас эди.

У баҳор қувончига тўлган кўчалардан соядай судралиб борар, аммо ҳаёт ўзининг кичкинагина бир зааррасининг фожиасига парво қилас, яшаш гашти билан, туғилиш завқи билан маст эди.

\* \* \*

Алимардон катта йўлдан бурилиб, тор кўчага кирдида, ўн қадамча юриб тўхтаб қолди. Деворлар оша эгилиб ётган ўрик шохиданан қотирган довуччалар маржондек тизилган, оқариб қолган гилослар устида чумчуқлар парвона бўларди. Куёш эндингина кўз очган, кечаси ёғиб ўтган жаланинг тароватли нафаси ҳали кетмаган, ас-фалт кўчанинг у ер-бу ерида сув ҳалқоб бўлиб ётарди. Ҳаммаёқ жим, ўткинчилар сийрак. Фақат кўча ичкарисида – ягона симёғоч тагидаги сайҳонликда икки қизалоқ копток ўйнайди. Уларнинг бири, калта қизил кўйлак кийган қиз томоша қилиб турар, иккинчиси, жажжи духоба нимча кийиб, сочига баргак тақиб олгани коптокни ерга

уриб, гир-гир айланарди. Копток тўп-тўп этиб ерга урилади, ҳар айланганида қизалоқнинг баргаклари ёйилиб ёйилиб кетади. Қизил кўйлакли қиз ўртогининг айланишига ҳавас билан қараб, бир оҳангда санайди:

– Ўн етти, ўн саккиз, ўн тўққиз...

Алимардон уларга қараб, жилмайиб кўйди. Ҳаёт ўз йўлидан борар, баҳор болаларга ўз қувончи, ўз шодликларини сахийлик билан тақдим этган эди.

Алимардон қизалоқларнинг олдидан секин-секин юриб ўтиб кетди. Қизчалар парво қилишмади унга. У яна йигирма қадамча юриб, болохонали уй ёнбошидаги кўкиш эшикни кўриб тўхтади. Юрагининг бир бурчидаги шунчаликни йиллардан бери мудраб ётган аллақандай пок, аммо азобли туйғулар бирдан туғён урди-ю, нафаси тикилиб қолди. Бир вақтлари – бундан уч йил бурун у ўзининг дўстлари билан, ёшлик завқига тўлган йигитлар билан мана шу ердан бир кўча бўлиб ўтиб, кўкиш эшикдан кириб борган эди. Уни кучоқ очиб, фарзандим, деб кутиб олишган эди. Энди-чи...

У кўлга тушиб қолишдан чўчигандек оёқ учida юриб яқин борди. Эшик қия очик турарди. У бошини бир томонга эгиб мўралади. Ҳовли ўртасидаги водопровод жўмрагидан, сув шариллаб окиб ётар, цемент ховузча тўлиб чиқиб, ариқча четидаги барқ уриб ётган ўスマларга тошиб кетганди.

Унинг кўз ўнги коронгилашиб, энтикиб кетди. Ҳамма нарсанинг қадри йўқолганидан кейин билинаркан. Шу топдагина, у Муқаддамни севганини, қаттиқ севганини тушунди. Тушунди-ю, енгил титраётган кўллари билан эшик занжирини қоқди.

Ичкаридан аёл кишининг «ху-ув» деган товуши эшиктилди. Айвоннинг ойнабанд эшиги тарақлаб очилди-да, қайноаси кўринди. У йўлакда турган одамни кўрмади шекилли, кафтини қуёшдан пана қилиб тикилди. Али-

мардон унинг қўллари хамир юқи эканини кўрди. Кампирнинг эгик гавдаси тагин ҳам кичрайган, мункиллаб қолган эди. Алимардон Муқаддамга уйланганидан кейин бу ҳовлига кам келган, қайноасини ҳам, қайнотасини ҳам кам кўрган, улар уйига боришганида рўйхуш бермас эди. Ҳозир у кампирни ғам-ғусса адо қилганини пайқади.

– Келаверинг, – деди кампир паст, ожиз товуш билан.

Алимардон кирмади, киролмади. Муқаддам хайдаб юборганидан бери бу уйга қадам босишига ҳаққи йўқлигини биларди.

Кампир жавоб бўлмаганидан ҳайрон қолди шекилли, зиналардан авайлаб қадам босиб ҳовлига тушди. Сув тошиб ётган ўсмаларни четлаб ўтиб, йўлак ёнига кела туриб, такқа тўхтаб қолди.

– Келинг, – деди у беихтиёр. Кейин бирдан ранги ўчди. Хира кўзлари ярқ этиб очилиб кетди. Бегона, қора ниятли одам олдида тургандай дока рўмолининг учи билан юзининг ярмини яширди. – Нега келдингиз? – деди овози титраб. – Нима керак сизга?

Алимардон шу бир оғиз сўздан – тубсиз алам, бир олам нафрат оҳангиданоқ ҳаммаси тамом бўлганини тушунди.

– Мен... – Алимардон қайноасининг кўзларига қарай олмай, тескари ўгирилди. – Ўглим қани? – деди юрагидағи гапни айтиб.

Айвон эшиги яна шарақлади. «Муқаддам». Алимардон юрагини титратиб юборган ҳаяжон ичida ярқ этиб ўша томонга қаради. Зинадан баланд гавдасини ғоз тутиб қайнотаси тушиб келарди. У ҳамон ўзгармаган эди. Ўsic қошлари остидан тикилиб қаради-ю, узоқдан Алимардонни таниди.

Алимардоннинг назарида унинг кўзлари ғазабдан чақнаб кетгандек бўлди. У, Кори ҳозир хайдаб солишини

ҳис этиб туарар, энди битта умиди қолган эди. Алимардон ўғлини кўргиси келар, унинг овозини, лоақал йигисини эшитиб қолишни орзу қиласарди.

Қори катта-катта қадамлар билан юриб келиб, Алимардонга рўпара бўлди. У қисқа-қисқа нафас олар, кулранг якtagи тагидаги сертук кўкраги тез-тез кўтарилиб тушар, соқоли асабий титрар, бурун парраклари қисилиб кетганди. У Алимардона, мана шу нобакорга арзигулик бир оғиз сўз топа олмагандай, анчагача тикилиб қолди.

– Нега келдингиз? – деди у нихоят тилга кириб.

Алимардон юрагини тўлдирган туйгуларни босиб олиб, совуккина:

– Муқад... – деган эди, Қори унинг гапини кесди:

– Муқадда нима ишингиз бор?

Алимардон ҳаммаси тамом бўлганини янада чуқуррок ҳис этди. Гапни айлантириб ўтиришдан фойда йўклигини билиб, кўнглидаги бор гапни айтди:

– Ўғлим қани?

– Ўғлингиз... – Қори лаблари титраб қайтарди: – Ўғлингиз йўқ... Муқад ҳам йўқ.

Алимардоннинг кўнглидаги изтироб ўрнини ғазаб эгаллади.

– Шавкат қани? Олиб кетаман!

– Шавкат йўқ! – Қори чертиб-чертиб таъкидлади. – Шавкатни онаси олиб кетган.

«Қаёққа?» – Алимардоннинг хаёлига шу фикр урилди-ю, аммо сўраб ўтирмади.

– Ҳаққингиз йўқ, – деди бўғилиб. – Мен отаман.

– Бола туғдиришни билганларнинг ҳаммаси ота бўлавермайди!

Пастак эшик унинг юзи олдида қарсиллаб ёпилди. Занжир шиқирлади.

Алимардон ғазаб ўтида ловиллаб бир нафас турди-да, шартта бурилиб кетди.

У ҳеч нимани кўрмас, кўз ўнгини оёғини «велосипед» қилиб қийкираётган ўғли тўсиб олган, бошини куйи солиб борар, нарироқда эса қизалоқлар ҳамон чирчира ўйнашарди.

\* \* \*

Гоҳо зарурат бўлиб, эски лаш-лушлар билан тўлиб кетган хужрачани титкилаб қолсангиз, занглаb ётган пичноқчангизми, жияги титилиб кетган дўппингизми то-пилиб қолади. Шунда аллақачон йилларнинг гарди бо-сиб, тусини йўқотган хотиралар тўсатдан ярқ этади-ю, тагин аллангаланиб кетади, юрагингизни ўт бўлиб ёнди-риб юборади. Бир вақтлар ўша пичноқчада толдан хуштак ясаганингиз, ўша дўппига қаттиқ нон солиб, ариқ бўйида оқизоқ қилиб еганларингиз ёдингизга тушади. Кечмиш йилларингиз, тонгдай мусаффо йилларингиз ҳозирги ку-нингизга қараганда анча беғубор, анча пок бўлганини аянчли бир ҳақиқатдай тан олишга мажбур бўласиз.

Алимардон Анварнинг янги маҳалладаги шаҳар ҳовлисига кириб келганида худди шундай ахволда эди. У бу ерга боши оғиб келиб қолди, аммо бари бир Анварнинг олдида бош эгишга мажбур бўлишини ўйлаб, ич-ичидан эзила бошлади.

Алимардон олди очиқ айвон тўрида – гулдор кўрпача устида ўтирганча, атрофни соғинч билан томша килар, бу ердаги ҳамма нарса унинг болалигини эслатар эди. Токчалардаги ялтироқ баркашлар ҳам, айвоннинг йўғон-йўғон, хийла сарғайиб қолган тўсинлари ҳам кўнглига яқин, кадрдон эди.

Бир вақтлар қиши кечаларида Алимардон далада зерикаб кетар, таътилда шу ерга келарди. Анвар билан кечгача уриниб, ҳовли ўртасида корбобо ясашар, кечалари худди шу айвон олдига чодир ташлаб қўйилар, улар танчага

оёқ узатиб, алламаҳалгача туршак чайнаб ўтиришарди. Тонг сахарда уйғониб, ҳовондаги сопол товоқларни олишар, музлаган қаймокқа шоша-пиша қора нон бўктириб ейишарди.

У ўша дамларни эслаб, мийифида кулиб қўйди. Ҳозир ҳам деярли ҳеч нима ўзгармаган. Ўша айвон, ўша кафтдай ҳовли. Ўртадаги бир туп тут оқариб қолибди. Қарши томондаги болохонада Иқбол холанинг саришта қўллари билан ипга тизилган маржон-маржон гармдорилар осилиб турибди. Фақат болохона тагидаги уй ўзгарибди. Оқланибди, янги эшик ўрнатилибди, сирланган деразаларда келинлик нишони бўлган нафис дарпардалар...

Ошхонада Иқбол хола кўринди. У Алимардон кўнишиб колган майда, чакқон одимлар билан келиб, лип этиб айвонга чиқди. Нон, қанд-курс солингган патнисни Алимардоннинг олдига, хонтахта устига қўйди.

– Келганингиз қандок ярашиб турибди, – деди чўккалаb ўтириб нон ушатаркан. – Сантал раҳматлик шундок бўлиб кетганингизни кўрганида юраккинаси қоқ ушалмасмиди. Яратгандан ҳам айланай. Бандасини доим бир томондан қисиб қўяди-да! – У чой қўйиб узатди. – Олинг, айланай, бегоналарга ўхшаб ўтирманг.

Алимардон чойни оларкан, зимдан унга қараб қўйди.

«Анвар ўртамиизда бўлиб ўтган гапларни айтганми, йўқми? – у Иқбол холанинг чехрасида ҳеч кандай ўзгариш йўқлигини илғаб, тинчиди. – Айтмаган...» – Иқбол хола деярли ўзгармаган эди. Ҳамон ўша меҳрибонлик, қоп-қора юзларида илиқлик. Фақат соchlарининг оқи кўпайибди.

Алимардон кўпдан бери ерда – кўрпачада ўтирмагани учун оёқлари увиша бошлади. Кўзлари билан стул кидиаркан, бирдан ўзининг ўзгариб кетганини, қандайдир бошқа одам бўлиб қолганини ўйлади.

– Анвар келиб қолармикан?

– Келади, ўргилай, ҳали-замон келиб қолади. – Иқбол хола овозини пасайтириди. – Келиннинг ойи – шу ой. Болам бояқиши хавотир олади-да. Ишдан чиқса солиб, уйга югуради. Ўзиям бу уйда чақалоқ овози чиқмаганига иккам ўттиз йил бўляпти.

«Дарров болалик ҳам бўлишаётган экан-да!» – У яна ўзининг Шавкатини, унинг қийқириб кулишларини эслади-ю, юраги санчиб кетди. «Ҳозир йўлга киргандир»

Иқбол хола унинг чехрасидаги алам кўланкасини илғамади.

– Келин дўхтирга қатнаяпти. Эсон-омон кутулсин, кўп яхши чиқди-да, болам бояқиши... Сиз бемалол ўтириб туринг, қоқиндиқ! – Иқбол хола яна ўша илдамлик билан ўрнидан туриб, ҳовлига тушди.

Кунботар олдидан ҳаво қизиб кетган, дим эди. Чоратрофдаги тунука томлардан чиқсан ҳарорат ҳовли ичига қамалиб қолгандай туюлар, тутнинг қилт этган шабадага зор япроқлари ғамгин шалпайиб турарди.

Ҳовли юзида яна Иқбол хола кўринди. У кўйлагининг этагини липпасига қистириб олганча, пакирлаб сув сепа бошлади. Қизиган тупроқнинг майин иси гуркиради. Бир ҳовуч сув айвоннинг пишиқ ғиштдан урилган пойдеворига сачради-да, шимилиб кетди.

Алимардон секин ўрнидан турди. Увушиб қолган оёқларини ёзиб, керишди. Унинг кетгиси келарди...

Алимардон Анварни қадам товушиданоқ таниди. Чехрасига қалқиб чиқсан аламли ифодани яширишга уриниб, бурилиб қаради.

Анвар айвон олдидаги ғиштин йўлакнинг ўртасида такқа тўхтади. Унинг чехрасида хайрат ифодаси қотиб қолган, чамаси, Алимардоннинг келишини ҳеч кутмаган эди.

«Ол, қасдингни олмайсанми?!» – пичирлади Алимардон ундан кўз узмай тураркан. Шу топда у Анвар-

нинг тўлишиб, улуғвор бўлиб қолганини пайқади. У бошқаларнинг, айниқса, шу йигитнинг ўзидан устунроқ бўлишига чидаб туролмас эди.

– Кетайми? – деди у лабларини заҳарли қимтиб.

Анвар худди шу гапни кутиб тургандай яқин келди. Пастдан туриб қўл чўзди.

Алимардон унинг қўлини парвосизгина қисаркан, яна кинояли бир хаёл кўнглига шарпа солиб ўтди:

«Ўзбекчилик қиляпти. Бўлмаса аллақачон ҳайдаб юборарди».

– Ўтири, – деди ниҳоят Анвар кўрпачага имо қилиб.

Икковлари ёнма-ён ўтиришди.

– Қачон келдинг?

«Тулкилик қилма!» – деб ўйлади Алимардон унга бурилиб қараб. Аммо Анварнинг хотиржам кўзларига кўзи тўқнашди-ю, бепарво жавоб берди:

– Ҳозир... Кетмоқчи бўлиб тургандим.

Анвар анчагача индамай ўтирди. У айвоннинг йўғон устунига тикилиб турар, чамаси, муҳим бир нарсани айтгиси келар, аммо керакли сўзларни топиб ололмасди. Ниҳоят, ҳовли томонга шошилинч қараб олди-да, Алимардоннинг кўзларига қараб сўради:

– Муқаддамда нима қасдинг бор эди?

Алимардон ич-ичидан сесканди. Истехゾ билан кулиб, кўзларини олиб қочди.

– Хурсандмисан?..

Анварнинг кўзлари чақнаб кетди. Ранги қув ўчиб, лабини тишлади. Ўша тўйга айтиб борган куни Муқаддамнинг оғироёқ эканини кўрганида сўна бошлаган ўт, Эътибор оғироёқ бўлганидан бери бутунлай сўнган эди.

– Ҳалиям одам бўлмабсан!.. – деди у овози титраб. – Боланг бор, ахир...

У Алимардоннинг энг нозик ярасига тегиб кетди. Алимардон бу ерга ҳам фақат мана шунинг учун – боласи

туфайли келган эди. У Анвардан енгила бошлаганини ҳис этиб, лов этиб ёнди.

– Жигимга тегма! – деди тишлари қисирлаб.

Анвар унинг аҳволини тушунди. Анчагача ўйланиб ўтириди-да, шу топда айтиш керак бўлган энг зарур гапни топди:

– Юр, Муқаддамларникига борамиз... – У бир лаҳза ўйланиб давом этди: – Ёйимлар борсинларми?

Алимардон бу ерга худди шунинг учун келган эди. У юрагининг бир бурчида, энг ашаддий душмани бўлса ҳам мана шу Анвар ёрдам бериши мумкинлигини биларди. Шунда ҳам ўзидан паст деб юрган кишисига бўйин эгги-си келмади.

– Кераги йўқ!

Анвар унинг сидқидилдан гапирмаётганини тушунди шекилли, яна қистади:

– Кеч бўлиб кетяпти, тур...

Улар Иқбол холанинг тайёр ошини ташлаб, чикиб кетишиди...

Тор кўчалар чанг-тўзон, болалар қий-чув солиб мактабдан қайтишарди.

Алимардон руль чамбарагидан ушлаганча кўча бошида турар, Анвар кириб кетган кўкиш эшикка қараб-қараб кўяр, кетма-кет сигарет тутатарди. У ҳаммадан ҳам Муқаддамни кўрганида ўзини йўқотиб кўйишидан ваҳимага тушар, совуқ гаплашиб, унинг ўзини айбордor килиб кўйиш, ялинтириш кераклигини ўйлар эди.

Оқшом қуюқлашиб кетди. Кун бўйи ўз ташвиши билан елиб-югурган шаҳар устига туннинг қора қуши келиб кўнди. Одамлар бир оз тинчib колишиди. Осмонда якка-ёлғиз шошқалоқ юлдузлар ёнди. Деразаларда чироклар парпиради. Телевизорли уйлар дарчасидан кўкиш нур ёғила бошлади. Кўл четидаги боғда сурнай садолари янграб кетди. Шабада аллақаердан ёзлик кинотеатр

карнайининг овозини олиб келди. Ҳар ким қўнгли тусаганча дам ола бошлаган эди.

Факат битта ховлида – Анвар кириб кетган уйда тошдай сукунат қотган, тиқ этган товуш эшитилмас, гўё Анвар ховлига киргану аллаким қазиб қўйган тубсиз чукурликка тушиб йўқолгандай эди.

Алимардон гижиниб, машинадан тушди. Энди олдинга бир қадам босган эди, эшик занжирнинг шиқирлагани эшитилди. У бирор келиб ёқасидан оладигандай, шошилиб машинага кирди. Эшикни тарақлатиб ёпиб олди.

Узокдан Анварнинг оқ қўйлаги кўринди. У ёлғиз ўзи келар, хеч қаёққа қарамай, елкасидан оғир юқ босган одамдай оғир-оғир қадам босарди.

«Йўқ дебди!» – Алимардон юzlари ўт бўлиб ёниб кетганини сезди-ю, газабдан томири тортишаётган қўллари билан моторни юргизди.

Анварунинг ёнига оғир чўқди-да, индамай ўтираверди. Алимардон нимқоронгиликда унинг ранги ўчиб кетганини, кўзларида тубсиз бир ғусса борлигини сезди.

Машина бир сапчиб елиб кетди.

– Хўш? – Алимардон овози хириллаб сўради. – Нима деди?

Анвар яна узоқ жим кетди. У ўзини босиб олишга уринаётганини Алимардон билиб турарди.

Ҳозиргина сув сепиб ўтилган катта кўчага чиқиб олишгандан кейин Анвар унга қараб қўйди.

– Тўхтат машинангни! – деди овози хириллаб.

Алимардон тормозни таққа босди.

Анвар пешанаси билан олд томондаги ойнага урилиб кетай деди. Унинг кўзлари қоронгига чараклар, важохати хунук эди.

– Мұқаддам қишлоққа кетиби, – деди овози қалтираб. – Бутунлай кетиби – У боядан бери бўғзига тиқилиб турган гапни энди айтди: – Сенинг шунчалик

ҳаромлигингни билганимда бу ерга келмасдим! Ҳайф сенга оталик!

Алимардоннинг қалбидаги энг нозик тор узилиб кетди. У фақат мана шу гапдан, бирор ўғлини эслатишидан даҳшатга тушарди. Фазаб ичидан Анварни ёқасидан олмоқчи бўлди-ю, кечикди. Анвар аллақачон ерга сақраб тушган, эшикни силтаб юборган эди. Эшик тутқичи Алимардоннинг қўлига қарсилаб урилди. Зум ўтмай Анварнинг оқ кўйлаги зулмат ичига шўнгиди.

– Шунаками? – Алимардон алам билан пичирлаб газни босди. – Шунаками ҳали! – У шиддат билан машинасини елдириб кетди. – Ҳаромликни мендан кўрсин! Қишлоққа кетиш мана бунақа бўлади! Бутунлай кетиш мана бунақа бўлади!

У кучи борича газни босар, машина кутуриб кетгандай у ёқ-бу ёққа силкиниб, гавжум кўчалардан учеб борар, сийрак ўткинчилар кўрқув ичидан ўзини четга олишарди.

\* \* \*

Мудҳиш бир туманлик ичидан адашган икки йил ўтди. Алимардон қанча май ичганининг, қанча аёллар билан улфатчилик қилганининг ҳисобига етмади. Бир кўнгли Кларага уйлангиси келди-ю, айниди. Энди у телевизорда кам кўринар, концертларда онда-сонда чиқиб қолар, одамлар ўзини олқишиламаётганини кўриб, жини қуришар, лекин одамлар ҳам энди унга зор эмас эди!

Энди у ягона бир нарсанинг – пулнинг ҳисобини биларди. Пул учун дунёнинг нариги чеккасига борищдан ҳам тоймас, тўйларда тонготар ашула айтиб, хириллаб қоларди.

Хушёр пайтларда у ўзининг ахволини ўйлаб кўрар, назарида даҳшатли туш кўраётганга ўхшаб кетар эди.

Гоҳо у уйғониб кетишни жуда-жуда хоҳлар, пулдан ҳам, қарсаклардан ҳам, мастана ўтиришлардан ҳам – ҳамма-хаммасидан воз кечиб, ўтмишга – покиза ўтмишига, ўз баҳорига қайтишни орзу қилар, аммо қайтиш йўлини тополмас, яна май билан таскин берарди ўзига.

Бу орада Зуфар Ходиевич пенсияга чиқиб кетди. Театрдагилар уни алланечук меҳр билан кузатдилар. Шунда Алимардон ҳам бу одамни яхши кўришини биринчи марта хис қилди...

Ора-чора Анвар келиб турарди. Алимардон аввалига рўйхуш бермай юрди-ю, кейин кўникиб кетди. Улар ўтмишлари ҳакида, болалик хотиралари тўгрисида узоқ-узоқ гаплашиб ўтиришарди. Анвар гоҳи-гоҳида чопқиллаб юрадиган бўлиб қолган қизчасини кўтариб келарди. Шундай пайтларда Алимардоннинг кўз ўнгига каратотчасида қийқириб ётган Шавкат пайдо бўлар, азобли соғинч туйғусидан титраб кетар эди. Анвар ҳар гал бир нарсани қистар, «Муқаддам билан ярашгин», деб тайинлар эди. Алимардон ҳам ҳар гал бир хил жавоб берарди: «Керак бўлса ўзи келсин!» – Шундоқ дерди-ю, кечмиш кунларини кўмсаб, дили ўрганаётганини билиб қоларди.

Шундай кунлардан бирида Алимардон эсини таниганидан буён биринчи марта ўзга кишидан енгилди. У йўлида учраган ҳар қанақа ғовни босиб-янчиб ўтишга, доимо голиб чиқишга ўрганган эди. Шу куни енгилди. Ўзи «сўтак бола» деб юрган Мутал Қодировдан енгилди!

Эрта билан вокзалга келди. Йўқ, унинг кутадиган ҳам, кузатадиган ҳам одами йўқ эди. Шунчаки, боши айланиб келиб қолди. Вокзал биноси олдидаги қаҳвахонага кирди-да, дераза ёнида турган стол қаршисида ўтирганча одамларни кузата бошлади.

Ҳаво тунд, салқин эди. Майдондаги гулзорда дакана танғиган хотинлар чўнқайиб ўтиришар, чамаси, хонаки гунафша экишарди. Энг сўнгги қор эриб кетган, асфальт

майдон қуриб қолган, автобус бекатида одамлар гавжум эди.

Майдончадаги скамейкалар тўлиб кетган. Бирор чамадонга ёнбошлаб мудрар, бирор папирос тутатиб, хаёл суринг ўтирас, бошқалар дўкондан китоб танлар эди. Ана, кизил жемпер кийган бир хотин кўксини рўмоли билан яшириб бола эмизиб ўтирибди. Унинг ёнидаги семиз киши бепарво газета ўқиди. Ойнабанд эшик олдига турган йигит кўкиш ёмғирпўш кийган киз билан оҳиста суҳбатлашади. Киз шодон кулиб қўяди. Чамадон кўтарган, қоп орқалаган одамлар зир югуришади. Бетоқат бақириб-чақиришади. Кўк шапка кийган темир йўл хизматчилари чамадон юклangan аравачаларини ғизиллатиб ўтиб қолишади...

Алимардон уларни кузата-кузата кулиб кўйди. Ажаб, қаёққа шошилади бу одамлар? Мунча зир югурмаса булар! Каёқа талпинади? Бари бир борар манзили битта-ку!

Навбатчи аллақайси поезд келганини эълон қилди. Одамлар тағин ҳам чаққонроқ бўлиб қолишди. Кепкасими бостириб кийиб олган бир йигит каттакон гулдастани силкитганча перрон томонга чопиб кетди. Хотининими, севгилисиними кутиб олаётган бўлса керак.

Алимардон кимdir ўзини чақирганини анчадан кеин эшитди. Бурилиб қаради-ю, қаршисида хиёл эгилиб турган Мутал Қодировни кўрди. Мутал спортчилардек таранг, кулранг жемпер кийиб олган, шунинг учун бўлса керак, гавдаси янайм ихчамроқ кўринарди.

У салом берди-да, Алимардоннинг қаршисига ўтирди.

– Намангандаги, қишлоққа борган эдим. Поезддан ҳозир тушдим, – деди Мутал ингичка бармоқлари билан жингалак соchlарини тараб. Кейин узр оҳангига давом этди: – Қарасам, сиз ўтирган экансиз...

Алимардон гижиниб, юзини ўғирди. У бу йигитни ёмон кўришини яшириб ўтирмас, театрдами, кўчадами

дуч келиб қолса тескари қараб ўтиб кетарди. Алимардон бир кун эмас бир кун томошабинлар уни ҳам қўғирчоқни ўйнаб-ўйнаб, зериккандан кейин улоқтириб юборган боладек унутишларини кутар, аммо ниятига етолмас эди. Мутал унинг кўз ўнгидагу кун сайин ўсиб борар, ҳеч қачон бошқалардан олдинга ўтиб олишга уринмас, шунинг учун бўлса керак, энг олдинда яраклаб кўриниб турарди.

– Бирровни кутяпсизми?

Алимардон унинг гаплашгиси келиб турганини пайқаб яна ижирғанди.

– Ҳа, сизни кутиб ўтиргандим! – У Муталнинг ҳамон болаларча содда нур аримаган кўзларига тикилиб туриб, аччиқ қулди. – Менга бир насиҳат қилиб қўймайсизми? Театрдан гапиринг! Станиславскийдан лекция ўқинг!

Мутал унга ўйчан қараб қўйди-ю, индамади. Анчагача икковларидан садо чиқмади. Алимардон қўли билан дераза томонга имо қилиб, яна қулди.

– Одамларни томоша қиласпман. Улар сизни ҳар куни томоша қилади. Сиз ҳам бир томоша қилинг, ахир. Одамларни яхши кўрасиз-ку! – У Муталнинг кўзларига тикандек қадалиб сўради: – Яхши кўрасизми, ахир?

Мутал бошини оҳиста силкиди.

– Ана, баракалла! – Алимардон хузур қилиб қулди. – Шулар орасида бугун сизга гулдаста тутиб, эртага унутиб юборадиганлар, бебурдлар борлигини биласизми?

Мутал бошини куйи солғанча кафти билан стол устидаги нон ушоқларини бир чеккага йигиштира бошлади. Узок ўйлаб турди-да, бир карорга келгандек, ишонч билан бош кўтарди.

– Биламан. Лекин шулар орасида минг йиллардан буён «Муножот»ни, «Чўли ироқ»ни чалиб келаётган, Навоийнинг ғазалларини боласига ўргатиб келаётган одамлар кўп-ку! Ахир, ўзингиз халқ қўшикларини яхши кўрасиз-ку! Шунаقا ашулаларни қайта-қайта айтгансиз-ку!

Алимардон у билан ҳеч қачон шунаقا дангал гаплашмаган эди. «Тилинг бурро-ку» – деб ўйлади ҳамон эрмак қилиб жилмайиб тураркан. Кейин парво қилмагандек қўл сильтади. Шоша-пиша вокзал биносига ёпирилиб кираётган одамларга имо қилди.

– Мана шуларнинг ичидаги бултурги олмани уч баҳосига пуллаш, худди ўзига ўхшаган одамларни лақиллатиш учун йўлга чиқсанлар йўқми? Эрининг қўйинини пуч ёнғоққа тўлдириб, бегона эркакнинг сочини искаш учун курортга кетаётган хотинлар йўқми? Нечтасини топиб берай?

Мутал бу сафар ҳам унга хотиржам қараб қўйди.

– Бор...

Алимардон мамнун қиёфада столни шатиллатиб урди.

– Ҳар ким ўз ҳузурини ўйлади. Сиз ҳалққа хизмат қиляпман, ном қозоняпман, деб керилиб юрибсиз. Булар бўлса сизни саҳнага чиқариб қўйиб, юрагининг ҳовуруни босади.

Мутал секин хўрсиниб қўйди. Болаларча содда юзида армон қўланкаси пайдо бўлганини кўриб, Алимардон ичичидан кулди. «Сўтаксан ҳали, қўғирчоқсан! Пайти келиб кўзинг мoshдек очилади!»

– Қишлоғимизнинг тепасида Қодиробод деган боғ бор, – деди Мутал унинг гапини эшиитмагандек. – Кеча ўша бокқа бордим. Бир вақтлар отам адирдан юз гектар ер очиб, боғ қилган экан. Ўлганидан кейин боғни отамнинг номига қўйишган. – У деразадан майдонга ўйчан қараб қўйди. – Мардон ака, мен отамни танимайман. Факат битта сурати қолган. Денгизчиларнинг кокилли шапкасини кийиб тушган сурати.. Урушдан кейин бир одам отамнинг қандай ўлганини онамга гапириб берганини эшитиб қолганман. – У негадир ҳорғин киёфада жилмайиб қўйди. – Зерикмадингизми?

– Гапираверинг, – деди Алимардон яна эрмак қилиб. – Сиз билан кўпдан бўён гаплашмаганмиз.

Мутал унинг киноясига парвосиз қараб қўйди.

– Отам сувости кемасида хизмат қиларкан. Бир куни кирғоққа разведқага чишишибди. Немислар отам билан ўша одамни ушлаб олибди. Кейин отамнинг оёғини осмондан қилиб, қайик орқасига боғлашибди-да, сувга ташлашибди. Отам типирчилаб-типирчилаб тинчиб қолганидан кейин денгизга улоқтириб юборишибди.

Алимардон бўғзига сув тиқилиб типирчилаб-типирчилаб одамни кўз ўнгига келтирди-ю, вужуди музлаб кетди.

– Ўша пайтда, – деди Мутал ўзига-ўзи гапираётган-дек, – отам сиз айтаётган ифлос одамларни эмас, чина-кам инсонларни ўйлаган бўлса керак... Отамнинг битта хатини ҳамон асраб юраман, – деди Мутал анчадан кейин хўрсиниб. – «Дунёда одамларни яхши кўришдан каттарок баҳт йўқ», деб ёзган экан отам хатида.

Орага жимлик чўкди. Ҳали кун эрта бўлгани учун, қаҳвахонада одам сийрак, столлар бўш, атроф жимжит эди.

– Онам бошқа турмуш қурмади, – деди Мутал ўйланиб. – Аввалига бу нарсада ҳеч қандоқ сир йўқдек эди. Онам бўлганидан кейин мен учун яшасин-да, деб ўйлардим. Мана, ўзим ҳам уйландим. Болали бўлдим. Онамнинг қадрини энди била бошладим. Мени деб ҳамма нарсадан воз кечиш осон бўлмаганини энди ту-шундим.

«Нима кераги бор шу гапларнинг!» – деб ўйлади Алимардон кўнгли чўкиб. У бояги эрмак қилувчи кулгилари йўқолганини, Муталнинг гапларига илк марта жиддий эътибор бера бошлаганини ўзи сезмай қолди. Унинг кўз ўнгига онаси жонланди. Қизиқ, у ҳеч қачон онаси-ни ўйламаган экан. Ўлганидан кейин ҳам, онам мен учун яшаган эди-ку, деган гап хаёлига келмаган экан. Ахир, унинг отаси ҳам урушда ўлганди-ку! Унинг онаси ҳам, шу болам одам бўлсин, деб ярим кўнгил билан ўстирган

эди-ку. Наҳотки, мана шу бола билган гапни у тушунмаса!

– Бунака оналар кўп бўлса керак, – деди Мутал унинг хаёлини уқиб тургандек. – Билмадим, нимагадир мен шунақа деб ўйлайман.

Алимардон шу топда нимадир дейиш кераклигини билар, аммо гапиролмас эди. Узоқ вақтлардан бери, онаси вафот этганидан бери биринчи марта унинг маъюс бокишиларини аниқ тасаввур этди. Кейин негадир Шавкатни, ўзининг Шавкатини кўз ўнгига келтириди-да, тагин кўнглида аламли соғинч дарди уйғонди.

– Мен одамларни яхши кўраман, – деди Мутал. – Йўқ, отамнинг васияти туфайли эмас. Ўзим яхши кўраман. Одам боласи туғилган пайтида покиза бўлади-ку. Унинг умрбод шунақа покиза бўлиб қолиши сизга, менга, ҳаммага боғлиқ эмасми?

Алимардон алланима демоқчи бўлди. Мутал яна гапитирмади.

– Алимардон ака, мен сизнинг қўшиқларингизни ўрганиб, ҳофиз бўлганман, – деди Мутал унга маъюс бокиб.

Алимардон унинг рост гапираётганини бир қарашдаёқ пайқади. Аммо ҳеч нима демади. Чамаси, Муталга ҳам буларнинг ҳаммаси бари бир эди.

– Сизга насиҳатгўйлик қилишга ҳаққим йўқ. Ўзингиз биласиз, дунёга келгандан кейин бирон-бир мақсади бўлиши керак-да одамнинг. Сиз айтгандай томошабинларнинг қарсагини эшлиши, ном қозонишга ишқибоз эмасман. Дунёда ҳамма нарса ўткинчи. Яна эллик йилдан кейин бирор мени эслайдими, йўқми, унисини билмайман. Менга бунинг қизиғи ҳам йўқ. Мен юрагимдаги хурсандчиликни ҳам, аламимни ҳам одамларга – томошабинларга тўкиб соламан. Менинг ашула айтишдан мақсадим шу...

...Алимардон Муталнинг қачон туриб кетганини билмади.

Шу топда аламли бир муаммо унинг юрагини ўртар эди. Наҳотки, мана шу бола, куни кеча ўзининг кўшиқларини ўрганиб, саҳнага чиқкан мана шу гўдак билган нарсани Алимардон билмаса? Наҳотки, Алимардоннинг шунча меҳнатлари бесамар кетган бўлса?! Наҳотки, у дунёга келиб, дурустроқ ният билан яшамаган бўлса?

Қаҳвахонанинг ичи шовқин-сурон бўлиб кетди. Бир тўда ёш-яланглар сотувчининг атрофини ўраб олишди.

Алимардон аста ўрнидан турди-ю, оғир-оғир қадамлар билан зиналардан тушиб кетди.

\* \* \*

Алимардон тағин муаллақ туманлик ичидаги қолди. Калаванинг учини излаб кўрди-ю, тополмади, охири Муталнинг ўша кунги гаплари шунчаки валдирашдан бошқа нарса эмасдек туюла бошлади. Яна ўша сархуш кечалардан таскин излади. Аммо топмади. Тополмади.

Мана шу боши берк кўчанинг энг ичкарисида ожизгина нур йилтиллаб турар, ингичка ип бўлиб, келажакка боғланаётгандек эди... Бу нур – Шавкат эди! Кейинги йилларда у ёлғиз мана шу нур умидида яшади. Қизиқ, у ўта кувончли ёки ўта ғамгин дамларида Шавкатни эслар, қаравотчасида оёқ-кўлини силкитиб, қийқириб ётган ўғли хаёлида жонланар, ҳозир унинг катта бўлиб қолганини, бижилдок болакай бўлганини тасаввур этишга уринар, аммо ҳеч кўз ўнгига келтиролмас эди.

«Ўзи келади, – дерди у Муқаддамни ўйлаб, – бола бор, бир куни келади»

Лекин Муқаддам келмади. Бир куни унинг ўрнига Алимардонни судга чакириб, қофоз келди.

Алимардон хафа ҳам бўлмади, қувонмади ҳам. Фақат бир нарса, Шавкатни кўриш истаги уни суд эшигига етаклаб борди. У машинасини суд биносининг соясига қўйди-да, иккинчи қаватга кўтарилди. Йўлак бўйлаб бораркан, ўзининг ҳаяжонланаётганини, ранги қув ўчиб кетганини сезди. Юраги гурсиллаб урганча атрофга аланглаб, Муқаддамни, тўғрироғи, Шавкатни излай бошлиди. Йўлак бўм-бўш эди.

У тўғридаги эшикни очди-ю, энг аввал Муқаддамни кўрди. У хона ўртасидаги узун скамейканинг бир чеккасида эшикка орка ўғириб ўтирарди. Муқаддам қора атлас кўйлак кийиб олган, бош яланг, сочи турмакланган эди.

Алимардон бир лаҳзада хонани кўздан кечириб чиқди. Тўрдаги алвон ёпилган стол қархисида тепакал, озгин киши ўтирар, ёнидаги кўзойнак таққан кекса хотинга алланималарни оҳиста гапираварди. Ўнг томондаги столда эса котиба қиз аллақандай қоғозларни тўлдираварди.

Алимардон ўзини мажбур этиб, дадил-дадил кадамлар билан юриб келди-да, скамейканинг бериги четига ўтираркан, Муқаддамга қараб қўйди. Муқаддам ҳам унга ўгирилиб қаради. «Ўзгармабди», деб ўйлади Алимардон кўзларини олиб қочмасликка уриниб. Ҳамон ўша эгик, узун киприклар, ҳамон ўша тиниқ чехра... Алимардон унинг чиндан ҳам чиройли эканлигини ўйлади-ю, шошилиб юзини ўғирди. Бу одам энди унга бегона...

Тепакал судья Алимардонни сўрок қилди. У нималар деганини ўзи билмади. Кўнглида кечмишининг тотли дамларини қўмсаш туйғуси уйғониб, яна азоб бера бошлиди. Муқаддамнинг илк бора ўз уйига кириб келгани, илк марта бағрига босгани... Соддагина, бўйсунувчан хотин бўлгани... Шавкат туғилганида қувонгандлари... Нихоят, эшикни қарс ёпиб, остонаядан ҳайдаб юборганини эслади-ю, «Муросамиз тўғри келмади. Менга боламни қайтарса бўлди», дегандай жавоб қилиб, жойига ўтирди.

Кейин Муқаддам ўрнидан турди.

У ҳам, энг аввало, илк бора Алимардоннинг уйига кириб боргани, тўй бўлгани, унинг мана шу қайсар соchlарини силаганини ўйлади. Кейин Шавкат кўз ўнгиға келди. У, шаҳардан сенга уч ғилдиракли велосипед олиб келаман, деб уйдан чиққан эди. Кейин тагин Мардон акаси билан кечирган кунларини эслади. Охири кўз ўнгида ўзининг тўшагида ўтирган ярим-яланғоч хотин пайдо бўлди-ю, бир оғиз «йўқ, бирга яшолмайман», деб жавоб берди.

Судья билан маслаҳатчи хотин узоқ насиҳат қилишди. Аммо натижа чиқмади. Охири суд ажратишга, болани онасида қолдиришга қарор қилди. зум ўтмай хона бўмбўш бўлиб қолди.

Алимардон қизил баҳмал ёпилган стол, шойи дарпарда тутилган пастак деразадан кўз узмай узоқ ўтиреди. Кейин бирдан сакраб ўрнидан туриб кетди. Юраги гурсиллаб урганча иккинчи қаватдан ўқдек отилиб тушиб, кўчага чиқди. Йўлка чеккасидаги хонаки арча орқасига ўтиб кетаётган Муқаддамнинг қора атлас қўйлагини кўриб қолди-ю, цемент ариқчадан ҳатлаб ўтиб кетидан югурди.

– Тўхтанг... – У аввалгидек «Муқад» демоқчи бўлди-ю, нафаси қисилиб такрорлади: – Тўхтанг, Муқаддамхон!

Муқаддам ярим ўгирилиб қаради, «Нима гап?» дегандек киприкларини пирпиратиб, қошини чимириди. Алимардон икки қадамча берида тўхтади.

– Шавкат қани? – деди у нафасини ростлаб ололмай.

Муқаддам унга маъносиз қараб қўйди.

– Уйда, қишлоқда...

– Қачон кўраман, қачон?! – Алимардон ўзининг ўтинч оҳангда гапирганини пайқаб, ғижиниб кетди. – ўғлимни беркитишга ҳаққингиз йўқ! – деди овози титраб. – Мен унинг отасиман.

Муқаддам унга яна маъносиз бир назар ташлади.

– Сиз унга ота бўлолмадингиз! – У кескин бурилдида, бекатга келиб тўхтаган троллейбус томонга югурди.

Алимардон етиб боргунча троллейбус юриб кетди. У ғазаб билан орқасига қайтди. Суд биноси олдида турган машинасига ўтирди-да, троллейбуснинг кетидан шиддат билан қува бошлади. Зум ўтмай етиб олди.

Алимардон троллейбуснинг катта-катта деразаларига қараб ўтди-ю, кейин бирдан ҳафсаласи пир бўлди.

«Қаёққа боради? Муқаддамнинг уйигами? Нима учун? Хор бўлиш, ҳайдалиш учунми?!»

У газни босганча шиддат билан елиб кетди. Ресторан эшигига келганидан кейингина хушини тўплаб олди. Бир лаҳза иккиланиб турди-ю, ичкари кирди.

\* \* \*

Уч ойдан кейин у Муқаддамнинг эрга текканини эшитди. Консерваторияда бирга ўқиган курсдоши шу ҳабарни топиб келди. Ойнатогга борганида Муқаддамнинг ўзини кўрмабди-ю, биттасидан эшитганмиш. Ўша ерлик Кабир деган бир ўрмончи агроном қайта-қайта совчи қўяверганмиш. Муқаддам, ёлғиз боламни бироннинг қошқовоғига қаратиб қўймайман, деб рози бўлмаганмиш. Йигит югура-югура охири Муқаддамни кўндирганмиш.

Ажаб, Алимардоннинг кўнгли энди таскин топгандек бўлди. Гўё худди шу ҳабарни кўпдан буён кутиб юргандай эди. Фақат кўнглида тубсиз рашк уйғонди. Қалбининг энг чукур яраси – ўғли қолдирган яра чидаб бўлмас азоб бериб ачишиб кетди. У Шавкатнинг бошқа бир одамни ота деб чакиришига тоқат қилолмас, асло, асло чидолмас эди! Бу яра кун сайин чукурлашиб борар, Алимардон кечалари мижжа қоқмай тўлғаниб чиқар, ўғлини қандай қилиб бағрига қайтариш йўлини ўйлар, лекин тополмас эди. У кечалари турли режалар чизиб чиқар, тонг отиши билан

бу режаларнинг ҳаммаси бемаъни эканини, рақибининг остонасига бош эгиб бориши мушкул эканини билар, ўғлини қайтариш учун яна янги режаларни излар эди. Унга сайин қалбининг яраси тағин ҳам чуқурлашар, ўз хунини кундан-кун қаттиқроқ талаб қиласади.

Нихоят, шундай кун етиб келди. Нихоят, Ойнатогга боришга баҳона топилди.

Кечқурун Алимардон ҳар сафаргидай «Тошкент» ресторанига кирди. Официанткалар уни таниб қолишган, ёлғиз ўзи ўтиришни ёқтиришини билишар, кириши билан олдига конъяқ келтириб қуишишарди.

Учинчи қадаҳдан кейин унинг фикри тиниқлашиб, атрофга разм солди. Бугун ресторанда одам сийрак, аммо залда одатдагидек оркестр жаз чалар, кувноқ садолар дунё ташвишларини унтишга, бир нафас маст бўлишга ундаётгандай ҳайқиради!

Алимардон яна икки қадаҳ ичди. Лимон билан газак килди. Энди унинг қулоқлари гувуллаб, шириң, мастона кайфиятга берилади. Супачада кимдир рубоб чалиб, ашула айта бошлади. Алимардон хонанданинг бўғиқ овозидан гижиниб, қайрилиб қаради.

Қизил свитер кийган гавдали йигит микрофон олдига келиб, оёқларини жуфтлаганича қаққайиб турар, рубоб чалиб, аллақандай шўх ашулани айтар эди.

«Консерваториядан қочган сўтаклардан бўлса керак!» Алимардон жаҳл билан афтини бужмайтириб, яна қадаҳни тўлатди. Икки марта кетма-кет ичди.

Бирдан мастона шов-шуввлар орасидан унинг қулоғига жуда таниш, жуда азиз бир оҳанг эшитила бошлади. Бу куй қаердадир жуда олисларда колиб кетган, юрагидан изи ўча бошлаган ширин туйғуни қитиқлади-ю, лекин қаерда эшитганини эслай олмади.

Тўсатдан у ўрнидан туриб кетди. Ахир, бу ўзининг куйи-ку! ўзининг ашуласи – «Йигит қўшиғи»ку!

Алимардон ашулачига бир қараб қўйди-ю, ҳолсизлангандек жойига ўтириди. Энди йигитнинг овози бўтиклиги ҳам билинмас, Алимардон бошини қуи солганича дикқат билан эшитар, кўшиқнинг ҳар бир сўзи унда жуда узок – қайтиб келмас манзилларга кетиб қолган дамларини эслатарди. Кўшиқ садолари унинг қулоги тагида борган сайин қаттиқроқ жаранглар, дунёдаги ҳамма нарсани – майни ҳам, пулни ҳам, ташвишларни ҳам унтишга, ўтмишни, ширин ўтмишни эслашга мажбур қила бошлади.

На қувончу, на ишончу, на кўнгилдан очма гап,  
Барчасидан ушбу кун йўқdir самар, кетмакдаман...

Ажаб, Алимардон қўшиқни неча мартараб айтган экан-у, аммо бу сўзларга эътибор бермаган экан. Тўсатдан унинг кўнгли чўкиб, чидаб бўлмас бир изтиробда тўлғана бошлади. Кафтини пешонасига босганча, кўзларини чирт юмди-да, пичирлаб қайтарди:

На қувончу, на ишончу, на кўнгилдан очма гап...

Илк бора шу қўшиқни айтган куни оstonада ўзига тикилиб турган Муқаддам кўз ўнгига келди. Кейин яна Шавкатни эслади.

Шу он ашулачи худди унинг қалбидаги ҳасратларни билиб тургандек, яна дона-дона қилиб такрорлади:

Барчасидан ушбу кун йўқdir самар, кетмакдаман...

Нима бўляпти ўзи? Нималар бўляпти, ахир?! Наҳотки, ҳаммаси адойи тамом бўлган бўлса? Наҳотки, энди у ҳам фарзандидан, ҳам Муқаддамдан, ҳам истеъдодидан – ҳамма-ҳаммасидан бир йўла айрилган бўлса!

Алимардон кўзларини чирт юмди-ю, фароғатли дамларини эслади. Ахир, унинг номини эшитганда одамлар

титраб қоларди-ку! Ҳар хонадонда унинг дилрабо овози жарангларди-ку! Камолот зинапояларидан дадиллик билан кўтарилиган, қанчадан-қанча кишиларнинг дилини ларзага солган унинг ўзи эмасми! Бугун нега ҳамма ундан юз ўғирди?

У ҳаммасини бир бошдан эсламоқчи бўлди. Энг аввал, кўз ўнгига Анвар келди. Ҳа, биринчи бўлиб ундан Анвар юз ўғирган эди. Кейин-чи? Кейин... кейин Муқаддам. Ундан кейин бошқалар. Ҳамма-ҳамма...

Алимардон яна ичди. Бу сафар фикри янайм тиниклашиб кетди. Қизик, энг аввал энг яқин кишилари ундан кочибди. Нимага? Нима учун ахир? Тез ўсгани учунми? Истебоди, дадиллиги учунми? Тўсатдан хаёлига бир фикр урилди-ю, аламдан инграб юборди. Ажаб, у қанча тез ўсган бўлса, одамлардан шунча тез ажралибди. Камолот зиналаридан ўтиб шон-шавкатга, мол-дунёга, ўзи бир вақтлар энтикиб орзу қилган ҳамма нарсага эга бўлибди-ю, худди ўша зиналарда битта нарсасини, энг азиз, энг покиза нарсасини – одамгарчилигини тушириб қолдирибди.

Алимардон хаёлига ўрнашиб қолган бу даҳшатли ўйдан чўчиб тушди. Наҳотки? Наҳотки шундок бўлса!

Унинг кайфи бутунлай тарқаб кетди.

Шартта қўлинни тушириб, қадаҳни стол чеккасига суриб қўйди-да, бокални тўлдириб қўтарди.

Ашула тамом бўлди. Чекка-чеккадан сийрак қарсаклар эшитилди.

Алимардон столлар орасидан ўтиб, супача олдига борди-да, энди жойига бориб ўтирган йигитга ҳайқирди:

– Ҳой, ука!

Йигит унинг мастилигини кўриб, парво қилмади-ю, кейин таниб қолди шекилли, сакраб ўрнидан туриб, супа лабига келди.

Алимардон мастона шовқиндан кўзи тиниб кетаётганини пайқаб, супача қиррасидан ушлаб қолди.

- Айтинг! – деди хириллаб. – Ҳозирги ашулани айтинг!
- Яна қайтарайми?
- Қайтаринг! – деди у аламли овоз билан. – Юз марта қайтаринг! Минг марта қайтаринг!

Йигит итоаткорлик билан рубобини кўлга олди.

Алимардон хира бир туманлик ичидаги ўзига қараб турган одамлар орасидан ўтиб, столини топиб олди. Стол ёнида чуст дўппи кийган, тожикларга ўхшаган қора қош, шопмўйлов йигит ўтиради.

Алимардон яқин келиши билан нотаниш одам ўрнидан туриб, салом берди.

– Ким сизни бу ёққа чақирди? – деди Алимардон ғижиниб. Нотаниш киши хижолатли аҳволда қолганидан уялди шекилли, ийманиб гап бошлади:

– Мен...

– Йўқ, мен сизни таклиф қилдимми? – Алимардон унинг гапини бўлди. У шу топда кимдан бўлмасин, аламини олгиси келар, газабдан титрар эди. – Мехмон бўлинг, дедимми сизга?!

Нотаниш киши баттар ўнғайсизланиб тушунтириди:

– Мен сизни қидириб келгандим, домулло.

Алимардон стулга оғир чўкди-да, жимиirlashaётган кўзлари билан тикилди унга.

– Мен сизга «домулло» эмасман! Нима дардингиз бор эди?

– Тўй қилаётган эдик.

У яна нимадир демоқчи эди, Алимардон гапиртирамади. Йўқ, тўйи ҳам, ўзи ҳам керакмас унга. Ҳеч ким керак эмас!

– Ишингизни килинг! – деди жеркиб. – Тўйингиз менсиз ҳам ўтаверади.

У ҳеч нимани кўрмаслик учун юзини кафти билан беркитди-да, столга энгашди. Унинг қулоқлари остида ашулачи йигитнинг овози яна янгради:

Барчасидан ушбу кун йўқдир самар, кетмақдаман...

Алимардон алам билан пичирлаб, бу сатрни ўзи ҳам тақрорлади.

Бошини кўтариб қараб, нотаниш одам ҳалиям ўтирганини кўрди, ҳайқириб юборди:

– Бормайман, деяпман-ку! Нима қиласиз мени қийнаб!

– Тўй меники эмас, домулло. Бозор куни раис ўғлини уйлантираётган эди. Атайлаб юборди. Ойнатоғдан келдим.

Алимардон ярқ этиб қаради. Бирдан кўз ўнги тиниклашиб, тикилиб қолди.

– Каердан дейсиз? – деди энтикиб.

– Ойнатоғдан, – нотаниш киши ялинган оҳангда сўради: – Закалат ташлаб кетайми?

Алимардон ички бир гижиниш билан қўл силтади.

– Пулингиз керакмас. Бораман!

\* \* \*

Тўй тарқай деб турган эди, бирдан шамол кўтарилиди-ю, зум ўтмай бўронга айланди. Шамол шиддат билан куюндей ёпирилар, ҳовлидаги олчаларнинг шохларини карсиллатиб, айқаш-уйқаш қиласи, узун стол устидаги дастурхонларни шартта кўтариб, тақсимчаларни чил-чил қилиб юборарди. Одамларчувиллаб қолиши. Күёв-келин ўтирган жойдаги палак узилиб тушди.

Тўйда елиб-югуриб хизмат қилаётганлар шоша-пиша келинни уйга олиб кириб кетиши. Ўртадаги мингинчи лампочка лопиллаб-лопиллаб турди-да, бирданига қарсиллаб ёрилиб кетди. Тоғ табиати қутуриб, бир зумда ҳаммаёқни остин-устун қилиб ташлади.

Алимардон ўзига ажратилган бурчақдаги сўридан сакраб тушди. Аллаким ичкаридан ўнинчи чироқ кўтариб

чиқди. Аммо шу ондаёк бўрон чироқнинг шишасини учирив, парчинлаб ташлади.

Алимардон хавотирланиб, осмонга қараб кўйди. Худди шу пайт илондай чақмоқ ярақлади-ю, этаги чўққиларга осилиб ётган ваҳимали, қоп-қора булутларнинг кирраси аниқ кўриниб кетди. Кетидан еру кўкни ларзага солиб, момақалдироқ гумбурлади.

Алимардон ўзи билан ўзи овора бўлиб қолган одамлар орасидан ўтиб, тор кўчага чиқди. Нарироқда соядай қорайиб турган машинасининг олдига борди. Шошилмасдан эшикни очди.

Алимардон хеч қаерда бугунчалик хиссиз, совук кўшиқ айтмаган эди. Бу сафар у бир қултум ҳам ичмади. Раиснинг пулини олмади ҳам. Ҳар гал ўртага тушганида кўзлари билан Муқаддамни излар, қаердадир, шу атрофда, одамлар орасида турибди, деб ишонар, хотин-халаж орасида чопишиб юрган болалар ичida ўзининг Шавкати ҳам борлигини ўйлар, кўшиқ айтарди-ю, нима деяётганини ўзи билмасди.

Алимардон ашула айтар экан, қайсиdir бир бурчакда ўша Кабир ҳам ўзига илжайиб тикилиб турганини кўз ўнгига келтириб гижинарди. Ким билсин, балки ўша рақиби ҳам унинг пешанасига пул қистириб, садақа бергандир.

Алимардон керакмас, деб ҳарчанд қайтармасин, серзавқ тоғ ҳалқи уни пулга кўмиб ташлади. У бўрон бошланганидан хурсанд эди. Эшикни қарсиллатиб ёпдида, машина чирогини ёқди.

Чироқ нурлари зулматни тилкалаб ташлади. Тор кўчада чекка-чеккада тўдалашиб қолган одамлар, у ёқдан-бу ёққа бесаранжом юргурган хизматчилар беихтиёр машина томонга бурилиб қарашди.

Алимардон энди моторни юргизган эди, аллаким ўнг томондаги эшикни тортди. Очолмади шекилли, эшик дарчасидан мўралади.

– Ҳа? – деди Алимардон қайрилиб қарамай, кейин елкасига бекасам чопон ташлаб олган раисни таниди-ю, юмшокроқ қилиб сўради: – нима дейсиз?

– Кетяпсизми? – деди раис шамолнинг ўкирган овозини босиш учун бақириб.

Йўқ, у ҳеч қаёққа кетмайди. Бу ерга тўй учун келган эмас!

Алимардон Муқаддамнинг уйини нима деб сўрашини билмай иккиланиб қолди.

– Вакт бўлди энди, – деди атайлаб ишонч билан.

– Шу топда-я? – деди раис яна шангиллаб. У тағин бир нима деди-ю, момақалдироқ овозини босиб кетди. Гулдурос тўхтаганидан кейин бошини янаем ичкарироқ киритиб қичкирди: – Қолинг, йўл ёмон. Шодивой уйига олиб кетади.

Алимардон индамади. У ўтирган ерида ҳаяжондан титрар, ўғлини кўришини ўйлагани сайн баттар энти-киб кетарди. Йўлга чиққанидаёқ юраги соғинч бир туйғу – Шавкатни кўриш туйғуси билан лиммо-лим тўлиб, ти-пирчилаб кетган эди. Энди бу туйғу қудратли бир талабга айланган, Алимардон бу талаб қаршисида ҳамма нарса-дан воз кечишга тайёр эди. Ким билсин, балки бир йўла олиб кетар... Нима, ҳақи йўқми?! Олиб кетади!

– Эрта билан тушиб кетасиз! – раис нари кетиб, зум ўтмай икки киши бўлиб қайтиб келишди. – Шодивойни-кида қоласиз! – деди яна қичкириб.

Алимардон ўтирган ерида эгилиб, ўнг эшикни очди. Шодивой ўриндиққа оғир чўқди. Алимардонни тўйга айтиш учун ресторонга қидириб борган йигит эди. Боя Али-мардон ашула айтаётганида Шодивой унинг кетидан чой кўтариб юрган эди.

– Жониворнинг қутуришини қаранг-а, меҳмон! – Шо-дивой қора костюмининг елкаларини оппоқ қилиб юбор-ган чангни қоқди. – Қани, юрдикми?

Алимардон қоронғида жирканиб қараб қўйди. «Чангини машина ичига орқалаб кирганини-чи! Нима қилса ҳам тўпори-да! Муқаддамнинг эри ҳам шунга ўхшаган молсифат бўлса керак!»

Ўзининг хаёлидан ўзи фижиниб кетди. Муқаддам эшиқдан хайдаб юборса-чи?

Шу пайт қанча вақтлардан бери юрагида туғилиб ётган алами қайтадан янгиланиб кетди-ю, нафрат билан пи-чирлади: «Нима, ўз боламни кўришга ҳаққим йўқми!»

Алимардон машинани секин жилдирида, қишлоқнинг пастак тош деворлари орасидаги ўнқирчўнкир йўлларидан авайлаб юриб кетди.

Баҳайбат қоялар орасида кўмилиб қолган жажжи қишлоқ табиат қудратидан ваҳимага тушгандай пусиб қолган, кичик-кичик деразаларда чироқ кўринмас, гўё ҳамма аллақандай даҳшат олдида титраётгандай эди.

Яна чақмоқ чақди. Фамгин қовоқ уйиб турган баланд-баланд қоялар ярқ этиб ёришди, яна зулмат чўқди. Кетидан момақалдироқ гумбурлади. Тоғларнинг заҳарханда қаҳқаҳаси узоқ акс садо бериб турди, кейин гумбур-гумбурлар бир-бирига уланиб кетди. Энди гулдурос бир нафас ҳам тинмас, қоялар чўққидан сурон солиб, қишлоқ устига ағдарилиб тушаётгандек эди.

– Тоғда момақалдироқ ваҳимали бўларкан! – деди Алимардон фамгин хаёллардан қутулиш учун атайлаб баланд овоз билан.

– Секинроқ айтасизми, меҳмон! – Шодивой суюнчикқа елкасини ташлади. – Бир куни денг, Полвонтепада трактор хайдаётган эдим. Шунақа, айни баҳор. Раис ҳар куни койиди. Иш чўзилиб кетаётганидан хафа. Эрта билан оёғим тортмаса ҳам отни эгарлаб, довонга чиқиб кетдим. Вақт пешиндан оғганда денг, бир сел келса бўладими! Тоғ тепасида ёлғиз ўзинг бўлсанг ҳаммаёқ ваҳима бўлиб кетаркан. Жийронни чоптириб тушиб кетаверай десам,

йўлда бир кори ҳол бўлиб қоладими, деб қўрқаман. турaverайми, десам, яна қўрқаман. хуллас, яратганга минг бор сигиндим-да! – Шодивой ўша кундаги ахволини эслаб, кулиб қўйди.

Машина пешанасидаги ойнага чирсиллаб ёмғир томчилари урилди. Яна юз қадамча йўл босгандаридан кейин шаррос жалага айланиб кетди. Томдан оқиб тушаётган сув ойнани бутунлай тўсиб қўйган, йўл яхши кўринмас, филдираклар тагидан сув шовуллаб оқарди.

Алимардон боядан бери хаёлини чувалтириб юборган фикрлардан бир қарорга келди-ю, тормозни босди. Шодивойга қараб қўйди-да, иложи борича хотиржам гапиришга уриниб, сўради:

– Кабирнинг уйи қаерда? – У овозининг титрай бошлаганидан гижиниб, бир лаҳза жим қолди. Янаям хотиржамроқ гапирди: – Агроном Кабир...

– Ўрмончини айтасизми? – Алимардон коронфида Шодивойнинг ҳайрат билан тикилиб турган кўзларини аниқ кўрди. – Нимага эди?

Алимардон тескари қараб олди.

– Кўрмоқчи эдим, – деди бўгилиб. – Эски танишмиз...

Шодивой яна ўша беғараз оҳангда шанғиллади:

– Кўйсангиз-чи, меҳмон! Бугун бизникида қўнок бўласиз.

Алимардон қатъият билан таъкидлади:

– Йўқ! Кабирнига тушаман.

Машина сув шовуллаб оқаётган тошлок кўчадан яна авайлаб юриб кетди. Алимардон йўлдан кўз узмай борар, аммо ҳеч нимани кўрмас, хаяжондан томоғи қақраб юти-нолмас, руль чамбарагидан ушлаган қўллари қалтирас, ҳозир қандайдир ноҳуш, мудҳиш бир воқеа рўй беришини сезиб, юраги титрарди.

Девори оқланган дўкон олдидан ўтганларидан кейин Шодивой Алимардоннинг кўлига секин туртди.

– Келдик.

Алимардон қандай қилиб моторни ўчирганини, қачон ерга тушганини билмади. Костюмининг ёқасидан муздей сув оқиб тушиб, баданини сесканириб юборганидан кейингина ўзига келди.

– Машина тураверади! – деди Шодивой бақириб. – Қани, марҳамат!

Яна чақмоқ чақди-ю, тор кўча ёришиб кетди.

– Хизрни йўқласангиз бўларкан, меҳмон, – деди Шодивой момақалдироқ овозини босиш учун ҳайкириб. – Ана Кабирнинг ўзи!

Алимардон сесканиб бошини кўтарди-да, қарши томондан оқ от етаклаб келаётган одамни ғира-шира кўрди. Бирдан унинг ҳамма нарсага қўл силтагиси, машинасига ўтириб, шартта орқага қайтиб кетгиси келди. Аммо Шодивой аллақачон отликнинг олдига бориб олган, кўшкўллаб сўрашар эди. Алимардон унинг охирги гапларини эшитиб қолди.

– Меҳмон олиб келдим, Тошкентдан...

Алимардон юрагини кемираётган азобли ғашлиknи енгib, гандираклаганча юриб кетди. У ўзининг рақибини кўриб қўйгиси келар, унинг нимаси ўзидан ортиқроқ эканини, Муқаддам бу одамнинг нимасига учганини билгиси келарди.

Улар пастак эшик пештоғида осилиб турган хира чироқ тагида тўқнаш келишиди. Алимардон ўзига узатилган каттакон, чайир қўлни беихтиёр қисаркан, унинг афтига қараб қўйди. Тор пешона, қоп-қора котма юзли киши унга синчков кўзлари билан тикилиб турар, дўпписи тагидан чиқиб турган соchlари, Ғира-шира ёруғликда қизариб кўринаётган юзи, ингичка мўйлови жикқа сув бўлиб кетганди. Кабир эгнига брезент ёмғирпўш, оёғига каттакон этик кийиб олган, бир қўли билан Алимардоннинг кафтини қисар, бир қўллаб отнинг жиловини ушлаб турар-

ди. Унинг этигиданми, ёмғирпўшиданми анқиб турган чучмал балиқ мойи иси димоfigа урилди-ю, Алимардон бурнини жийирди.

«...Тўпори ёввойи-ку! – У гижиниб юзини бурди. – Ҳали шу ҳайвон менинг ўғлимга ота бўлиб юрибдими?...»

Алимардон истехзоли илжайиб кўйди-да, кўлинни тортиб олди. Кабир ҳамон ундан кўз узмай турар, чамаси, қаерда кўрганини эслай олмасди.

От бегона одамни сезди шекилли, чирок нурида йилтираб турган катта-катта кўзларини олайтириб, бошини силтаганча, пишқириб юборди.

– Тек! – Кабир ингичка, кескин овоз билан ҳайкириб, жиловни тортди. – Қани, меҳмон, марҳамат, – деди тоғликларга хос тавозе билан.

Алимардон у жилмайганида ингичка мўйлови остидаги оппоқ тишлари ярақлаб кетганини кўрди.

– Тўйга бормадингиз-ку! – деди боядан бери уларни жимгина кузатиб турган Шодивой.

Кабир жиловни маҳкам ушлаганча унга бурилиб қаради:

– Ойнатоқقا чиққандим. – Кейин у Алимардонга қаради-да, тагин қайтарди: – Марҳамат!

– Бўлмаса мен тўйхонага қайтаверайми?

Алимардон Шодивой ўзидан рухсат сўраётганини анчадан кейин тушунди.

– Бораверинг! – деди қайрилиб қарамай.

Улар пастак эшикдан эгилиб, ховлига киришди. Тағин чақмоқ чақди. Ҳовлидаги беш-олти туп олмаларнинг ёмғирдан кизарган шохлари, этакдаги коронги отхона бир зум ёришиб кетди.

Унинг юраги гупиллаб ура бошлади. Тубсиз алам, нафрат, алланечук ўқинч туйгулари аралашиб, унинг вужудини ларзага солар, ҳеч нимани кўрмас, тусмоллаб қадам ташлаб бораради. Кабир отни қўйиб юборди-да,

ўзи олдинга ўтиб, йўл бошлади. Деразадан тушиб турган қизгиш нурни кесиб ўтиб, эшик олдига боришиди.

– Қани, – Кабир эшикни очди. – Бемалол кираверинг.

Алимардон ҳамон ўзини босиб ололмас, чалкаш ўйлардан боши ғувиллаб, кўз ўнги хиралашиб кетгган эди. Бора-бора у ўзини босиб олди. Кавшандозда туриб, бир лаҳза уй ичига назар ташлади. Пастак шифтга гулдор қофоз қоқилган, ўртада осилиб турган кичкинагина лампочка ожиз нур сочар, токчалардаги чойнак-пиёлалар, қақир-куқурлар ялтираб кўринарди.

Алимардон энди энгасиб, туфлисининг боғичини ечаётган эди, ичкари томондаги эшик гийқиллаб очилдида, дўмбоққина бола югуриб чиқди.

– Ада! Ада! – деди у янгроқ, ингичка овоз билан.

Алимардон кўпдан бўён излаб юрган нарсасини бирданига топгандай беихтиёр қаддини ростлади. Бу овоз, ўзи ҳали ҳеч қачон эшитмаган, аммо ўзига шу қадар қадрон бўлган янгроқ овоз унинг қулоқларига ўқдай кирди.

Бола майкаchan бўлиб олган, қоп-қора кўзлари шодликдан порлар, пешанасидаги бир тутам сочи ўзига қуйиб қўйгандай ярашиб тушган эди.

– Ада! – деди бола тағин ўша янгроқ оҳангда. Кейин қўлчаларини кенг ёзганча чопиб кела бошлади. Шу топда у онасининг оғзидан дон олаётганда қанотларини пирприратиб турган қушчага ўхшарди.

Кабир кавшандозда чўнқайиб олганча қуличини кенг ёзди.

– Қани! Қани, оташ болам, бобош болам! Ачом! Ачом!

– Ато-ом! – деди болакай ҳам ширин тил билан.

Ўғли қучогига келиб урилиши билан Кабир даст кўтариб олди-да, юз-кўзларидан ўпа бошлади. Болакай дадасининг мўйлови текканидан қитиги келган бўлса керак, ҳадеб қиқирлар, бошини орқасига ташлаганча қотиб-қотиб куларди.

Алимардон суратдай жонсиз бўлиб қолган, кўзлари ўтдай ёниб, уларга тикилиб турарди.

– Қани, амақингга салом бер-чи. – Кабир болани ерга қўйиб, мақтангандай Алимардонга қараб қўйди. – Катта йигит-да, бу! Ҳар куни дадасининг ишдан келишини пой-лаб, ухламай ўтиради.

Аммо болакай Алимардонга ётсираб қараб қўйди-да, катталардай қошини чимириб, хурпайиб олди.

– Вой, тентаг-эй, салом беришни эсингдан чиқариб қўйдингми? – Кабир кулди. Кейин Алимардонга қараб илтифот қилди. – Қани, ечининг, чиқинг. Мен отни арқонлаб қўяй. Ҳаммаёқни пайхон қилиб ташлайди. – У ичкаридаги эшикка қараб қичқирди: – Ҳой, онаси, меҳмон келди!

Кабир чиқиб кетиши биланоқ Алимардон беихтиёр болага талпинди.

– Шавкат! – деди пичирлаб. У бутун борлиғи билан болага талпинар, шунча йилдан бери юрагининг тубида ожиз титраб турган нозик бир тор бор овози билан жаранглай бошлаган, энг баланд авжига чиқиб, вужудини ларзага солар, турган ерида япроқдай қалтирас эди.

Алимардон бир қарашдаёқ оталик туйғуси билан шу бола Шавкат эканини, ўзининг ўғли, ягона овунчоги эканини аниқ билиб олганди.

У туфлисини ҳам ечмай, наматга оёқ қўйди. Икки кўлинин олга чўзиб чакирди:

– Бери кел-чи, – деди овози титраб. – Менга ўғил бўласанми?

Бола ундан хуркандай ёnlамаси тисарилиб-тисарилиб, токча олдига бориб қолди.

Алимардоннинг кўксини тўлдирган бир нидо бўғзидан отилиб чиқди:

– Шавкат!

Бола алланарсани сезгандек, шартта бурилиб қаради, Алимардон унинг кўзларида ўзининг кўзларини аниқ кўриб, қичкириб юборди:

– Ўғлим!

Лекин шу ондаёқ ваҳима тўла яна бир қичкириқ бурилиб қарашига мажбур қилди уни. Бу ох чекишиди, кўрқинч тўла нидоми, ҳар холда, юракни ўртаб юборувчи бир ун эди. Алимардон қотиб қолди. Остонада одми кўйлак кийиб олган, бош яланг Муқаддам турарди. Унинг кўзлари катта-катта очилиб, ранги қув ўчиб кетган эди. Ҳа, бу Муқаддам эди. Бир вакълар унинг ўзиники бўлган, ҳозир эса бир олам нарига кетиб қолган бегона Муқаддам эди!

Алимардон боши айланиб кетаётганини, кўз ўнгига хира ҳалқачалар пирпираётганини сезиб турар, ҳозир бир оғат бўлишини, аллақандай даҳшат рўй беришини билар, аммо тили калимага келмас эди.

– Ўғлим! – деди у нихоят пичирлаб. Томоги хиппа бўғилиб, гапиролмай қолди. Телбалардай силтаниб Шавкатга талпинди. – Шавкат, – деди титроқ қўлларини чўзиб. – Кел, болам. – У Шавкатнинг қаршисида чўккалаб, қучоғини очди. – Кел, ўғлим... – деди пичирлаб. – Битта бағримга босай.

Бола лабини буриб тисарилди. Муқаддамнинг этагидан ушлаб, орқасига яширинди.

Бу қандоқ бедодлик! Бу қандай жазо! Ўғил ўз отасидан тонса! Шу ондаёқ даҳшатли бир ҳакикат унинг юрагини қиймалаб ташлади. Нега тонмасин? Ўзи ҳам қачондир боласидан кечган эмасмиди?

Алимардоннинг шунча йиллардан бери тош бўлиб кетган дийдаси бирдан эриб оқди. Ҳа, у кўпдан бери – Муқаддам кетиб қолганидан бери битта дард билан яшар эди. Бу дард кундузлари хаёlinи, кечалари уйқусини олиб қочар эди! Энди билса – бу оталик дарди экан. Ин-

сонликнинг қўл етмас баланд чўққиси экан! Мана, ўша дарднинг малҳами! Мана, ўғли! Мана! Шундоқкина олдида турибди!

У Шавкатни маҳкам бағрига босиб олди. Унинг юзкўзидан алланечук таниш бир бўй – ўз ҳиди анқиб турган соchlаридан ўпа бошлади. Бахтиёр бир туйғудан тўлганиб жилмайди.

– Тентагим,... Мен сенинг отангман, билдингми, отангман!

Шавкат бирдан лаблари бурилиб, йиғлаб юборди.

У чирқиллаб йиғлар, онасига талпинар, аммо Алимардоннинг қучогидан чиқиб кетолмас эди.

– Йиғлама, Шавкат... – деди у пичирлаб. Боланинг юзларидан ўпа бошлади.

Шавкат баттар юлқиниб, оёқ-кўлларини силкитарди.

Тўсатдан Алимардон ўғлига озор бераётганани тушуниб қолди. Ички бир куч мажбур қилдими, қўйиб юборди.

Шавкат йиғлаганча яна онасининг этагига ёпишди. Муқаддам ҳамон тошдай қотиб турар, эси оғиб қолганга ўхшар эди.

Шавкат онасини қўйиб юборди-ю, чопқиллаб нариги уйга кириб кетди. Алимардон унинг силкиниб бораётган дўмбоқ қўлчаларини кўрди. У боланинг кетидан уч-тўрт кадам юрди-ю, тўхтаб қолди. Шундагина бу бола ҳеч қачон ўзиники бўлмаслигини ҳис қилди.

– Шавкат! – У очиқ қолган эшикка қараб охирги марта сўнік, умидсиз овозда пичирлади-да, ҳаммаси тамом бўлганини тушунди.

Шартта бурилди-ю, телбаларча икки ҳатлаб остонаяга тушди. Унинг кўзлари олайиб кетган, аммо ҳеч нимани кўрмас эди.

Эшикни тарақлатиб очди-да, ҳовлига отилди. Зимистон қўйнида Кабирга урилиб кетганини ҳам, югуриб бориб машинага ўтирганини ҳам сезмади.

Машинани кескин бурди-да, дарё-дарё сув оқаётган тор кўчадан елдириб кетди.

Машина шиддат билан қалтис тог йўлидан учиб кетди. Бир зумда қишлоқнинг тош деворлари орқада қолди.

Кўкда момақалдироқ фарёд солди. Чақмоқнинг бир лаҳзалик совуқ нури ғамгин бош эгиб турган тоғларни, ёмғирдан ялтираб кетган қизғиш қояларни, йўлнинг шундоқ чеккасидан тик тушиб кетган жаҳаннам жарлигига илондай биланглаб оқаётган сойни ёритиб ўтди. Аммо унинг кўзлари ҳеч нимани кўрмас, тасаввурида факат бир нарса – ўз отасидан ётсираб йиглаб, уйга қочиб кириб кетган Шавкат, унинг силкиниб бораётган дўмбоқ қўлчалари тураг, аламдан вужуди қалтираб, оёғи оғриганига қарамай, бор кучи билан газни босар эди...

Машина шиддат билан елиб, икки четига омонат панжаралар ўрнатилган тахта кўприкдан ўтиб кетди. Кўприк ёғочлари лопиллаб, аянчли ғийқиллаб қолди. Йўлнинг энг хавфли жойи – энг чуқур жарлик яқинлашиб келарди.

Алимардон ҳамон газни босар, барбод бўлган умидлари ҳаққи, ҳазонга айланган умри ҳаққи, барча аламлари ҳаққи кўзларига ёш қуюлиб келарди. Нимаси қолди унинг! Нимаси қолди ахир?! Сахнами? Шон-шуҳратми? Нима қолди ўзи! Нима?! Охирги, энг охирги умиди, танҳо суюнчиғи юз ўғирди-ку ундан. Тағин нима керак энди?!

У ҳамон шиддат билан елиб бораркан, кўз ёшидан томоғи хириллаб, охирги марта пичирлади:

– Ўғли-им!

Тўсатдан у кўнглида хушнуд бир енгиллик сезди. Қалби сокин туйғуларга тўлиб-тошгандай бўлди-ю, руль чамбарагини чирпирак қилиб чапга буриб юборди.

Машина бир ёнбошга оға бошлади. Шундагина у хато қилаётганини, ёмон иш қилаётганини тушуниб қолди.

Кўзлари даҳшатдан олайиб, тормозга ёпишди. Аммо машина аллақачон жаҳаннам лабига бориб етган эди.

Зум ўтмай даҳшатли сурон тог-тошларни ларзага солди. Фамгин қоялар қилиб қўйган гуноҳидан ўзи қўрқиб кетгандай инграб юборди... Бир нафас ҳаммаёқ жим бўлиб қолди.

Тоғ бағрига қанчадан-қанча сирларни яширишга ўрганиб қолган оқсоқол чўққилар қўклами бекор ўтиб хазон бўлган боласининг кисматига ачиниб, бошини қуий солди.

Қоп-қоронғи дара устида булутлар узоқ аза тутди.

\* \* \*

Эртасига кечкурун Қонқус ёқасида – Алимардоннинг энг баҳтиёр, энг покиза дамлари – болалик йиллари кечган ўша анҳор ёқасида жимгина мудраб ётган гўристонда яна бир қабр мунгли дўппайди. Ҳассакашлар гўристондан чиқиб кетаётганида янги мозорнинг ёмғирдан ивиган майнин тупроғи уларнинг ортидан унсиз жавдираб қолди.

...Ўша куни кунботар олдида ҳаво очилиб кетди. Уфқка қуёш қон сачратиб юборди. Анвар қабр устида узоқ ўтирди. Унсиз йифлади. Негадир шу оқшом офтоб жуда қийналиб ботди. Уфқ этагида узоқ осилиб турди-да, охири умиди узилгандай, секин-секин ер ортига чўкиб кетди.

Яна бир неча қундан кейин яйраб-яшнаб баҳор келди. Гўристон ёнидан кескин бурилиб оқаётган Қонқус тошқин сувларини бағрига сиғдиролмай шовуллай бошлиди. Ложувард осмон маконига қайтаётган турналарнинг кийқириғи билан тўлиб кетди.

Қабристон чеккасидаги қатор-қатор тераклар япроқ ёзиб, ой нурида ҳазин шивирлади.

Тонг отиши билан жуфт-жуфт бўлиб олган қушлар безовта чирқиллаб, инига хас-хашак ташиб қолди. Осмону фалакда якка-ёлгиз тўргай нола чекди.

Сахий кўклам кўп қатори Алимардоннинг қабрини ҳам чечакларга буркади. Майсалар орасида очилган биттагина қизгалдоқ тонг шудрингига қадаҳ тутди. Эрта-индин тўкилиб кетиши, ўзидан на бир муаттар бўй, на мева қолишидан бехабар ял-ял ёнди...

*1969 йил*

---

---

## ЧҮЛ ҲАВОСИ

«Хатлар юрак кантари,  
Хатдир күнгил дафтари»

(Халқ құшиғидан)

### БИРИНЧИ ХАТ

Зиёда!

Нега хат ёзмай қўйдингиз? Ўқишлиарингиз яхшими? Кечаси билан станциядан ғишт ташидик. Мана, охирги юкни ҳам келтириб ташладиму хат ёзишга ўтирдим. Қизиқ, тун бўйи ишласам ҳам чарчоқ сезмаяпман. Кипригимга қўнган уйку гардини тонг шабадаси ювиб юборди.

Сиз ҳали чўл баҳорини кўрганингиз йўқ... Мана, хозир хат ёзяпман-у, тўхтаб узоқ-узоқларга, осмоннинг чинни товоғи тўнтарилган уфқларга тикилиб қоламан. Ҳаммаёқ лолазор! Каттакон қизил алвон ердан бир қарич баландда секин-секин силкиниб тургандай.

Зиёда, тонг юлдузини кўрганмисиз? Менга ўхшаб соатлаб тикилиб ўтирганмисиз унга? Мен уни хар куни кўраман. Бундан ярим соатча аввал қора баҳмалга қадалган оппоқ дурдек ялт-юлт этиб кўз қисишаётган юлдузлар мудраб-мудраб охири сўнди. Уфқда биттагина ёрқин юлдуз қолди. Бу – тонг юлдузи. У ердан кўзини узмай узоқ порлаб турди. Мен ҳам ундан кўзимни узолмадим...

Қачонлардир шу юлдузни бир чўпон йигит ерга олиб тушган дейишади. Чўпон маликага ошиқ бўлиб қолибди-ю, ишқ йўлида ўлимга ҳам рози эканини айтибди. Шунда малика унга бажариб бўлмайдиган шарт қўйиб, осмондан тонг юлдузини узиб тушишни талаб қилибди.

Ошиқнинг дўйстлари кўп экан. Аммо ҳеч ким бу ишда унга ёрдам беролмабди. Шунда онаси йигиттга ўзининг соч то-ласидан ердан юлдузгача етадиган арқон тўқиб берибди. Йигит арқонга осилиб чиқиб, юлдузни узиб тушибди. Аммо малика унга хиёнат қилиб, аллақачон эрга чиқкан экан. Ошиқ дили вайрон бўлиб, юлдузни яна жойига чиқариб қўйибди. Айтишларича, юлдуз ҳам маликадан нафратланадиган бўлиб қолган экан. У малика уйкуга ке-тиши билан чўтдек порлай бошлар, уйгониши билан яна сўниб қоларкан. Ўшандан бери, тонг юлдузининг қачон чиқиб, қачон ботишини ҳеч ким билмайди дейишади.

Негадир, ҳар гал тонг юлдузини кўрсам шу афсонани эслайман-у, кўз ўнгимда сиз гавдаланасиз. Назаримда у кун сайин ерга яқинлашиб келаётгандай, қуёшнинг илк нурларига осилиб, пастга тушиб олмокчи бўлаётгандай туюлади.

Балки сиз бу сатрларни ўқиганингизда ҳалиям ёш болалигим қолмаганидан, ҳалиям аллақандай афсоналарга ишониб юришимдан қуларсиз. Нима ҳам дердим... Одатимни биласиз-ку...

Зиёда! Ўтган куни қизиқ воқеа бўлди: Ҳафиз келди! Ҳа, Ҳафиз, бутунлай келди.

Кечкурун станцияга боргандим. Цемент ортиб бўлишгунча димиқиб кетган кабинанинг иккала эшигини ланг очиб қўйдим-да, зинага ўтириб олиб папирос чека бошладим. Кечирасиз, Зиёда, сизнинг бир сўзингиз билан чекишини ташлаб юборгандим, лекин нима килай, яна чекишимга ҳам ўзингиз сабабчи бўляпсиз! Вокзал перронидаги каттакон осма соат тагида ерга кўз тикиб, сочларингизни тортқилаб ўйнаб турганингизни эсласам, ўзим ҳам билмай чека бошлайман...

Хуллас, цемент ортишаётганида машина зинасига ўтириб олиб хаёл сурардим. Кимдир нариги эшиқдан қичқириб қолди.

– «Бўйстон» совхозига борасизми, шофёр ака?

– Ха, – дедим қарамай. Ўгирилсам, у хаёлимни ўғирлаб кўядигандай туюлди.

Йўловчи чамадонини олиб келгунича кетиб қолмаслигимни илтимос қилганида ҳам қайрилиб қарамай, бош силкиб кўя колдим. Юкни ортиб бўлишгунича атрофни айланиб келдим. Йўловчим аллақачон кабинага чиқиб олган экан. Каттакон қора чамадонига суюнганича хаёлга чўмиб ўтиради. Эшикни тарақлатиб ёпганимда менга бир қараб кўйди. Қаради-ю, сесканиб кетди. Беихтиёр қаддини ростлади. Бир қўли билан чамадонининг бандига, иккинчиси билан эшик тутқичига ёпишди, ғира-шира қоронғи бўлса ҳам унинг ранги ўчиб кетганини кўрдим. Ҳайрон бўлиб тикилиб қарадим: Ҳафиз! Қора кепкасини қошигача бостириб олибди. Бирпас иккиланиб турдим-да, моторни юргизиб юбордим. Машина ўйдим-чукур йўлда ҳаккалаб юра кетди. Катта йўлга чиқиб олгач, Ҳафизга қараб кўйдим. У ҳамон эшик тутқичини қўйиб юбормай олдинга тикилиб ўтиради. Мен ўзимни босиб олдим. Ҳозир уни мендан хавотирланиб ўтирганини тушуниб, турганим учун хотиржам қилиб кўйгим келди.

– Тузумисиз, оғайнни?

Ҳафиз кўз қирини ташлаб, секин бош силкиб кўйди. Фараларни ёқдим.

– Курилишга келяпсизми?

– Ха. Ёрдамчилар керак деб эшитдим...

– Рост, бизга ҳаммаям керак. Ёрдамчилар ҳам, инженерлар ҳам...

Ҳафиз менга ялт этиб қаради. Тезликни оширдим. Очиқ деразадан кираётган шамол сочимни тортқилай бошлади.

– Ўқишингиз нима бўлди? – дедим ўзига қарамай.

У жавоб бермади.

Бир чақиримча юргач, машинани асфальт йўлдан ўнгга буриб, пастликка тушиб кетдим. Ҳафиз деразадан бошини чиқариб, олдинга қараб борарди.

- Совхозга машина кўп юрадими?
- Кечаси билан тинмайди... Тўғри Тошкентдан келяп-изми?
- Ҳа.
- Қалай?
- Ёмон эмас!

Савол-жавоблар шу билан тамом бўлди. Мен кўп нарсани билгим, айниқса, сизни Зиёда, сизни сўрагим келарди. Начора сўрамадим, ёнимдаги Ҳафиз ўша Ҳафиз эди...

Моторнинг бир текис гувуллашига қулоқ солиб боравердим. Қоронги қуюқлашиб, юлдузлар ҳам уйғониб қолди. Газ бердим. Машина пишқириб олдинга интилди. Зулмат титраб-қақшаб чекина бошлади. Машина чироқлари алланимани пайпаслаб топиб олмоқчи бўлгандек дам йўлдан ташқарига чиқиб кетади, дам осмонга сапчиди... Уйдим-чўнқир жойдан ўтиб олгач, анча текис кетдик. Яна осмонга тикилдим. Тугмачадай келадиган жажжигина юлдуз учди. Бир зумда юлдузнинг ўзи ҳам, орқасидан эргашиб келаётган ўқ ёйдек ингичка изи ҳам зулмат қўйнига сингиб кетди.

Эсингиздами, Зиёда, қайиқда сайр қилиб юриб осмонга тикилишни яхши кўрардик. Ўшанда ой ҳам, юлдузлар ҳам жуфт-жуфт бўлиб кўринарди кўзимизга: бири осмонда, бири кўлда...

Рулни бўш тутганча борарканман, шуларни ўйлардим. Ҳафиз бўлса ҳамон қош-қовоғини уйиб ўтирарди. Бир соатча юргач, совхозга етиб бордик. Машинани ётоқхона эшигига тўхтатдим.

Кабина эшигини очдим.

– Тушинг.

Ҳафиз зимдан қараб қўйди.

– Мени қаерга олиб келдинг?  
– Ётокҳонага... – Ҳафизнинг чамадонини олиб, зинадан сакраб тушдим. – Қани, тезроқ бўла қолинг.

Ҳафиз зинага оёқ қўйиб, бир лаҳза туриб қолди.  
– Кадрлар бўлими қаерда?  
– Эртага учрашасиз...

Ҳафиз бошини қуи солиб, кетимдан эргашди.  
Хонамга кириб, чироқни ёқдим. Ҳафиз эшик ёнида  
кимирламай тураверди. Чамадонини каравот тагига су-  
риб қўйдим.

– Кираверинг.

Ҳафиз кепкасини ечди.

– Кадрлар бўлимига боришим керак.

Кулиб юбордим:

– Кадрлар бўлими ухлаб ётибди.

Ҳафиз стулга ўтирди.

– Бемалол ечиниб ётаверинг, – дедим каравотга имо  
килиб. – Кеч бўлиб қолди. Йўл юриб чарчагансиз.

Ҳафиз ишонмай, зимдан қараб қўйди.

– Сен-чи?

– Мени қўяверинг. Айтаяпман-ку, толикқансиз. Дам  
олинг.

Ҳафиз бошини қуи солди. Узоқ жим бўлиб қолди.

– Ечинаверинг, – дедим қистовга олиб.

Ҳафиз каравотга ўтириб, қўнжли ботинкасининг  
ипини ечди. Пиджагини ечиб ташлаб, шифтга узоқ ти-  
килиб ётди. Кейин ўрнидан туриб кетди. Елкамга қўл  
ташлади.

– Сен... сен... энди билсам, дуруст йигит экансан.

Нима қилишимни билмай қолдим. У бўлса ҳамон  
қўйиб юбормайди. Титроқ овоз билан ҳадеб такрорлайди.

– Билмаган эканман. Сен... сен...

Нихоят у ўзини босиб олди. Каравотга ўтириб, папи-  
рос тутатди.

– Менга қара, Ботир, нега мени чўлга ташлаб келмадинг? Ярим йўлга келганда машинадан тушириб юборсанг бўларди-ку? ...

– Кўйсанг-чи! – дедим хунобим ошиб. – Бунақа ўйетти ухлаб тушимга киргани йўқ. Чой ичасанми?

Ҳафиз чукур уф тортди.

– Йўқ. Ҳали станцияда овқатланиб олганман.

– Бўлмаса, дам ол.

Ҳафиз яна ўтириб олди. Деразани очиб юбордим. Чигирткаларнинг нағмаси енгил баҳор шабадасига мингашиб, хонага ёпирилиб кирди. Чирмандадай қизғиши ой тирмаша-тирмаша бақатеракнинг устига чиқиб олди. Олисларда қатор тизилиб келаётган машиналарнинг чироғи кўринади. Деразадан ташқарига тикилганимча хаёл сураман.

Ҳафизнинг ҳозирги гапларига ҳайрон бўламан... Қизик, оддий қора қарға ҳам икки юз йил яшаркан. Одам шу парранданинг ярим умрини кўрадими, йўқми-ю, баъзи бирорвлар арзимас, ўткинчи икир-чикирлар учун бир-бирини жазолаш, ўч олиш керак деб ўйлашади. Наҳотки, инсоннинг инсонга оқибати шунчалик бўлса?!

... Бир вақт қайрилиб қарасам, Ҳафиз ҳалиям бошини кафтлари орасига олиб, мунғайиб ўтирибди.

– Ухламайсанми?

Ҳафиз бошини кўтарди.

– Уйқим келмаяпти...

Қистаб ўтирмадим. Ўрнидан туриб ёнимга келди. Деворда осиғлиқ турган суратингизга узоқ тикилиб қолди. Мен ҳам тикилдим.

– Ботир, сен Зиёдага муносибсан, – деди у хаёлчан пичирлаб.

– Кўйсанг-чи, йигитлар бир-бирини мақтаса ярашмайди.

Ҳафиз бошини оғир силкиб қўйди.

– Тўғри...

– Зиёдани кўрдингми? Яхши юрибдими? – дедим унинг гапини бўлиб.

– Ха, юрибди. – Ҳафиз хўрсиниб қўйди.

Анчадан кейин секин сўради:

– Зиёда билан болалиқдан бирга ўсганмисизлар?

Нима дейишимни билмай қолдим. Унга Ботир билан мактабдош эдик деган бўлсангиз керак. Рост, сиз кизларнинг одатингиз шунака бўлади. Севгилингизни акам ёки қариндошим деб таништирасиз.

Сизни ёлғончи қилиб қўймаслик учун ўзим ёлғон гапирдим.

– Ха, синфдош эдик.

Ҳафиз анчагача лабларини қимтиб ўтириди. Шу топда унинг хориганини, қаттиқ хориганини сездим.

– Ётинг, Ҳафиз, – дедим елкасига қўлимни ташлаб. – Эртадан ишга тушиб кетасиз. Дам овлолинг...

Ҳафиз хоргин кўзлари билан бир қараб қўйди-ю, қарвотга ётди. Мен бўлсам анчагача ухлай олмадим. Сиз билан танишувимиз, нурга чўмган хиёбонлар, гўзал фонтан – ҳаммаси бирма-бир кўз олдимдан ўтди.

Зиёда, шунча вақт бирга бўлибмиз-у, бир нарса ўртамиизда сир бўлиб қолаверибди. Сиз мени танишган кунимиздан бошлаб биласиз. Аммо мен сизни танишмасимиздан анча олдин кўрган эдим. Сиз Ҳафиз билан менинг ўртамда қандай можаролар бўлиб ўтганини ҳам билмайсиз.

Мен иккинчи курсни битирганингизда сизни танигандим. Бахт кишига йўлдошдек эргашиб юрса ҳам, баъзан уни ўзинг кўрмас экансан. Ўша баҳор оқшомида шу гап ҳақиқатан ҳам рост эканига ишондим. Ўша куни мен ўз баҳтимни – сизни учратдим.

Эсингиздами, шу куни ўтириш қилган эдингиз. Мен ўша кечангизнинг ҳақиқати маган меҳмони бўлдим. Уйин-

гизга кира олмасам ҳам сизни хаёлан қутладим. Ўшанда такси ҳайдовчиси бўлганимга ҳам туриб-туриб суюниб кетаман.

Бир куни институт ёнидан кўк чироқ ёқиб ўтиб кетаётган эдим, каттакон гулдаста кўтариб олган юм-юмалоқ қиз шоша-пиша йўл ўртасига чиқиб, қўлини кўтарди. Тўхтатдим. Қиз орқа эшикни очди-да, қичкирди:

– Юр, Зиёда!

Бўйчангина қиз атлас кўйлагини ҳилпиратиб зинадан югуриб тушди. Унинг табассум ёйилган чехрасига тикилиб туриб, юрагимда аллақандай нозик титроқ уйфонди. Менинг ғалати одатим бор эди: қизлардан уялардим. Нотаниш қиз у ёқда турсин, танишларига ҳам гапимни эплаб гапира олмасдим. Аммо хаёлимда гўзал бир қизни севишни орзу қилиб юрардим. Ўша атлас кўйлакли қизни кўрдим-у, хаёлимдаги гўзал шу бўлади, деган фикр миямга қаттиқ ўрнашиб қолди.

Бу – сиз эдингиз!

Сиз орқа ўриндиққа, дугонангизнинг ёнига ўтиредингиз.

– Бодомзор кўчасига! – деб буюрди дугонангиз.

Такси олачалпок сув сепилган асфальт кўчадан елиб кетди. Машинани ҳайдаб боряпман-у, пешонамнинг тепасидаги кафтдек кўзгуга ўқтин-ўқтин қараб қўяман. Унда сизнинг аксингиз кўринади. Ҳа, сиз баҳтиёр эдингиз. Куралай кўзларингизда ўт бор эди. Дугонангиз бўлса, тинмай гапириб борарди:

– Ойимларни зўрга кўндиридим. Тавба, бугун Зиёданинг туғилган куни, зиёфат қиляпти десам сира ишонмайдилар. Қизларни олиб қочиб кетадиган замонлар ўтиб кетган десам, бирарми уришиб бердиларки!

У хандон отиб кулди. Сиз бўлсангиз, индамай жилмайиб борардингиз. Бора-боргунча бир оғиз ҳам гапирмадингиз. Мен ҳам ўгирилиб қарашга ботина олмадим.

Бодомзор кўчасига бурилишим билан яна дугонангиз буюрди:

– Тўхтанг!

Икковингиз тушиб кетдингиз. Тротуар четидаги ариқчадан ҳатлаганингизни, хомсувоқ қилинган пастак деворга ёнбошлаб турган жийда шохлари остидан илдам ўтиб, зангори эшик ёнига борганингизни кўриб турдим. Сиз аввал дугонангизни киритиб юбордингиз. Кейин ўзингиз ҳам ичкарига кириб кетдингиз. Лоақал бир марта қайрилиб қарамадингиз. Машина эшигига тирсагимни кўйганча, узоқ тикилиб қолдим. Аллақандай куч мени ичкарига – сиз кириб кетган эшикка чорларди.

Кўёш ҳам жийда шохлари орасидан бир мўралади-ю, девор орқасига ўзини ташлаб юборди. Жийданинг кумушсимон япроқлари лов-лов ёна бошлади. Тўдалашиб юрган булутлар атлас либос кийиб олгандек...

Бу ерда қанча турганимни билмайман. Аллаким келиб такси бўшми, деб сўради. Яна бирор вокзалга олиб бориб кўйинг, деб ялинди. Ҳаммасига ҳам «бандман» деб қўя қолдим. Ўз хаёлим, сўнгсиз хаёлларим билан банд эдим... Бир вақт қарасам қоронги тушиб қолибди. Ичкаридан хеч ким чиқмади. Фақат сал ҳириллаган товуш билан айтилган ашула овози келиб туарди.

«Радио кўйишяпти» деб кўйдим ўзимча. Яна анча ўтириб қолдим. Истар-истамас моторни юргиздим. Орқага бурилдим-да, машинани секин ҳайдаб кетдим.

Марказий кўчага чиқиб, тўхташ жойига бориб турдим. Ўзимдан ўзим хунобим ошиб, папирос тутатдим.

Беш-олти қадам нарида бир йигит тез-тез юриб келди.

– Чектиринг.

Гугурт ёқиб тутдим.

– Раҳмат. Бўшмисиз?

Индамасдан бош силкиб кўйдим.

– Бир минут...

Йигит шундай деди-да, кўча четидаги магазин томонга югуриб кетди. Бир оздан кейин уч киши бўлиб қайтиб чиқишиди. Ҳалиги йигит бир тўрхалта шампан виноси, ароқ шишаларини кўтариб келиб, олдинги ўриндиққа ўтириди. Шериклари орқага жойлашиб олишиди.

– Қаерга борасизлар? – дедим моторни юргизиб.

– Бодомзор кўчасини биласизми?

Машинани елдириб кетдим. Анчагача ҳеч кимдан садо чиқмади. Нихоят, орқада ўтирганлардан бири кулиб қўйди.

– Келин болани – Зиёдахонни табриклар эканмиз-да, бугун, Ҳафиз?

Ёнимдаги йигит илжайди. Беихтиёр орқага ўгирилиб қарадим. Боши машина шифтига тегай деб турган новча йигит ингичка бўйнига ярашмаган учбурчак бағбақасини лиқиллатиб дўриллади:

– Келин болалардан биттасини десанг-чи, нима киласан Ҳафизни камситиб.

Учковлари хаолаб кулишиди. Ҳафизга биринчи марта диққат билан тикилдим. Лабининг чеккасида йилтиллаб турган бир жуфт тилла тиши совуқ кўриниб кетди кўзимга. Индамай кетавердим. Наҳотки, булар ўша қиз ҳақида, Зиёда ҳақида гапираётган бўлса, деган савол ичэтимни кемирарди.

Улар эшигингиз ёнида тушиши-да, сизларни кириб кетишиди.

... Шу кеча навбатчи эдим. Такси билан шахар кўчаларида узоқ айланиб юрдим. Қаерларга борганимни, кимларга қаёққа элитиб қўйганимни ҳали ҳам яхши эслай олмайман. Хаёлимда бу уйдан узоклашиш керак, яқин келмаслик керак, деган фикр хукмон бўлиб қолганди.

Кечирасиз, Зиёда! Унда мен сизни билмасдим. Дўстлари шундай экан, ўзи ҳам ҳаётга енгил қарайдиган қизлардан бўлса керак, деб ўйлагандим. Аммо орадан

икки кун ўтгач, яна ўша кўчага, жийда тагидаги пастак зангори эшик ёнига боришга мажбур бўлдим. Ўзим ҳам нималигини билмаган сирли куч мени шу ерга судраб келарди.

Зиёда! Эшигингизнинг ёнида ўсадиган жийдани биласиз. Аммо сиз эҳтимол унга эътибор бермассиз. Шунака бўларкан, ўзи. Одам ўзига таниш, қардон нарсаларни ҳар куни кўравериб шу қадар кўнишиб кетадики, эътибор ҳам бермай кўяди. Пайти келиб, улардан узоклашиб кетсанг, шундагина қалбингда чидаб бўлмас оғриқ сезасан. Гўё қадрдон нарсалар тугён кўтариб, ўз хотирасини талаб қиласди...

Биласизми, Зиёда, мен ўша жийдани сиздан кўра яхшироқ танийман. Унинг ҳар бир япроғи, ҳар бир бутоғи менга сирдош. Мен ҳар куни унга узок-узоқ тикилиб ўтирадим. Сизнинг уйдан чиқишингизни, мен учун азиз бўлиб қолган сиймонгизни бир марта кўриб қолишни орзу қилиб кутардим.

Сиз бўлсангиз китобларингизни қўлтиқлаганча уйдан чиқардингиз-да, ҳеч қаёққа қарамай, автобусга ўтириб, жўнаб кетардингиз. Кўнглимда шу тобда сизни тўхтатсам, ақалли бир оғиз гаплашсам дердим-у, лекин сўз қотишга, йўлингизни тўсишга ҳайикардим.

Ишонасизми, сизни уч ойгача ана шундай кузатиб юрдим. Яна бир баҳтли тасодиф рўй бермаганида билмадим, қанчагача чўзиларди экан, бу ҳол?

Бир куни одатим бўйича машинани тўхтатиб, институтдан чиқишингизни кутиб турганимда, ўзингиз келиб қолдингиз. «Бўшмисиз?» деб сўрадингиз. Дарров эшикни очдим. Ўтиришингиз билан кулиб сўрадим.

– Бодомзор кўчасигами?

Ҳайрон бўлиб қолдингиз.

– Ҳа, сиз қаердан биласиз?

– Кўчангизнинг номи чиройли экан, – дедим кулиб.

Сизнинг қошингиз чимирилди, ниманидир ўйланиб қолдингиз. Яна бироз юргач, кўпдан бери ўйлаб юрган гапимни айтдим:

– Кечирасиз, Зиёдахон, кечикиб бўлса ҳам туғилган кунингиз билан табриклайман.

Бу гапдан севинарсиз, деб ўйлагандим. Йўқ, хайрон бўлиб қолдингиз. Кўзларингизни катта очиб менга тикилдингиз:

– Нима, қизиқ одам экансиз-ку! Қаердан биласиз? Танимаган, билмаган одам... – дедингиз-у, жим қолдингиз.

– Нима, танимаган одам табрикласа ёмонми? Яхшини табриклидилар-да, дедим.

Сиз менга диққат билан тикилиб қарадингиз. Назаримда ўйлаб мени қаерда, қачон кўрганингизни эслай олмадингиз. Кейин:

– Ўзимни танимайсиз-у, туғилган кунимни қайдан биласиз? – деб сўрадингиз.

– Ўша куни сизларни уйга келтириб кўйгандим... Дўстларим қатори бир таксичи Ботир ҳам туғилган куним билан кутлади деб хисобласангиз бас.

Шу билан сухбатимиз уланиб кетди. Институтга қайтишда ҳам ўзим олиб келиб кўйдим. Яна сухбатлашиб келдик. Ҳа, зачёт дафтарингиз уйда эсингиздан чиқиб қолган экан. «Шу дафтар ҳар куни эсингиздан чиқиб қолса эди» деб ўйлайман ичимда.

... Зиёда, мен ўша сухбатнинг ҳар бир дақиқасини эслайман. Шу куни менинг баҳт қуёшим кулиб боқкан эди. Кейин нималар бўлганини ўзингиз яхши биласиз.

Ҳар куни институтдан чиқишингизни пойлаб турадиган бўлдим. Севишганлар атрофдагиларни ҳеч нимани кўрмайди деб ўйлайди, дейишгани рост. Мен ҳеч кимнинг биз билан иши бўлмаяпти, ҳеч ким бизни кўрмаяпти деб ўйлардим. Бундай эмас экан. Бир куни зина ёнида турсам, бирор билагимдан маҳкам қисиб тортди. Ўгирилиб қарадим: Ҳафиз.

– Бир минутга мумкинми? – У мени холироқ жойга олиб боргач, кўзларини тикандек қадаб таъкидлади:

– Менга қара бола! Пашиша бўлма, тушундингми?

Мен тушундим, лекин негадир яна сўрадим.

– Нима?

– Яхшиликча тушунмасанг, бошқачасига тушунтириб кўяман. Бу ердан туёфингни шиқиллатиб қол!

– Нима гап ўзи?

– У қизга осилма дейман! Аравакашлигингдан қолма! – Ҳафиз жавобимни кутмай кескин бурилди-да, институтга кириб кетди.

Турган жойимда серрайиб қолдим. Шу тобда мен ўзимни жуда ожиз ҳис қилдим. Рост, Зиёда инженер бўлади, Ҳафиз ҳам. Мен бўлсам оддий «аравакаш»... Томогимга бир нарса тикилиб, у ёққа ҳам, бу ёққа ҳам кетмай туриб қолдим. Ёнимга келиб қолганингизни ҳам сезмабман.

– Кечирасиз, – дедингиз жилмайиб. – Анча кутдириб қўйдим.

... Нурга гарқ бўлган хиёбондан юриб кетдик. Акация япроқларининг титроқ соясини босиб борарканмиз, сиз ҳам мен ҳам ўз хаёлларимиз билан банд эдик. Ким билсин балки икковимиз ҳам бир нарсани – ойдин истиқболимизни ўйлардикми. Сиз йўл-йўлакай менга қараб-қараб қўйдингиз-да, секин сўрадингиз:

– Нега хомушсиз?

Кўзларингизга тикилдим. Сиз беозор жилмайиб турардингиз. Зиёда, биласизми, табассумингизни куёшга ўхшатгандим. Рост, сизнинг бир марта кулиб боқишингиз ҳар қандай шубҳани ҳам юракдан суриб чиқаарди.

Бир куни институтдан кўлгача пиёда келганимиз эсингиздами? Сув ўпиб ётган тик қирғоққа келиб ўтиридик. Кўл секин-секин мавжланиб турарди. Сув юзига ой қалқиб чиқди.

– Ой тўлибди, – дедим секин.  
– Буниси акси, асли осмонда, – дедингиз жилмайиб.  
Монанд бир сўз излаб, чехрангизга мафтун ўтирардим.  
– Ҳа, акси... Лекин бир-биридан кўз узмайди...  
Сиз аста, енгилгина, жуда беғубор қулдингиз. Кўнглим ёришиб кетди.

Шу топда қувноқ қулги эшитилди. Кичкинагина қайиқ сув ҳовучлаб турган мажнунтол япроқлари орасидан сузиб чиқди. Йигит шошилмай эшкак эшар, унинг қаршисида ўтирган оппоқ дуррачали қиз эса эгилиб, бармоқларини сувга тегизиб борарди.

Қайиқ ўтиб кетди, икковимиз унинг кетидан қараб қолдик.

– Зиёда, – дедим тутилиб-тутилиб. – Сиз... Сиз мени шунчаки... Йўқ... Сиз мени ўзингизга лойик деб биласизми... ёки ...

У ёфини айттолмадим. Сиз кўзларимга шундай маъноли, шундай губорсиз тикилдингизки... Юрагим гупиллаб ура бошлади. Энтикиб қолдим.

Вужудимни қамраган илиқ титроқни базёр тўхтатиб, сизни багримга тортдим. Кўзларингизни яшириб, кўксимга бош кўйдингиз-у, негадир йиглаб юбордингиз.

Агар йигит ҳам, қиз ҳам бир-бирини севса, муҳаббатига содиқ колса, ҳеч қандай куч уларни бир-биридан айиролмас экан. Кейинчалик Ҳафиз билан бўлган можароларда ҳам бунга ишондим.

Зиёда! Хатим чўзилиб кетди. Анча вақtingизни олдим, кечирасиз. Ўзим ҳам ҳозир ишга чиқишим керак. Бугундан бошлаб қум ва шағал ташимиз.

Хайр Зиёда! Жавобингизни кутаман.

## ИККИНЧИ ХАТ

Салом Зиёда!

Бетончилар ишни қизитиб юбориши. Шағал етказиб улгуролмаяпмиз. Ажойиб! Чўлнинг қоқ ўртасида катта-кон интернат биноси қад кўтарди. Унда совхоз ишчила-рининг болалари ўқийди. Қандай яхши-а!

Инсон боласи дунёга келганидан кейин, ўзидан ҳеч бўлмаса битта ёдгорлик колдириб кетиши керак, яшашнинг маъниси ҳам шу, дер эди отам. Айтгандай, сиз уни ҳали танимайсиз. Отам урушда юрганида онам бошқа кишига турмушга чиқиб кетган экан. Ўшанда мен уч яшар гўдак эканман... Аммамнинг қўлида ўсадим. Отам қайтиб келганидан кейин бошқа оила курмади. Энди билсан, фақат мени деб шундай қилган экан. Эсимни танишим билан отамнинг ишончини оқлашга аҳд қилдим. Энди шунга эришяпман шекилли. Ҳар хатида дуо килади. Чўлни бўстон қилишдек катта ишга ҳисса қўшаётганим учун қувонади. Сизлар ўзингизга ҳайкал қуряпсиз, дейди.

... Зиёда! Хатингиз бугун ҳам келмади. Аввал ёзган хатларимнинг биттасига ҳам жавоб олмадим. Сизга нима бўлди, Зиёда! ... Жуда хавотирланиб юргандим. Ростимни айтсан, Ҳафиз келганига хурсанд бўлдим. У сизнинг соғ-саломат юрганингизни айтди. Била-ман, қизлар ялинтиришни яхши қўришади. Лекин хатим жавобсиз қолса ҳам ҳар куни хат ёзмасам ниманидир йўқотиб қўяётганга ўхшайман. Мана бугун ҳам ётоқхонага қайтдим ёзишга ўтирдим. Қонталаш осмон хираллашиб, адирлар орқасидан этагини судраб, оқшом кела бошлади. Чироқни ёқдим. Хатни нимадан бошлашни билмай, узоқ ўйланиб қолдим.

Баҳор ҳавосини биласиз-ку! Бирдан шамол келди. Деразани тақиллатиб, дарпардан бошига илганича ўйхлик қила бошлади. Шу топда сиз билан узоқ йили баҳорда

лолага чиқиб, қирда жала остида қолиб кетганимизни эсладим.

... Мана, ҳозир ҳам момақалдироқ бошланди. Жала қуиб берди, чироқ ўчиб қолди. Нима қилишимни билмай турганимда чўлга илк бор келганимизда шам ёққанимиз эсимга тушиб қолди. Тумбочкамни титкилай-титкилай тўрт энликкина шам топиб ёқдим. Унинг хира ёғдусида ҳатимни давом эттирдим.

Мен хат ёзяпман, шам эса ўзининг нозик тилчаси билан шу сатрларни ялаб-ялаб қуритяпти.

Ҳатимнинг шу ерига келганимда деразалар зириллаб кетди. Яшин шамолда қалтираб турган миrzатерак устида илдиз отди. Унинг сут ранг ёғдуси уйнинг бурчак-бурчакларигача ёритиб юборди. Аммо яшиннинг ёрқин нури шу ондаёқ ғойиб бўлди. Шам эса ҳамон чирсиллаб-чирсиллаб ёниб турибди. Ҳозир менга ўша улкан яшиндан кўра, тугаб бораётган ожиз шам минг марта афзалроқ...

... Мухаббат кишига ҳаётда ўз ўрнини топиб олишга ёрдам бераркан. Ҳафиз мени «аравакаш» деб камситганидан кейин чўлга кетмоқчи бўлганимни сизга айтганман.

Эсингиздами, ўша куни ёмғирдан қочиб, темир йўлчилар саройига кириб, иккаламиз узок сухбатлашдик. Чўлга кетишимни эшитиб, ҳайрон қолдингиз. Менга ишонмагандек бўлдингиз назаримда. Аммо, биз бир-биrimizни тўгри тушуна олардик. Рост, сизни қолдириб кетиш менга ҳам осон эмасди. Лекин шундай қилишим керак эди... Сиз рози бўлдингиз. Отамни ҳам кўндиридим бунга. Факат ишхонада яна озрок ишлаб туришимни сўрашди.

Таъбим хира бўлиб, яrim кечада уйга қайтиб келаётган эдим. Шамол аралаш лайлак қор ёғарди. Осмондан тўзиб тушаётган «товуқ патлари» бир зум ҳам

тўхтамайди, туғён уради. Учқунлар чироқ нуридан қочиб кутулишга урингандай тезгина асфальтга қўнади. Охирги трамвайлар судралиб боради. Кимсасиз кўчаларга муздек сукунат қўнган.

Пастқам кўчадан чикаверишда йўл четида чўзилиб ётган кишига кўзим тушди. Ҳайрон бўлдим. Машинани тўхтатдим. Югуриб бориб қўлимни бўйнидан ўтказиб, бошини кўтардим. Афтини ёруғга солиб қўришим билан яна жойига ётқизиб қўйдим. Бу – Ҳафиз эди. Кечагина мени ҳақоратлаган, менга таҳдид қилган Ҳафиз маст бўлиб, чўзилиб ётарди.

Бориб машинага ўтирдим. Жилиб эллик қадамча бордим-у, яна тўхтаб қолдим.

Ҳамон қор ёғади, совуқ шамол изғийди. Кўз олдим да яна Ҳафиз пайдо бўлди... Пальтосидан ботинкасигача корга буркалган. Кулоқ, бўйинлари қизариб кетган. Бошида оддий кепка ҳам йўқ...

Машинани буриб, орқага хайдадим. Ҳафизни кўтариб, орқа ўриндиққа ётқизиб қўйдим.

Отам хавотир ола-ола, энди кўзи илинган экан. Бизларни кўриб, кўркиб кетди.

– Ким бу?

– Ўртоғим, – дедим пичирлаб. – Умрида ичганини кўрмагандим. Билмадим, бу сафар...

Отам афсусланиб, бош чайқаб қўйди. Ҳафизни бир амаллаб ечинтириб ётқиздим.

Ҳафиз эртаси пешинга яқин уйгонди.

– Сув, – деди хириллаб.

Сувни ичиб бўлгач, ёстиққа бошини ташлади. Кўзини ярим очиб, бирпас тикилиб ётди-да, сакраб туриб кетди.

– Бемалол ётаверинг, – дедим хотиржамлик билан.

Ҳафизнинг лаби бурилди.

– Мени қаерга олиб келдинг? Майна қилмоқчи бўлдингми? Мен сенга майна бўлиб қолдимми?

Ҳафиз болаҳонадор қилиб сўка кетди. Ҳеч кимдан бунчалик ҳақорат эшитмагандим. Яхшиямки, отам эрталаб ишга кетган эди.

- Виждон борми сизда, Ҳафиз? – дедим бўғилиб.
- Виждонни кўрсатиб кўяман сенга!

Ҳафиз апил-тапил кийинди, гандираклаб чиқиб кетди. Бу ҳақда ўйламасликка ҳарчанд ҳаракат қилсан ҳам, кун бўйи таъбим тириқ бўлиб юрдим.

Орадан бир хафта ўтар-ўтмас, Ҳафиз ростдан ҳам мен билан «гаплашиб қўйди».

Ҳар куни кечкурун театр майдонидаги тўхташ жойига таксини кўйиб, кафеда овқатланиб чиқадиган одатим бор эди. Бир куни кафедан чиқсан, Ҳафиз ёнида папирос тутатиб турган экан. У мени зимдан кузатиб қолди. Мен бўлсан, таксини хайдаб кетдим. Эртасига ҳам уни шу ерда учратдим. Учинчи куни овқатланиб чиқиб, энди машина эшигини очган ҳам эдимки, Ҳафиз келиб ўтириб олди.

- Қўйлиққа! – деди жеркиб.
- Шаҳардан ташқарига чиқиш мумкин эмас. Вактида гаражга қайтишим керак.

– Кўрқма, сен гўдак билан олишиб ўтиришни ўзимга эп кўрмайман, юравер.

Шу гап учун уни дунёнинг нариги чеккасига обориб ташлашга ҳам рози бўлдим.

- Бўлти!

Машина асфалт йўлдан унсиз учди. Симёғочлар учидаги лампочкалар бошим тепасида пирпираб айлана бошлиди. Пешонам қаршисида турган кичкина ойнага қараб кўйдим. Унда сизнинг, биринчи марта учрашганимиздаги сизнинг аксингиз ўрнида Ҳафиз киноя билан илжайиб турарди. Уни машинадан хайдаб тушириб юборгим келди-ю, лекин ноилож эдим. Начора, мен оддий аравакашман. Ҳафизнинг буйругини бажаришга мажбурман...

Алам билан кўзимни чирт юмиб очдим. Хаёлимда яна сиз жонландингиз. Сиз кўз ўнгимда ҳамон ўша беғубор табассум билан жилмайиб турардингиз...

Кўйлиққа етишимизга озгина қолганда юз қадамча олдинда елиб келаётган «Победа» машинаси чапга бурилди. Шаҳардан чиқаверишда шу машина олдимизга тушиб олганди... Негадир Ҳафиз ҳам қулогимга эгилиб хириллади.

– Чапга!

Тормоз бермасдан кескин бурилдим. Икки четида бақатераклар қалтираб турган коронги кўчадан елиб кетдим. Олдинда аллақандай машинанинг орқа чироқлари қизариб кўринди. Яқинроқ келиб, тор ёғоч кўприк устида тўхтаб турган бояги «Победа»ни кўрдим. Бу ҳалиги машина эди. Келиб-келиб кўприк устида ҳам тўхтайдими? Кетма-кет сигнал бердим.

Ҳафиз билагимдан тутиб, хириллаб қулди.

– Кўйсанг-чи, кийқиллатиб нима киласан.

Унга қарамадим. Яна сигнал бердим.

Ҳафиз иккала қўлимни омбирдек қисиб олди.

– Туш бу ёққа!

Рулни ушлаганча ўтиравердим. «Победа»нинг эшиги тарақлаб ёпилди. Чироқдан кўзини пана қилиб, пальто-сининг ёқасини кўтариб олган новча йигит шу томонга келаверди. Танидим. Бу – сизнига Ҳафиз билан бирга борган найнов эди. У шошилмай келиб, чап эшикни очди. Икковлашиб мени судраб тушишди. Шундагина Ҳафиз мени бу ерга қасдан бошлаб келганини тушундим.

Ҳафизга аччик қилиб, бу ерга келиб қолганимга энди афсусландим. Ҳозир улардан ҳар нима кутиш мумкин эди.

Найнов эгилиб, юзимга қаради.

– Ботир деганинг шуми, ҳали! Бунинг нимаси ботир!

Ҳафиз қўлини пальтосининг чўнтағига тиқиб, илжайди.

– Менга қара, – деди овозини пастилатиб, – майли, биз сени урмаймиз. Аммо бугундан бошлаб қадамингни билбос... Ўзингга ўҳшаган аравакашлардан юзтасини айлантиранг ишим йўқ. Лекин мана-ман деган қизимизга кўз олайтирадиган бўлсанг... – Ҳафиз тишини ғижирлатиб таъкидлади. – Зиёдадан нарироқ юр, тушундингми?

Ўн қадамча нарида, кўприк тагидан ўтиб, музларни парчалаб оқаётган анхорга тикилиб қолдим. Тўлқинлар юзида тўлин ой қалқиб туарди. Бирдан кўз ўнгимда сиз жонландингиз. Фикрим шунчалар равшан, ёрқин бўлиб кетдики, ўзимни шунчалар қувноқ, енгил сездимки...

... Эҳ, Зиёда, Зиёда! Ҳозир булар мени нимани ўйлаётганимни, кимни ўйлаётганимни тушунса эди... Мен кўзгудан маъюс жилмайиб турган азиз сиймонгизни ўйлардим. Ўша чароғон хиёбонни, ўша ойдин кечада икковимиз сайд қилган кўлни, учар юлдузлар билан тўлган осмонни ўйлардим: Ўзим энтика-энтика такрорлаган сўзларимни ўйлардим. «Зиёда, ўзимникисиз! Сизни ҳеч кимга бермайман». Ҳозир мен ўша зангори эшикни, хомсувоқ қилинган деворга ёнбошлаган кумуш япроқли жийдани ўйлардим... Илк бор кўксимга бош кўйганингизда кўзларимизда қалқиган ёшни ўйлардим. Қаршимда турган Ҳафизни ҳам, найновни ҳам кўрмасдим. Менинг кўз ўнгимда ёлгиз сиз турардингиз...

Ҳафиз кўрсаткич бармоғини илгак қилиб, даҳанимдан силкитди.

– Тушундингми?

Мен унинг кўзларига узоқ тикилиб қолдим. Йўқ, бу кўзларда ғазаб эмас, хавотир бор эди. У мени кўрқади, узр сўрайди, ялинади, деб ўйларди-ю, ўзи атрофга олазарак бўлиб қарап эди.

Ҳайронман негадир бирдан телбалардек кула бошладим. Куйиб кетгандын сүйкедек қорайиб қолган бақатерак шохларининг инграши ҳам, увиллаётган шамол ҳам эши-тилмай қолди. Менга таҳдид қилаётган Ҳафиз ҳам, унинг дўсти ҳам зум ўтмай қаёққадир жўнаб қолди..

Кўзимга ишонмай, ҳайрон бўлиб қолдим. «Победа» мотори гуриллай бошлагандагина ўзимга келдим. Кўприк устида – машинанинг қаршисида унга тўқнаш келиб қолган эшак арава туар, қулокчинини бостириб кийиб олган чол чироқдан қамашган кўзларини кафти билан тўсиб, олдинга энгасиб қаарар, машинани тор кўприкда тўхтатган олифталарни бақириб, койир эди. «Победа» шиддат билан тисарилиб орқага бурилди-ю, шаҳар томон елиб кетди. Чол ҳам калиш-маҳси кийган оёғи билан эшакнинг сонига тепа-тепа жўнаб қолди. Ке-йин ҳамма ёққа жимжит сукунат чўқди. Бақатерак устида безовталаниб қағилаётган қарғаларнинг ҳам уни ўчди...

Ўша-ўша Ҳафизни кўрмаган эдим. Қизик, у чўлга келган куниёқ, энг аввал, менга дуч келди. Мени кўриб машинадан тушиб кетмоқчи бўлгани, йўл бўйи бир оғиз гапирмагани, совхозга машина бўладими, деб хавотирланниб сўрагани, ниҳоят хижолат бўлиб, мендан ўзини олиб қочиб юрганининг сабаби шу эди. У, Ботир мендан ўч олади, деб ўйларди чоғи.

Бу нарса хаёлимга ҳам келгани йўқ.

## УЧИНЧИ ХАТ

Салом, азизим!

... Олдингизда жуда уятлиман. Шунча орзиқиб кутган хатингизни олсам-у, вақтида жавоб ёзолмасам! ... Турибтуриб ўзимга кор қилиб кетади.

Эсингиздами, олча гуллашини сабрсизлик билан кутардингиз. Ўтган баҳор Дўмбирободга – аммамларники-

га бориб, икковимиз олчазорда сайр қилгандик. Мана, чўлда ҳам олча гуллади. Оппоқ мунчоқ тақсан нозик нихолларнинг муаттар иси хиёбон тепасида қанот қоқа бошлади. Дарров қош ҳам қорайди. Ранги ўчган осмонга увада булулгар қувишиб чиқа бошлади.

Кун бўйи қурилишда ишлаган йигит-қизлар қуёшга эргашгандек кунботар томонга кетиб қолишиди. Шамолда силкинаётган қизил дуррачалар адир орқасига чўкиб кетди. Элас-элас қулоққа чалинаётган қувноқ қўшиқ садоларигина тинмайди.

... Йиллар ўжар бўларкан. Умрнинг ҳар бир дақиқасини қадрлаш керак экан... Бир йил ичидаги килган ишларимизни ўйласам, кувониб кетаман. Кечагина сароб жимирлаган ерларда бугун озмунча бинолар қад кўтардими, озмунча олчазорлар яшнадими! ...

Зиёда, ўзимиз қилган ишлар билан мақтанмайман, суюнаман, чин юракдан суюнаман.

Бир маҳал шоша-пиша Ҳафиз келиб қолди.

– Станциядан телефон қилишибди. Тахта келганмиш. Гаражга борсам, шофёрлар ҳар ёққа тарқаб кетишибди. Машинанг тайёрми, Ботир?

Истар-истамас ўрнимдан турдим. Бу – Ҳафиз билан биринчи марта рейсга чиқишим эди.

Станцияга етиб келишимиз билан ёмғир куйиб берди. Тахтани ортишга биз ҳам қарашибдик. Икковимиз ҳам терлаб-пишиб кетдик. Ярим кечага яқин ўйлга тушдик.

Йўл бирпасда тийгоноқ бўлиб кетибди. Пастак булуллардан ергача тортилган ёмғир тўрига тикилиб, жимгина борардик. Зулмат шунчалик қуюқки, осмон ҳам, ер ҳам коракуяга чаплаб ташлангандек, олиса марジョン-марジョン чироқлар кўзга чалинади.

Эҳ, Мирзачўл, Мирзачўл! Куш учса қаноти, одам юрса оёғи куядиган сахролар ҳақида озмунча афсоналар тўқиганми боболаримиз! Одамларнинг юраги-

га ғулғула солган сен эмасмидинг? Туя карвони ҳорғин кўнғироқларини жаранглатиб ўтиб кетаётганида олисда дарвешнинг шами кўринса, тұякашлар ваҳимага тушмасми? Минг йиллардан бери ҳансирағ ётган сен эмасмидинг? Инсоннинг қудратини кўриб қўй. Кўксингга олтин маржон такиб қўйған ҳам, жамолингга пардоз бераётган ҳам инсон бўлади.

Қани энди, чўл тилимга тушунса-ю, унинг қулоғига шуларни хайқирсан. Рост-да, бу ерлардан тинчгина ўтиб кетолмайсан. Ҳайқиргинг келади!

Ҳафизни гапга солдим:

– Чўл ёқдими сизга?

Нимагадир Ҳафизнинг таъби тирриқ ўтиради. Саволимни яхши эшитмади:

– А?

– Нимани ўйлаяпсиз?

Ҳафиз анчагача индамай борди-да, бир нима эсига тушгандек эгилиб, қўйин чўнтагини ковлай бошлади. Алланимани олиб узатди.

– Ма, олиб қўй.

Коронгида кўрмадим.

– Нима бу?

Олиб қўявер, ўзингники.

Хат экан. Қалингина пакет.

– Ўзингники, – деди Ҳафиз. – Қишда юборган хатларинг.

Танидим. Ўзимнинг хатим... Тушундим... Қишда ёзган хатларим нега жавобсиз қолганини ҳам, сиз мендан нега хафа бўлиб юрганингизни ҳам – ҳаммасини тушундим. Чўлга келганидан бери Ҳафизга биринчи марта нафратланиб тикилдим. Ҳафиз бошини эгиб, жим ўтиради.

– Бу менинг охирги чорам эди, – деди у эши билар-эши тилмас. – Биламан, бирорнинг хатига тегиш номардлик. Лекин ўшанда кўзимга ҳеч нима кўринмасди.

Ҳафиз жавоб қутиб, қараб-қараб қўйди. Индамай кетавердим. Майли, бир йўла юрагини бўшатиб олсин, дедим.

– Юрагимда хўл ўтин тутаб ётарди, – деди Ҳафиз, – аввал ёнди, кейин бурксиди, ундан кейин учиб қолди... Зиёда билан очиқчасига гаплашганимиздан кейин шундай бўлди. Имтиҳонларни топшириб бўлган куни гурухимиз билан янги спектакль кўрдик. Театрдан чиқишимиз билан Зиёдани кузатиб қўйишни таклиф килдим.

– Раҳмат, қизлар билан кетавераман, – деди.

– Нима, мен билан кетишга қўрқасизми? – дедим ўсмоқчилаб.

– Нега қўрқай, одам ҳам одамдан қўрқадими?

– Юринг бўлмаса, – дедим-да, судрагудек бўлиб, етаклаб кетдим.

Мен биринчи саволдаёқ Зиёдани лол қилиб қўйишни хоҳлардим.

– Ботирдан хат келиб турибдими? – дедим киноя билан. Зиёда менга ҳайратланиб тикилади, қўрқиб кетади, деб ўйлагандим. Йўқ, қайрилиб ҳам қарамай кетаверди. Уч-тўрт қадам юргач, жавоб берди:

– Ҳа, келиб турибди.

Нима дейишни билмай қолдим.

– Зиёда, сиз ғалатисиз.

Зиёда яна чурқ этмай кетаверди.

– Ўзингиз ўйланг ахир... – дедим.

У ҳамон соқов эди.

Тоқатим тоқ бўлди

– Ботирингиз қўрқанидан чўлга қочворди.

Зиёда ғалати илжайди.

– Мард бўлсангиз чўлга, Ботирнинг ёнига бориб, бир ой ишлаб кўринг-чи. Қочгани жой тополмай қоласиз!

Бошимга гупиллаб қон урди. Зиёдани билагидан маҳкам ушлаб олдим.

– Ў, ичидан пишган қиз! Билиб қўй, мен бир ишга киришсам, охирига етказмай қўймайман.

Ўзимни ўнглаб олгунимча, Зиёда одамлар орасидан ўтиб, троллейбусга чиқиб кетди...

... Ҳафиз гапида тўхтаб менга қараб-қараб қўйди. Назаримда у менинг сўкинишимни ёки бирон нима билан бошига тушириб қолишимни кутарди.

Қизик, Ҳафиз ҳикоясини бошлаганида қанчалик ғазабланган бўлсан, ҳозир юрагимда заррача хижиллик қолмаганди. Мен бир вақтлар отамдан эшитган гапларни эслардим. Одам бутун бошли хазинасини йўқотса парво килмаслиги керак. Агар севгилингни йўқотсанг, йигла, ўзингни тоғ-тошларга ур! Мабодо инсон умидини, ишончини йўқотиб қўйса, унда яшашнинг маъниси қолмайди.

Зиёда! Ҳозир менинг қалбимдаги ишонч рашкни суриб чиқарганди. Йўлдан кўзимни узмай, индамай бора-вердим. Ёмғир тиниб қолди. «МАЗ» ёмғирни аллақачон симириб кетган йўлдан борарди. Сўрамасам ҳам Ҳафизнинг ўзи юрагидагини тўкиб соларди.

– Ўшандан бошлаб мен сенинг енганингни тан олдим. Фурурим йўл қўймаса ҳам юрагим сезиб турарди. Мен мард одамни яхши кўраман. Аммо ўзим номардлик қилиб қўйдим: институтга борган хатингни ўғирладим. Рости – бу кундош хотинларнинг иши... Номардлик қилишга қилиб қўйдим-у, айбимни ювиш йўлини топмай юрдим. Хатни Зиёдага беришга фурурим йўл қўймади. Охири, ўзингга топшириб қўярман дедим.

Мен Ҳафизга киноя билан қараб қўйдим. У сезмади. Ҳозир ўз хаёли билан банд эди.

– Ботир, балки ишонмассан. Бу ерга Зиёданинг таънаси учунгина келди деб ўйлама. Дунёда дўстинг яхши бўлиши керак экан. Курсимизда яхши йигитлар кўп эди. Лекин мен улар билан гаплашгим келмасди. Ёшликнинг даврини суриб қолгим келарди. Ўйин-кулгига берилиб

кетиб, ўқишдан ҳам қўнглим совиди. Кетма-кет учта имтиҳондан йиқилдим. Кейин мени бир йилга институтдан хайдашди.

Ҳафиз ўша хотираларни унутишга аҳд қилгандек, чор атрофни тўйиб-тўйиб кўриб олмоқчи бўлгандек, кабинадан бошини чиқарди.

– Мен чўлни бошқача тасаввур килиб юардим. Янглишган эканман.

– Шунақа, Ҳафиз... Чўл ҳавоси ҳаммага ҳам таъсир қиласди,— дедим.

Ҳафиз жилмайди:

– Мана шу ерда бирпас тўхтат!

– Ярим кеча бўлиб кетди. Эрталаб аzonлаб тағин ишга чиқиш керак...

Ҳафиз индамади. Тезликни яна оширдим. Бирдан орка ғилдиракнинг ерга дукиллаб урилиб кетаётганини сезиб қолдим. Тормоз бердим.

– Нима гап? – Ҳафиз менга ҳайрон бўлиб қаради.

– Ростдан ҳам тўхтайдиган бўлдик – баллон бўшаб кетяпти.

Иккаламиз кабинадан баравар сакраб тушдик. Ғилдирак борган сайин ерга қалишиб бораарди.

Ҳафиз этиги билан баллонни тепди.

– Падарига қусур!

Мен ҳам таъбим хира бўлиб, нажот кутгандай атрофга алангладим. Чигирткалар бир-бирига гал бермай чириллайди. Ёмғирдан кейин эсадиган майин шабада ҳаводаги рутубатни супуриб кетганди. Кўкатлар иси анкыйди. Булут орқасидан кулчадек ой ҳам кўринди.

– Нима қиласмиз энди? – Ҳафиз кепкасини ечиб, пешона терини артди. – Запас камера бормиди?

Ўриндиқнинг тагини титкилаб, камерани судраб чиқдим.

– Домқратни олинг, латтага ўроғлик турибди, – дедим кабинага имо қилиб, Ҳафиз домқратни кўтариб чиқди.

Лой-балчик бўлиб кетган ғилдиракни ажратиб оламиз, деб икковимиз ҳам терлаб-пишиб кетдик. Ҳадеганда чиқавермагач, Ҳафиз тутоқди.

– Лом қани?.. – Мендан жавоб кутмай, ломни олиб чиқди-да, ичкари томондан гурсиллатиб ура бошлади.

– Шошманг, – дедим нафасим бўғзимга тикилиб. – Бирпас дам олайлик.

Турган еримизда папирос тутатдик. Ҳафиз этигига ёпишган лойни сидирди. Иккаламизнинг ҳам таъбимиз тирриқ бўлиб, чурқ этмасдик.

Ой паст-баланд ерларга хомуш тикилиб турди-да, бу-лут орқасига ўтиб олди. Биз тағин ишга киришиб кетдик. Ҳафиз ломни ўққа тираф туриб ғилдиракни итарди. Мен икки қўллаб торта бошладим.

– Ке, бараварига олайлик... Бир, икки, уч!

Ғилдирак бирдан чиқиб кетди. Зарб билан тисарилиб, чалқанча йиқилдим. Оғир ғилдирак устимга ағдарилди. Қичқириб юборганимни эшишиб, Ҳафиз кўркиб кетди. Урина-сурина ғилдиракни сурди. Бошим ганграб, кўзим тина бошлади. Ҳафиз мени суяб турғизди. Чироқ ёруғига келиб, ўзим ҳам кўркиб кетдим. Ўнг қўлим тескарисига қийшайиб кетгандек эди. Қаерим оғриётганини аниқ билмадим. Кўнглим айний бошлади.

– Кўйинг, бирпас, – дедим.

Ҳафиз қўйиб юбормади. Кўнглим беҳуд бўлаверди. Сув ичгим келарди.

Бу ерда сув йўқлигини билсан ҳам, «сув» деб юбордим.

Негадир Ҳафизнинг жавоби узок-узоқлардан эшитилди:

– Бардам бўл, дўстим! Ҳозир...

Осмонга тикилдим. Бошимнинг қоқ тепасида сарғиш доф кўринди. Ой бўлса керак... Доф қорая-корая зулмат ичига шўнгигб кетди...

Кўзимни очганимда энг аввал оппок нарсани кўрдим. Тикилиб қарадим: хонамнинг шифти экан. Қулоғим тагида кўнгироқдек овоз жаранглади...

– Кўзингизни очинг-э! Ўртоғингиз ҳаммани шошириб кўйди-ку.

Оқ халат кийган нозик қиз бошимга эгилди. Унинг нимасидир, қаериdir сизга ўхшарди. Оқ-сариқдан келган юзими, жилмайиб туришими.

– Зиёда,— дедим пичирлаб.

Қиз қулоғини тутди.

– Нима дейсиз?

– Сув,— дедим тамшаниб. Қиз жилмайди.

Мумкин эмас...

Эшик очилди.

Қиз югуриб борди.

– Йўқ, кирмайсиз! Ҳеч нима бўлгани йўқ деяпман-ку. Фақат суяги дарз кетган. Бошқа ҳеч гап йўқ...

– Жон синглим. Хўп денг энди. Бир минут, бир минут ўтираман.

Ҳафизнинг овозини танидим. Қиз гапиргунча Ҳафиз тепамга келиб олди, Пешонамга кафтини қўйиб кўрди. Қулоғимга шивирлади:

– Суюнчи бер.

Ҳафиз кўз қисиб қўйди-да, қўйин чўнтағидан хат олди.

Бу сизнинг хатингиз эди, Зиёда. Ўрнимдан туришга интилдим – Ҳафиз елкамдан босди. Кўрсаткич бармогини лабига босди.

– Жим...

Ҳафиз кечкурун яна келишга ваъда бериб, чикиб кетди.

Ҳамшира қиз унинг кетидан қараб қолди.

– Яхши ўртоғингиз бор зкан. Салкам тўрт чакирим ердан сизни кўтариб келибди. Бечора шунча кийналибди-ю, ҳайдасак ҳам кетмайди.

– Ҳа, Ҳафиз яхши йигит – дедим шивирлаб.

Қиз чикиб кетгач, хатингизни қайта-қайта ўкиб чиқдим. Эҳ, Зиёда, Зиёда! Хатингизни олган қуним мен учун байрам бўлиб кетишини билсангиз эди. Унинг ҳар бир сўзидан сизнинг нафасингиз келиб туради. Ҳар бир сатрида сизнинг табассумингиз, сизнинг юрак ҳароратингиз яширинган. Мен учун ҳозир сиз билан хаёлан сухбатлашишдан каттароқ баҳт борми?!

Зиёда! Сиз Ҳафиздан узоқроқ юришимни илтимос қилибсиз. Йўқ, азизам, билмайсиз. Ҳафиз аввалги Ҳафиз эмас. У менга дўст бўлиб қолди.

Зиёда, хатимни кечикиб ёзаётганим учун хижолатдаман. Нима қиласай, қўлимни гипслаб қўйишган эди. Энди кутулдим ўша совуқ омбирдан.

Зиёда, мен хат ёзаяпман-у, яна ўша хаёлпарастликка бериламан. Осмонга тикиламан. Ой аллақачон ботиб кетган. Чироқ ўчганида парвоналар гойиб бўлгани сингари жажжи юлдузлар ҳам кўринмай қолди.

Уфқда биттагина юлдуз қолди. Бу – ўша тонг юлдузи. У ўтдек ёниб турибди. Балки, ҳозир сиз ҳам дераза ёнида ўтириб, уни томоша қилаётгандирсиз. Балки, сиз ҳам менга хат ёзаётгандирсиз. Ҳозир мен юлдузга қўл чўзиб турибман. Назаримда тонг юлдузи кафтимга қўнмоқчига ўхшайди... Хайр, азизим, хайр.

*Муаллиф изоҳи.*

*Биринчи муҳаббат тип-тиниқ баҳор осмонидаги булутга ўхшайди. Покиза, шаффоғ... Шамол қаёққа олиб кетишини ўзи ҳам билмайди...*

*Биринчи асар эса, биринчи муҳаббатга ўхшайди. Қисмати нима бўлишини ўзи ҳам билмайди. Биринчи*

*муҳаббат одамнинг эсидан чиқмагани каби, биринчи асар  
ҳам хотираға муҳрланиб қолади. Шаффоф, покизалиги  
билин...*

*Бундан қарийб ярим аср аввал ёзилган «биринчи  
муҳаббатим»ни китобхонларга тақдим этишига журъат  
қилдим.*

*1963 йил*

---

---

## СИРЛИ ЙОЛДУЗ

### ҚИССА

Бу асарда ўтган асрнинг саксонинчи йилларида рўй берган воқеалар тасвиrlанган. Улар бугунги авлодга бир қадар эриши туюлиши мумкин. Аммо ўша замон учун булар – оддий, кундалик турмуши тарзи эди. Олисдаги марказ зугуми остида кеча-кундуз меҳнат қилаётган ўзбек дехқонининг косаси оқармас, фарзандларининг илм олиши ҳам ўлда-жўлда эди.

Шунга қарамай ёш авлоднинг илм олиши учун жон фидо қилишига тайёр устозлар, билимга чанқоқ ёшлар оз эмасди.

Энг муҳими – асарда ўсмир йигитча билан қизалоқнинг баҳор шамолидек покиза, шудринг томчисидек шаффоф, олис юлдуз каби илк севгиси тасвиrlанган.

МУАЛЛИФ

Ташқарида сим-сим ёмғир ёғади. Томчиларнинг шитирлаши, тарновнинг шовиллаши ҳам эшитилмайди. Аммо ёмғир ёғяпти, эзиб-эзиб куз ёмғири ёғяпти. Деразалар буғланиб, хирадашиб қолган, ташқари кўринмайди. Фақат ҳовлидаги симёғоч учига илинган қалпоқда чироқнинг акси олмадек қизариб турибди. Лампочканинг ўзи эмас, хира доғ кўринади.

Барак ичи ёруғ. Узун шифтнинг тўрт жойида лампочка бор. Икки қават қатор-қатор сўрилар, сўриларда ҳар ким ўз уйидан олиб келган кўрпа-тўшаклар. Барак, ўртасидан қоп тутиб, иккига бўлинган. Бир томонида ўғил бола-

лар, бир томонида қизлар ётади. Ўртада узун ёғоч стол. Столнинг икки томонига ҳарраклар қўйилган. Болалар шу столда овқатланишади. Бир томонда қизлар тизилиб ўтиради, бир томонда ўғил болалар. Стол ёнида Омонулла Рустамовнинг йигма каравоти. У – ўқитувчи, астрономия ўқитувчisi, географиядан ҳам дарс беради. Пахта теримига ҳашарга чиқкан тўққизинчи синф ўқувчиларига Омонулла Рустамов раҳбар бўлиб келган. Болалар унинг отини ҳам, фамилиясини ҳам айтишмайди. «Муаллим» деб чақиришади.

Муаллим стол ёнидаги ҳарракда оёғини чалиштириб ўтирибди. Эгнида водолазка, чарм куртка. Домла Ҳамроев уни «шаҳарлик боди» дейди. («Боди» бўлгани учун пахтагаям чарм куртка кийиб чиқсан). Бош яланг. (Яна ўша домла Ҳамроевнинг айтишича, «жингалак сочини кўрсатиш учун» бошяланг юради, бўлмаса шляпа киймасмиди?) «Боди» бўлсаем болалар уни яхши кўришади. Пахтага Омонулла Рустамов бошлиқ бўлиб боради, дейишганида тўққизинчи синф ўқувчилари хурсанд бўлиб кетишди. Аслида, улар бешинчи сентябрдан пахтага чиқишган. Аввалига дарсдан кейин чиқиб юришиди. Кейин эрталабдан чиқадиган бўлишди. Октябрнинг ўрталарига бориб, уларнинг колхози планни бажарди.

Кейин аксига олиб, ёмғир ёғди. Ўқувчиларни мактабга тўплаб, эртага кўрпа-тўшак билан келинглар, чўлдаги янги совхозга борасизлар, дейишди. Болалар ўрганиб кетишган. Ёмғир ёғса далага машина кирмайди, кўлда териш керак. Илгари ҳам бошқа хўжаликларга кўп боришган.

Йигирма кундан ошди: ўқувчилар янги очилган совхозда «подбор» теришшайти. Ҳаво очиқ кунларда кечала-ри муаллим уларни ҳовлига олиб чиқиб «Сомон йўли»ни, «Катта айик»ни, «Оқкуш» юлдузларини кўрсатади. Икки кундан бўён тинимсиз ёмғир ёғиб, болалар далага чиқолмай қолди. Икки кундирки, муаллим уларга рубоб

чалиб беради, коинот ҳақида, космонавтлар тўғрисида кизик-кизик ҳикоялар айтади. Ҳозир ҳам у узун стол ёнида ўтирганча осмон сирларини сўзлаяпти. Стол устида каттакон тунука чойнак, пиёлалар, бир чеккада буханка нон бурдалари, қуюлтирилган сут банкалари.

Ҳозиргина овқатланиб бўлган ўкувчилар муаллимнинг икки томонига тизилиб ўтириб олишган. Баъзи болалар ўз ўрнида ётганча, инидан мўралаган қалдирғочдек бошини чиқариб, муаллимга қарашибади. Бир хил кизлар кафтини иягига тираб, жимгина ўтиришибди. Баъзилари тиззасини кучоқлаб, бошини бир ёнга ташлаган кўйи унинг гапларини тинглайди. Хонада карам шўрва ҳиди аралаш намиққан пайпоқ иси кезади. Ёмғир ҳаммаёқни захлатиб юборган.

– Биз чексиз коинотда шиддат билан учиб юрибмиз, – дейди муаллим ўйчан оҳангда. Унинг овози бўғиқроқ. Шамоллаган одамдек хириллаб чиқади. Дарсни ҳам шунаقا ўтади. Аммо болалар дарсида қилт этмай ўтиришибади. – Учиб юрибмиз-у, ўзимиз билмаймиз. Ер шари ўз ўқининг атрофида соатига бир минг етти юз эллик километр тезлиқда айланади. Унча-мунча самолёт етолмайди.

Тошпўлат «иккинчи қаватда» – тахта кат устида ёстиққа суянганча, оёғини осилтириб ўтиришибди. У ҳам тўққизинч синфда ўқийди, астрономияни яхши кўради. Космонавт бўлгиси келади. Муаллимнинг гапини берилиб тинглайди. Шунақа-ю, оёғи оғрияпти. Айниқса, ўнг оёғининг тиззаси. Шунақанги зирқираб оғрияптики, инграб юбормаслик учун лабини тишлаб ўтиришибди. Оёғи азалдан оғрийди ўзи.

Эсида, кичкиналигига томоги оғрирди. Томоги оғриб, кечаси билан иситмалаб чиқар, онаси ярим кечада уйғониб, сут қайнатар, дурдаёғ кўшиб ичишга мажбур киларди. Дадаси сувчи бўлгани учун кўпинча кечалари далада қолиб кетар, эрталаб ҳориб-чарчаб қайтиб келар,

лойга ботган этигини кавшандозга ечиб, дарров чўян печка ёнига чўзиларди. Онаси бўлса Тошпўлатнинг бошида ўтириб, ҳасрат киларди.

– Шу бачам нимжон чиқди-да...

Бир куни (тахминан беш ёшларда бўлса керак) онаси уни етаклаб, деразасига оқ парда тутилган докторхонага олиб борди. Докторхона қишлоқ марказида – почтанинг ёнида экан. Ичкарига кирди-ю, оқ халатли доктор хотинни кўриб, кўркиб кетди. Онасининг пинжига тиқилди.

– Ҳеч нима қилмайди, – деди онаси уни юпатиб. – Доктор опа томоғингни кўриб қўядилар.

– Полвон экан-ку, бу! – доктор стакандан қошиқ бандига ўхшаган ялтироқ темирни олиб, оғзига тиқди.

– А-а дегин!

Тошпўлатнинг томоги қичишиб, кўзидан ёш чикиб кетди. Жонҳолатда докторнинг қўлига ёпишди. Доктор хотин кулди.

– Иби, мен сени домод<sup>1</sup> қилмоқчиман-ку!

– Керакмас, – деди Тошпўлат ҳеч балога тушунмай.

– Ҳозир битта укол қиласиз, касалинг тузалиб қолади. Тошпўлат эмлашдан кўркиб, йиглаб юборди.

– Иби! – деди доктор хотин яна кулиб. – Уколдан кўрқасанми? Ана, Солия кўрқмайди-ку!

Тошпўлат хона бурчагидаги курсида қўғирчоқ ўйнаб ўтирган, зардўзи дўппи кийган қизалоққа энди эътибор берди. Қизалоқ қўғирчоқнинг сочини кафти билан тарап, кулиб туради. Тошпўлат хиқиллаб-хиқиллаб чикиб кетаётганида ҳам қизалоқ кулиб қараб қолди.

Биринчи марта мактабга борган куни худди ўша қизалоқ билан битта партага ўтқазиб қўйишиди. Сўнг иковлари қишлоқ этагидаги мозористонга туташиб кетган ўтлоқда мол боқишиди.

---

<sup>1</sup> Домод – куёв

Кейинчалик ҳам Солиянинг онаси вақт-бевақт Тошпўлатни укол билан «сийлаб» турди. Бешинчи синфа ўқиётганида унинг бўғинлари қақшаб оғрийдиган бўлди. Айниқса, тиззасининг қўзи шу қадар азоб берардики, Тошпўлат кечаси билан инграб чикар, эрталаб кўзининг таги кўкариб кетарди. Бир куни доктор опа Тошпўлатнинг онасига қаттиқ тайинлади:

– Бўғинлари шишибди. Ревматизмга ўхшайди. Бициллин олиши керак.

Онаси уни туман марказидаги поликлиникага олиб борди. Ҳафтасига бир мартадан укол қилишди. Укол олган кунининг эртасига оқсоқланиб юрарди-да, кейин нишанинг ўрнидаги оғриқ босилиб қоларди. Бир ҳафтадан кейин яна укол... Кейин бўғинларининг оғриши босилгандай бўлди. Онасининг койишига қарамай, Тошпўлат поликлиникага қатнамай қўйди.

\* \* \*

Ташқарида сим-сим ёмғирнинг шитирлаши ҳам, тарновнинг шовиллаши ҳам эштилмайди. Аммо ёмғир ёғяпти. Эзиб-эзив куз ёмғири ёғяпти. Муаллим оёғини чалишитириб ўтирганча, хикоя қиляпти.

– Ер шари Қуёш атрофида бундан ҳам тез айланади, – дейди у ҳамон ўша бўғиқ оҳангда. – Секундига ўттиз километр тезликда.

– Иби – дейди ҳарракнинг бир четида ўтирган Солия кўзларини катта-катта очиб. – Шундай тезми, маълим!

– Шунақа тез! – муаллим мамнун жилмайиб қўяди. – Биз яшаб турган Ер факат Қуёш атрофида эмас, Галактика атрофида ҳам айланди. Буниси ундан ҳам тез: секундига икки юз қирқ километр! Болалар, қизлар чекка-чеккадан ҳайратланиб, хитоб қилишади.

– Эҳ-ҳе!

– Нега бўлмаса биз билмаймиз, маълим?

Бу – яна Солиянинг овози. Тошпўлат унга қарамасликка харакат қиласди: Солиядан аразлаган. Аммо уни кўп туш кўради. Анчадан бўён.

Саккизинчи синфга ўтишганида ҳам Тошпўлат уни менсимасди. Ҳатто бошқа партага – Абдулланинг ёнига ўтиб олганди. Абдулла дудук бўлсаям аълочи бола. Ҳамма нарсани билади...

Биринчи май байрами куни Тошпўлат Солияни автобусда кўриб қолди. Уям шаҳарга – ўйнагани кетаётган экан. Кўрди-ю, ғалати бўлиб кетди. Йўқ, бу – ўзи билан мол боқиб юрадиган Солия эмасди. У сочини чиройли қилиб турмаклаб олган, оёғида оппоқ туфли, эгнида атлас кўйлак... Кўйлак остида кўкси бўртиб турибди... Тошпўлат эсанкираб қолди. Нимагадир томоғи қақраб ютинди.

– Сенам шаҳаргами? – деди овози титраб.

– Ҳа, – Солия кулди. Чиройли киприклари пирпираб кетди. – Бирга-бирга айланамизми?

Шаҳаргатушишди. Автостанция олдидаги дўкончадан музқаймоқ олиб ейишди. Тошпўлат ўтган-кетган йигитларнинг Солияга тикилиб-тикилиб қараётганини кўрар, ғаши келар эди. Қишлоққа келгунча гап-гапга қовушмади. Хайрлашаётганда Тошпўлат нима дейишини билмай сўради:

– Эртага дарсга борасанми?

Солия унга қараб турди-турди-да, шараклаб кулиб юборди. Шунақа чиройли кулдики, Тошпўлат мулзам бўлиб, гандираклагудек юриб кетди.

Кейин кулогига дарс кирмайдиган бўлиб қолди. Икки кўзини Солиядан узмайди. Солия уч парта олдинда, нариги қаторда Шарифа билан ўтиради. Тошпўлатга унинг сочи, юзининг бир томони, бежирим бурни кўриниб туради. Доскага чиққанида эса унга қарамасликка ҳа-

ракат қиласи. Қараса, гапидан адашиб кетади. Таътил яқинлашган сайин унинг юраги безиллар эди. Таътилга чиқишиша, Солияни кўролмай қолади. Барибир вақт-соати билан имтиҳонлар ҳам ўтди, таътил ҳам келди. Тўғри, имтиҳон бошланганда ҳам улар ҳар куни кўришиб туришди: синовдан бўш кунлари ўқувчиларни чопикка олиб чиқишиди. Тошпўлат бошига оқ рўймол танғифиб олган Солиянинг эгилиб чопиқ қилаётганини кўриб турар эди... Кейин таътил бошланди. Уч кунда Тошпўлат уни соғиниб қолди. Солиянинг онаси ишлайдиган поликлиника олдидан атайин велосипедини етаклаб, бир неча марта ўтди. Солия йўқ эди. Уларнинг уйи ҳам яқин. Почтадан нарироқда. Аммо Тошпўлат уйига бирон нарсани баҳона килиб борай деса, Солиянинг дадасидан қўрқади.

У ҳар куни қоронги тушганида пахтага сув тараётган дадасига овқат олиб борар эди. Велосипеднинг рулига тугунни осади-ю, ғириллаб кетаверади. Ҷадаси марза четидаги тут тагида ёнбошлаганча шошилмай овқатланади. Тошпўлат унгача пойлаб туради.

Бир куни кечаси тупроқ кўчадан велосипед миниб қайтаётганида, мактаб дарвозаси олдида шарпа кўринди. Тошпўлат аллақандай ички сезгидан ҳаяжонланиб, велосипеддан тушди. Яқинроқ борди. Қараса – Солия. Қоронги бўлсаям Тошпўлат уни узокдан таниганига ўзиям ҳайрон бўлди.

– Солия! – деди овози титраб. – Нима қилопсан?

– Гўсала бўшалиб кетиби, – деди Солия негадир велосипеднинг рулига қўлинни кўйиб.

– Қачон?

– Билмасам... – Солия Тошпўлатга жилмайиб қаради. Жилмайди-ю, қоронгида юзи ёришиб кетгандай бўлди. – Сен дадангга ҳар куни овқат олиб борасанми?

– Ҳа! – деди Тошпўлат аланглаб. – Гўсаланг қаёқка кетдийкин?

– Ўзи топиб боради! – Солия қўл силтади. – Майли хайр. – Шундай деди-ю, тупроқ кўчадан юриб кетди. Тошпўлат серрайиб қолаверди. Анчадан кейин ўзига келди-да, кўчани бошига кўтариб бақирди:

– Шошма, обориб қўяман!

Велосипедининг рулидан чангаллаганча, лўкиллаб юурди. Эллик қадамча нарига бориб қолган Солияга етиб олди.

– Ўтири, – деди велосипеднинг орқа ўриндигини кафти билан артиб, Солия орқа ўриндиққа оёғини жуфтлаштириб, ёнбошлаб мингашди. Тошпўлатнинг бикинидан енгил тутди.

Тошпўлат ерда эмас, осмонда учеб бораётгандай эди. Фидирик остида тупроқ шит-шит этади, осмон тўла юлдузлар... Солиянинг юмшоқ, иссиқ қўллари вужудини ёндиради. Тошпўлат юлдузлар сари учеб боряпти. Ана ҳозир осмону фалакка учеб кетади, ёнида – Солия.

– Бўлди, – деди Солия унинг елкасига охиста шапиллатиб. – Бўлди, келдик-ку.

Тошпўлат қараса, амбулатория яқинига келиб қолишибди.

Солия ўриндиқдан лип этиб тушди-да, секин қўл силтади.

– Хайр...

Ўша кеча у Солияни биринчи марта туш кўрди. Икковлари велосипед миниб, осмонда учеб юришганмиш.

Кейин яна икки марта Солиянинг бузоги «йўқолиб» қолди. Тошпўлат уни велосипедга мингаштириб, уйига обориб қўйди. Улар кўп гаплашишмас, дарров хайрлашар эдилар. У Солия билан тушида гаплашарди.

... Аразлашиб қолишгани чатоқ бўлди. Уч қундан буён гаплашишмаяпти. Шунинг учун у ҳаррак четида ўтириб, муаллимнинг хикоясини берилиб тинглаётган Солияга қарамасликка ҳаракат қиласди. Аслида ҳозир

оёғининг қақшаб оғриётганига ҳам бир чеккаси Солия сабабчи. Йўқ, Солиямас, Мамат сабабчи. Уч кун аввал одатдагидек подбор теришди. Подбор териш унча қийинмас: машина терганида эгатларга тўкилиб қолган, чанокларда янги очилган пахта териб кетилаверади, этак тез тўлади. Аммо аввал ҳам ёмғир ёққани учун тўкилган пахта ерга ёпишиб қолган. Тирмалаб олиш керак.

Кечқурун болалар терган пахтасини орқалаб, йўл чеккасига олиб чиқишиди. Одатда тушда, кечқурун йўл четида битта тележка тайёр туради. Тарозисини шайлаб, табелчи ҳам келади. Табелчи пахталик кийган, соқоли тикандек ўсиб кетган киши. Шляпа кийиб юради. Ёнига яқин келсангиз димогингизга гуп этиб вино ҳиди урилади. Афтига қараб ёшини билиб бўлмайди: ўттиздами, элликдами? Болалардан пахтани тортиб олаётганда доим қовогини солиб туради. Аммо қизларга кўзи йилтираб, илжайиб қарайди. Тошпўлат этагини орқалаб, биринчи бўлиб келди. Этак оғир эди. Икки кўллаб кўтариб, тарози устига кўйди. Шу пайт елкасига икки этак пахтани ортмоклаб, муаллим ҳам келиб қолди. (Қизлар терган пахтани даладан ўзи кўтариб чикарди).

– Ўн саккиз! – табелчи «ол этагингни» дегандек Тошпўлатга имо қилди-да, кирланиб кетган дафтарини очди.

Тошпўлат энди этакни тарозидан олмоқчи эди, муаллим унинг қўлидан тутди.

– Шошманг, – деди табелчига. Тарози тошини қайтадан ўнгга сурди. – Ўттиз кило-ку!

– Искидка бор, акамулло, искидка бор!

– Скидка шунча бўладими? – деди муаллим лабини қимтиб.

– Нима деёбсиз, акамулло, биз ҳам ўқиган, хисобкитобни биламиз.

Муаллимнинг ранги ўчди.

– Уялмайсизми, – деди овози хириллаб. – Ёш боланинг ҳақи-ку бу! Тағин барматуха ичганини...

– Иби, нима дейди бу! Барматуха нима ўзи? – Табелчи тележка устида турган телпакли шеригига қаради. Негадир лабининг бир чети билан заҳарли илжайди. – Закунчи бўлсангиз, директорга жалоба қилинг, акамулло, бизлар кичик одам. Ҳай ана, йигирма ёздик.

Муаллим атрофини ўраб олган болаларга қараб кўйди-да, индамай этакни тарозидан олди.

– Бундан кўра күшхонага бориб без термайсанми! – деди паст овозда ижирғаниб – Виждонсиз!

Табелчи ё эшитмади, ё эшитса ҳам парво қилмади.

– Қани? – деди навбатда турган болага. – Чаққончаққон! Кеч бўп кетопти.

Навбатнинг охирида турган болалар ҳам паҳтани тортириб тележкага узатишашётганда мотор гуриллади. Икки биқинига лой сачраган «Нива» машинаси тележка орқасига келиб тўхтади. Эшик очилиб, кирза этик кийган, кўзлари уйқусизликдан қовжираган ўрта ёшлардаги киши тушди. Бу – совхоз директори эди. Ётоққа келганда болалар уни кўришганди.

Табелчи директорни кўриб, типирчилаб қолди.

– Ассалом, – деди-ю, пилдираб бориб, кўшкўллаб кўришиди.

Директор у билан енгилгина кўришиб, муаллимнинг қўлини қисди.

– Ҳорманглар-ов, азаматлар! – деди болаларга юзланниб.

Болалар, қизлар уялиброқ салом беришиди.

– Биламан, қийин, ҳаммамизгаям қийин, – деди директор дехқонча дилкашлик билан. – Наилож, куз сабил оғир келди. Шу паҳтани оталарингиз, оналарингиз экишган. Йил бўйи ишлашган. Ерда қолиб кетса бўлмайдида, – у муаллимга қаради. – Бизга талаблар борми?

– Бор, – деди муаллим секин. Тошпўлат табелчининг кўзини пирпиратиб-пирпиратиб орқага тисарилганини, муаллимга қараб аянчли илжайгани, тележка устида турган телпакли шеригига мадад кутгандай қараб қўйганини кўрди.

– Печка керак, – деди муаллим. – Совук тушиб қолди.

– Яхши! – директор кескин бош силкиди. – Иккита печка олиб келишади.

– Йўқ! – деди муаллим кўрслик билан. – Тўртта керак. Барак катта. Беш-олти қоп кўмир ҳам керак.

– Яхши, – деди директор яна бош силкиб. – Тўртта бўлса тўртта-да! Аммо кўмир йўқ. Ўтин топамиз. Балки саксовул юборармиз. Чўл яқин-ку. – У муаллим билан қўл олишиб хайрлашди-да, қайтиб рулга ўтирди. Машинани кескин буриб ҳайдаб кетди.

– Ана энди уйимиз исиб кетади! – деди муаллим мамнун жилмайиб. – Кўмирдан саксовул яхши-да, тўғрими! – У болалардан кўра кўпроқ ўзи кувонгандек, тетик овозда буюрди. – Кетдик, болалар!

Сўқмоқ йўлдан канал ёқалаб ётоққа қайта бошлишди. Тизилишиб келишарди. Энг олдинда муаллим, кетидан қизлар, болалар... Тошпўлат орқароқда келарди. Болаларнинг тизилиб боришими, ранг-баранг кийими, хуллас нимасидир сомон йўлига ўхшарди назарида. Худди осмондаги сомон йўлига. Ана, сомон йўлидаги энг чиройли юлдуз – Солия. У Маматдан олдинроқда кетяпти. Тошпўлат хафа. Бугун ҳам Солия билан ёнма-ён эгатга тушолмай қолди. Бир томонига Шарифа, бир томонига Мамат тушиб олди. Умуман, пахтага чиқишганидан бери шу – Мамат Солияга эргашиб юрибди. Аввал ҳам шунаقا қиласди-ю, Тошпўлат унча эътибор бермасди. Мамат гапга чечан. Аллақаёқдаги хангомаларни топиб, қизларни кулдиради. Тошпўлат шу болани жинидан ҳам ёмон кўради. Дадаси сельпо раи-

си. Бултур лотореяга «Жигули» ютган. Оппоқ «Жигули». Отаси лотореяга ютганини Маматнинг ўзи айтган. Тошпўлат бу янгиликни дадасига етказганида дадаси нимагадир қулган. «Сўраб кўр, Аҳмад бойвачча неча сўмлик лотореяга ютган экан, ўн беш минг сўмгами, ўн олти минггами», деган. Кейинроқ Тошпўлат билса, лотореяда ҳеч қанақа «суперлюкс» «Жигули» ўйналмас экан. Шу Мамат Солиянинг атрофида кўп айланишаяпти. Ана, ҳозир ҳам Солиянинг кетидан соядек эргашиб боряпти. Солиянинг ўнг қўлтиғида этак, чап қўлтиғига аллақандай қалин китоб қистириб олган. У этакни боши устида вертолёт паррагидай пирпиратиб айлантирганча сакраб-сакраб қадам ташлайди, худди ёш боладек. Мамат бўлса дўриллаб алланималарни гапириб боряпти. Тошпўлат билади: Мамат Солияга гапирайяпти. Билган сайин алам қилади. Солия ҳам аҳмоқ, келиб-келиб шу билан гаплашадими?

Бир махал қизиқ иш бўлди. Солия бир сакраган эди, қоқилиб, мункиб кетди. Қўлтиғидан китоб отилиб, вараклари очилганча сувга учиб тушди. Болалар қий-чув қилиб юборишиди.

– Иби, сувга тушди!

– Китобим, китобим! – Солия соҳил бўйлаб орқага қайта бошлади. У канал қирғогидаги кесакларга қоқилиб-қоқилиб келар, икки кўзи сувда қалқиб бораётган китобида эди. Ҳамма чувир-чувир қилар, китоб эса канал ўртасига бориб қолганди.

– Нима гап? – Олд томондан муаллимнинг овози келди. Тошпўлат унинг энгашиб ботинкасининг боғичини ечаётганини кўрди. Энди китоб Тошпўлатнинг шундок рўпарасига келиб қолган эди. У шўрҳок босиб қордек оқариб кетган тик соҳилдан сирғалиб пастга тушди. Этинги лойга ботиб кетди. Амаллаб лойдан чиқди-да, этигини ечмасдан шалоп-шалоп қилганча сувга кирди. Канал саёз

экан, тиззасидан келди. Аммо шу ондаёқ этиги муздай сувга тўлиб чиқди. Сирғана-сирғана ўртага борди-да, китобни тутиб олди. Негадир илжайиб, муқовасига қаради. «Қизил ва қора» деган китоб экан.

Соҳилга етганида қараса, Солия қўлини чўзиб турибди. Тошпўлатни ток ургандек, вужуди зириллаб кетди. Назарида Солия унинг қўлини бошқача қисгандек бўлди. Юраги гурсиллаб ура бошлади.

– Раҳмат, – деди Солия жилмайиб. – Оёгинг совук едими?

Тошпўлат сувни ҳам, совуқни ҳам сезмасди, баҳтиёр эди. Нарироқда илжайиб турган Маматни ҳам кўрмади, лекин гапини эшилди, аниқ эшилди.

– Язнамиз гирой-ку!

Тошпўлат сувга тўлган этигини шилтиллатганича чиқиб келди-ю, Маматнинг башарасига мушт туширди.

Мамат кўзи олайганча бурнини тортди, кафтининг орқаси билан лабини артиб, оғир-оғир киприк қоқди.

– Нега уропсан? – деди дўриллаб.

– Солиядан нари юр! – Тошпўлат бутун вужуди титраб таъкидлади. – Уқдингми?

Мамат сузонгич буқадек бошини эгганча Тошпўлатга ташланди.

Аммо етиб келолмади: болалар орасидан отилиб чиққан муаллим елкасидан ушлаб, бир тортган эди, Мамат оёғи сирғаниб ўтириб қолди.

– Вой хўроллар-ей! – деди муаллим бош чайқаб. – Уялмайсанларми!

Тошпўлат гоҳ Маматга, гоҳ Солияга қараб ўшшайиб турарди.

– Нима, сан манга хўжайнми? – деди Солия Тошпўлатга қараб. Шундоқдеди-ю, китобни қулочкашлаб сувга улоқтирди. Индамасдан бориб қизлар тўдасига кўшилди.

Тошпўлат бундай бўлишини кутмаган эди. Айниқса, Солиянинг жеркишидан кўра кўзи чакчайиб бақиргани алам қилди.

– Жигарингни эзаман! – Мамат дўриллаб, Тошпўлатга муштини дўлайтирди.

– Еч этигингни! – муаллим Тошпўлатни қуруукроқ кесак устига ўтқазди. Этигини тортар экан, елкаси оша болаларга юзланди.

– Этак беринглар!

Кимдир узатган иккита этакни олди-да, пайтава ўрнига Тошпўлатнинг оёғига ўради. Бари бир, хўл пахта терилгани учун этаклар ҳам нам эди.

Муаллим ҳар бирига салкам ярим челақдан сув тўлиб қолган этикларни силқитиб қайта кийгизди-да, Тошпўлатга буюрди.

– Марш ётоқقا! Югур!

\* \* \*

... Ташқарида сим-сим ёмғир ёғади. Томчиларнинг шитирлаши ҳам, тарновнинг шовуллаши ҳам эшитилмайди. Аммо ёмғир ёғяпти. Эзиб-эзиб куз ёмғири ёғяпти. Хонада макарон шўрва ҳиди, намиқкан пайпоқ иси кезади. Тошпўлат сирқираб оғриётган оёғини силаб ўтирибди. Муаллим ҳамон ўша бўғиқ овозда ҳикоя қиласди.

– Олам чексиз. Биз яшаб турган Ер шари олам олдида заррадек бир гап. Ҳозирги астрономия фани етмиш беш миллион галактикани аниқлаган. Шундан учтаси бининг галактикага яқин жойлашган. Биттаси Катта Магеллан, биттаси Кичик Магеллан, яна биттаси Андромеда туманлиги. Андромеда туманлигининг нури Ерга икки миллион йилда етиб келади.

Тошпўлат Андромеда туманлигини кўз олдига келтиради. Муаллим шундоқ Сомон йўлининг четроғида

турган туманга ўхшаш хира, зич юлдузлар тўдасини кўрсатиб тушунтирган. Шу Андromeda туманлиги. Бизнинг галактикага қўшни. Аммо Андromeda туманлигига ҳам ҳаёт борлигига олимлар ишонмайди. Агар унда онгли мавжудот бўлса, Ерга бирон хабар беришарди. Шунга қарамай, қаердадир барибир одамга ўхшаган мавжудот бор. Муаллим айтган. Бор. Албатта бор! Муаллим бир нарсани билмаса гапирмайди.

— Юлдузлар абадий яшайди, — дейди муаллим ўйчанлик билан. — Ўзи сўнганидан кейин ҳам нури бизга етиб келаверади... Осмондаги юлдузлар бизга бир текис жойлашгандек кўринади. Лекин ёнма-ён тургандек кўринган юлдузлар ҳам аслида бир-биридан жуда узоқда бўлади. — У негадир маъюс хўрсиниб қўяди. — Одамларга ўхшаб... Бир хил одамлар бор. Ёнингда турганга ўхшайди-ю, ўзи олисда бўлади. Жуда олисда. Факат фарқи шундаки, юлдузлар одамларга ўхшаб, бир-бирини алдамайди. Кўзига чўп солмайди... — шундай дейди-да, узоқ жимиб қолади.

Тошпўлат муаллимнинг бошқаларга ўхшаб қах-қах уриб кулганини ҳеч кўрмаган. Нимага шунаقا?

Қизик, домла Ҳамроев янги ўқитувчи келгандаёқ ёмон кўриб қолган. Домла Ҳамроев Тошпўлатлар билан ҳамсоя. Тошпўлатнинг дадаси билан жўра. Кечкурунлари чиқади-да, ҳовлидаги сўрида гурунглашиб ўтиради. Тошпўлат уларнинг гапларини беихтиёр эшишиб қолади.

— Шаҳарлик боди ўзларини кўрсатоптилар. Янги жўроб яхши супуради-да! Бруклар утукланган, бўйнида бўйинбоғ, соқоллар паратка... Педагог ҳамма жойда ўрнак бўлиши керак деб лекция ўқидилар. Мен ҳам эдим санингдек, сен ҳам бўласан манингдек! Ўқувчиси олдида гўсаланинг уч-тўрт сатил гўнгини томорқага таисин, кўрамиз, соқол олишга вақти қолармикин!..

Тошпўлатнинг дадаси жавоб беришга шошилмайди.

– Энди, домла, – деди салмоқлаб, – гўсала боқадиган жой ҳам қолмади-ку ўзи. Мана, биз ҳам молдан кутулдик. Бирини сотдик, бирини кесдик. Қишлоқ жойда туриб, зардолини шаҳардан сотиб оламиз.

Дадаси тўғри айтади. Тошпўлат олтинчи синфда ўқиб юрганида қишлоқ чеккасидаги мозористонга туташиб кетган ерлар бўш ётарди. Тошпўлат укаси, ўртоқлари билан мол боққани чиқарди. Бир сигир, бир бузоқ, тўртта қўйи бўларди. Молларни ўтлокқа қўйиб юбориб, бақатерак тагида ётиб китоб ўқирди. Осмонда илиқ баҳор қуёши, оппоқ, эринчоқ булутлар... Қизик, негадир Солияни ёқтирумасди. Ахмоқ экан-да! Устига-устак ўзининг молини Солияга боқтиради. Ҳатто бир марта йиғлатган ҳам. Ўшандা Солия дадамга айтиб бераман, сени отиб ташлайди, деган. Солиянинг дадаси – мелиса. Тўппонча тақиб юради. Нега йиғлатган экан? Келиб-келиб Солияни-я!

... Кейин пахта майдонлари кенгайтирилди. Мол бокишга жой қолмади. Паҳтазордан ўт юлишгаям иккиланади киши. Дори сепилган бўлса иш чатоқ. Сигирга ҳеч нима қилмагандаям сутини одам ичади-ку! Тошпўлатнинг дадаси томорқадаги олма-ўрикларни кесиб ташлаб макка экди. Мол деганнинг жағи тинмас экан. Томорқадан чиқкан жўхори урвоқ ҳам бўлмади. Ҳозир иккита қўллари бор, холос. Ўшаниям ёнига боргиси келмайди. Молни ёмон кўриб қолган...

– Барибир! – дейди домла Ҳамроев бўш келмай. – Бу шаҳарлик боди қишлоқни билмайди. Раис бованинг қўлига тушмаган ҳали. Саратонда уч кун яганага чиқсин, шаҳрига қараб таранг қочиб қолади.

Йўқ, муаллим шаҳрига қараб қочиб қолмади. Колхоз ҳаммомининг ёнидаги меҳмонхонада, битта хужрада туриб, икки йилдан бўён ишлаб келяпти.

Муаллим ҳали уларга қўп дарс бергани йўқ: пахтага чиқиб кетишиди. Бироқ муаллимнинг биринчи марта дарс-

га кирган кунини Тошпўлат яхши эслайди. Учинчи дарс эди. Кўнғироқ чалиниши билан синфга янги муаллим кириб келди. Кўйлаги қордек оппоқ. Шими текис дазмолланган, жингалак сочли, оёғида гард юқмаган туфли... Болалар бошқа ўқитувчиларнинг ҳам домла Ҳамроевга ўхшаб, пала- partiш кийиниб кираверишига кўнишиб кетишгани учунми, бироз эсанкираб қолишиди.

– Салом, болалар, – деди янги муаллим хиёл бўғик овозда. – Менинг исмим Омонулла, фамилиям Рустамов. Мен сизларга астрономиядан дарс бераман. Хоҳласангиз исмимни айтиб чакиринглар, хоҳласанглар, фамилиямни. Муаллим десанглар ҳам майли...

– Маълим деймиз. – Мамат ўтирган жойида дўриллади. – Маълимсиз-ку, ахир.

– Яхши! – Муаллим маъқуллаб, бош силкиди. – Мен ўзимни таништирдим. Энди сизларният таниб олай.

У йўқлама қила бошлади. Хар бир бола, хар бир киз ўрнидан турганида кўзига тикилиб қарайди, гўё нимани ўйлаётганини билиб олмоқчидек.

Муаллим дарсни ўқувчилар кутганидан ўзгачароқ бошлади.

– Бундан бир неча йил илгари Тошкентдан Москвага учаётган Ил-62 самолётида тажриба қилиб кўришиди, – деди бўғик овозда. – Учувчилар кабинасининг ойнасига кора парда тутиб қўйишиди. Самолёт Домодедово аэропортига кўнаётганида ҳам пардани олиб ташлашмади. Учувчилар ерни кўрмасдан кўнишиди. Бундан мақсад самолётдаги навигация асбобларини, электрон-техника аппаратларини синааб кўриш эди.

Болалар дарсни ғалати мисол билан бошлаган муаллимга бир қадар ҳайрон қолишиди.

– Биласиз, ҳозир техника жуда ривожланган, – деди муаллим давом этиб. – Лазердан тортиб электроникага-ча ҳаммаси бор. Космосдан туриб ерда, стол устига ёзиб

кўйилган газетани бемалол ўқиши мумкин. Лекин бундан минг йиллар илгари ҳам саҳроларда карвонлар юрган, океанларда кемалар сузган. Майли, кундузи улар шарқ билан ғарбни осон топишган. Аммо кечаси-чи? Денгиздаги кемалар, саҳродағи карвонлар кечаси тўхтаб қолмаган-ку. Уларда оддий компас ҳам бўлмаган. Улар йўлни қандай топишган? Ёки баҳорда шимолга, кузда жанубга учадиган күшлар кечаси нимани мўлжалга олади?

— Күшлар кечаси дам олади, — Мамат яна ўтирган жойида дўриллади.

— Дам олмайди, — деди муаллим қатъий қилиб. — Шунақа қүшлар борки, Атлантика океанини кўнмасдан кесиб ўтади. Бир ҳафтагача кеча-кундуз тинимсиз учади. Хўш, улар нимани мўлжал қилишади?

— Юлдузларни! — деди Мамат яна дўриллаб. Билағонлигидан хурсанд бўлиб, қаддини ростлаб қўйди.

— Мана шунинг учун ҳам инсоният жуда қадим замонлардан астрономияга кизиккан. Осмон сирларини билишга уринган. — Муаллим ички ҳаяжон билан жингалак сочли бошини силкитди. — Биз яшаб турган Ер осмон билан чамбарчас боғлиқ. Агар Ойда бирон ўзгариш бўлса Ерга ҳам таъсир қиласи. Агар Қуёшда портлаш рўй берса, саккиз ярим минутдан кейин Ерда автомобиль ҳалокатлари кўпайиб кетади, юрак касалликлари кучаяди. Қуёш фоллиги ошганда Ер юзида зилзилалар, сув тошқинлари бўлади.

... Кизик, муаллим биринчи дарсданоқ болаларни юлдузлар оламига олиб кирди-кўйди. Болалар унинг «боди»лигини унутиб, яхши кўриб қолишиди...

Бултур кишида Тошпўлат мактаб кутубхонасига кирса, муаллим ҳам турган экан. У ҳали Тошпўлатларга дарс ўтмаган эди. Тошпўлат «Менинг укам Юрий» деган китобни кутубхоначи опага топшираётганини кўриб, ёнига келди.

– Осмонни яхши кўрасанми? – деди тўсатдан.  
Тошпўлат дафъатан тушунолмади.  
– Нима?  
– Космонавтикага қизиқасанми?  
– Ҳа, – деди Тошпўлат. – Жудаям!  
– Юр, сенга китоб бераман. – Муаллим шундай деб,  
уни ўзининг хужрасига бошлаб борди.

Тошпўлат муаллимнинг бир хоналиқ уйига кирди-ю,  
хайратдан оғзи очилиб қолди. Икки томонидан деворга  
ойнабанд шкаф тираб қўйилган, шкаф китобга тўла эди.  
Дераза олдида стол, стул, этак томонда диван. Деворга  
рубоб илиб қўйилган.

– Анави токчадагилар ҳаммаси астрономия билан  
космонавтика тўғрисида. – Муаллим шундай деди-да,  
чиқиб кетди. Зум ўтмай бир челак кўмир кўтариб кир-  
ди. – Ҳозир печка ёқамиз, – деди «голланд» печканинг  
бурама бандли эшигини очиб. – Чой ичамиз.

Тошпўлат баттар хайратланди. «Боди» муаллимнинг  
печка ёқишини хаёлига ҳам келтирмаган эди. Қарашиб  
юборишини ҳам, индамай туришни ҳам билмай, сер-  
райиб қолди. Муаллим печканинг кулинни куракча билан  
эҳтиётлаб сидириб олиб, пачоқ пақирга солди, чўғ устига  
кўмир қалади. Кейин икковлари конфет билан чой ичиши-  
ди.

Муаллим унга ўлкамизда астрономия фанига қизиқиш  
қадимдан кучли бўлганини, улуғ олим Беруний бундан  
минг йил аввал Ер билан Ой ўртасидаги масофани аник  
ўлчаганини айтди.

– Фақат бу эмас, – деди тушунтириб. – Беруний Ер-  
нинг думалоқ шаклда эканини исботлаган. Шундан келиб  
чиқиб, ғалати фикр айтган. Агар Ер курраси шар шакли-  
да бўлса унинг бир томони қуруқлик, бошқа томони сув  
бўлиши мумкин эмас. Чунки физика қонунига биноан сув  
билан қуруқликнинг солиштирма оғирлиги икки хил.

Бир яримшар нуқул сув, иккинчиси қуруқлик бўлса,  
Ер ўз орбитасидан чиқиб кетган бўларди.

Демак, гарбдаги яримшарда ҳам катта қитъа бор. Берунийнинг бу қашфиёти дунёдаги энг зўр ихтиrolардан бири бўлган...

Сўнг муаллим Тунгуска воқеасини айтиб берди. 1908 йил 30 июнда Сибирдаги Тунгуска дарёси ёнига метеорит тушганида Хиросимага ташланган атом бомбасидан минг марта кучли портлаган экан, унинг зарбидан Тошкентда ҳам ер қимиirlабди. Ўшанда бир неча кунгача тайгадаги ўрмонлар ёниб, осмондаги шафақ минглаб километр наридан кўриниб турган экан. Орадан кўп йиллар ўтгандан кейин олимлар Тунгускага тушган нарса метеорит эмас, оғирлиги юз минг тонналик қор уюми деб исботлаган экан. Аммо Тунгускага тушган нарса бошқа планетадан келган космик кема, деб ҳисобловчи олимлар ҳам бормиш.

Ўша сухбатдан кейин Тошпўлат космонавт бўлишни кўнглига туғиб қўйди. У муаллимнинг домла Ҳамроев айтганидай шаҳарга қочиб қолишини хоҳламасди! Асло хоҳламасди. Йўқ, муаллим шаҳарга қочиб қолмади. Қайтага қишлоқдагилар уни яхши кўриб қолишли. Тўйлар, маъракалар муаллимсиз ўтмайдиган бўлди.

Қаерга бормасин доим озода кийиниб юради. Домла Ҳамроев айтганидай «боди» – бруклар утуклangan, бўйнида бўйинбоғи, соқол қиртишлаган...

\* \* \*

... Ташқарида сим-сим ёмғир ёғади. Томчиларнинг шитирлаши, тарновнинг шовуллаши эшитилмайди. Аммо ёмғир ёғяпти. Эзиб-эзиб куз ёмғири ёғяпти. Хона ичи ёруғ, лекин зах. Болалар жим. Муаллимнинг хикоясини тинглайди. Тошпўлатнинг оёғи янаем қаттиқроқ оғрияпти.

Ўша сувга тушган куни ҳашарчиларга овқат қилинадиган каттакон темир ўчиқ ёнида ғўзапоя алансасида пайтавасини қуритди. Аммо кечаси билан томоги оғриб чиқди. Кейин оёғи қақшаб оғрий бошлади.

– Ердан Қуёшгача бўлган масофа юз эллик миллион километр, – дейди муаллим. – Офтоб нури эса шу масофани саккиз ярим минутда босиб ўтади.

– Маълим, осмонда нечта юлдуз бор ўзи?

Тошпўлат Маматнинг дўриллаган овозини эшишиб, ижирғаниб бошини кўтаради. Мамат тўшагига ёнбошлаганча юзидаги хусунбузарни тирноғи билан ҳадеб ситяпти. Оғрийди шекилли, бир кўзини қисиб, пешонасини тириштириб қўяди.

Тошпўлат муаллимнинг «ўчир овозингни» дейишини хоҳлайди. Лекин муаллим осойишта алпозда Маматга қараб қўяди.

– Бизнинг галактикамизда бир юз йигирма миллиард юлдуз бор, – дейди хиёл бўғик оҳангда. – Бобомиз Улуғбек бир минг ўн тўққизта юлдузнинг харакат харитасини чизган. Бу ўн бешинчи аср учун жуда катта иш эди. Аммо муҳими бу эмас. Муҳими шуки – Улуғбек планеталар харакатини ўрганганди. Юлдузлар планеталарга қараганда жуда узоқда бўлади. Ерга энг яқин юлдуз ҳам Қуёшгача бўлган масофадан олтмиш олти минг марта узок.

Болалар яна ҳайратланиб, хитоб қилишади.

– Эҳ-хе!

– Вой-бў!

– Юлдузлар орасида ўзининг равшанлигини ўзгартириб турадиганлари ҳам бор, – дейди муаллим. – Минг йил илгари араблар бунақа юлдузларга «шайтон кўзи» деб ном кўйишиган.

Мамат хиринглаб кулади.

– «Шайтон кўзи?» Қизик-ку!

Тошпўлат домла Ҳамроев билан дадасининг яна бир сұхбатини эслайди. Тошпўлатнинг дадаси бир умр сувчилик қилгани учунми, совук тушиши билан бели оғрийди. Қишлоғардан бирида дадаси белига кепак қиздириб босиб ётганида ҳамсоялари кирди.

«Яхшими, саломатми?» деб омонлашгандан кейин Тошпўлатнинг дадасидан «суюнчи» оладигандек «янгилик»ни айтди.

– «Боди» бежиз келмаган экан, жўра! Эшитдик, гулдек хотини билан уч яшар болани сағир қилиб, ташлаб келган экан.

Тошпўлатнинг дадаси ётган жойида инқиллаб, белини чангаллади.

– Сурилиб кетибди, ўғлим, – деди Тошпўлатга, – тўғрилаб қўй.

Тошпўлат дадасининг бикинига сурилиб кетган кепакли «белбоғни» қайта боғлади.

– Энди, домулло, ҳар кимнинг бошида бир ташвиш бор, – деди Тошпўлатнинг дадаси. – Муросаси келишмангандирки, шундоқ қилгандир. Бирордан ўтганини бирор билмайди. Шунча жойдан келиб, болаларимизга сабоқ беряётгани учун раҳмат демайсизми? Бирорга оғирлиги тушмаса, каталакдек ҳужрада мусофиридек тирикчилик қилаётган бўлса!

– Иби, сизам қизик! – домла Ҳамроев кўл силтади. – Нимаси педагог муни. Хотинбоз! – У қизик воқеани эслади шекилли, ингичка овозда кулди. – Аммо лекин Аҳмад сельпо боплабди бодини. Биласиз, сельпони ўғли бор – Мамат. Ўзи шўҳроқ бола. Боди бориб отасига айтибди. «Болангизни мазаси йўқ, «икки»дан боши чиқмаёти», дебди. Шунда сельпо нима дебди дeng? – Домла Ҳамроев янайам ингичкароқ овозда кулди: – «Майли, ҳозирча ўқиб

тураверсин-чи, жуда бўлмаса сизга ўхшаган маълим-пальим бўлар», дебди.

Тошпўлатнинг дадаси қовоғини солди.

– Ўзингизам маълимсиз-ку, домулло! – деди зардали оҳангда.

– Мен бодимас! Ҳаммага бир хил талаб қўймайман. Ҳамма олим бўлаверса, подани ким боқади!

Тошпўлатнинг дадаси ихраб, яна белини ушлади.

– Аҳмад сельпонинг ўғли пода боқмайди, – деди оғриқдан афтини бужмайтириб. – Бўлса ўзига ўхшаган чайқовчи бўлар...

– Иби, нима деёпсиз ҳали! – домла Ҳамроев овозини баландлатди. – Сельпо ўғлини энг катта институтга киргизмоқчи. Киргизадиям-да!

... Ўша сухбатдан кейин Тошпўлат Маматни яна-ям ёмон кўриб қолган. Нимага энди институтга аълочи Абдулла эмас, Мамат кириши керак? Абдулла дўхтири бўлмокчи эди. Муаллимнинг астрономия дарсини эшитганидан кейин уям Тошпўлатга ўхшаб, космонавтликни орзу қиласидиган бўлиб қолди.

Дадаси тўгри айтади: шу кетиши бўлса Мамат отасидан ўтса ўтадики, қолишмайди. Ўтган йили баҳорда Мамат мактабга жинси шим кийиб келди. Чарм марка ёпиштирилган, фиж-фиж ялтироқ занжирли ҳақиқий жинси шим. Домла Ҳамроев уни койиди.

– Сен мурай шайтон тери брукларни кийма, – деди насиҳат қилиб. – Кийсанг ана шерс кий, ҳай ана крим-плин кий... Нима қиласан мурай брукни!

Танаффусда болалар Маматнинг атрофини ўраб олишди.

– Н-неча сўм? – деди Абдулла ҳавас билан.

– Сени пулинг етмайди. Мана, фирмений! – Мамат отнинг боши тасвирланган чарм маркага шапатилади. – Дадам Тошкентдаги бозордан олибдилар.

Тошпўлат Маматнинг шимини сеҳрлагандек томоша қиласар, хаёлида нуқул битта гап айланар эди. Ўзи ҳам шунаقا жинси шим кийиб, велосипедда Солиянинг олдига борса... Шундай деб ўйларди-ю, бу гаплар хомхаёл эканига ўзининг ақли етиб турар эди. Аввало, дадаси Тошпўлатга шим олиб бераман деб атайлаб Тошкентга бормайди. Борганда ҳам шунча пулга шим олмайди.

Орадан икки ҳафталар ўтгач «фирменний» шим жуда ҳам унчалик янгилик бўлмай колди, ўнинчи синфда ўқидиган бир эмас, уч бола худди Маматникидақа шим киядиган бўлишди.

Кўп ўтмай Тошпўлатнинг синфдоши – доим орқа партада ўтирадиган дароз Баҳодир ҳам шунақасидан кийиб келди. Баҳодир – колхоз бухгалтерининг ўғли, яхши бола. Бундан чиқди, унинг отаси ҳам Тошкентга борган. Тошпўлат ҳарчанд сўрамай деса ҳам чидаб туролмади.

– Қанчага олдинг? Ҳаданг Тошкентдан олиб келдиларми? – деди Тошпўлат шимнинг маркасини беихтиёр силаб.

– Нега? – Баҳодир елкасини қисди. – Маматдан олдим. Икки юз эллик сўм. Сенга лойиги ҳам бор.

\* \* \*

... Ташқарида ҳамон ёмғир ёғади. Ичкарида болалар, қизлар ўтиришибди. Ҳаммаси жимжит. Ҳамма муаллимнинг гапларини тинглайди. Тошпўлат ўз хаёли билан бўлиб, гап паҳтага келиб тақалганини сезмай қолади. У оғриётган оёғини икки қўллаб қисиб-қисиб уқалайди. Оғриқ босилгандай бўлади-ю, яна сирқиллайверади. Муаллимнинг гапи унинг қулогига олисдан эшитилаётгандай бўлади.

– Паҳтадан нималар олининишини биласизлар-а?  
– Биламиз, маълим.

Бир зумда Тошпўлатнинг хаёллари тўзиб кетади. Солиянинг овозини эшишиб, ярқ этиб қарайди. Солия ҳам муаллимга гапиряпти-ю, кўзи Тошпўлатда. Икковлари баравар кўзини олиб қочишиади.

– Биламиз, – дейди Солия муаллимга қараб. – Пахтадан ип олинади, газлама, ёғ...

– Кунжара, – дейди Мамат дўриллаб.

«Ўзинг кунжара! – дейди Тошпўлат хаёлан ижирғаниб. – Солиянинг олдидаги билагонлигини кўрсатмоқчи!»

Муаллим негадир хўрсинади.

– Одам нима учун меҳнат қилаётганини билиши керак, – дейди паст, бўғиқ овозда. Курткасининг чўнтагини узоқ титкилаб, сигарет чикаради. Чекиб, гугурт чўпини куюлтирилган сутнинг бўшаган банкасига ташлайди. Ҳа, айтгандай, қайси куни Мамат этакни тагига ёзиб, «Прима» тутатиб ўтирганида муаллим келиб қолди. Мамат шоша-пиша сигаретни ариқ ичига ташлаб, этигининг пошнаси билан эзғилади. Муаллим уришмади, сўкмади. Фақат бир оғиз гап айтди. «Нима фойдаси бор», деди. Мамат илжайди. «Ўзингизам чекасиз-ку, маълим», деди. Муаллим қараб турди-турди-да, яна бир оғиз гап айтди. «Мен қилган хатони сен такрорлашинг шартми?» Шундай деди-ю, кетаверди. Ҳозир Тошпўлат шуни эслади.

– Сиз болалар, бу ерда бекорга пахта териб юрибмиз деб ўйлайсизларми? – Муаллимнинг овози янаем босикроқ чиқади. – Пахта дегани ип-газлама-ю, ёғдан иборат деган гапмас. Тўғри, пахтадан юз хиллаб газлама олинади. Бир кило пахта толасидан йигирма метргача чит олинади.

– Эҳ-ҳе!

– Йигирма метр!

– Бу ҳали ҳаммаси эмас, – дейди муаллим ҳамон ўша оҳангда. – Пахта толасидан олинган корд бўлмаса,

машина бир қадам ҳам юролмайди. Ғилдиракка худди шу модда керак. Ҳозир чарм ўринида ишлаётган кирза ҳам пахта толасидан олинади. Пахта момифида тўқсон фоиз целлюлоза бор, ёғочдагидан икки ҳисса кўп. Чигит мойидан олинган нитроглицерин оғир касалликларни даволайди. Ғўзапоядан шифер, мебель ишланади. – Муаллим жимиб қолади. Сигаретни чуқур-чуқур тортади. Оғиздан тутун чиқариб, кафти билан ҳайдайди. – Ҳатто космонавтика учун ҳам пахтадан олинадиган маҳсулот керак... – дейди бир нуқтага тикилиб. – эслаб қолинглар: пахта толасидан эллик хил, ғўзапоядан, чигитдан ундан ҳам кўп маҳсулот олинади. Бир кило пахта ўттиз кило дон билан баравар баҳоланади. – У яна жимиб қоладида, секин кўшиб қўяди. – Сизлар катта иш қиляпсизлар, болалар.

Тошпўлат кўз қири билан Солияга қарайди. Солия елкаси оша сочини ўраётган алпозда туриб қолган. Худди суратга тушаётгандек. Мамат қаддини ростлаб олибди, оғзини ярим очиб, анграйиб қулоқ солади.

– Бизнинг юртимизда икки минг йил илгари ҳам пахта экилган, – дейди муаллим. – Археологлар бир қабрни очиб, пахта толасидан тўқилган арқон топишган. Лабораторияда текшириб кўришса икки минг йиллик арқон экан. – Муаллим сигаретни сут банкасининг копқогига эзгилаб ўчиради. – Европаликлар пахтани Колумб Америкага борганидан кейин билишган. Унгача пахта деганда шохида мева ўрнига кўй ўсадиган дaraohтни тушунишган.

... Еттинчи синфда ўқишаётгандан география дарсини домла Ҳамроев ўтганди. У ҳам Колумбнинг Америкага сафарини гапирган эди. Аммо дарсда болалар мудраб ўтиришганди.

Домла Ҳамроев дарсга ғалати кийимда киради. Эгнида олача тўн, бошида шляпа, оёғида этик. Бўйнида

резинка боғичли галстук. Аммо кўйлагининг тугмаси тақилмаган. Сарғиши ёқаси кўриниб туради. Зихлари тердан оқариб кетган шляпани стол четига қўяди-да, катта-кон, гулдор рўмолча билан бошини обдан артади. Кейин болаларга юзланади.

– Хўш, кимдан бошлаймиз?

Билган болалар доскага чиқиб жавоб беради, билмаганлари писиб ўтираверади.

Кейин домла Ҳамроев негадир бақириб, дарс ўта бошлайди.

– Амазонка дарёси...

Бир куни Абдулла домла Ҳамроевга қизиқ савол берди.

– Ер ш-шарида с-сув кўпми, е-ерми?

– Иби! – домла Ҳамроев бир чўчиб тушди. – Шуниям билмайсанми? Уч йилдан бери қулоғингга танбур чертяпманми, хўқиз? Ер шарининг учдан бири қуруқлик, колгани сув. – Домла «буни қаранглар» дегандек болаларга қаради. – Тағин аълочи эмиш, ўтир жойингга!

Абдулла қип-қизариб жойига ўтирди. Ўтирди-ю, баттар дудукланиб гапирди.

– О-оceanнинг т-тагиям ер-ер-ку! Д-демак, е-ер к-кўп.

– Иби, сен биласанми, китоб ёзган олимлар биладими? – Домла Ҳамроев терлаб кетган бошини рўмолчаси билан ишқаб-ишқаб артди.

– М-менам к-китобдан ў-ўқиганман.

Домла Ҳамроев бир зум талмовсираб қолди.

– Маҳмадана! – деди жеркиб. – Олимлар ҳам одам. Ёзаверади-да, бошига келган гапни. Мунай нарсаларни сен титкилаб юрасан. Ана, Маматни қара, жим ўтирибди. – У Маматга ўгирилиб, бошини янаем ишқаброқ артди. – Да-дангдан сўраб кўр, ҳолагидан келдимикин. Давлена сабил яна кўтаришопти.

Мамат негадир илжайиб, «хўп» деб қўйди...

Тошпўлат тушунди. Домла Ҳамроевнинг қон босими баланд. Тўқсон беш чойни «ҳолаги» дейди. Маматнинг дадаси домлага топиб бериб туради.

Домла Ҳамроев «боди» муаллимнинг нимага бунчалик ёмон кўришини Тошпўлат анчадан кейин тушунди. Домла дадасига хасрат килганида эшитиб қолди. «Боди» муаллимга унинг ярим ставка дарсини олиб беришган экан. Бу сухбат қиши охирлаб қолган кезлари бўлган эди. Тошпўлат дадаси билан томдан гўзапоя тушириб, энди овқатга ўтиришган эди. Домла Ҳамроев кириб қолди. Шунча қисташса ҳам овқатдан бир-икки чўқиган бўлди-ю, емади.

– Сиз, жўра, баҳузур, – деди қўлинини кўксига кўйиб. – Ҳозир овқат еб эдим. Мана бу гапни эшиting. Бодини районда боплабдилар. Аввал ҳам бир закун сўқиган эканлар. Ўқувчилик бир йилда тўрт ойдан ортиқ ўқимаёпти, бутун умри далада ўтиб кетопти, дебдилар. Институтга имтиҳон топширгани борган болаларнинг саводсизлиги шундоқ кўриниб қолопганмиш. Районга масала кўтариб чиқибдилар. Ҳай, у деб-бу деб жўнатишибди. Энди, иккинчи чоракда бир эмас, тўрт бачага «икки» чиқарибдилар. Дириектор яхшилик билан тушунишибди. «Биздаям пилон бор, ўзлаштириш пилонини юз поиз қилмасак, катталардан гап тегади», деса осмонга сапчибдилар. «Ақлни пилони бўлмайди, саводсиз болага уч кўёлмайман», дебдилар. Районга чақириб олиб, таранг тузлашибди. «Шахарнинг атобусига ўзингиз чипта оласизми ё паттандизни оберайликми», дейишибди. – Домла Ҳамроев хузур қилиб кулди. – Шахарга кетади-ю, акун қайтиш йўлини тополмайди. – Ҳамсояси гапини маъқуллашини кутиб, қараб-қараб кўйди. Тошпўлатнинг дадаси индамаганидан оғринди.

– Э, сиз нимани тушунасиз, жўра! – деди ҳафсаласи пир бўлиб. – Сиз бир чаласавод одам-да!

Тошпўлат дадасининг ҳақоратланганидан ғижиниб кетди. Қизик, дадаси парво қилмади. Индамай шавлани еяверди.

– Шу боди билан ишламайман! – деди домла Ҳамроев ингичка товушда. – Мактабдан бўшайдиган бўлдим. Каттаконлар билан гаплашиб келдим.

Тошпўлатнинг дадаси ялт этиб унга қаради.

– Иби! Нега мунай қилдингиз? Ўзингизни қишлоқ, ўзингизни мактаб. Ташлаб қайга борасиз?

Домла Ҳамроев қўл силтади:

– Дехқончилик қиласман. Эртадан кечгача бачаларга дарс ўргатиб жигар хуноб. Оладиган пул холагидай... Дехқончилик қиласман. Бари бир умрни ярмиси далада ўтопти.

... Чиндан ҳам шундай бўлди. Март ойидан бошлаб домла Ҳамроев дарсга кирмай қўйди. Катталар билан гаплашиб, колхоздан бригада олибди.

Мактабдаги ўқитувчилар домла Ҳамроевни эслашган бўлса, бордир, аммо болалар кўп ҳам куюнишмади. Бир ойдан кейин эрталаб домла Ҳамроев Тошпўлатларнига кирди. Ширчой ичиб ўтирган Тошпўлатга газета узатди.

– Даданг ишдан келса ўқиб бер. Албатта ўқиб бер, уқдингми?

Шундай деди-ю, шошилиб чиқиб кетди. Тошпўлат вараклаб қараса туман газетаси. Иккинчи бетида «Ташаббускор педагог» деган мақола чиқибди. Таҳрибали педагог Ҳамроев қалб даъватига амал қилиб ўқитувчиликни ташлагани, бригадага бошчилик қилаётгани, юқори хосил усталари сафидан ўрин олишга азму қарор қилгани мақталибди. Тумандаги бошқа педагогларни ундан ўrnak олишга чақиришибди.

Кечқурун Тошпўлат мақолани дадасига ўқиб берди. Дадаси қўл силтади.

– Бригадир бўлмоқчи экан, нимага беш йил ўқитувчиликка ўқиб давлатни аҳмоқ қилди. Агрономлика ўқисин эди! – Мақоланинг охири нашъя қилган экан шекилли, тажанглик билан шанғиллади (Тошпўлат дадасининг шанғиллаб гапирганини камдан-кам кўрганди). – Хўп гапларни топади-да муҳбирларам! Нима, маълимлик бригадирликдан паст бўйтими! Шу сиёғи бўлса бригадирликниям ташлаб қочади бу!

\* \* \*

... Тошпўлат сирқираф оғриётган тиззасини уқалаб ўтириб, муаллимнинг сўзларига қулоқ соларкан, дадасининг ўша гапларини эслайди. Ташқарида сим-сим ёмғир ёғади. Деразалар буғланиб қолган, ташқарига кўринмайди. Факат симёғоч учидаги лампочкагина олмадек қизарип турибди. Ичкарида болалар, қизлар муаллимга қулоқ солиб ўтиришибди.

– Одам ёлғиз ўзи учун яшамайди, – дейди муаллим бир нуктага тикилиб. Негадир кўзларида ҳорғин ифода пайдо бўлади. – Ёлғиз ўзи учун яшамайди, – деб қайтаради у тагин. – Бугун сиз тераётган пахта эртага ер шарининг бурчак-бурчакларига тарқалади. Чехословакия, Финляндия, Япония... Эх-хе! – Муаллим болаларгамас ўзига-ўзи сўзлаётгандек хаёлчан гапиради. – Агар шу пахта етиб бормаса, қанчадан-қанча фабрикалар ёпилади. Қанчадан-қанча одамлар ишсиз қолади.

Муаллим бир зум жимиб қолади.

– Энди ётинглар, – дейди болаларга юзланиб. – Ёмғир тинса далага чиқамиз...

Болаларнинг уйқуси келмайди. Кун бўйи ётишган.

Тошпўлатнинг тагидаги ўриндиқда ўтирган Абдулла бўйинини чўзиб, муаллимга қарайди.

– М-маълим, кваз-зарлар тез-тез п-пайдо б-бўладими? – дейди.

Муаллим унга майин жилмайиб қарайди.

– Йигирма йил илгари олимлар бешта квазарни ку-затишган. Квазар – ўта катта юлдуз дегани. Ҳажми күёшдан миллион марта катта бўлади. Олимлар квазарларни галактикаларнинг ядроси деб тахмин қилишяпти. Квазарлар пайдо бўлиши билан телескоплардан дарров кузатишади...

Тошпўлат жойига ёнбошлаганча, секин-секин уйқуга кетади. Қулогига муаллимнинг гаплари элас-элас чалинади. Балки квазарлар биз билмаган коинотнинг күёшидир... Балки ўша галактикаларда ҳаёт бордир... Тошпўлат туш кўради. Тушида саратон күёшида қизиб ётган тупрок кўчадан чопиб бораётган эмиш. Чопиб борармиш-у, оёғи сирқираф оғрирмиш. Офтоб шунақанги қиздирармишки, нафас олишга қийналармиш. Бирдан Солия пайдо бўпти. Кўлида китоб бормиши. Атлас кўйлак кийиб олганмиш. Тошпўлат унинг олдига югуриб бормокчи экан, аразлагани эсига тушиб қопти. Солия бўлса қўлидаги китобни улоктириб юборибди. Тошпўлат қараса, бу – Солия эмас, Мамат эмиш. Мамат атлас кўйлак кийиб олганмиш. Тошпўлат оёғи чалишиб, йиқилиб тушибди. Мамат унинг тепасига келиб, нукул «тур-тур» дермиши.

Тошпўлат инграб кўзини очди. Қараса ёнида Абдулла турибди.

– Тур, – деди елкасига туртиб. – X-ҳамма т-туриб кетди.

Тошпўлат терлаган пешонасига кафтини босиб кўрди, кўли чўғга теккандай бўлди. Ютинган эди, томоғи ачишиб оғриди. Энди иккала оёғи ҳам зирқираф оғрир, боши оғирлашиб кетганга ўхшарди. У амаллаб «иккинчи қаватдан» тушди.

– К-касалмисан? – Абдулла унга ачиниб қаради. – Б-бўлмаса ётавер.

Тошпўлат индамай бош чайқади. Оёғи оғриётганини сезидирмаслик учун хиёл оқсоқланиб ўртоғига эргашди. Икковлари ташқарига чиқишиди. Ёмғир тинибди. Аммо ҳаво рутубатли, зах осмонда хўмрайган кулранг булутилар муаллақ туриб қолган. Ҳовлидаги симёғоч учида ҳамон қалпоқли лампочка ёниқ турибди. Эллик қадамча наридаги томи шифер билан ёпилган атрофи очиқ бостирмада бошига кўрпабоп матодан рўмол ўраган кампир куймаланиб юрибди. Бир бурчакда алюмин баксамовар. Бир бурчакда чўян ўчоқ. Кампир бак-самовар тагига ғўзапоя тиқади, бакнинг дудбуронидан ловуллаб аланга кўтарилади. Кулоги, думи кесилган каттакон ит кампир атрофида ўралашади. Кампир ғўзапоя ўқталиб, уни ҳайдайди. Ит лапанглаб нарироққа боради-да, тагин қайтиб келади.

Янаям нарироқда атрофи бўз мато билан пана қилинган ҳожатхона. Болалар навбат кутиб туришибди. Тошпўлат канал томондан ювиниб келаётган қизлар орасида Солияни кўрди. У елкасига сочиқ ташлаб олган, эгнида эски, қалин жун кофта. Ундан орқароқда сочигини белига bogлаб олган Мамат келяпти... Тошпўлат оқсоқланмасликка ҳаракат қилиб, барак орқасига ўтиб кетди.

Узун столнинг бир томонига болалар, бир томонига қизлар ўтириб, нонушта қилишди. Тошпўлат ширин сутли чойни ҳар ютганда томоғи ачишади. Бутун вужудидан олов чиқиб кетаётгандай, аззори бадани қизиб бораётганини ўзи ҳам сезиб турарди.

Чойдан кейин болалар ўрнидан туришди, ҳар ким ўз этагини қўлига олди. Эшик олдига борганида муаллим Тошпўлатни тўхтатди.

– Бугун сен навбатчи бўласан, – деди секин.

Одатда қизлар галма-галдан баракда қолиб, навбатчилик қилишади. Навбатчи хонани супуриб-сидиради,

овқат учун ошпаз кампирга картошка арчиб, пиёз тўғраб беради.

– Керакмас, – деди Тошпўлат. Овози хириллаб чиқди.

Муаллим кафтининг орқасини унинг пешонасига босиб кўрди.

– Исимтанг баланд-ку, – деди кўзига тикилиб. – Майли, дам олавер. Солия навбатчилик қилади.

– Керакмас! – Тошпўлат тажанглик билан қўл силтади. – Керакмас!.

Солия эшиқдан чиққан экан. Муаллимнинг гапини эшиитди шекилли, оstonага қайтиб кетди.

– Бугун Шарифа навбатчи-ку, маълим, – деди goҳ муаллимга, goҳ Тошпўлатга қараб. Тошпўлат дарров кўзини олиб қочди. У Солиянинг ҳамон ўзига қараб турганини хис этиб, баттар асабийлашар, бирорвнинг, айниқса, Солиянинг раҳми келишини хоҳламасди. Иложи борича дадил қадам ташлаб ташкарига чиқди.

Ер шу қадар сувга тўйиб кетганки, яна бир томчи ёмғир ёғса туфлаб ташлайдигандек. Пахтазор ботқоққа айланган. Ҳар қадамда оёққа бир ботмон лой илашиб чиқади. Икки кунлик ёмғир эгатларга тўқилган пахтани ерга чакичлаб ташлаган. Қўлга муздай урилади. Тошпўлатнинг қўлига сузак кириб кетса ҳам бадани терлайди, нуқул терлайди. Икки оёғи сирқираб оғрийди. Ҳўл пахтага тўлаётган этак тиззасига урилиб баттар қийнайди. Тушга яқин офтоб кўринди. Булутлар орасидан чиқиб, нимтатир илиқ нур сочди. Намиқкан ғўзалардан спиртга ўхшаш аччиқ ҳид таралди. Жигарранг пахтазор устида енгил ҳовур кўтарила бошлади. Бир маҳал Солия яримлаган этагини кўтариб, тележка томон кетаётганини кўрди-ю, ўз этагининг боғичини бўйнидан ечди. Орқалаб йўл четига чиққунча жиққа терга ботиб кетди. Икки марта сирғалиб йиқилиб кетишига оз қолди. Унинг боши фувиллаб борар, Солия орқасига

қараб-қараб кетаётганини кўргани учун текисрок қадам ташлашга уринар эди.

Нихоят катта йўлга чиқди. Этигининг лойини қоқиб, тозалаган бўлди. Солиянинг терган пахтасини тарозига кўйганини кўрди. Шляпали табелчи унга илжайиб, алланима деди. Солия қовоғини солди. Тошпўлат қадамини тезлатди. Ҳамон боши ғувиллаб борар, икки кўзи Солияда эди. Солия этакни тарозидан олиб, тележка тепасида турган телпакли одамга узатаётганини кўрди. Бўйи етмади. Телпакли киши эса эгила қолмайди. Табелчи илжайиб яқин борди. Қарашган бўлиб қўлини Солиянинг қўлтиғи тагидан чўзди. Бўртиб турган кўксига бегона кўл текканидан қўрқиб кетган Солия сесканиб, ўзини четга олди. Кўзларини катта-катта очганча ҳайрон бўлиб табелчига қаради. Паҳта тўла этак ерга тушди. Тошпўлатнинг юраги отилиб кетгандай бўлди. Елкасидаги этакни улоқтириди-ю, учиб бориб табелчининг ёқасига ёпишди.

– Нега? – деди табелчини кучи борича силтаб. – Нега? Нега??!

Табелчининг шляпаси учиб кетди. Такир боши силкиниб, кўзини бақрайтирганича Тошпўлатнинг қўлига ёпишди.

– Юбор! – деди Тошпўлатнинг қўлидан паҳталигининг ёқасини бўшатишга уриниб. Бироқ Тошпўлат унга мушукдек ёпишиб олган, кўйиб юбормасди.

– Нега! Нега! – дерди бақириб.

Табелчи унинг важоҳатидан қўрқиб кетди.

– Юбор-е! – деди титраб. Бор кучи билан юлқиниб, орқага ташланди. Тошпўлатнинг қўлини омбирдек ча-йир қўллари билан қайириб ёқасини бўшатди-да, силтаб улоқтириб юборди. Тошпўлат лойга ёнбоши билан йиқилди. Негадир қўкрагининг чап томонида оловдек ловуллаган оғриқ сезди. Шу пайтгача ҳеч қачон юраги санчмаган эди.

– Нега! Нега! – деб ҳайқирди лой ерни муштлаб. – Нега! Мараз!!!

Бутун вужуди титрар, ҳамон кўкрагининг чап томони ловуллаб ачишар эди. Бир маҳал кимдир унинг кўлтиғидан олиб кўтарди. Қараса, бошида муаллим турибди. Орқа томонда табелчининг овози келди.

– Иби, девонами бу!!!

Муаллим Тошпўлатнинг елкасига қўлини қўйди.

– Тура кол. Касалсан-ку, кара ёниб кетяпсан.

Тошпўлат ҳеч кимга қарамай, канал томон кета бошлиди. Ҳеч кимни кўришни ҳам, ҳеч кимга кўринишни ҳам истамасди.

Анчадан кейин орқа томондан шип-шип қадам товуши эшитилди. Тошпўлат бурилиб қаради: муаллим бошини қуий солганча, секин-секин келяпти.

– Кетинг! – деди Тошпўлат алам билан қўл силтаб. – Кетинг!

Муаллим яқинроқ келиб тўхтади.

– Ҳозир ювинамиз, – деди осойишта оҳангда. – Бориб дам оламиз. Машина чақираман... – У Тошпўлатнинг кўзига термулди. – Ревматизминг борми?

Тошпўлат индамай бурилиб кетди.

Ётоққа қайтишганда муаллим унга дори ичирди. Портфелини титкилаб, битта лимон топди. Парраклаб кесиб, чойга солди. Униям ичирди. Ўрнига ётқизиб, ўраб қўйди. Анчагача ёнида ўтирди. Тошпўлат баданида хузурбахшилик сезиб, ухлаб қолди. Туш кўрди. Осмонда, шундок боши устида каттакон юлдуз ёниб турганмиш. «Квазар!» дермиш у кичқириб, «кваза-а-а-р!» дермиш яна кичқириб. Учаверибди, учаверибди... Пастга қараса Ер худди глобусга ўхшаб кўринармиш. Океанлар, Африка... У бир қарашдаёқ Японияни топибди. Худди харитадаги дек. Битта узунчоқ, учта кичкина орол. У чўнтағига қўлтиқса, бир чаноқ пахта чиқибди. Пахтани қўйиб юборган

экан, худди оппоқ капалакдек пирпираб-пирпираб Ер томонга учиб кетибди. Орол устида турган қисиқ кўзли япон бола чанокни илиб олибди-да, унга қараб кўл силтабди. Алланима деб қичқиравмиш-у, Тошпўлат унинг овозини эшигмасмиш. Бола эса қўлларини силкитиб, қувонч билан нуқул иргишлармиш. «Кваза-ар!» – дермиш Тошпўлат шодликдан нафаси қайтиб. – Мен келдим, «кваза-ар» Борган сайин юлдузга яқинлашармиш. Ёнида Солия ҳам учиб келаётганмиш. Атлас кўйлак кийиб олганмиш...

\* \* \*

У қанча ухлаганини билмади. Бир маҳал ғўнғир-ғўнғир товушдан уйғониб кетди. Анчагача қаердалигини билолмай гарангсиб ётди. Нихоят ўзининг жойида – «иккинчи» қаватда ётганини идрок этди. Оёғининг оғриги хийла босилган, фақат боши лўқиллаб оғриб тураг, терлаб кетган эди. Барак ичи ним қоронғи, деразалар хира оқариб кўринар, окшом тушиб қолган эди. «Чироқни ёкишмабди, – деб ўйлади негадир ҳозир кўрган тушини эслаб. – Ёқишиxa яхши бўларди».

Боя қулогига чалинган ғўнғир-ғўнғир товуш яна эшитилди.

– Ҳаммаси қонуний ҳал бўлган эди-ку!

Бу – муаллимнинг овози эди. Тошпўлатнинг кўнгли негадир хижил бўлди. Нимага шунаقا бўлаётганини кейин англади: муаллимнинг товуши қандайдир асабий, ҳатто аламли чиқди. Илгари ҳеч қачон бунаقا охангда гапирган эмасди.

– Ахир ҳаммаси қонуний ҳал бўлган-ку, нимага яна бунаقا килишади? – деди у баттарроқ асабий овозда.

– Мен қаердан билай? Райондан келтириб беришди.

Тошпўлат бу овозни таниди. Мактаб директори! Қаддини ростлашга уриниб, қўлига таянганча, бошини кўттарди. Терлаб кетган баданига нам, совуқ шамол тегди.

– Ёзиб қўйибди-ку, повесткага: «Шаҳар судига 14 ноябрда етиб келиши мажбур» деб.

Тошпўлатнинг юраги ёмон нарсани сезиб, сирқираб кетди. Мўралаб қаради. Стол олдидағи ҳарракда муаллим билан директор нариёққа қараб ўтиришар, муаллимнинг жингалак сочли боши, директорнинг йирик гавдаси, айвони кенг шляпаси ғира-шира кўриниб туарди.

– Бормайман! – муаллим алам билан ёғоч столни муштлади. Директорга юзланди. – Тушунсангиз-чи, Маҳмуд Турсунович! Мен ҳам одамман! Ёмон кўрган, жирканган кишим билан туролмайман-ку!

– Ҳай, мен нима қилай ахир! – директор ҳам овозини баландлатди. – Повесткани мен ёзган эмас-ку!

– Бормайман! – муаллим қатъият билан бош чайқади. – Менга деса отиб ташласин! Хиёнат қилган хотин билан яшамайман!

– Ҳай, нега отади! – Директор унинг елкасига қўлини қўйди. – Биласиз, закун хотин тарафни олади. Бир боринг. Ҳеч ким сизни боғлаб қўймайди-ку! Суд билан ҳазиллашиб бўладими? Тағин «вторично» деб ёзиб қўйибди.

Муаллим узоқ жимиб қолди. Тошпўлат ғира-шира коронғиликда унинг жингалак сочли бошини чанглаб, столга мук тушганини кўрди.

– Болалар-чи? – деди бошини кўтармай. Овози хириллаб чиқди. – Болалар нима бўлади?

– Болалар нима? – директор юпатувчан оҳангда се-кин гапирди. – Ҳар доим териб юрган пахтаси. Эртага ўрнингизга математика ўқитувчисини юборамиз. Қайтиб келгунингизча пахтаем...

– Печка сўрагандим, – деди муаллим бошини кўтармай. – Совхоз директори тўртта печка бермоқчи эди. Тезроқ олинглар. Болалар совқотиб қоляпти.

– Ўзимиз тўғрилаймиз, сиз бораверинг ахир...

Тошпўлат муаллимнинг оғир тебраниб ўрнидан турганини, йиғма каравот бошидаги михга илиғлиқ плашини олиб билагига ташлаганини кўрди. Плаш тагида осиғлиқ турган рубобнинг торлари инграб юборгандай бўлди.

– Маълим, – деди Тошпўлат овози титраб.

Муаллим ярқ этиб шу томонга қаради. Директор ҳам бошини бурди. Муаллим тез-тез юриб, Тошпўлатнинг олдига келди.

– Исиманг тушдими? – деди пешонасига кафтини босиб. – Маладес! Эртага машина келади. Касалхонага олиб боришади. Гаплашдим. Ёт, ўралиб ёт.

У илдам бориб, йиғма каравот тагига тиқиб қўйилган дипломат портфелини сугуриб олди. Эшик ёнига этиб, чирокни ёқди. Ётоқ ичи ёришиб кетди.

– Маълим! – деди Тошпўлат йиғлаб юбормаслик учун лабини тишлаб. – Маълим...

Муаллим унга қўл силтаб жилмаймоқчи бўлган эди, эплолмади, лаби аянчли бурилиб кетди. Тошпўлатнинг назаридаги музукларни кўзида ёш айлангандек бўлди.

– Турма, – деди бўғиқ овозда.

– Турма, шамоллайсан!

Шундай деди-ю, директорга эргашиб, эшикдан чиқиб кетди.

– Маълим... – Тошпўлат бутун кучини тўплаб, ўрнидан турди. Ташқарида трактор тариллади.

– Маълим, кетманг! – Тошпўлатнинг бўғзидан титроқли йиғи отилиб чиқди. – Кетманг! Кетма-а-анг!

Иккинчи «қаватдан» сакраб тушди. Пайтавасини ўрамоқчи эди, титраётган қўллари яхши қовушмади. Сарпойчан оёғини муздек этикка тиқди-ю, кўйлакчан эшикка отилди. Туман тушган, қоронги қуюқлашиб борар, бостирма олдидан жилган трактор йўл томонга бурилар эди. Тошпўлат трактор прицепининг устига чиқиб олган

муаллимни кўрди-ю, остоңада папирос тутатиб турган директорни тутиб ўтиб югорди.

– Кетманг! Кетманг, маълим! Кетма-а-анг! – Раста бўлган хирқироқ овозини баралла қўйиб, йиглаб юборди.

Директордан ҳам, козон бошида чўмич ушлаб турган ошпаз кампирдан ҳам уялмади, бу – болаликнинг сўнгги йигиси эканини идрок ҳам этмади.

– Кетма-анг! – деди нафаси қайтиб! – Маълим!

Муаллим қўли билан трактор прицепининг орқа бортини чангллаганча қичқириди:

– Ичкари кир, шамоллайсан!

Трактор қаттиқ тариллаганча тезлаб юриб кетди. Тошпўлат кучи борича югорди. Юраги гурсиллаб урар, совуқ ҳаво нафасини бўғар, трактор ғилдирагидан сачраётган лой юз-кўзига урилаётганига парво қилмас, ҳансираф қолганди. Муаллим алланима деб қичқирав, аммо тракторнинг гуриллашидан гапини англаб бўлмасди.

Катта йўлга чиққанда трактор анча узоклашиб кетди. Тошпўлат ҳамон тўхтамас, ҳарсиллаб югуриб борар, сирғаниб-сирғаниб кетарди.

Яна бир неча қадам югуриб борди-ю, тийғаниб, юзтубан йиқилди. Титраётган қўлларига таяниб, қаддини ростлади.

– Кетма-анг! – деди кўзидан тиркираб чиққан ёшни лой қўллари билан артиб. – Маъли-им!

Фира-шира қоронғиликда пахтадан қайтаётган болалар кўринди. Улар кўчанинг икки четига чиқиб, тракторга йўл беришди. Кейин прицеп устида турган муаллимни кўриб қолишиб шекилли, ҳаммалари трактор кетидан югурга бошлишди.

Коронгулик қўйнида: «Маълим! Маълим!» деган ни долар туманли ҳавони титратди.

Тошпўлатнинг мадори қолмаган, лой босган йўлда чўккалааб қолган эди. Бошқа товушлар орасида Солиянинг ҳам овозини эшилди, аниқ эшилди.

– Маълим-и-им!

Энди трактор ҳам, прицеп ҳам кўринмас, фақат моторнинг гуриллаган товуши эшитилиб турар, муаллим булутлар орасига, туманлар орасига сингиб борар эди.

*1982 йил*

---

---

## ҚАЛБИНГГА ҚУЛОҚ СОЛ БИРИНЧИ ҚИСМ

Қиши келди. Кечагина беморнинг инграшидек ҳазин куз садоларига тўлган боғлар бугун жимиб қолди. Ҳазон шитирламайди яланғоч шохларга аргамчи осган мезонлар чайқалмайди...

Қиши келди, шаҳарда уни дарров пайқашмади ҳам. Тўғри, талабалар аллақачон пахтадан қайтиб, ёмғирдан ивиган боғлар яна ошиқ-маъшуқларнинг шивир-шивирига тўлди. Автомат-телефон будкаларидан тагин атириси келадиган бўлиб қолди. Кинотеатр кассаси олдида ёмғирдан қочиб, навбат кутаётганлар кўпайди. Аммо, ҳақиқий қиши биринчи қор ёққанида билинди.

Ёдгор шу куни тушдан кейин кутубхонага борганди. Ҳали имтиҳонлар узок бўлгани учунми, залда ўн-ўн беш кишидан бўлак хеч ким йўқ эди. Кутубхонада вазмин бир сукунат хукм сурар, чироқлар ёқиб қўйилган, ташқарида эса ёмғир шовилларди. Ёдгор буғланиб кетган дераза ёнига ўтирганча мутолаага берилди.

– Қор ёғаяпти, – деди аллаким ўйчан овозда.

Ёдгор бирдан эти увшандек, деразага қаради.

Оқшом тушиб, ташқари қоронfilaшиб қолган, гупиллатиб йирик-йирик кор ёғарди. Ёдгор ёмғирнинг шовуллаши аллақачон тинганини энди пайқади. Ҳар сафар биринчи қор ёғаётганини кўрганида унинг қалбини аллақандай тушуниб бўлмас, этни жунжиктирувчи ўйчан туйғу қамраб олар, елкасидан оғир бир юк босиб тушаётгандек бўлаверарди. Шу топда залда ўтирган бошқа

одамлар ҳам негадир бир лаҳза сукутга кетишган, ҳамма ташқарига қараб ўтиради.

Қор қоп-корайиб ётган хўл асфальтга тушиб, тез эриб кетар, онда-сонда филдиракларини шариллатиб, машиналар ўтиб қолар, уларнинг ҳам овози одатдагидан бўғикроқ чиқаётганга ўхшарди. Бора-бора кўча бетидаги уйнинг қия томи оппоқ бўлиб қолди. Кейин аста-секин кўчанинг ўзи ҳам оқара бошлади.

Ёдгор Италия архитектурасига оид гапларни яна ўқишига тушди. Анчагача миясига ҳеч нарса кирмай турди-ю, кейин ўша сахифаларни жиддийлик билан қайта-қайта такрорлай бошлади.

– Кеч бўлиб кетди, йигитча, бир ўзингиз қолдингиз.

Ёдгор кутубхоначи хотиннинг таниш овозини эшишиб, бошини кўтарди. Зал тўридаги алвон ёпилган стол қаршисида ўтирган жиккаккина татар аёл китобларни бир чеккага тахлар, юпқа гардишли кўзойнагини чироқда ялтиратиб, унга қараб-қараб кўярди.

Ёдгор ён-верига аланглаб, зал бўшаб қолганини кўрди-да, дарров ўрнидан турди.

– Кечирасиз... раҳмат, – деди китобларни топшириб.

Конспект дафтари ни плашининг тагидан қўлтиғига қистириб, ташқарига чиқди.

Муздек қор нафаси юзига урилиб, бир лаҳза зинада тўхтаб қолди.

«Аксига шапка ҳам киймаган эканман», деб ўйлади у зиналардан тушиб бораркан.

Қорбобо ҳамон шаҳар устида супрасини қоқар, қиши фариштаси момиқ қанотларини беозор силкитар, осмон негадир қизгиш тус олган эди. Ғознинг тумшугига ўхшатиб ишланган симёғочлардаги лампочкалар остидан нурли нуқралар ёғилар, ғужғон ўйнаб, айқаш-уйқаш бўлиб кетарди. Кўча ўртасида машиналар изи тасмадек корайиб қолибди, аммо йўлкаларга оёқ ботади. Одам

сийрак. Ҳамма ин-инига кириб кетган бўлса керак. «Қиши  
ўчоғи тор...» Рост гап.

Ёдгор бўйни музлаб кетганини пайқаб, плашининг  
ёқасини кўтариб олди-да, тез-тез юриб кетди. Симёғоч  
тагида турган йигит билан қизни кўриб, кулиб қўйди.  
«Шу ҳавода нима зарил». Улар ҳам қор ёғишини би-  
лишмаганми, юпқа плаш кийиб олишган эди. Қиз ти-  
лини чикарганча сакраб-сакраб қор учқунларини илиб  
олмоқчи бўлар, аммо учқунлар унинг тилига кўнмас, қиз  
бошқа учқунни мўлжаллаб сакрар, йигит эса завқланиб  
кулар эди. Унинг кулгиси жимжит кўчада янграб эшити-  
лар, бу кулгига алланечук баҳтиёрик бор эди.

Ёдгор ҳам беихтиёр кулиб юборди. Кейин уларга ха-  
лал бермаслик учун тезлаб ўтиб кетди.

Навоий театрида томоша тугаган бўлса керак,  
чироқлар ўчиб қолибди. Фонтан атрофидаги майдон  
ҳам кимсасиз, скамейкаларни қор босган. Универмаг  
пештоғида лампочкалар занжири липиллаб айланади.  
«Янги йилингиз билан» деган ёзув гоҳ ёнади, гоҳ  
ўчади.

Ёдгор кимсасиз трамвай бекатига келиши билан ёни-  
дан «Тез ёрдам» машинаси қизил чироғини липиллат-  
ганча фарёд солиб учиб ўтди. Қор тумани орасида унинг  
ноласи анчагача акс садо бериб турди. Кейин «Тошкент  
мехмонхонаси» деган пуштиранг чироқ ёниб турган би-  
нодан қаҳқаҳа товуши, жаз садоси янгради.

«Тошкент ғалати шаҳар, – деб ўйлади Ёдгор совқотган  
оёқлари билан ер тепиниб. – Қачон қарасанг, кўз ёши би-  
лан кулги ёнма-ён туради».

– Марказий универмаг тарафдан гийқиллаганча трам-  
вай чиқиб келди.

– Хадрага боради, Хадрага! – деди жун рўмолга  
ўранириб олган аёл олдинги эшикни очиб.

– Майли! – Ёдгор зинадан сакраб чиқди.

Вагон деярли бўш эди. Ўртадаги ўриндиқда жигарранг пальто кийган қиз билан қизил шарфини бўйнига ўраб олган бир йигит қисилишиб ўтирас, уларнинг тепасида курткали бошқа бир йигит сигарет тутатиб турарди.

«Яна ошиқ-маъшуқлар», деб ўйлади Ёдгор хаёлан жилмайиб.

Кейин бир нима эсига тушгандай, беихтиёр яна ўша томонга қараб қолди. Қизнинг оппок, тиник юзи, йирик кўзлари шу қадар таниш эдики, бир лахза кўз узолмай турди. «Қизиқ, қаерда кўрган эканман? – деб ўйлади у гоҳ қизга, гоҳ шарфли йигитга қараб. – Кўрганман, аниқ кўрганман».

У ўзининг ноқулай аҳволда туриб қолганини, бирорнинг «қизи»га сукланиб қараётгандай бўлаётганини анчадан кейин пайқади. Олдинги ўриндиққа ўтириб, деграздан ташқарига қаради. Вагон ғизиллаб борар, кўча чироқлари хира доғдек тизилишиб ўтар, аммо ҳеч нимани кўриб бўлмасди: дераза хира тортиб колибди.

Унинг хаёлига ўрнашиб олган савол ҳамон нари кетмасди. «Қаерда кўрувдим-а?!»

Бир бекатми, икки бекатми ўтганидан кейин бирдан миясига лоп этиб урилди: «Бўлди! Театр-рассомлик институтида ўқыйдиган қиз. Худди ўшанинг ўзи!»

Кузда, Темурийлар даври санъатига багишлаб ўтказилган ЮНЕСКО симпозиуми арафасида телевидениеда талабалар мусобақаси ташкил қилинган эди. Рассомлар билан архитекторлар ўртасида ўтказилган мусобақада Ёдгор ҳам қатнашган, ўшанда бу қиз Бехзод, унинг шогирдлари тўғрисида шу қадар тўлқинланиб гапирган эдики, Ёдгор унинг отини билолмай қолган бўлса ҳам билимiga тан берган, узоқ вақтгача қизнинг гапларини, чиройли чехрасини унутолмай юрган эди. «Худди ўзи» деб ўйлади у ҳаяжонланиб. Ўшанда бу қиз унинг наздида фариштадек бўлиб жонланган, хаёлида алла-

нечук покиза из қолдирган эди. Ҳозир унинг аллаким билан қисилишиб ўтиргани Ёдгорга ёқмади, Кўнгли хижил тортди, Аммо қайрилиб қарагиси келмади. «Менга нима?!»

Бир оздан кейин вагоннинг тарақлаши орасидан қизнинг товушини эшитди:

– Қанақа одамсиз, қўйиб юборинг, ахир!

Ёдгор ҳайрон бўлиб, ўғирилиб қаради. Бояги йигит қизни ўриндиқ бурчагига янаям қисиб олган, қип-қизил юзидан сурбетларча табассум аримай, алланималарни тушунтирап эди.

– Кочинг, мен тушаман, – деди қиз йигитни итариб.

– Секин, яхши қиз, секин, – деди шарфли йигит ҳамон кулиб.

Ёдгор, қиз бу йигитларга бегона эканини тушунди, шу ондаёқ қизнинг ранги қув ўчиб, рўмоли бўйнига тушиб кетганини, катта-катта чиройли кўзларида кўркув борлигини пайқади. Қиз ингичка кўллари билан яна йигитнинг кўкрагидан итарди.

– Кўйвор, – деди йиғламсираб.

Ёдгор кўнглида бу қизга нисбатан алланечук яқинлик сезди. Шилқим болалар факат уни эмас, ўзини ҳам қўшиб ҳақоратлаётгандек, фижиниб кетди.

– Нега бирорвга осиласан? – деди ўзини аранг босиб. – Тинч кўй уни!

Сигарет тутатиб турган курткали йигит Ёдгорга хўмрайиб қараб кўйди-ю, қизнинг тепасига энгашиб кулади:

– Кўрқманг, хеч нима қилмайди... Қор... Юмшок...

Унинг беҳаёқ қарашидан нияти ёмон эканини билди-ю, Ёдгорнинг қони қайнаб кетди. Сакраб турди-да, югуриб келиб, ўтирган йигитнинг шарфига ёпишди. Силтаб ўрнидан турғизди. Бир лаҳзада қиз учиб ўрнидан турганини, этикчаларини тақиллатганча қўлидаги тугунчаси-

ни силкитиб, ҳайдовчи томонга чопганини кўриб қолди. Эшик тарақлаб очилди. Қиз вагон зинасида турганча бир дақиқа бурилиб қаради. Ёдгор унинг чиройли кўзларида чуқур миннатдорчилик борлигини сезиб қолди. Аммо у ҳамон ўзини босиб ололмас, титрар эди.

Вагон яна ғизиллаб кетди. Ёдгор йигитнинг ёқасини кўйиб юборди.

– Шуям ишми? – деди гоҳ у, гоҳ бу йигитга караганча овози титраб.

Афтидан, йигитлар бундай бўлишини кутишмаган экан шекилли, бир-бирларига тезгина қараб олишди. Ёдгор қулок-чаккасига келиб тушган мушт зарбидан ўриндиқ суюнчиғига таяниб қолди. Шарфли йигит унга яна бир мушт туширди.

Ёдгор интернатда ўқиб юрганида кўп муштлашган эди. Аммо анчадан буён бирорни чертган эмасди. Кўз ўнги қоронгилашиб кетди-ю, тишини ғижирлатиб, устига ёпирилиб келаётган курткали йигитни тепди. Йигит букчайганча қорнини ушлаб нари кетди. Зум ўтмай, яна ўша гурзидай мушт гарданига тушди. Ёдгор ўриндиқقا чўкиб қолди.

– Безорилар, туш ҳамманг! – ҳайдовчи хотин кабинадан бошини чиқариб бақирди. – Ҳозир милиция чақираман. Эй, милиция!

Ёдгор ҳамон чаккасини чанглаб, букчайиб ўтиради.

Ҳайдовчининг дағдағаси таъсир қилдими, йигитлар олдинга ўтиб кетищди.

Шарфли йигит зинадан тушиб бораркан, Ёдгорга мушт дўлайтириди.

– Иккинчи ювилмаган қошиқдай бирорнинг ишига суқилмайдиган бўласан!

Ёдгор индамади. Рўмолчасини олиб, юзига босди. Оёги остида эзғиланиб ётган конспект дафтарини олиб, қўлтиғига қистирди.

Яна бир бекат юриб тўхтагач, ҳайдовчи хотин унинг тепасига келди.

– Ёмон урдими? Ўлдиришдан ҳам тоймайди бу безорилар.

Ёдгор, ҳечкиси йўқ, дегандай ўрнидан турди. Унинг қовоги ачишар, тишлари сирқилларди.

...Ҳамон қор ёғар, кўча жимжит, кимсасиз эди. «Бу ёғи қизик бўлди-ку», деб ўйлади у йўлка чеккасидаги мармар фавворачага юзини тутиб. Кейин конга беланган рўмолчасини чайди. «Қизик, сув илиқ-а... Айтгандай, рассом қиз етиб олганмикин уйига». У қизнинг сўнгги дақиқада ўзига миннатдор тикилиб турган кўзларини эслади. Фотоаппарат бир лаҳзада киши тасвирини қандай илиб қолса, унинг тасаввури ҳам қизнинг ўша киёфасини шундай эслаб қолган эди. Ўшанда ҳам худди шундай бўлганди. Мусобақада ўзларининг институти ютқазган бўлса-да, қувонган, кўплар орасидан шу қиз айниқса, ажралиб кўриниб турганига севинган эди. «Чиройли қиз бўлса, нима қиларкан яrim кечада кўчага чиқиб, – деб ўйлади у куюниб. – Кейин қизнинг кўлидаги гулдор рўмолга ўроғлик тугунчани эслади. – Бирон ташвиши бордир-да?»

У ётоқхонага етиб келганида алламаҳал бўлганди. Чироқлари хира ёниб турган йўлакдан ўтиб, тўртинчи қаватдаги ўз хонасининг эшигини очди. Ичкарига қадам кўйиши билан оёқ остида турган чойгумга қоқилиб кетди. Чойгум тарақ-турук килиб, тун сукунатини бузиб ўборди. Ўз каравотида ётган Зойиржон ғингшиб кўйди.

«Оббо, энди шуям бормиди?» Ёдгор чироқни ёқди. Газ плитага қўйилавериб сарғайиб кетган чойгумни бир чеккага олиб қўйди. Плашининг қорини қоқиб, каравотга ташлади.

Зойиржон нон-чой қилиб ётган шекилли, клеёнка ёпилган столда нон бурдалари, парраклаб тўғралган кол-

баса, қанд ётарди. Чироқ ёниши билан стол устидаги сувраклар ўрмалаб қочди. Улар хонани ҳарчанд тоза тутишга уринишмасин, сувраклардан кутулиша олмасди.

Зойиржон икковлари икки йилдан буён шу хонада туришади. Шу икки йил ичида бу хонанинг қофози кўчган деворлари ҳам, бесёнақай шкаф устида ётадиган чизмалару китоблар ҳам, лиқиллаб турган стуллару ювилавериб сизилиб кетган дарпардалар ҳам Ёдгорга қадрдон бўлиб қолган эди. Қиши кунлари хона яхши иситилмас, Зойиржон коменданнтнинг кўзини шамғалат қилиб, электр иситгични ёқиб кўяр, кўлга тушиб қолишгудек бўлса бир амаллаб ийдиарди. Андижонлик мана шу қоп-қора йигит Ёдгорга қадрдон бўлиб қолганди.

Ёдгор совиб қолган чойдан ичди. Колбаса емоқчи бўлган эди, тиши сирқиллади.

– Тушниям ҳаромини чиқардингиз-да! – деди Зойиржон кўрпага бурканаркан, тўнғиллаб.

Ёдгор ундан кўз узмай ўтиаркан, негадир гаплашгиси келди.

– Кимни кўраётгандингиз?

– Айтганимда топиб берармидингиз, тушимни?

Зойиржон каравотни фирчиллатганча пишиллаб ўгирилди. Бошини кўрпадан чиқарди-да, анграйиб қолди.

– Ҳа?! – деди анчадан кейин ҳушини тўплагандай. Сакраб турди-да, майкачан югуриб, унинг тепасига келди. – Ким? Қачон?

Ёдгор илжаймоқчи бўлган эди, юзи оғриди.

– Қўяверинг! – деди қўл силтаб.

– Қаерда бўлди? Ким ўзи? – Зойиржон ҳозир бориб муштлашмоқчи бўлгандай ранги ўчиб кетди.

– Йўлда... – Ёдгор ўзининг аҳволига кулгиси қистади. «Кап-катта одам ёш болалардек муштлашиб юрса». – Иккитаси бир қизга хирадлик қилаётган эди, шунга... – деди кулимсираб.

Унинг кулаётганини қўриб Зойиржоннинг кўнгли жойига тушди шекилли, қаршисидаги стулга ўтири.

– Ким экан қизнинг ўзи?!

– Қаёқдан билай? – деди у қўл силтаб. «Илгари бир кўргандим», – дегиси келмади. – Бари бир эмасми, у танимайди-ку мени».

– Емаган сомсага пул тўлаш деб, шуни айтади. – Зойиржон Ёдгорнинг юзига қараб туриб, кулиб юборди. – Арча байрамига лампочка етишмай турувди, – деди унинг ғуррасини силаб.

Ёдгор ҳам беихтиёр кулиб қўйди.

Чирокни ўчиришганидан кейин ҳам икковлари анчагача ухлай олмади. Зойиржон ўзича ғудраниб, Ёдгорни урганларнинг гўрига фишт қалар, яниб қўяр, ташқарида эса шамол ғувиллар, деразанинг аллақайси тирқишидан совук кириб турарди.

– Аваз ака янги йилни бизникида кутамиз деяпти, борамизми? – деди Зойиржон анчадан кейин. Ёдгор уни юпатиш учун Зойиржон гапни атайлаб бошқа ёққа бурганини тушунди.

– Майли, – деди лоқайдлик билан.

– Қизларгаям ҳайронман. Ярим кечада майиз бор эканми қўчада? – деди Зойиржон яна ўша мавзуга қайтиб.

– Билмасам, – Ёдгор кўрпага бурканиб олди. Қизнинг оппоқ тиник юзи, миннатдор боқиши кўз ўнгига келиб жилмайди.

– Юрмасин эмас, юрсин. Мана, бизга ўхшаган йигитлар билан чиқсин кўчага. – Зойиржон мамнун хўрсинди. – Бугун Наргиза икковимиз ҳам алламаҳалгача тентираб юрдик. Ўзининг ҳам оёғи акашак бўлиб қолди-ёв.

Ёдгор ўzlари билан ўқийдиган Наргизани Зойиржон яхши кўришини билар эди. Яна бояги рассом қизни ўйлади. Тиник чехраси кўз ўнгига келди.

– Бормайсизми?

– Нима? – деди Ёдгор Зойиржоннинг гапига дафъатан тушунолмай.

– Эртага дарсга бормайсизми, деяпман.

– Қандоқ бораман... – деди Ёдгор. – Кулмайдими ҳамма.

Анчадан кейин Зойиржон пишиллаб, текис нафас ола бошлади. Уй совиб кетди.

Ёдгорнинг уйқуси келмас, боши лўқиллар, ҳамон ўша тиник чехра кўз ўнгидан кетмас эди. «Қизиқ, нима қилиб юрибди ярим кечада? Бояги болалар унга ҳеч ким эмас, – деб ўйларди у ачишаётган ғуррасини пайпаслаб. – Булар унинг тирноғига ҳам арзимайди. – У муштлашувнинг бутун тафсилотини эслаб, жилмайиб қўйди. – Қизиқ бўлдидику!»

Ёдгор бўлиб ўтган нохушликка ранжимас, узок вақтлар хаёлини банд этиб юрган қизни бир лаҳза бўлсин, кўрганидан қувонар эди.

\* \* \*

Чаросларнинг уйи шахарга энди кўшилган чеккадаги қишлоқда эди. У охирги автобусга қандоқ илинганини, қишлоққа қандоқ етиб келганини ўзи ҳам билмади. Тийгана-тийгана ўзларининг тор кўчасига етганидан кеинингина нафасини ростлаш учун тўхтади. Тез юргурагнидан бўлса керак, юраги гупиллаб урар, юзлари ловиллаб ёнар эди. Сочлари жикқа сув бўлиб кетган, бўйнига қўнган қор эриб, ёқасидан оқиб тушар, ғашини келтиради.

Кўча четидаги каллакланган толлар шарпадай корайиб кўринар, энг ичкарида – уларнинг уйи пештоғида чироқ ёниб туради. Қор кечиб дарвозага яқин боргандагина у қаттиқ толиққанини, оёклари қалтираб кетаётганини пайқади. Қўлидаги тугунни оstonага қўйиб, рўмолини

қайта ўрамоқчи бўлди-ю, бўшашиб туриб қолди. «Ўлсин тушиб қопти». У энди эси жойига келгандек боя ўзини химоя қилган баланд бўйли, ингичка мўйлови ўзига ярашган, озғингина, жингалак соч йигитни ўйлади. «Анавилар индамаганмикин унга... Турқингни ел егурулар, индамай қўярмиди?» Юрагида оғир бир ғашлик билан эшикни итарди: очиқ экан. «Опам ухламай ўтиргандирлар», деб ўйлади у қори супурилган цемент йўлқадан тез ўтиб бораркан. У этакдаги ошхонанинг қор босган томини, кўмилмай қолган токнинг оппок тасмадай осилиб ётган сўриларини, музлаб қолмаслиги учун жўмраги очиб қўйилган водопроводни кўриб, зудлик билан айвон олдига борди.

Онаси эшитсин, деб этикчаларининг қорини атайлаб қаттиқ-қаттиқ қоқди-да, ойнабанд зинадан кўтарилди. Эшикни очиши билан гуп этиб иссиқ ҳаво юзига урилди. Шу пайт ичкари уйнинг ҳам эшиги очилиб, оstonада онаси кўринди. Васила Назаровна бош яланг, оқ оралаган соchlари силлик тарапланган, кўк жемпер кийиб олган, бир қўлида коса кўтариб, иккинчи қўли билан эшик дастасидан ушлаб турарди.

Чаросни кўрди-ю, худди қизиникига ўхшаш йирик, қоп-кора кўзларида қўркув пайдо бўлди. Ҳали аёллик кўркини йўқотмаган юзи жиддийлашди.

– Ҳа? – деди косаларни айвон ўртасидаги столга кўйиб. – Нима бўлди, қаёқдайдинг?

«Овқатланмай кутиб ўтирган эканлар», деб ўйлади Чарос. Бояги воеаларни эслаб, хўрлиги келди-ю, ерга қаради.

– Дарсдан кейин тоғамникига борувдим, – деди ўпкаси тўлиб: – Чакалоқ касал бўлиб қолибди. Тоғам ҳадеганда келавермаганидан кейин, кеннойимни касалхонага обордим... Мана, кийимлари. – Чарос тугунни бир чеккага кўйди.

Васила Назаровна тўла гавдасига ярашмаган илдамлик билан келиб қизининг пальтосини ечишга кўмаклашди.

– Вой, рўмолинг қани? Нега йигладинг?

Чарос онасининг кўзига қарашга ботинолмай, этикчасини еча бошлади.

– Тушиб қолибди, – деди бош кўтармай. – Йиғлаганим йўқ, чопдим... Кўрқдим.

Онанинг юзига қон югурди.

– Қилган ишинг тушмасин. Ўтири, овқатингни ич.

Чарос иштаҳасизлик билан шўрва ичаркан, онасининг ўзига диккат билан қараб қўяётганини сезар, шунинг учун бош кўтармас эди. У онасининг қаттиққўллигидан чўчир эди.

– Ҳали Дилшод ҳам келувди, – деди Васила Назаровна жимликини бузиб.

Чарос «Келиб нима қиларкан», дегандек онасига кўз кирини ташлади. Кошиқни стол чеккасига кўйди.

Васила Назаровна унинг кўнглидан ўтганларни сезди.

– Овқатингни ич.

– Бўлдим, опа, – деди Чарос чой куяётиб.

Яна бирпастдан кейин у ўз хонасига кириб кетди. Хоргинлик билан ўрнига чўзилди. Каравоти тепасида, шундок шифт остида турган рамкадаги расмга ўйчан тикилиб, узоқ ётди. Расмда шалағи чиқсаям ҳамон айланиб турган чархпалак тасвирланган эди. Унинг тарновларига яшил сув ўтлари ёпишган, кўп пақирчалари тушиб кетган. Аммо тарновда ҳамон сув тўлиб оқяпти. Ариқ соҳилидаги жийда соясида эса мисқоли яктак кийган оппоқ соколли чол кетмон дастасига суюниб, буқчайиб турибди. У ўсиқ қошлари остидаги қисикроқ кўзлари билан чархпалакка ўйчан тикилиб қолган.

Бу – бултур биринчи курсни битириб, таътилда Чимёндаги бувисиникига борганида Чарос ўзи чизган расм эди. У чол билан чархпалакни қиёсламоқчи бўлганди. Чархпалак сувни юкорига – ташна далаларга чиқариб беради. Оқар сув асло ортига қайтмайди. Чархпалак эса ўз

ўрнида туриб, яна янгидан-янги далаларни суғораверади. Чол ҳам шундай. Кўпларга яхшилик қилган. Ҳаёт ортга қайтмайди. Чолни бирор эслайди, бирор эсламайди... Чароснинг «Мироб» деб аталган бу асари институтда кўпчиликка маъкул бўлган эди.

Нариги хонада гугурт чизилди. Чарос ҳамон ёибошлиб ётганча, эшик фирасидан онасини кўрди. Васила Назаровна сигарет тутатганча, стол лампаси ёруғида ўтириб ишлар, афтидан, ўқувчиларнинг ёзма ишини текширади.

Чарос кўзларини юміб олди. Ташқаридаги шамол кучайган бўлса керак, дераза ортидаги толларнинг шохи кисирлаб кетди. Қор учқунлари ойнага чирсиллаб урилди. Ҳовлида ит фингшиди.

Чарос исиб кетди. Кўрпани очиб ташлаганча, «ховуз» килиб ишланган фанер шифтга тикилди. Боядан бери кўнглини ғаш қилаётган нарсани энди топиб олгандек оғир хўрсинди. «Опам ҳам қизиклар, Дилшодни нима киладилар гапириб. Турки қурсин... – Кейин бояги трамвайдаги йигитни эслади. – Нега қочиб кетдим, – деб пичирлади лабларини тишлаб, – Анави сурбетлар соғ қўймайди уни. Қаёқданам ўша трамвайга ўтира қолдим?!»

У ўйлай-ўйлай яна бир нарсани топди. Бўй етган ҳар бир киз қатори унинг ҳам хаёлини аллақандай бир йигит тимсоли ҳамиша тарк этмасди. Қизик, бугун худди ўша тасаввуридаги одам учради. Баланд бўйи, жингалак соч... Худди ўзи... Қисматнинг ўйинини қаранг. Учради-ю, бир лахзада йўқолди.

Айтгандай, плаш кийган эди шекилли... Кулранг плаш. Чарос у ёғини эслай олмади. Анчагача шу алфозда ётди. Ташқарида бўлса ҳамон шамол изиллар, тол шохлари қирсиллар, ит фингшириди.

\* \* \*

Ёдгор ғалати туш кўрибди. Келесдаги ҳовлисида юрганмиш. Ҳовлининг ўртасидан каттакон анҳор оқиб ўтётганмиш. «Қизиқ, ҳовлимизда анҳор йўқ эди-ку», деб ўйлармиш у ҳайрон бўлиб. Тағин анҳор бўйида бир тупми, икки тупми ёнғоқ ҳам бор эмиш. Ёдгор яланоч бўлиб, сувга тушиб олганча ёнғоқ териб юрганмиш. Бирини тутаман деса, иккинчиси оқиб кетармиш...

Бирдан дарахтнинг ўрнида Оқила буви пайдо бўлиб қолибди, «Ҳой, чиқ, оқиб кетасан», дермиш у чирқиллаб. Ёдгор сузаман деса, кўлларини қимирлата олмасмиш. Бир вақт бундай қараса, уни чақираётган Оқила буви эмас, жигарранг пальтоли чиройли қиз эмиш. Ёдгор шу алфозда сувдан чиқишга киздан уялармиш. Туравериб музлаб кетибди.

У совқотиб уйфонди. Кўзларини чала очиб, атрофга разм солди. Зойиржон ўрнини тузатиб, кетиб қолибди, вақт алламаҳал бўлиб кетган шекилли, уй ёп-ёруғ, аммо совуқ эди.

Ёдгор шишиб кетган лунжини силаб кўйди-да, гужанак бўлиб, адёлга бурканиб олди. «Ҳалиям қор ёғяпти шекили», деб ўйлади у тиззаларини қорнига тортиб. Кўзини юмид, харчанд уринмасин энди уйкуси келмади.

Бир маҳал эшик оҳиста тақиллади.

– Керакмас, – деди Ёдгор кўрпадан бошини чиқармай.

Эшик қаттиқроқ тақиллади.

«Жуда сурбет-да», деб ўйлади у ҳар қуни қатиқ олиб келадиган боладан аччиқланиб.

– Қатиқ керакмас, – деди бақириб. Кейин девор томонга ўгирилиб олди.

Тағин бир лаҳзадан кейин эшик ғийқиллаб очилди.

«Оббо, тинчлик йўқ экан-да, буларнинг дастидан».

У жаҳл билан бурилиб, бошини кўтарди. Кўтарди-ю,

тирсагига таянган кўйи қотиб қолди. Остонада Азиза туарди. У бошига чиройли шарф ўраб, шуба кийиб олган, кўлидаги сумкаласини ликиллатганча эшикнинг бир табақасига суюниб, нокулай жилмайиб турар, унинг табассуми кулгидан кўра йигини эслатар эди.

— Келинг,—деди Ёдгор овози титраб. Унинг важохатида «нега келдинг», деган маъно борлигини Азиза тушунди шекилли, ўзини босиб, кинояли кулди.

— Келдим... — У ичкарига қадам ташлаб, столнинг бир чеккасини қўлининг учи билан жиркангандек артдида, сумкасини қўйди. Шарфини бошидан олиб, стул суюнчигига илди, истамайгина ўтири. Сочлари паришон тўзиб кетди. Нафис бўялган киприкларини пирпиратиб, хонани қўздан кечириб чиқди. Лабини буриб, жилмайиб қўйди.

Ёдгор унинг бу қарашида: «Ўл-а, шу кунга тушиб қолдингми?» — деган маънони уқиб, фижинди.

— Кечирасиз, мен кийиниб олишим керак, — деди у қовоғини солиб.

Азиза яна лабини буриб кулди.

— Кийинаверинг, қарамайман, кераккинасиям йўқ...

Ёдгор ёнламаси турганча шим кияркан, Азизанинг бирлаҳза ташлаган ғамзалик назарини илиб олди-ю, юраги гупиллаб кетди. «Зойиржон ўқишга кетган, бутун ётоқхонада ҳам ҳеч ким бўлмаса керак...» У Азизага қўз кирини ташлади. Азиза энди унга қарамас, сувоги кўчиб тушган шифтни томоша қилиб ўтиради.

Ёдгор хаёлига келган аҳмоқона фикрдан ўзи ижирғаниб кетди. «Ўл, аҳмок!» У тезгина кийинди-да, бурчакдаги жўмракда ювинди.

«Нега келди бу, тағин нима даъвоси бор экан?» — деб ўйлади артина туриб.

Кейин Азизанинг қаршисидаги стулга келиб ўтирида, унинг қўзларига хотиржам тикилди. Азиза бир оз

ўзини олдирган, аммо ҳамон ўшандай чиройли, кўзлари киртайиб қолган бўлса ҳам тетик бокар эди. Бир вақтлар Ёдгор мана шу кўзларни бир бор кўриш учун жонини фидо қилишга тайёр эди. Мана шу юпқа лаблардан бир ўпич олиш эришиб бўлмайдиган баҳтдек туюларди. Худди шу кўзлардан газаб сочилиши шу лаблар заҳардек қақшатиши мумкинлигини хаёлига ҳам келтиролмасди. Сўнгги воқеалар кўз ўнгидаги жонланди-ю, Азизанинг хозирги қиёфаси ҳам совуқ кўриниб кетди.

– Муборак бўлсин... – деди Азиза унинг шишиб кетган юзига имо қилиб.

Ёдгор бу гапда меҳрибонлик эмас, хузур оҳангি борлигини сезиб, қўл силтади. «Кел, шуям бир қувонсин!»

– Ҳа, кеча кўпроқ ичиб кўйган эканман. Болалар билан муштлашибмиз. Боплаб пўстагимни қоқишидди.

Азиза қийқириб кулди. Ўтирган стули фирчиллаб кетди.

– Кўпроқ ичинг! – деди у «ажаб бўпти» деган маънода.

Ёдгор унинг роҳатланаётганини кўриб, негадир ўзининг ҳам кўнгли таскин топди. Ёмонми, Азиза ўзи кўмган гўрни ўзи тепкиласа...

– Кечирасиз, – деди Ёдгор бир оздан кейин. – Куруқ чой йўқ эди...

Бу унинг: «Энди иззатинг битди, кетавер», дегани эди.

Азиза тушунди.

– Зиёни йўқ, мен бир минутга... ўлибманми, сизнинг чойингизни ичиб.

Ёдгор бу гапдан: «Гадойдан хайр сўрайманми, сенку шунча менинг тузимни ичдинг, ҳалиям бўлса, отам сендақаларнинг ўнтасини боқишига қодир», деган маънени уқди. Кўнгли чўкиб, бир лаҳза ерга караб қолди.

– Мен ҳам ўқияпман. – деди Азиза унга диққат билан тикилиб. – Пединститутнинг сиртқи бўлимида.

– Эшитгандим, – Ёдгор шундай деди-ю, Азизанинг кўнглига «ҳалиям мени қўмсар экансан-ку», деган ўй келмаслиги учун қўшиб қўйди: – Тошкент катта шаҳар, даргоҳи кенг.

– Қанча стипендия оласиз? – деди Азиза нихоятда жиддийлик билан.

«Яна пул, – деб ўйлади Ёдгор ижирғаниб. – Нима бало, булар ўлгандаям пулдан кафан қиласи шекилли».

– Ўзимга етади, – деди секин.

Азиза кўриб турибман, дегандай, яна хонани кўздан кечирди. Қофози кўчган деворлар, тоза бўлса ҳам эскириб кетган дарпарда, саргайган чойгумни кўриб қаноат ҳосил қиласи шекилли, яна кўзларида кулги ўйнади.

Энди уларнинг гапи тамом бўлган эди. Аммо иккави ҳам бир-биридан алланимани кутгандек ўтиришарди. Ёдгорнинг назарида уй янаем совиб кетгандек кўринди. Азиза олтин узукли бармоқларини ўйнаб ўтиаркан, илкис бошини кўтарди.

– Ўйлаб кўрдингизми?

«Ҳа, гап мана бу ёқда экан, – деб ўйлади Ёдгор. – Бояги гапларнинг ҳаммаси даромад экан-да».

– Нимани ўйлайман?..

Азизанинг кўзларидаги бир лаҳзалик маъюслик йўқолиб, ўрнини асабий хушчақчақлик эгаллади.

– Балки ялиниб келди дерсиз, – у шодон қулди.

Аёл киши ўзини баҳтиёр кўрсатишга уриняптими, билингки, юрагида дарди бор. Ёдгор буни тушунди. Азизанинг аҳволига негадир ачинди. Маъюс қиёфада бошини кўтариб, унга тикилди.

– Кераккинасиям йўқ. – деди Азиза яна асабий кулиб.

У Ёдгорнинг қок юрагига ханжар уришни мўлжаллагандек бир зум тўхтаб қолди-да, кўзига тик қараб гапирди:

– Мен эрга тегяпман.

Ҳар кимда бўладиган худбинлик Ёдгорда ҳам бор эди. Бу гап ростми, ёлғонми, бари бир юрагининг бир чеккасида оғриқ пайдо бўлди. Қачонлардир ўзиники бўлган хотин бирорнинг бўйнига осилиши унга алам қилди.

Ёдгор Азизанинг ўзидан кўз узмай ўтирганини, юрагидагиларни билишга уринаётганини пайқаб турарди. У анчадан кейин ўзини босиб олди. «Кимсан ўзинг, – деб ўйлади нафратланиб. – Хўш, эрга тегмаганида қайтиб бориб ярашармидинг». Шу тобда ўша эски адоватлар, бирбиридан жирканганлари кўз ўнгига келди-ю, алланечук енгиллик сезди.

– Табриклайман! – деди у бошини кўтариб.

Бу гап Азизага шунчалик таъсир қилишини билмаган экан. Тўсатдан Азизанинг ранги бўзарип кетди. Титроқ қўллари билан сумкасини юлиб олди-да, силтаниб эшик олдига борди. Ғазаб билан бурилиб қаради.

– Эркак эмиш! Бу кунингдан ўлганинг яхши!

У эшикни шу қадар қарсиллатиб ёпдики, деразалар зириллаб кетди.

Ёдгорнинг қулоқлари анчагача шангиллаб турди. У чаккасини бармоқлари билан қисиб олганча, столга тирсагини тираб, мункайиб ўтирас, Азизанинг оқариб кетган юзи, титраётган лаблари кўз ўнгидан кетмас эди: «Бу кунингдан ўлганинг яхши!»

Дунё қизиқ экан. Қачон қарасангиз, етдим деганда қоқиласиз. Ё кисмат ҳаммага баҳт улашаётганида унга етмай қолганми? Эсини танибдики, одам бўлсан, нимадир яхши иш қилсан, дейди. Узоқда нурли бир нуктадай порлаб турган толега интилади. Амаллаб яқин борганида баҳт деган нур яна бир олам нарига кетиб қолади. У югураверади, толе ундан қочаверади.

Чойхоначи Мирзо бувага кўмаклашиб, сув ташиб юрганиям баҳарнав экан. Энди тўртинчи синфга ўтганда ота ўрнида ота бўлиб қолган Мирзо бува тўсатдан ўлиб қолди.

Анчадан буён тувакка тушиб ётган Оқила буви ҳам чолнинг кирқи чиқмасидан кўз юмди, Чол-кампирнинг Туркистонга келин бўлиб тушган ёлгиз қизи ота-онасининг катта маъракасини ўтказиб, ҳовли-жойни сотиб кетди.

Ёдгорни, Келеснинг ўзидағи интернатга жойлаштиришди. Ўлиб-тирилиб ўқиди. Фишт терувчилик хунарини ўрганди.

Биринчи маошини олган куни чол-кампирнинг мозорига борди. Мозорни киртишлаб тозалади. Гўристон коровулига пул бериб, Куръон тиловат қилдирди. Ўзининг ота-онаси нега йўқлигини ўйлаб, йиғлади.

Курилиш трести унга ётоқхонадан жой берди. Хуллас, йигит кишининг бошига баҳт қуши қўнмай иложи йўқ экан. Унинг ҳам ҳаёти бир нав яхши бўлиб қолди. Икки йилча шу тарзда ишлаб юрди. Кейин бирдан ороми бузилди. Ҳаммаси шим олиш баҳонасидан бошланди.

Биринчи май арафаси эди. Ёдгор байрамга янги мода бўлган лавсан шим олиш ниятида туман марказидаги универмагга борди. Пештахта ортида турган қош-қўзлари қоп-кора, дўмбокқина қизни кўрди-ю, юраги жиз этди. Шим танлаган бўлиб узоқ ивирсиб қолди. Қиз, охири жаҳли чиқди шекилли, койиб берди:

– Оласизми, йўқми? Олсангиз олинг, бўлмаса бўшатинг йўлни.

– Оламан, оламан! – деди Ёдгор ҳовлиқиб, пул чиқааркан,

Ётоққа келиб кийиб кўрса, икки мўлжал каттасини олибди. Ҳамхоналари кулишди.

– Обориб бер, бошқасини айирбошлаб беришади.

Ёдгор катта шим олганига, яна боришга баҳона то-пилганига ҳатто севинди ҳам.

Бу сафар қиз унга зарда қилмади.

– Ўзим ҳам дадангизга оляпсизми, деб ўйловдим, – деди кулиб.

Қизнинг кулгиси Ёдгорга шунчалар қувонч бағишладики! «Бундан чиқди, мени эслаб қолган эканда», деб ўйлади у севинчи тошиб.

Шу-шу ҳар куни совунми, тиш чўтками, тугмачами баҳона қилиб универмагга келадиган бўлди. Бора-бора қиз ҳам уни таниб қолди. Ёдгор қизнинг бир марта кулиб қаравини кўриш орзусида саккиз чақирим наридан гоҳ пиёда, гоҳ ўртоғининг велосипедида келиб кетарди.

Бир куни у иккита кино билети кўтариб келди.

– Клубда хинҷча кино кетаётган экан, – деди қўрқапўса. У қизнинг ҳозироқ олдига солиб ҳайдаб юборишини кутиб турарди, Йўқ, қиз ҳайдамади.

– Бугун вақтим йўқ, ишдан кеч чиқаман, – деди у.

Шундан кейин унинг энг шодон кунлари бошланди. Ёдгор Азизанинг билагидан ушлашга ҳам ботинолмас, аммо бир кун кўрмаса туролмасди.

Айни узум пишиғида Азиза Ёдгорни иккита ўртоғи билан меҳмонга чақирди. Уларнинг каттакон боғи бор экан, йигитлар узумхўрлик қилишди.

Азизанинг сельпо раиси бўлиб ишлайдиган отаси Ёдгорнинг авлод-аждодини суриштирди. «Тамом, – деб ўйлади Ёдгор эти увушиб. – Ҳаммаси тамом бўлди!»

Йўқ, бахт ҳам, бахтсизлик ҳам жуфт бўлади, дейишгани рост экан.

Бир ойдан кейин худди ўша катта боғда данғиллама тўй бўлди. Ёдгор жаранглаган уйлар, қора дараҳтдан қилинган гарнитурлар, кўша-кўша гиламларни кўриб, оғзи очилиб қолди. Бу нима, тушими, ўнгими? Ўзига шунча фидойилик қилган мана шу гўзал қизнинг – жондан ортиқ Азизасининг олдидаги қарзини қандок узсин. Бошига кўтариб юрса арзимайдими?! Яқиндагина чойхона сўрисини супуриб, чой ташиб юрган Ёдгор шуми? Бирордан туртки еб, бирордан сўкиш эшитиб ўргангандек бола шуми? Ўзининг ота-онаси қани, шу топда

ўғлини кўрса бўлмайдими? Ёдгор ҳарир рўмол ёпинган келин ёнида ўтириб, баҳт-саодат тилаб гапираётган кишиларнинг жарангдор сўзларини, қарсбадабанг куй садоларини эшитаркан, буларнинг ҳаммаси эртакдек туюлар, ишонгиси келмас эди.

Қизик, ишонмаганича бор экан. Тақдирнинг ўйинини қаранг. Бир кун илгари қувончдан боши кўкка етган Ёдгор, тўйининг эртасига тўрвасини йўқотган гадойдек бўшашиб қолди. Севинчлари момақалдироқдек гумбурлаб, чақмоқдек бир зум ярақлади-ю, ўчди.

Нега мени алдадингиз? – деди овози қалтираб. Кейин муштини тишлаганча инграб юборди. – Нега алдадингиз, нега?!

Азиза тўшакда хомуш ётар, кўзини бир нуқтадан узмас, афтидан, кимнидир эслар эди.

– Ким ўша?! – деди Ёдгор ғазаб билан ўрнидан сапчиб туриб.

– Секин, – деди Азиза унга қарамай. – Дадам эшитса жанжал бўлади.

Ёдгор жанжал бўлмаслигини билар эди. Дадасининг ҳамма нарсадан хабари бор. Бўлмаса кизини таг-зотининг тайини йўқ бу йигитга бермасди.

«Гап бу ёқда экан, – ўйлади у ўқинч билан. – Демак, улар мени одам санашмаган».

У ўзининг қадри пастлигидан афсусланди, ғурури поймол бўлганлигини ўйлааб, аламдан тўлғана бошлади.

Анчадан кейин Азиза йиглади. Уни жонидан ортиқ севишини пичирлаб айтди.

Хотин кишининг кўз ёши ширин бўлади. Ёдгорнинг раҳми келди. Хотинини овутди.

Аммо шафқат билан муҳаббатнинг ораси бир чакирим-у, шафқат билан нафратнинг ораси бир қарич бўлишини Ёдгор билмас экан. Кўп ўтмай тушунди. У бу уйга бирор бўйнига арқон солгандай истар-истамас кириб

келар, келганда ҳам кўп ўтиrolmas эди. Бу уй унга бегона туюлар, ҳар сафар адашиб кириб қолгандай бўлаверарди.

Ярим йилча турмуш қуришган бўлса, бир ой ҳам эрхотин бўлиб яшашгани йўқ. Икковлари хўроz қичқиргунча ухламай ётишар, иккови ҳам бир-бирининг ухламаёттагини билар, аммо чурқ этишмасди.

Азиза гапнинг учини чиқарган бўлса керак, қайноаси Ёдгорни ношудликда айблаб, койийдиган бўлиб қолди.

Бир куни қайнотаси Ёдгорга маслаҳат солди:

– Қачонгача қишлиқ-қирорлик кунлардаям лой чанглаб юрасиз. Савдога киринг. Савдода гап кўп. Мен сизга овлоқроқ бир дўконча олиб бераман.

Ёдгор қайнотасининг кўзига биринчи марта тик қаради.

– Мен савдога кирмайман. Ўзингизни уринтирманг.

Қайнотаси мoshранг баҳмал дўпписини кафтига қоқиб, ўриндан туриб кетди. Нарироққа бориб тўнғиллади:

– Ҳемириининг тайини йўғ-у, димогидан эшаққурт ёғилади...

Ёдгор ўрталарида дарз пайдо бўлганини билди. Ўша куни ичиб келди.

Бора-бора Азиза ҳам уни жеркадиган, ҳар гапида пи-чинг қиласидиган бўлиб қолди.

Ёдгор бутун аламини меҳнатдан олар, кечки сменаларга қолиб ишлар, бу эса Азизанинг баттар гашига тегар эди.

Худди хозиргидақа қиши кунларидан бирида Болгариядан қурувчилар делегацияси келди. Трестдагилар илфор бинокорлар қатори Ёдгорни ҳам тантанали кечага таклиф қилишди. Кеча охирида трест бошлиги – кекса, жиккак киши: «Ҳеч меҳмонингиз бўлмадик-да», деб ҳазиллашди.

Ёдгор меҳмонларни уйига бошлаб келди. Дарвоза кулф экан, узок тақиллатди. Меҳмонлар совқотганидан ер тепкилаб туришар, Ёдгор хижолат чекар эди.

Анчадан кейин йўлакда қадам товушлари эшитилди.

– Очинг, меҳмонлар келишди, – деди Ёдгор бетоқат бўлиб.

– Меҳмонларингиз бошингизда қолсин! – деди Азиза дарвозанинг нарёғида туриб.

Ер ёрilmади-ю, Ёдгор кириб кета қолмади.

– Эсингни едингми, оч! – деди у зарда билан.

– Битта ўзингни боққанимиз етади. Йўқот пиёниста ўртоғларингни!

Ёдгорнинг боши айланиб, кесакига суяниб қолди. У турмуши омонат эканини, қачондир оиласи бузилишини кўпдан кўнгли сезиб юрар, аммо бунчалик шарманда бўлишини ўйламаган эди. Хотинининг хайдаганидан кўра сенсирагани юрак-юрагидан ўтиб кетди.

– Шунақами, – деди Ёдгор хириллаб. – Кўйдим!

Трест бошлиғи ҳайҳайлаб унга ёпишди:

– Ёшлиқ қилманг, ўғлим, шайтонга ҳайф беринг.

Ичкарида қайнонасаннинг жаврагани, Азизанинг бидирлагани эшитилди.

Ёдгор кўз ўнги қоронғилашди-ю, бошини қуий солганча, тусмоллаб юриб кетди.

Ўшанда трест бошлиғининг юпатганлари, насиҳат килгани, аммо у ўқишга кетаман, деб туриб олгани ҳозир Ёдгорнинг кўз ўнгидан бирма-бир ўтди.

«Энди менинг рухсатим керак бўлиб қолибдими? – деб ўйлади чойгумга сув тўлатаркан. Боя хотинининг зарда қилиб эшикни қарсиллатиб чиқиб кетганини эслаб, кулиб қўйди. – Синаш учун келган. Тегса тегавермайдими?»

У ошхонага кириб, чойгумни газга қўйди. Қайнашини кутиб, дераза олдига келди.

Ҳаво очилиб кетди. Нариги ётоқхона томида, икки бино ўртасидаги гулзорда кор яраклайди. Тўртта-бешта сўқмоқ из тушибди. Ўйинқароқ болалар катта йўлдан

ғизиллаб ўтаётган машиналарга ёпишиб, сирпанчик учяпти. Бекатда одам сийрак. Бир хотин арча кўтариб турибди.

Чойгум қайнаб, тошди. Ёдгор деразадан кўз узиб, газни ўчирди.

\* \* \*

Хар фаслнинг ўз қувончи бор. Қиши ҳам каттадан-кичик ҳаммага бир олам шодлик баҳш этди. Икки кундан буён муздеккина қиши фариштаси шахар устида кезиб, элагини силкитар, қулоқ-бурни қизарган одамлар «Янги йилбоп қор бўляпти-да», деб кулишар, ҳавода мусаффо чилла иси кезар эди. Кинотеатрлар, маданият саройларида таътилга чиққан болаларнинг кулгиси янграйди. Катта майдонларда арчалар безатилди.

Йилнинг сўнгги оқшомида Тошкент яшнаб кетди. Катта бинолар пештоғида сон-саноқсиз лампочкалар маржони порлади, арчалар нурга беланди. Озиқ-овқат магазинлари тирбанд бўлиб кетди. Сумка, тўрхалт кўтарган одамлар уй-уйига шошилишар, таниш-билишларини кўриб, байрам билан қутлашар эди.

Ёдгор билан Зойиржон гастрономдан майда-чуйда харид қилишди-да, Аваз аканикига йўл олишди. Биринчи курсда пахтага боришганида бу аспирант йигит уларга раҳбар бўлиб чиққан, шу баҳона дўстлашиб кетишганди. Унинг боғчада тарбиячи бўлиб ишлайдиган озғингина хотини Тамила ҳам йигитларнинг ўз опасидай бўлиб қолган. Аваз марказдаги тўққиз қаватли уйда яшар, Ёдгор билан Зойиржон бу уйга кўп келишганди.

Марказий универмаг олдидан ўтиб кетишаётганида Ёдгор бир ҳафта илгари рўй берган ҳодисани эслади, ўша қизнинг кўзлари, миннатдор боқиши тағин тасаввурида жонланди-ю, юраги орзиқиб кетди. Энди у қизни учратада олмаслигини билса ҳам, негадир кейинги пайтларда уни

ҳар қуни эслар эди. Бир-икки марта Театр ва рассомлик институтига боришига ҳам қарор қилди-ю, айниди. «Трамвайда иккита аҳмоқ шилқимлик қилганида ёрдам берган-дим, шунга келдим», дейдими?

Кўйлакчан бўлиб, шимининг устидан сочиқ боғлаб олган Аваз оstonада уларни қувониб қарши олди.

– Буларни қара, Тамила, шунча ичкилик олиб келишибди – деб қичқирди у сарғиш қошларини учириб.

Пиёз тўтраган бўлса керак, кўзи ёшланиб турган Тамила ошхонадан чиқди. У кийиб олган гулдор халатининг елкалари осилиб турад, қўлида пичоқ бор эди.

– Қочинг, Ёдгор! – деди Зойиржон кулиб. – Тамила опамнинг қўлида пичоги бор экан.

– Шиша кўтаргандарнинг жазоси шу! – Тамила пичогини ўйнатиб, таҳдид қилди. – Қани, киринглар, болалар!

– Ҳайронман, арак қимматлашганидан буён магазинларда навбат янаем кўпайиб қолди. – Зойиржон гоҳ Авазга, гоҳ Ёдгорга қараб, қўз қисиб қўйди.

– Қанийди шу ўлгурни янаем қиммат қилиб қўйса, – деди Тамила тўрхалталарни бир чеккага олаётib.

– Унда хотинлар оч қолади-да!

Кулишди.

Зойиржон дарров ошхонага кириб, сабзи тўғрашга тушиб кетди.

– Сиз энагалик қиласиз, – деди Тамила олти ойлик ўғилчасини Ёдгорга тутқазиб. – Қаранг-чи, кимга ўхшабди бу?

– Билмасам, – деди Ёдгор пахмоқ қалпоқча кийгизилган болани оларкан. – Сариқ машаклиги дадасига ўхшаб кетади.

– Шамоллаб қолиб бизларни қандоқ қўрқитдики бу! – Тамила унга сўргич кийгизилган сутли шишани узатди. – Йиғласа мана буни берасиз.

Нариги хонадан Авазнинг овози келди:

– Уйланадиган бўлсангиз, Ёдгоржон, серсуроқ қизни танланг. Ҳайронман, онасининг сути йўқлигига мен айборманми, ҳар куни сахарлаб сут олиб келаман.

– Алжиманг! – деди Тамила жилмайиб.

Ўзи фарзанд кўрмаган одамга қизиқ туюларкан: Ёдгор диваннинг бир чеккасида Алишерни беўхшов кўтариб ўтирас, қимирлашга кўрқар эди.

Бир оздан кейин у шикоятомуз қичқирди:

– Бунингизни қаранг, Тамила опа, ҳаммаёғимни ҳўл қилиб қўйди-ку!

Тамила югуриб келиб, кулганча болани унинг кўлидан олди. Ёдгор тиззалири ҳўл бўлган янги шимига қараб қўйди. Бола эса тиҳсиз оғзини катта очиб, «қойил қилдимми», дегандай қийқириб кулди.

– Э, дарвеш, – деди Ёдгор ҳам беихтиёр кулиб.

Улар столга ўтиришганида Янги йил киришига бир соатча қолган эди. Энди овқатга қўл уришганди, қўнгироқ жиринглади. Эр-хотин йўлакка югуришди. Зум ўтмай Авазнинг аллаким билан қуюқ сўрашгани, Тамиланинг «Вой!» деб қувноқ қийқиргани, кимнидир чўлп этиб ўпгани эшитилди.

Аваз қора костюм кийиб, галстук таққан, сочи ҳўллаб силлиқ тараалган йигитни бошлаб кирди. Совуқдан бўлса керак, унинг юзи қизариб кетган, ингичка қошими, қўзларими, нимасидир, қизларни эслатар эди.

– Танишинглар! – деди Аваз йигитни кўрсатиб. – Дилшод, менинг ўртоғим, мактабда бирга ўқиганмиз. Ҳозир француз тилидан дарс беради... Булар менинг дўстларим. Студентлар...

Ёдгор билан Зойиржон баравар ўрнидан туришди. Дилшод кинодаги офицерлардек бошини кескин силкиб, сўзсиз саломлашди. Бу қилиғи Ёдгорга ёқмади. «Мана, французча саломлашишним ўрганиб олдик», деб ўйлади у Дилшоддан юз ўгириб.

Йўлақда Тамиланинг аллақандай аёл билан гаплашгани эшитилди. Кейин... кейин Ёдгор эшик томонга қаради-ю, юраги шув этиб кетди. Назарида уй янайм ёришиб кетгандай, хали ичмай туриб маст бўлиб қолгандай, ичида қуёш порлаб чиққандай бўлди. Остонада ўша қиз – шунча кундан буён унинг хаёлидан нари кетмай қолган қизнинг ўзгинаси турарди. У нафис пуштиранг жемпер кийиб олган, сочи чиройли турмакланган, чироқдан кўзи қамашгандай, киприкларини пирпиратиб жилмаяр эди.

Ёдгор йиқилиб кетаётгандай стул суюнчини ушлаб олди. Унинг томоги қақраб кетган, ҳозир гапирадиган бўлса овози чиқмаслигини билар эди.

Бу менинг жияним. Чарос, – деди Аваз қизнинг елкасига қоқиб. – Булар – Зойиржон, Ёдгор.

Қиз Ёдгорга қаради-ю, бирдан кўзлари катта очилиб кетди. Ёдгорнинг юзига тикилиб, хавотирлангандай энтикиб қўйди. Чамаси, унинг юзидағи «лампочка» излари ҳамон кетмаган эди. Кейин қизнинг кўзлари қувончдан порлаб кетди.

Илдам келиб, Ёдгорга қўл узатди.

– Ассалому алайкум.

Ёдгор эсанкираганча қизнинг жажжигина, муздек қўлини қисаркан, унинг кўзларидан: «Мен сизни танийман, мен сизни биламан», деган маънони уқиб олди.

– Ўтиринг, Чарос, – деди Дилшод ёнидаги стулни суребиб.

Ёдгор гарангсиб, жойига ўтириб қолди: «Эри экан бў...»

Чарос «эри» билан Ёдгорнинг ўртасига ўтириди. Ёдгор қувончи узоққа бормаганидан талмовсираганча, зимдан Дилшодга қараб қўйди. «Дуруст, силлиққина йигит экан», деб ўйлади ғаши келиброк.

– Қани, бўлинг, хой! – деди Аваз Тамилани чақириб, – Ўн минут қолди.

...Тамила йиғлаётган ўғилчасини кўтариб келди.

Шампан тиқини пақиллаб отилди, дастурхонга вишллаб вино оқди. Чарос ёш боладай қувониб, қарсак чалди. Бахтиёрлик билан кулиб, Ёдгорга қараб кўйди.

Ёдгор ичидан ўтаётганини сездирмаслик учун жилмайди. Нима қилишини билмай, қиздан кўзларини олиб кочди.

Бонг чалинганида кўнгли чалкаш туйғуларга тўлиб, ичди. Аваз аканинг нима деганини, Зойиржон қандай лукма ташлаганини унча англамади. Факат бир нарсани эслади: у қиз билан қадаҳ чўқиширар экан, кўзлари пир-пираб жилмайди.

Кейин Дилшодга сўз беришди. Ёдгор дарров хушини тўплаб олди. Шу топда негадир унинг гапини жуда эшитгиси келди.

– Муқаддас китобларда, – деди Дилшод ингичка қошини чимирганча, – «онадан азиз инсон йўқ» дейилади. – У бир нафас жимиб қолди. Ёдгорнинг назарида Дилшод атайлаб тўхтагандек. Одамлар гапини қандай эши-таётганини билиб кўйиш учун атайнин салмоқлаётгандек туюлиб кетди. – Чиндан ҳам ҳар кимни фақат битта она дунёга келтиради. Шундай экан, оналар соғ бўлсин. Мен она деганда аёлларни назарда тутаман. Бинобарин, ҳамма аёллар омон бўлсин, – у майин жилмайиб, Чаросга қараб кўйди.

Тамила қувониб қарсак чалди. Ҳамма ўрнидан турди.

Дилшод энг аввал Чарос билан уриштириди.

– Яхши гап, – деди Чарос негадир Ёдгорга қараб. – Бу гапни аллақайси журналда ўқигандим.

Дилшод норозиланиб, қошини чимириди.

– Мсье Дилшод рост айтадилар, – Зойиржон қадаҳни баланд кўтарди. – Бутун дунё хотинларининг соғлиғи учун!

Телевизорда диктор қиз рақсга таклиф қилди. Дилшод Чаросга қараб кўйди. Унинг қўлидан оҳиста тутди. Икковлари чир айланада бошлишди.

Чарос сиполик билан рақс тушар, Дилшод уни авай-лаб бошқарап, кўзларида мамнун табассум бор эди.

«Бир-бирига муносиб экан!» – деб ўйлади Ёдгор стул суюнчиғига елкасини ташлаб ўтирганча Дилшоднинг «қовун сўйса бўладиган» қилиб қирраси чиқариб дазмолланган шимидан, чаққон, юмшоқ сирғалиб бораётган туфлисидан кўз узмай. Ҳарчанд ўзини босишга уринмасин, кўнглидаги ғашликка ўхшаш туйғу ҳамон тинчлик бермас эди. Унинг назарида куй ҳам жуда чўзилиб кетгандек бўлди.

Нихоят, мусика тугади. Дилшод билан Чарос жойига келиб ўтиришди. Зойиржон қадаҳларни қайта тўлатаётган эди, янги куй янгради.

Чарос Ёдгорга кўз қирини ташлаб қўйди. Ёдгор иккиланиб, ўрнидан турди.

– Кечирасиз, – деди Дилшодга ийманиб қараганча.

Чарос унинг кўлларидан енгилгина тутиб, күшдек учди. Аваз ака ўғлига шишадан сут эмизар, Зойиржон Тамила билан гир айланар, Дилшод столга тирсагини тираганча ўтиради. Ёдгор елкасида қизнинг кафтидан ўтаётган ҳароратни хис қиласи, унинг нозик бармоқларини авайлаб ушлаганча айланар, димоғида алланечук нафис бўй туяр, юраги ҳаяжондан гупиллаб урар эди. Қизнинг ихчам гавдаси куй қанотида учар, Ёдгор унинг тиник юзини, бўйнига тушган соч толаларини кўриб турар, рақсдан эмас, ҳаяжондан боши айланарди.

– Юзингизга нима қилди? – деди Чарос куй қанотида учаркан. Эгик киприклари капалак қанотидай пирпираб жилмайди.

– Мушук тирнаб олди, – Ёдгор кулди.

– Мушуклар билан уришманг-да, – Чарос ўша кунги хунук ҳодиса учун ўзи айбдордек қизариб, жилмайди.

– Улар ҳам қушчаларга тегмасин-да, – деди Ёдгор аста...

Яна қадаҳ кўтаришиди.

– Ёдгор ака гапирсинглар! – Чарос қўлидаги бокал орқасидан унга мўралаб қаради.

Ёдгор Дилшоднинг унга зарда билан қараб қўйганини кўриб, бояги худбинлиги учун ўзини койиди. «Оббо, Қоработир бўлиб қолдинг шекилли. Бироннинг оиласига рахна солишинг қолувди».

У тараддуланиб, ўрнидан турди.

– Биз Янги йил кирганидан қувонамиз, – деди биллур қадаҳдан кўз узмай. – Аммо эски йил ўтиб кетганини ўйламаймиз. Умримизга умр қўшилди, деб суюнамиз, аммо умримизнинг бир йили ўтиб кетганига ачинмаймиз...

– Нима бало, чолларнинг гапини гапириб қолдингиз, – деди Зойиржон кулиб. – Айтадиганингизни тезроқ айтинг, томоқ тақиллаб кетди.

Ёдгор эзмалик килиб юборганини сезиб, қизарди.

– Хуллас, мазмунли хаёт учун!

– Худбинлар, – деди Тамила. – Нега фақат сизлар гапирасизлар? Сўз – Чаросга.

Чарос бокал ушлаганча энтикиб қўйди.

– Соф муҳаббат учун!

Қарсак бўлиб кетди.

Ёдгор Дилшоднинг унга яна зарда аралаш қараб қўйганини илғади. Тағин ўзини айбдор санаб, юраги сиқилди. Сигарет эзгилаб, балконга чиқди.

Муздек ҳаводан нафаси кайтиб, бир зум туриб қолди. Ҳамон қор ёғар, балкондаги қоғоз кутилар, эски пақир қор остида қолган эди. Ичганиданми, ҳаяжонданми, унинг боши айланар, юзлари ловиллаб ёнарди. Рўпарадаги каттакон бинонинг ҳамма деразаларида чироқ порлар, шодон учкунлар нур оғушида ўйнар эди. Ичкарида ҳамон куй янграр, Зойиржоннинг ҳазил гаплари, қувноқ қаҳқаҳа тинмасди.

Унинг кўз ўнгига яна Чароснинг пирпираб турган кипприлари, Дилшоднинг норизо боқишилари келди... «Трамвайдан тушишингга ёрдамлашиб юбордим, деб ҳали севгиям изҳор қиласан», деб ўйлади Ёдгор ўзига-ўзи хунук кўриниб. Шунча кундан буён шу қиз хаёли билан юрганини эслаб, юраги баттар сиқилди.

Бир оздан кейин балкон эшиги фийқиллаб очилиб, ёпилди. У Тамила опами, Зойиржонми бўлса керак, деган хаёлда кайрилиб қарамади.

– Ҳозир кираман! – деди сигаретини тутатиб. – Чекиб бўлай...

– Шамоллаб қолмайсизми?

Ёдгор овоз эгасини таниди-ю, ҳовлиқиб бурилиб қаради. Чарос балкон эшигига суюниб турарди. Унинг меҳрибон оҳангда гапиришидан Ёдгорнинг кўнгли мулойим ҳисларга лиммо-лим тўлиб кетди.

– Сизмидингиз, кечирасиз... – деди овози титраб.

– Ўша куни яхши етиб олдингизми? – деди Чарос анчадан кейин. – Мен сиздан хавотир олдим.

Ёдгор яна хаяжондан энтиқди. «Мен ҳам, – деб ўйлади кўзларида кувонч порлаб. – Мен ҳам ҳар куни сени ўйлайман».

– Мен сизни бошқа кўрмасам керак, деб ўйловдим, – деди Ёдгор ўзини босиб.

– Мен ҳам... Мана, кўришдик...

– Уйга киринг, совук... – Ёдгор кўнглига келган гапни қийналиб айтди... – Кейин, кейин Дилшод ҳам хафа бўладилар, киринг, – у ҳарчанд уринмасин, овозида рашкка ўҳшаган оҳанг борлигини пайқаб уялди. Чаросга қарамасликка ҳаракат қилиб, қоғоз кутига кўнган қорни оёғи билан сидириб туширди. У қизнинг кетишини кутарди. Аммо Чарос кетмади.

– Менга нима?! – деди у аччиқланган оҳангда. – У менинг ҳеч кимим эмас!

«Нима?! – Ёдгор ярқ этиб қизга қаради. – Нима дединг? Яна битта қайтар! Яна бир марта айтгин...» Унинг қалби нурга тўлиб, Чаросга термилиб қолди. «Наҳотки, наҳотки, шунаقا бўлса! Бугун қанақа кун ўзи! Қанақа баҳтли кун!»

Ёдгор ҳамон ўзини босиб ололмас, қизга термилган кўзларида олам-олам шодлик бор эди. Бир оздан кейин Чарос ичкари кириб кетди. Ёдгор сигаретини улоқтириб юборди-да, балкон панжарасига суюниб қолди. У қизиб кетган пешанасига қўнаётган қор учқунларини ҳам, мана шу муздек панжарани ҳам, нариги уйдаги деразалардан тушаётган нурни ҳам кучиб олгиси келарди шу топда.

Йўлакдан ғўнғир-ғўнғир товуш келди.

– ...Бу нима қилик? «Соф мухабbat», «Журналда ўқиганман», рақс тушишлар. Нега мендан куласиз? Нима, ёш боламани?..

Ёдгор Дилшоднинг овозини таниди. Унинг боядан бери тумтайиб ўтиргани кўз олдига келди. Аммо бу гаплар энди унинг ғашини келтирмасди.

Зум ўтмай Чароснинг овози келди:

- Менга хўжайнисиз, нима ишингиз бор?
- Гап шу, кетасизми, йўқми?
- Йўқ!
- Бўлмаса мен кетдим.
- Хайр!

Ёдгор бу жанжалнинг айбдори ўзи эканлигини хис қилгани учун эшитгиси келмай, атайлаб хаёлини чалғитди. Қор учқунларини кафтига илиб ола бошлади. Аммо беихтиёр ўша ёқдаги гаплар яна қулогига чалинди.

– Шу пайтда қаёққа борасиз, Дилшод? – Бу Авазнинг товуши эди.

Бирпастдан кейин эшик қулфи шиқирлади-да, жимлик чўқди.

Ёдгор хонага қайтиб кирди. Зойиржон диванга ёнбошлиб мудрар, ўқтинг-ўқтинг хиқиҷоқ тортиб қўярди. Тамила боласини кучоклаб ўтирап, Аваз ака стул суюнчиғига кафтини қўйиб жилмайиб турар, Чарос эса дастурхонни янгилар эди.

– Келдингизми? – деди у Ёдгор кириши билан. Ёдгор унинг кўзларидан ташвиш ифодасини излади-ю, хотиржам қиёфасини қўриб, кўнгли жойига тушди.

Чарос чой олиб кирди. Яна қувноқ кайфият тикланди. Зойиржон уйгониб, тағин ичди.

– Тоға, мен кетаман, – деди Чарос анчадан кейин.

– Кўйсанг-чи, – Аваз ранжиб, кескин киёфада қўл силтади. – Соат уч бўляпти, тентак.

– Нимадан қўрқаман? – Чарос кулиб, Ёдгорга қараб қўйди. Кейин илтимос қилгандай Аваз акага қаради. – Опам хавотир оладилар. Қайтаман, дегандим.

– Нега бўлмаса ҳали кетмадинг? Алламаҳал бўлиб қолди-ку!

Чарос елкасини қисиб, ширин жилмайди.

Ёдгор кизнинг кўнглидагини ҳалиёқ пайқаб олган, ҳаяжонланиб ўтиради.

– Мен кузатиб қўя қолай, – деди ўрнидан туриб.

Чарос жилмайиб, унга қаради.

– Уйимиз узоқ, қишлоқда турамиз. Студентлар шаҳарчасидан нарида.

– Яхши, йўлимиз бир экан, – деди Ёдгор Авазга қараб.

Аваз маслаҳат сўрагандек, хотинига қаради.

– Масалан, мен қоламан, – деди Зойиржон мудрок кўзларини ярим очиб.

...Кўчалар чароғон эди. Еру қўк кумуш нурга тўлган, учқунлар унсиз парвоз қилиб, Чароснинг рўмолига, жигарранг пальтосига қўнар, Ёдгор унинг нозик елкалари, жажжи гавдасидан кўз узмай борар, секинроқ

юргиси, шу бахтиёр дамларни узокроқ чўзгиси келар эди. Улар қорда чуқур-чуқур из қолдириб, жимгина келишарди.

Театр ёнидаги арча олдида бир зум тўхтаб қолишиди.

Ёдгор кулиб юборди.

– Қаранг, шумтакаларнинг ишини!

Чарос ҳам қаҳ-қаҳ уриб кулди. Шўх болакайлар қорбобонинг ҳассасига пакир илиб кетишибди.

Аллақаердан курант садолари келди.

– Эҳтимол, бошқа бир сайёрада ҳам Янги йил киргандир, – Ёдгор Чарос билан ёнма-ён бораракан, муздек ҳавони ҳузур қилиб симирди. – Бундай қараганда, ер курраси коинотда қум заррасидек бир гап. Биз одамлар шу зарранинг бир заррачасимиз. Шу ҳолимизга ташвишларимиз дунёни тутади.

– Серташвиш одамлар бўлмаса дунё ҳам бўлмасди, – деди Чарос бурилиб қараб. Кейин этиккаси билан қор тепкилаб кулди. – Италияда Янги йил кечаси ортиқча нарсаларни деразадан улоқтиришаркан-а?

Ёдгор индамай бош силкиди.

– Бизда шунақа одат бўлса, энг аввал Дишод акани ташлаб юборардим.

– Нега уни ёмон кўрасиз? – деди Ёдгор.

– Ёмон кўраман эмас, яхши кўрмайман. Опам бўлсалар ҳадеб мақтайдилар. Бугун ҳам юзларидан ўтолмасдан бирга келгандим.

Ёдгор индамади.

Уларнинг ёнидан – йўлкага яқин жойдан гуриллаб мотоцикл ўтди. Телпагини бостириб олган, қора қўлқоп кийган милиционер мотоциклини секинлатиб, шубҳа билан қаради. Кейин қорлик орасига кириб кетди. Мотор товуши анчагача ҳавони титратиб турди.

– Бир нарса сўрасам, кўнглингизга келмайдими? – деди Чарос анчадан кейин. – Отингиз нега Ёдгор?

– Нимаям қила олардик, отни чақалоқ ўзига-ўзи танлай олмайди. – Ёдгор ўйчан табассум билан Чаросга қараб кўйди. – Бу менинг иккинчи отим бўлса керак. Биринчиси нималигини билмайман. Чамаси, икки яшарлигимда мени чойхонадан топиб олишган экан. Билмадим, адашиб қолганманми ё онам бирон ерда очликдан узилиб қолганми... Ўшанда урушнинг охирги йиллари, қаҳатчилик экан. Чойхоначининг ёши олтмишга яқинлашганда кўрган ўғли ўлиб қолган экан. Ота-онами сўроқлаб тополмаганидан кейин ўшанинг ўрнига Худо етказди, деб уйига олиб кетибди. Отимни Ёдгор қўйибди.

Чарос ўзи билмай унинг ярасига тегиб кетганини сезди, хижолат чекиб қараб кўйди.

– Кейин-чи? – деди атайлаб хушчақчақ оҳангда.

– Кейин мактабда ўқидим... Мактабгаям икки йил кечикиб борган эканман.

– Кейин-чи?

– Кейин чол-кампирлар вафот этишди.

– Кейин-чи?

Ёдгор қизнинг атайлаб сўроқлаётганини, кўнглини кўтармоқчи эканини тушуниб, енгил тортди.

– Кейин интернатда ўқидим, ишладим.

– Кейин-чи?

– Кейин... – Ёдгорнинг юраги шув этиб кетди. «Кейин уйландим», демоқчи бўлди-ю, тили бормади. Ақалли шу бугун ташвишларни эслагиси келмади. – Кейин... ўқияпман, – деди секин, – архитектор бўлмоқчиман.

– Салкам ҳамкасб эканмиз, – деди Чарос қувониб. – Мен рассом бўлмоқчиман.

– Биламан, – Ёдгор жилмайди. – Театр ва рассомлик институтида ўқийсиз.

Чарос тўхтаб қолди. Ёдгор ҳам ўгирилиб қаради-ю, унинг кўзлари пирпираб кетганини кўрди.

– Қаёқдан биласиз? – деди Чарос товуши товланиб.

Ёдгор унинг овозида яширин кувонч борлигини сезиб, ўзи ҳам суюниб кетди.

– Биламан-да, – деди атайлаб сирли қилиб. – Кузда темурийлар даври санъатига бағишланган симпозиум олдидан ўтказилган КВН мусобақаси эсингиздадир? Беҳзод... Унинг шогирдлари Қосим Али... Яна ким эди, кўпроқ дехқонлар хаётини тасвирлаган?

– Мир Сайд Али, – деди Чарос Ёдгорга шўх бурилиб қараб. – КВНда элликка яқин талаба қатнашган эди-ку, ҳаммани эслаб қолган бўлсангиз, хотирангиз яхши экан.

– Институтларингиз ютиб чикқан бўлсаям, сизнинг хотирангиз зўр эмас экан, – Ёдгор кулди. – КВНда мен ҳам бор эдим. Нимагадир сизни айниқса эслаб қолгандим.

– Шунақами? – Чарос астойдил ажабланди. – Мен ўшанда жудаям ҳаяжонлангандим. Шунинг учун бўлса керак... – У юмшоқ қорни унсиз босиб бораркан, ўйчан тарзда қўшиб қўйди. – Кейин ҳам симпозиум материалиларини кўриб чиқдим. Ҳамма мутахассислар Беҳзод билан унинг шогирдлари истеъодди рассом бўлганини айтишибди. У даврда бошқа рассомлар ўз асарларига диний мавзуни асос қилиб олишган бўлса, Беҳзоднинг миниатюраларида ҳаётий воқеалар – ов, подшоҳлар сафари, табият манзаралари тасвирланади. Хуллас, у реал ҳаётга яқин туради.

– Бу асарларнинг кўпи сақланиб қолмаганда-а?

Чарос Ёдгорга қараб қўйди.

– Афсуски, сақланиб қолмаган, ўн олтинчи аср инқирозидан кейин бор маданий ёдгорликлар ҳам йўқолиб кетган. Пайти келиб топилса, ажабмас.

Чарос жимиб қолди. Ёдгор шу топда унинг чукур ўйга толганини, кипригига қўнаётган қорни ҳам, соchlари хўл бўлиб кетганини ҳам пайқамай бораётганини кўриб турарди. У бояги ўзига тааллуқли мавзу ўзгарганидан

кувонди. Бунинг устига Чарос ҳам ўзи ўйлаб юрган нарсани айтатётганини билиб, ҳаяжонланиб кетди.

– Билмадим, – деди куюнчак овозда, – мактабда тарихни ёмон ўқитишганми, ўзимиз ёмон ўқиганмизми... Навоий, Ибн Сино, Улуғбек... Яна ким? Бошқаларнинг номиниям билмаймиз, шундай эмасми? Саккизинчи асрдан ўн олтинчи асргача Ўрта Осиё жаҳон маданияти марказларидан бири бўлганини мен ҳам энди биляпман. Колумб Америкага тасодифан бориб қолишидан тўрт ярим аср илгари Беруний Ер куррасининг нариги томонида катта қуруқлик борлигини айтиб, Американинг тахминий харитасини чизиб берганини, Ер шарининг диаметрини аниқ ўлчаганини яқинда билдим. Хивага борганимда минг йиллик биноларнинг аниқ тригонометрик чизмалар билан қурилганини кўриб, оғзим очилиб қолди. Бундай лойиҳалар чизиш учун зўр мутахассис бўлиш керак. – Ёдгор саратон офтобида ёнган тор кўчаларни, пештогига ранго-ранг жилоларда ғазал битилган саройларни эслади.

– Хивага борганимисиз?

– Йўқ, – деди Чарос сочига ёпишган қорни кафти билан сидириб, – Аммо ўқиганман. Паҳлавон Маҳмуд мақбараасининг орнамент безаклари жуда мураккаб дейишади. Ёзги таътилда бормоқчиман.

– Ўша даврда шундай ноёб иншоотлар бунёд этилганига ақл бовар қилмайди. Фан билан санъат шундай уйгуналашиб кетганки! Бинолар пештоқига ўрнатилган сиркор безакларнинг кимёвий таркибини ҳалиям топиша олмаяпти. Демак, кимё фани ҳам ўша пайтда юксак бўлган экан...

– Самарқанднинг икки ярим минг йиллиги муносабати билан реставрация яхши бажарилган дейишади, аммо Хивада бу иш суст бораётган эмиш, шунақами? – деди Чарос Ёдгорга қараб.

– Тўғри, – Ёдгор ўйчан бош силкиди. – Шундай яхши мадрасаларнинг бирига арқон тўқиши артели жойлашган, бирига карвонсарой. Шаҳарга ҳар куни дунёниг тўрт бурчагидан юзларча туристлар келади. Туризмдан тушган маблагнинг ўзига тарихий обидаларни бемалол таъмирласа бўлади. Ҳам давлатга фойда, ҳам обидалар яхши сақланади.

У чироқлар нурида осуда мудраётган қўчага тикилганча жимиб қолди. Кўча кимсасиз эди. Сўнгги бекатда қатор тизилган трамвайлар тўхтаб турар, баъзиларининг деразаларида чироқ кўринар, кўплари чироқсиз, томини кор босган эди.

– Чарчамадингизми? – деди у хаёл суриб кетаётган Чаросга.

– Йўғ-е, кор ёғаётганда юришни яхши кўраман, – Чарос шўхлик билан қор тепкилади. – Мен мактабда математикани яхши кўрардим, айниқса алгебрани. Қизиқ, алгебра деган сўзниг ўзи Хоразмийнинг «Ал-Жабр» асари номи билан боғлиқ эканини энди билдим.

– Ўзимиз қизиқкан соҳани чала-чулпа билиб оламиз-у, дунёда биздан кучлироқ мутахассис йўқдай гердайиб юрамиз, – деди Ёдгор кулиб. – Ҳамма соҳада ҳам ўтмиш билан келажакни боғлай билиш керакка ўхшайди. Донишманд боболаримизни саводсиз, деб бир чеккага йиғиштириб қўймасдан, ўшаларнинг ҳикматини ўрганишимиз керак.

– Масалан, сиз, – Чарос тўхтаб, дикқат билан унга тикилди. – Обидаларнинг бирон нарсасини бугунги кун курилишига татбиқ этармидингиз?

«Жуда амалий савол бўлди-ку», – деб ўйлади Ёдгор Чароснинг хўл киприклари орасидан синовчан тикилиб турган кўзларига қараб.

– Нега мумкин бўлмасин, мумкин, – деди анчадан кейин.

- Масалан, нимасини?
- Масалан, ташқи безагини. Бинолар шунчаки бошпа-на эмас, санъат асари ҳам бўлиши керак-ку.
- Лекин ҳаммага бир текис қаср қуриб бериб бўлмайди-да.
- Тўғри, уй-жой муаммоси бутун дунёда биринчи да-ражали муаммо бўлиб турибди. Лекин бинолар бари бир ҳам қулай, ҳам чиройли бўлиши керак. Ҳеч бўлмаса са-ройлар, клублар, маъмурий бинолар қурилишида замона-вий усул билан қадимиш шарқ услуби уйғунлашиб кет-са яхши бўларди. Ҳозир шундай қилиняпти. Туар жой бинолари масаласида ҳам муаммолар кўп. Ўн бешинчиди студентлар илмий жамиятида докладим бор. Ўйлаб юр-ган баъзи гапларимни айтмоқчиман.
- Муваффакият тилайман, – Чарос тор кўча бошидаги симёоч тагида тўхтаб, самимий жилмайди. – Уйга ҳам етдик.
- Ёдгор хуши энди ўзига қелгандек, атрофга аланглади. Тор кўчанинг икки четидаги каллакланган толлар боши-да оқ қалпоқдек қор тўпланиб қолган, деразаларда чирок ўчган эди.
- Гап билан бўлиб пайқамай ҳам қолибман... Уйин-гиз ростдан ҳам чекка жойда экан, ўқишига қандоқ қатнайсиз? – деди у Чаросдан кўз узмай.
- Айтдим-ку, қишлоқда турамиз, деб. Бу ерлар энди шаҳарга қўшилди. Ўзи шаҳарга ўхшаса ҳам ҳозирча кишлоқ. Одамлари ҳам шунаقا... – Чарос кулиб кўйди. – Ҳадеб келаверсангиз, сизнинг ҳам таъзирингизни бериб кўйишади.

«Майлийди, – деб ўйлади Ёдгор хаёлан жилмайиб. – Энди қачон қўришамиз? – Шу фикр лип этиб келди-ю, ўзини сўқди: – Нима ҳаққинг бор?!»

У қизнинг қор кўнган рўмолига, пальтосига узок қараб қолди. Рўмоли тагидан чиқиб турган соchlаридаги

корни силаб туширгиси келиб кетди. Аммо қизнинг жажжи қўлини қисиб, совуққина хайрлашди:

– Хайр.

Чарос тор кўчага чопқиллаб кириб кетаркан, Ёдгор юраги узилгандай, толга суюниб анча туриб қолди. Зум ўтмай энг ичкаридаги ҳовли эшиги очилди. У оёги музлаб кетгунча шу алфозда турди-да, кейин секин-секин юриб кетди. Осмон бўзариб қолган, Янги йилнинг тўнгич тонги туғилмокда, қор сийраклашган эди.

\* \* \*

Чарос ертўладан ўтин-кўмир олиб чиқаман, деб курумга беланди. Ўтинни «голланд» печкаси олдига ташлади-да, ювиниб келди. Кейин тараша қилиб, олов ёқди.

Оқшом тушиб қолган, уй нимқоронғи, совуқ эди. Гурт чўпининг ожиз алангаси аввалига аранг липиллаб турди-да, ингичка пайраҳага тегиб, ловиллатди. Кейин каттароқ пайраҳа ёна бошлади. Бора-бора печка гувуллаб кетди. Чарос унинг чўян эшигини беркитмай, чўнқайиб ўтирганча оловнинг ёнишини томоша қиласади. Ўтиннинг чарсиллаши сукунатни ўқтин-ўқтин бузиб қўяр, аланга яллиғи деворларда, буфет ойналарида ўйнарди. Осмоннинг қайси бир бурчида самолёт ғувуллади. Уй деразалари зириллаб кетди. Сўнг яна сукунат чўқди.

Чарос болалигида хам оловга тикилиб ўй суришни яхши кўради. Балки бу одат кашшофлар лагерида сафарга чиқиб, гулхан ёқишганларидан қолгандир. Онаси уни ҳар йили болалар оромгоҳига юборарди.

Хозир у Ёдгорни ўйлар, Янги йил кечаси хайрлашганидаги қиёфаси кўз ўнгидан кетмасди. У йигитнинг совуқ хайрлашганини сезган, аммо сабабига тушунолмаган эди. «Ғалати йигит экан. Мағрурми-ей»...

Айвон эшиги очилди.

«Опам!» Чарос дик этиб ўрнидан турди. Васила Назаровна хонага кириб келди.

– Нега қоронғида ўтирибсан?! – деди чироқни ёқиб.

– Ўзим... – Чарос ҳозир ўйлаган ҳәёллари онаси олдида фош бўлиб колаётгандек чўчиб, унга қараб кўйди.

Ташқари совуқ бўлса керак, Васила Назаровна сезилмас харсилларди. Чарос унга ачиниб қаради.

– Ҳозир чой кўяман...

– Йўқ! – Васила Назаровна қўл силтади. – ўтириб, гап бор. – У қошини чимириб, диванни кўрсатди.

Чароснинг юраги увушиб кетди. У онасининг феълига ўрганиб қолган, жаҳли чиққанида овози шунака, эркак-часига йўғон бўлиб кетишини билар эди.

«Дилшод ака чаққан, – деб ўйлади қўрқа-писа диванга ўтираркан. – Уятсиз...»

Васила Назаровна сумкасидан сигарет олиб тутатди. Кўли билан тутунни ҳайдаб, Чаросга қаттиқ тикилди.

– Янги йил куни ким кузатиб кўйди?

Чарос индамасдан ерга қаради. Бармоқлари билан диван ёпғичини ўйнай бошлади. Онаси ҳамон жавоб кутиб турганини билиб, секин бошини кўтарди.

– Дилшод ака айтгандир...

Васила Назаровна қошини янаям керди.

– Бошқаларни ўртага сукмай тур!

Чарос яна ерга қаради. Онаси унга рост гапиришни ўргатган эди.

– Битта бола, – деди пичирлаб.

– Ким ўша «бола»?

Онаси сўнгги сўзни киноя билан айтгани Чароснинг ҳамиятига тегди.

– Ҳар ҳолда, Дилшодингиздан яхшироқ бола, – деди қайсарлик билан лабини тишлаб.

– Қаёқдан била қолдинг яхшироқлигини? – Онаси унинг устига ёпирилиб келди.

Чарос онасининг семиз оёқларини кўриб туар, хозир жаҳлдан кўзлари ёнаётганини ҳис қилар, аммо бошини кўттармасди.

– Ҳар ҳолда, бирорни ўртага солмайди.

– Нима бирор, ким бирор? – Васила Назаровна қўлини пахса қилиб силкитди. – Мен сенга бирор бўлиб қолдимми? Гапир!

Чарос кўз қирини ташлаб, онасининг ғазабдан қизариб кетган юзини кўрди. Фикрини тўғри тушунтира олмаганидан афсусланиб, индамай ўтираверди.

– Мен Дилшодингизни ёмон кўраман, – деди овози титраб. Кейин ёш тўла кўзлари билан онасига қараб кўйди. – Сиз менга ҳадеб мақтайверманг!

Васила Назаровна нари кетди. Сигаретини печканинг кулхонасига ташлаб, қаддини кўтарди.

– Дилшодни хоҳламассанг, гаплашма, – деди анчадан кейин босиқ товушда. – Ҳеч қачон сени мажбур қилмайман. Лекин сени яхши инсон бўлишингни хоҳлайман. Жуда эркалатиб юбордим шекилли. – У яна Чароснинг тепасига келди. – Тақдирингни мендан бошқа ўйладиган одам йўқ. Гап шу, – деди яна овози жаранглаб. – ўша бола билан билар-билимас учрашмайсан. Бор, дарсингни қил!

Чарос хонасига кириб, ётиб олди. Кўз ўнгига Ёдгорнинг чехраси келди.

«Учрашаман! – деди кўрпага бурканганича пичирлаб. – Дилшоднинг шу қилгани учун ҳам учрашаман! Ўлсин аламидан!»

\* \* \*

«Нима бало, яхши кўриб қолган шекилли бу, – деб ўйлади Васила Назаровна хонанинг у бошидан-бу бошига бориб келаркан. – Бўлмаса йиғламасди».

У Дилшодни мактабга ишга келгандаёқ ёқтириб қолганди. Бунинг устига унинг адвокат бўлиб ишлайди-ган онаси қизлиқдан Васила Назаровна билан дугона эди. Назарида Чарос ҳам аввалига Дилшодни ёқтиргандек бўлувди шекилли. Ким билсин, нима жин урди буни.

Яхши кўрмаса ўзининг иши. Лекин Васила Назаровна одамларга майна бўлишни хоҳламайди. Мактабда ҳамма ундан зир титрайди. Ўқитувчилар, директордан эмас, за-вучдан кўрқамиз, дейишганини ўзиям эшишган. «Аввал ўзингнинг қизингни эплаб ол», деган таънани эшишишга тоби йўқ. Чарос ҳали ёш бола, хеч нимани тушунмайди. Эркак зотининг ҳаммаси бир гўр. Бошини айлантириб юриб-юриб, ташлаб кетса, додини кимга айтади.

Умуман, муҳаббат деганнинг ўзи бир пуллик гап. У буни яхши билади. Бўлмаса ўзининг ҳаёти шунчалик бўлармиди...

Васила Назаровнанинг қуонганича бор эди. У ўзининг чалкаш кисмати қизининг ҳам бошига тушиши-ни хоҳламасди.

Васила ёшлигига олов эди. Ўшандада тўртинчи курсда ўқирди. Уни математика факультетининг комсорги қилиб сайлашди. У ўзининг принципиал раҳбар бўлишини кўрсатди. Бир куни институтга бола кўтарган жувон йиғлаб келди. «Кеча эrim овқатни шўр қилибсан, деб урди. Қачон қараманг, ўтирасам ўпок, турсам сўпок, деб турткилайди. Койиб қўйинглар, сизларда ўқиди», деди ёлвориб.

Комсомол зўр куч эди ўшанда. Васила мажлис чақириб, талабани шартта институтдан ҳайдаттириб юборди. Йигит унинг оёғига йиқилгудек бўлиб узр сўради. Аммо Васила кечирмади. У хотинига қўл кўтарган одамдан педагог чиқмайди, деб билар эди. У кезлари, умуман, комсомол аралашмаган иш йўқ эди. Яна бир сафар институт домласи ўз талабасига уйланмоқчи бўлганида нари обориб, бери обкелишди.

Васила яхши талаба, яхши ташкилотчи эди. Факультетда ҳамма ундан чўчирди.

Бешинчи курсга ўтганида Мўминжон деган бир аспирант унга ошиқу бекарор бўлиб қолди. Ўзиям мўмин-қобилгина эди. Васила бу йигит ўзини ҳар кўрганида эсанкираб қолишини, худо билсин, кечаси билан ўйлаб келган гапларини айтольмай, довдирашларини кўриб завқланарди. Йигит бир йилча судралиб, унга осилиб юрди. Бора-бора Васила ҳам уни ёқтирадиган, янги очилган Навоий театринга томошага тушадиган бўлди.

Хуллас, институтни битириб, мактабга ўқитувчи бўлиб жойлашганидан кейин тўйлари ўтди. Мўминжон уни еру кўкка ишонмас, овқат қилса пиёз тўғраб берар, кир ювса сув иситарди. Васила баҳтиёр эди, орзулари каттайди. Ўзи ҳам аспирантурага киришга қарор қилди. Институтда шуни ваъда қилишганди. Ҳомиладор бўлди-ю, бутун орзулари корга ёзиб, офтобда куритиладиганга ўхшаб қолди. Йўқ, Васила жамият учун фойдали одам бўлишни истарди. У билими эриникидан қолишмаслигини, яхши олим бўлишини билар эди. Бир куни аборт килдирмоқчи эканини эрига ётиғи билан тушунтириди.

Тили билан тенг айланадиган Мўминжон бирдан ўзгарди. «Жамиятга яхши фарзанд етиштириб бериш – баҳт эмасми, ишлаб юрибсиз-ку, аспирантура қочмас», – деб тўнгиллади. Васила қараса, эри уни уй кули қиласиган. Ўйлай-ўйлай аниқ қарорга келди-ю, жон ховучлаб бўлсаям боласини олдирди.

Шу-шу оиладан путур кетди. Мўминжон уни силтайдиган, ичадиган одат чиқарди. Охири бир куни уйда кутилган жанжал чиқди. «Қараб тур, кўзингни ўйнатиб сендан минг чандон яхшисини топаман», деди Васила қасдлашиб. Топди ҳам. Мактабларига амалиётга келган ёшгина, чиройли талаба йигитга турмушга чиқди.

Уй-жой Василанинг номида эди. Мўминжон папкасини кўлтиқлаб, чиқиб кетди.

Васила энди илмий ишга киришмоқчи бўлганида мана шу Чарос бўйида бўлиб қолди. Бу сафар бола олдиришга ўзиям қўрқди. Аввалига Василанинг ҳар сўзини хукм деб биладиган Абдураҳмон бирдан айниди. «Сен менга алдаб тегиб олгансан», деб тўполон кўтарадиган бўлди. Васила эндиам турмуши бузилишини истамас, эл-юрт олдида уялар, қай йўл билан бўлмасин, Абдураҳмонни тутиб қолишга уринарди. Бари бир, кумдан қаср ясаб бўлмас экан. Абдураҳмон очиқдан очиқ бошқа бир киз билан «юриб» кетди. Одам баҳтсиз пайтида айбни ўзгалардан излайди. Васила: «Мухаббат дегани шу бўлса, уйи куйсин! Эркак зотининг падарига лаънат», деган қарорга келди. Абдураҳмон ўқишини битириб, қишлоғига – Чимёнга кетиб қолди. Чамаси, у Василанинг ялиниб боришини кутган бўлса керак. Йўқ, у ялинмади.

Бир куни у Абдураҳмоннинг уйланганини эшилди. Эшилди-ю, юраги жиз этди. Негадир Мўминжонни эслади. «Кирилсин, ҳаммаси бир гўр!» – деди нафратланиб. Ўзини ишга урди. Мана, обрў-эътибор топди. Илмий бўлим мудири бўлди. Аввал Васила эди, Васила Назаровна бўлди. Шунча қийинчилклари эвазига топгани ҳам, тутгани ҳам мана шу Чарос бўлиб қолди.

У қизини яхши ўқитди. Эркин ўстирди. Қишлоқ кизлари орасида биринчи бўлиб Чарос велосипед минди. Биринчи бўлиб Чарос конъки учди. Ҳа, у Чароснинг йўлига тўғаноқ бўлмайди. Ўзи шунака ота-оналарнинг таъзирини бериб келяпти. Лекин унинг баҳтсиз бўлишиниям хоҳламайди. Ишқ-севги деганлари ўткинчи бир ҳавас, холос.

...Девордаги соат даранглаб, ўн бир марта занг урди. Унинг садолари уй ичидагача тебраниб турди. Ва-

сила Назаровна дивандан туриб, яна чекди. Чароснинг хонасига ўтди. Қизи кўрпага бурканиб олган эди. Чарос ухляяптими ё атайлаб ўзини ухлаганга солиб ётибдими, у билолмади. Бирпас тепасида турди-да, ҳали йиғлаганини ўйлаб, юраги эзилди. «Тентак қиз, аллақанаقا «бола» деб йиглаб ўтирибди-я!»

\* \* \*

Архитектура кафедрасининг мудири – силлиқ қиртишланган қип-қизил бошли доцент қаварик қўзойнагини қаншарига кўндириб, кўлидаги рўйхатга қаради.

– Энди учинчи курс студенти Ёдгор Мирзаев «Курилиш эстетикаси ва тураржой биноларини маҳаллий шароитга мослаштиришнинг баъзи масалалари» ҳақида маъруза қилади. Илмий раҳбари санъатшунослик фанлари номзоди, доцент Валиев.

Ёдгор ўртароқдаги қаторда ўтирган эди. Карнай қилиб ўралган чизмасини қўлга олиб ўрнидан тураркан, оёқлари бўшашиб кетганини ҳис қилди. Икки қатор столлар орасидан ўтиб бораётib, хамма ўзига караётганини сезди-ю, батттар ийманди. У бу ерда юқори курс талабалари кўплигини билар, шунинг учун ҳаяжонини босиб ололмас эди. Бунинг устига кеча илмий раҳбари йиғилишга қатнаша олмаслигини айтган эди.

Кафедрага чиққандан кейин дафъатан, гапни нимадан бошлашни билмай қолди.

– Гапираверинг, – деди қўзойнакли доцент далда берган оҳангда.

– Бултур мен Хоразмга боргандим, – деди Ёдгор кафедранинг қиррасига қараб. Кейин фикрлари қуйилиб келаётганидан кувониб, ўзини босиб олди. – Хоразмда кўпинча уйларнинг деразаси кўчага каратилмайди. Биринчи марта кўрган одамга ғалати туюлади. Уйлар-

нинг пештоқига сувоқ аралаш кўзгулар ёпиштириб кўйилганини кўриб ҳайрон қолдим.

Ёдгор залга қараб олди-да, хотиржам давом этди:

– Нега шундай қилишган? Негаки, инсон ҳамма ерда, ҳамиша гўзалликка интилади. Биз ўз ишимизга факат қурилиш деб эмас, санъат деб ҳам карашимиз керак. Шундай қиляпмизми? Оддий бир мисол: Чилонзорга борсан-гиз адашиб қоласиз. Ҳамма уйлар бир-бирига ўхшайди.

– Зилзилада қаёқда эдингиз? – деди залдан кимдир луқма ташлаб.

Ёдгор довдираб қолди.

– Келесда...

Залда қувноқ қаҳқача кўтарилди.

Доцент ҳам кўзойнагини столга ташлаб, қотиб-қотиб кулди. Кейин ручка билан залга таҳдид қилди:

– Жим...

Аммо зал ҳадеганда тўхтамади. Қайтага ғовур-ғувур бўлиб кетди.

– Зарур бўлгандан кейин қуришган-да.

– Ҳозир зарур эмасми?!

– Тугилиш кўп.

– Тошкентга кўчуб келаётганлар ундан кўп.

Ёдгор зал тинчигунча ўзини босиб олди.

– Тўғри, – деди ўзиям кулиб. – Зилзилада мен Келесда эдим. Курилишда ишлардим. Аммо Чилонзорда зилзиладан илгари қурилган уйлар ҳам бир-биридан фарқ килмайди. Рост, зилзиладан кейин уй-жойларни қай тарзда қуриш керак, деган масаладан кўра қанча қуриш, қачон битказиш керак, деган масала муҳимроқ эди. Кўчада, палаткаларда ётган одамларни жой билан таъминлаш зарур эди. Шунинг учун ҳам кўп боғлар йўқ қилиб юборилди. Лекин тез муддат ичida одамлар бошпана билан таъминланди. Аммо энди-чи?!

Ёдгор жиддий сукунат чўмган залга қараб қўйди.

– Ҳозир кўчада қолган одам йўқ. Лекин ўша камчилик энди одат тусига кириб қолди. Югославияда қадими анъана бор экан. Ҳар бир йигит вояга етганида ўттиз туп дараҳт ўтқазиб кўкартириши керак экан. Бизнинг ота-бо- боларимиз ҳам жой олиш, иморат қуришдан олдин дараҳт ўтқазишни одат қилган. Бунинг ҳайрон қоладиган жойи йўқ. Бир дараҳт вояга етиши учун камида бир йигит умри керак. Ҳолбуки, ҳозирги техника билан уйни тиклаш учун ярим йил кифоя.

– Жон бор бу гапда, – деди кимдир секингина.

Ёдгор аудиторияга хотиржам назар ташлади.

– Менимча, табиатни иложи борича асраб қолиб уй қуриш, бинокорлик эстетикасининг бир бўлаги бўлса керак...

Кўп қаватли уйлар қуриш масаласига келсак, аввало, бизда сифат паст, – деди Ёдгор ўйланиб. – Қўлингизни чўзсангиз, шифтга тегади. Бир одам: «Тошкент иссиқ шаҳар, бу уйларда ҳаво етишмайди», деса, аллақайси овсар: «Ҳавони кўчага чиқиб ола қол», деган экан.

Уйларни маҳаллий шароитга мослаштиришнинг яхши мисолини Пушкин кўчасидаги биноларда кўришимиз мумкин. Бу уйларда балкон кенгайтирилиб, ёпиқ айвон ҳолига келтирилган. Бизнинг шароитда айвонсиз тириклик қилиб бўлмайди.

Ёдгор залнинг жимжит бўлиб қолганидан руҳланиб, кувонди.

– Уйларнинг архитектураси масаласига келсак, Франциянинг «Камью» фирмаси лойиҳаси билан қурилаётган тўққиз қаватли бинолар бор. Улар кўзни зериктирмайди. Негаки, ташки девори бир тусда эмас. Бетон конструкцияларга заводнинг ўзида сайқал берилган. Ҳам чиройли, ҳам ранг-баранг. Менимча, уйсозлик комбинатларида шундай конструкциялар ишлаб чиқаришни кўпайтириш керак.

– Ҳозир ҳам ишлаб чиқариляпти, – деди кимдир.

– Тўғри, – Ёдгор овоз чиқкан томонга қаради. – Лекин юзларча уйлар бир хилда, сайқал берилмаган, кулранг ёки сариқ плиталар билан қурилияпти. Яна бир муаммо бор. Балконига кир осганларни кўча ҳуснини буздинг, деб уришишади, газеталарда боплаб танқид ҳам қилишади. Хўш, жой бўлмаса, ҳовли бўлмаса, кирини қаёққа оссин? Менда бундай таклиф бор. Хомаки таклиф. – У чизманни очиб, залга кўрсатди. – Ёнма-ён хонадонларга мана шунга ўхшаш кир осадиган жой ажратиш керак. Бундай хонани ҳар икки хонадонга биттадан ажратса бўлади. Бу хонани ойнабанд айвон вазифасини ҳам ўтайдиган қилиб мослаштириш мумкин.

Кўзойнакли доцент келиб, унинг қўлидан чизмани олди. Диққат билан тикилиб қаради-да, маъқуллаб бош силкиди.

Муҳокамага чиқкан юқори курс талабаларидан бири – озғин йигит Ёдгорнинг таклифларини нореал, деб топди.

– Тошкентдаги уйларнинг шифтини баланд қилиш, умуман, мумкин эмас. Бу нарсани бошида ўйлаш керак эди. Сабаб: бутун-бутун уйсозлик комбинатлари шу нусхада бетон конструкциялари ишлаб чиқаряпти. Агар Мирзаевнинг гапига амал қилинса, заводнинг ўзини реконструкция қилиш керак. Унга кетадиган маблағни Мирзаев чўнтағидан тўлайдими?

Яна бир талаба – чамаси, тўртинчи курсда ўқиса керак (Ёдгор уни беш-олти марта кўрган эди) – дўмбоққина қиз қизишиб гапирди:

– Сиз скептик экансиз! – деди бояги йигитга бармоғини бигиз қилиб. – Ким сизга айтди, бир умр шундай конструкциялар ишлаб чиқарилади, деб?! Қурилиш тўхтамас экан, янги уйсозлик комбинатлари ҳам ишга тушаверади. Ўша комбинатлар ишлаб чиқарадиган маҳсулотга Мирзаевнинг таклифларини ҳам жорий этса бўлади. Биз

факат бугунни эмас, қирқ-эллик йил кейинги ҳаётни ҳам ўйлашимиз керак. Дараҳтларни кийратишига чек қўйиш масаласи эса худди бугунги кун муаммоси!

Ёдгор жим ўтирганча баҳслашаётган талабаларга кулоқ солар, ўз фикри тўғри эканига шубҳа қилмас эди.

Охирида кафедра мудири ҳам унинг таклифини маъқуллади:

– Тўғри, – деди у кўзойнагини йилтиллатганча залга қараб. – Булар дарров ҳал бўлиб қўя қоладиган муаммолар эмас. Неча йилдан буён бўлаётган баҳснинг давоми. Аммо диққатга сазовор таклифлар.

... Ёдгор йўлакка чиқди-да, бир лахза тўхтаб колди. Пешанасида қалқан терни артди. Ҳозиргина залдан чиққанлар ўзига қараб-қараб ўтаётганидан ийманиб, бошини куйи солди. Негадир, чеккиси келди. Шу пайт кўз ўнгидан ўтаётган сон-саноқсиз чехралар орасида жуда таниш, жуда азиз бир сиймо кўриниб кетди. Ёдгор бошини кўтарди-ю, йўлакнинг нариги томонида, дераза рахига тирсаги билан таяниб турган Чаросни кўрди. У қизил шарф ўраб олган, жажжи сумкасини ушлаганча кулиб туради.

«Келибди, атайлаб келибди», деб ўйлади қувончдан юзлари ловиллаб.

Чарос унинг қўлини маҳкам қисди.

– Яхши гаплар айтдингиз.

Ёдгор «шунчаки бир гап-да», дегандек кўл силтади-ю, аммо кўзларидаги нур шодлигини ошкор қилиб қўйди. Йўқ, у ўз таклифини гапиргани учун эмас, мана шу киз – Чарос келгани учун баҳтиёр эди.

Кўчада қуёш чараклаб ётар, дараҳтларнинг эгик шоҳларидан тап-тап этиб қор тушар, оёқ ости юмшоқ эди. Санъат саройининг олдидан ўтишаётганида Ёдгор бир кино афишага, бир Чаросга қараб қўйди. Аммо Чароснинг индамай кетаётганини кўриб, фикридан қайтди.

Саройдан гурас-гурас одамлар чиқди.

Стадионга кирмаймизми? – деди у Чаросга қараб.

– Бўпти!

Ёнма-ён боришаркан, Ёдгор киздан кўз узмас, баҳти-ёрлик туйғусидан маст бўлганга ўхшар, негадир ҳадеб жилмаяр эди. У шу кунларда Чаросни соғинганини, улар-нинг уйи олдига икки марта бориб келганини айтгиси ке-лар, аммо тили бормасди.

– Ҳовлинглар катта экан... – деди у ниҳоят чидолмай.

Чарос унга ярқ этиб қаради. Кўзларида севинч учқуни бир лаҳза ловиллаб кетгандек бўлди. Ёдгор унинг бу қарашидан «бордингизми?» деган савол уқди.

– Нималарни кўрдингиз? – деди Чарос жилмайиб.

– Сўриларингизнинг панжараси чиройли экан.

– Яна?

– Ошхонангиздаги деразанинг бир кўзи синибди.

– Яна?

– Водопроводингиз музлаб қолибди.

– Уни эритдик... Яна?

– Деразаларингга йўғон темир панжара тутилган экан.

Сизни ўғирлаб кетишимасин, дейишса керак.

– Тўғри... Тағин?

– Тағин? Қоп-қора, баджаҳл кучугингиз бор экан.

Чарос шодон кулди.

– Шуми?

– Шу.

– Яна бошқа нарсалар ҳам бор. Опамлар борлар, ко-сов бор, супурги бор.

Ёдгор ҳам самимий қаҳқаҳа урди.

– Ҳар қалай, супурги тузук, юмшоқрок.

Стадион дарвозасидан киришлари билан, узокдан йи-гирма қаватли бино кўринди. Икковлари ҳам беихтиёр ўша томонга бурилиб қарашди.

– Марказ чиройли бўлиб кетди-а, одам суюнади, – деди Чарос мамнун жилмайиб. – Хиёбон, музей, анави бино...

– Сездингизми, мана бу бинода ҳам, музейда ҳам, «Зангори гумбаз» ошхонасида ҳам кўзга ярқ этиб кўриниб турадиган бир нарса бор. – Ёдгор Чаросга ғолибона қараб қўйди. – Эсингиздами, Янги йил куни қадимий обидаларни замонавий қурилишларга қандай татбиқ этса бўлади, деган эдингиз. Музейдаги мармар панжаралар, «Зангори гумбаз»нинг ўзи, ана – йигирма қаватли бинонинг ҳаворанг деворидаги жимжимали безаклари шунга мисол бўлади, тўғрими?

Чарос унинг ёш болалардек ҳовлиқиб, қувониб сўзлаётганидан завқланди, киприкларини туташтириб, жилмайиб қўйди:

– Аммо-лекин, туаржой бинолари бир қолипда қуриляпти, деган бояги гапингиз тўппа-тўғри, – Чарос тогаси айтиб берган воқеани эслаб, кулиб юборди. – Тамила кеннойимнинг кекса отаси бор. Янгийўлда туришади. Ёзда бозорга мева-чева олиб келаркан-да, тогамницида ётиб юаркан. Подъездлар бир-бирига ўхшайди-ку. Уйни топсаям, подъезддан адашиб кетаркан. Пастдан туриб, овозининг борича кеннойимни чақиаркан. Бир хафтача шундай қилганидан кейин бехато топиб келадиган бўлибди. Тамила кеннойим, энди дадам ўрганиб қолди, деб суюнса, бир куни отаси уйнинг нариги бошида довдираф юрганмиш, – Чарос яна кула-кула Ёдгорга қараб қўйди. – Амаки адашмаслик учун йўлак эшигига тарвуздек тош қўйиб қўйган экан. Ўша куни болалар ўйин қилиб тошни юмалатиб, энг охирги подъездга обориб қўйишибди. Амаки бундан бехабар, бироннинг эшигини тақиллатиб, эсгинаси кетибди.

Ёдгор чолнинг соддалигидан ҳузур қилиб кулди. Кор босган зиналардан кўтарилиб боришаркан, Чарос пойабзал фабрикаси томонни кўрсатди.

– Қаранг, бу ёқдаям қурилиш...

Ёдгор эриётган қор ховури жимиirlаб турган тиник осмонга санчилган кранларни кўрди. Олисда – паст-баланд бинолар устида одамлар куйманиб юрар, кранлар темир паҳлавонлар сингари қўл чўзиб, охиста бурилар, ора-чора уларнинг ғариллаган товуши қулоққа чалиниб қоларди.

– Ҳа, қурилиш тўхтамайди, – деди Чарос, – Зилзиладан кейин бутун шаҳар кранлар ўрмонзорига ўхшаб кетган.

– Келесда зилзила билинмаган ҳам эди, – деди Ёдгор Чароснинг олисларга қадалган кўзларига караб. – Бу ерда кўркинчли бўлгандир?

– Унда мен мактабда ўқирдим, – Чарос зилзила кечасининг даҳшатли тафсилоти яна кўз ўнгидага жонланиб, кошларини чимирди. – Ўша кеча мен тоғамницида ётиб қолгандим. Улар Хадрада, театрнинг орқасида туришарди. Кечқуран кетаман, десам, Тамила кеннойим кўймади. Анчагача гаплашиб ўтиридик. Кейин кеннойим диванга жой солиб берди. Энди ухлаган эканман, бирор дивандан улоктириб юборгандай бўлди. Бир нима гумбурлаб кетди. Сервантдаги чойнак-пиёлалар шарақлаб, осмон ёп-ёруғ бўлиб кетди. Югуриб айвонга чиқдим. Бошқа хонадан тоғам билан кеннойим чиқиб келишди. Ўша кунлари газеталарда Икар деган комета Ерга яқинлашиб келаётиди, деган шов-шув бошланганди. Мен Икар Ерга урилди, деб ўйлабман. Йўқ, тоғам ер кимирлади, деб бизларни ховлига бошлаб тушди. Чироқ ўчиб қолган, кўни-кўшнилар бир-биридан ахвол сўраган. Кун ёришганидан кейин чироқ ёнди. Шоша-пиша радиони кўйсак, қайси завод Май байрами шарафига планни муддатидан илгари бажарганини гапириб ётиди. – Чарос мийигида кулиб кўйди. – Опамлардан хавотир олиб, уйга югурдим. Зилзила ростдан ҳам ёмон бўлганини кўчага чиққанимдан кейин билдим. Кўп уйларнинг девори қоқ ажраб кетиб-

ди. Одамлар нимагадир трамвай-троллейбусга ўтиrmай, тўда-тўда бўлиб пиёда кетишияпти. Уйга келсам, опамлар тогамларникига кетибдилар... Йўқ, кўп ўтмай ҳашарчилар кела бошлади. Кўчаларда: «Тошкентни энг чиройли шаҳарга айлантирамиз», деган шиорлар пайдо бўлди. – Чарос Ёдгорга қараб кўйди. – Қаранг, ҳакиқатан ҳам шундай бўлди-да!

– Менга, айниқса, битта нарса таъсир қилганди, – деди Ёдгор газетада ўзи ўқиган хабарни эслаб. – Ўшлиқ бир қизалоқ атлас кўйлак оламан, деб йигиб юрган беш сўм пулини боғча қуинглар, деб юбориби.

Улар марказий минбардаги панжара олдида тўхташди.

Стадион бўум-бўш эди. Ўриндиқлар оппоқ. Югуриш йўлкалари қураб тозаланган, майдонга эса қор уйиб ташланган эди. Ҳувиллаган стадион негадир ғариб кўринарди.

– Баҳорини кутиб ётибди! – деди Ёдгор майдонни кўрсатиб.

– Қизиғ-а, – деди Чарос стадиондан кўз узмай. – Битта тўп кетидан йигирма киши югуради. Олтмиш минг одам томоша қиласди. Шунинг нимаси хавас?

Ёдгор, Чарос бу гапни ҳазил қилиб айтиётганини тушиуни.

– Ўзларинг-чи? Аллақанақа бир ателье мини юбкани реклама қилса, ҳаммангиз ўша ёққа югуриб қоласизлар.

Чарос «шайтонсиз», дегандек кулиб кўйди.

Ёдгор ошириб юборганини сезди-ю, гапни чалғитиш учун майдонга имо қилди.

– Шунақа қорда чанғи учса бўладими?

– Биласизми?

– Билмайман.

– Мен биламан! – Чарос бошини бир ёнга ташлаб кулимсиради. – Чанғи тоғда учишли бўлади. Чимёнга борамизми? Чанғи базаси бор.

Ёдгор тараддудланиб қолди. Чароснинг дилидаги истакни билиб қувонар, аммо кўнглида чалкаш туйғулар түғён ура бошлаган эди. «Энди бу қизни кўрмасанг, туромайсан. Лекин бари бир алдаяпсан-да», деб ўйлади у ўзидан ғижиниб.

– Бувимларни ҳам кўриб келамиз, – деди Чарос ундан кўз узмай.

Ёдгор нохуш хаёlinи базўр нари суриб, сўради:

– Бувинглар ўша ерда туришадими?

Чарос бош силкиди.

– Яқинда дадамлар ҳам институтга келиб кетдилар.

«Институтга нега келади?» – деб ўйлади Ёдгор савол назари билан қизга қараб.

Чарос тушунди.

– Дадам кетиб қолганларида мен чақалоқ эканман. – У отасининг кетиб қолгани учун ўзи айбордек қизарди. – Айб опамдами, дадамдами, бунисини билмайман. Дадам Нукусда ишлайдилар. Ҳар гал бувимни кўргани келганларида мениям қидириб топадилар. – Чарос маъюс жилмайиб кўйди-да, оҳиста юриб кетди. Унинг ҳозирги киёфаси, шунчалик юрагини очиб гапириши Ёдгорни ларзага солди. Яна ўзини ёмон кўриб кетди.

\* \* \*

Ким ўз юрагини ўзи сугуриб олгиси келади? Кафтига кўнглан қуёшни улоқтириб юборишга кўзи қиядиган одам борми?

Ёдгор неча йиллардан буён алланечук бўум-бўш бўлиб ётган юрагини ёритган, иситган қуёшни қандоқ қилиб улоқтирсин?! Ҳаёти энди мазмун касб эта бошлаганида, қалби энди нурли туйғуларга тўла бошлаганида қандоқ қилиб воз кечсин?!

Ҳа, у билар эди. Бир вақтлар орзулари сароб бўлиб чиққанида, олтин деб шиша парчасини ушлаб олганини кўрганида, Азизанинг уйидан чиқиб кетаётганида қачондир чинакам бахтини учратишини билар эди. Мана, учратди ҳам. У худди мана шунака қизни топишини биларди. Топди ҳам, тақдирнинг ўзи уларни топиштириди. Мана у, мана, ёнида ўтирибди. Ёдгор унинг шодон кулгисини эшитяпти, ҳароратли нафасини сезиб турибди. Бир вақтлар Ёдгор елиб-югуриб яқин келган сайин ундан бир олам нарига қочадиган саодат энди ўз оёғи билан унинг ҳаётига кириб келяпти.

Лекин Чарос-чи?! Кимнинг юрагига қаср қураётганини у билмаса, Ёдгор билади-ку! Ўзининг гард кўнмаган, нурдек пок туйгуларини кимга ишониб топшираётганини у билмаса, Ёдгорга аён-ку!

Ёдгор Мирза буванинг чойхонасида дастёрлик қилиб юрганида бир кўр киши ҳар куни келиб, чой ичиб кетарди. Қишлоқдагиларнинг ҳаммаси уни танир, онадан кўзи ожиз туғилганини айтишар эди. Ҳар сафар шу кишини кўрганида Ёдгорнинг юраги эзилиб кетар, негадир уялар эди ундан. Ўзи кўриб турган нарсаларни бу одам кўрмаётгани учун ўзини айбордек санар эди. Кейинги пайтларда Чарос билан учрашганида ҳам шу туйфу тарк этмай кўйди уни. Ҳа, у кўрган нарсаларни Чарос кўрмаяпти, унга аён нарсани Чарос билмайди. Аммо билиши керак. Шу бугун билиши керак!

Ёдгор автобус деразасидан хомуш термилиб борар, Чарос алланималарни шодон-шодон гапирав, деразадан ташқарига имо қилиб, бир нималарни кўрсатганча тушунирав, Ёдгор шуурсиз тарзда бош силкиб маъкуллаган бўлар, аммо ҳеч нимани кўрмас, эшитмас эди.

– Тушдик! – деди бир маҳал Чарос.

Ёдгор ҳушини тўплаб, ўрнидан турди. Машинадан тушишлари билан муздек ҳаво ўпкасини тўлатиб юборди.

Чор-атрофини ўраб олган оқ-кўкиш тоғлар орасида кўрди ўзини. Ўққилар шундок боши устида турганга ўхшар, совук уфураг эди.

Гузарда одам сийрак, айвонга ўхшаш усти ёпиқ бекатнинг омонат скамейкасида қалин кийинган уч-тўрт эркак билан, рўмолини ияги аралаш ўраб олган бир хотин ўтирас, нарироқдаги майдончада қулоғини қийиқча билан ўраб олган кабобпаз елпифичини силкитиб, тутун буруқситар, ўқтин-ўқтин қичқириб кўяр эди:

– Еганлар дармонда, емаганлар армонда. Ишкалад, ишкалад!

Тўрт йигит, шундок қор устида туриб кабоб чайнашар, сахардан ичиди олишган шекилли, шанғиллаб бирбирига гап маъқуллашар, кўзлари қизариб кетган эди. Улар бараварига бурилиб қараб, Чаросга суқ билан тикилиб қолишганини кўрди-ю, Ёдгорнинг ғаши келди.

Чарос ҳаммасини тушунди шекилли, жилмайиб Ёдгорга қаради:

– Кетдик.

Эшигига одамлар уймалашган озиқ-овқат дўкони, деразалари буғланиб кетган чойхона олдидан ўтиб, юқориляб кетишиди.

Пастак уйларнинг лойсувоқ томлари яхшилаб куралган, икки томондан тушган қор тор кўчани тўлдириб юборган, чеккада ингичка сўқмоқ йўл қолган эди. Ёдгор тор сўқмоқдан юриб бораркан, Чарос «келяпсизми», дегандек орқасига бурилиб, қараб-қараб кўярди. Ёдгор боядан бери хаёлига келмаган андишани энди ўйлади.

– Бувингизга нима деб таништирасиз?

Чарос қайрилиб қараб, кўл силтади.

– Сўрамайдилар.

Эллик қадамча юрганларидан кейин, чапга бурилиб, яна худди шунаقا тор кўчага кирдилар. Каердадир, олд томонда, пастда сой шовулларди. Яна бир оз юргач, Чা-

рос тўхтади. Ёдгор қаршисида турган олти-етти ёшлардаги болакайни кўрди. У жажжи бекасам чопон кийиб, қулоқчинни бостириб олган, қоп-кора кўзлари милтиллаб ёнар, судраб келаётган чанасининг ипидан ушлаб турарди.

– Бурнинг оқиб кетибди-ку, – деди Чарос.

Бола бурнини бир тортиб кўйди-да, шу билан иши битгандай, салом берди.

– Аянг уйдамилар?

– Баннисадалар. Бувим борлар, – деди бола негадир Чаросга эмас, Ёдгорга қараб.

– Бу – жияним, – деди Чарос тушунтириб.

Бола чанасини орқага қайтариб, йўл бошлади.

Пастак эшикни очиб киришлари билан чап томондаги кўй қўраси олдида ётган қулоқ-думи кесилган каттакон қозоқи ит шамоллагандай бўғиқ овозда «ҳов» деб кўйди.

– Кўрқманг, бойлок, – деди бола.

Ёдгор бир лаҳза тўхтади-ю, ҳовли каттакон олмазор эканини, дараҳтларнинг ҳаммаси негадир бир томонга ёнбошлаб ўсганини пайқади. Олмалар шохида қизил тўш саъвалар учиб-кўниб турарди. Этак томонда девор кўринмас, боғ, афтидан, сойга туташиб кетган бўлса керак, ўша ёқда сув шовулларди.

Ўнг томондаги уй эшиги очилиб, узун кора баҳмал чакмон кийиб олган кичик жуссали бош яланг кампир чиқди.

– Вой айновний! – деди кампир оқсоқланиб илдам келаркан. – Бормисан, қизим? – У Чароснинг у юзидан бу юзидан ўпиб, узоқ кучиб турди. Кейин эски танишлардай Ёдгорнинг ҳам елкасига қоқди. – Келинг, жон болам! Да-дангиз, онангиз саломатгина юришибдими?

Ёдгор Чаросга эргашиб, пастак уйга кирди. Бозиллаб турган танчага ўтиришди.

Кампир фотиҳа ўқиди. Чарос билан узоқ ахвол сўрашди. Яна Ёдгорнинг соглигини, ота-онасининг саломатлигини суриштириди.

Ёдгор ташаккур билдириб, хижолат чекканча, уйни томоша қилган бўлди. Токчаларда баркаш-чойнаклар турар, бурчакдаги сандик устига кўрпалар тахлаб қўйилган, уй ичида исириқ ҳиди кезар эди.

Кампир дарров дастурхон ёзиб, баркашдек келадиган юпқа нонлар келтириб қўйди, писта-бодомлар сочиб ташлади.

– Опоқимга нима қилди, буви? – деди Чарос кампир узатган чойни олаётуб.

– Касалга чалиниб қолди-да, болам боёкиш. Пахта пайтида тележкадан тушаётганида йиқилиб, қовурғаси жичча лат еган экан. Қиши тушиши билан оғриғи зўрайиб кетди. Баннисада ётибди.

Чарос афсусланиб, бош чайқади.

– Амаким қаёқдалар?

– Нанайга кетди. Кўпкари деса ўзини томдан ташлайди-ку. Бултур бир жийрон олувди, шуни совутиб қўювди. Саҳармардонлаб миниб жўнаган. – Кампир Ёдгорга чой узатиб, қистади. – Олинг, жон болам, бодомдан чақинг.

– Пахтаям экасизларми? – сўради Ёдгор индамай ўтираверишдан ўзи нокулай ахволга тушиб.

– Илгари экилмасди, – кампир чўккалаб олди. – Беш-олти йилдан бери боғларни бузиб, пахта экадиган бўлишиди. Бизда пахта битмайди ўзи: ёз қисқа, салқин. Колхоз қайтага боғдан кўп даромад оларди. Ким билсин тағин, давлатга пахта зарилроқдир-да.

Кампир овқатга уринаётган эди, Чарос тўхтатди. Ҳозир кетишларини баҳона қилиб, туришди.

Чанғичилар базаси икки чақиримча нарида экан. Ҳордик куни бўлгани учунми, одам гавжум эди. Чарос Ёдгорга чанғи, бўйига мос узун таёклар танлаб берди.

– Боғлаб олмасангиз ботиб кетасиз. Биз хув анави адирга чиқамиз, – деди бошқалар чанғи учайтган тепаликнинг қаршисидаги кунгай томонни кўрсатиб.

Арча шохига ўхшаган қия из қолдириб, тепага кўтарила бошладилар. Ёдгор адир тепасига етгунча энтикиб кетди. Чарос пальтосини ечиб, қорга ташлади. Ёдгор унинг ёқаси бўғиқ зангори кофтасини бўрттириб турган кўксига, чиройли гавдасига маҳлиё тикилиб қолди.

– Галма-галдан учамиз. Мана бундай қиласиз: сал олдинга энгашиб, тиззаларингизни букасиз. Шу ҳолда мувозанат сақлаб... – У шундай деди-ю, таёқни юмшоқ силкитганча шув этиб Ёдгорнинг олдидан ўтди-да, ўқдек ушиб кетди.

Ёдгор унинг борган сайин узоқлашиб кетаётган гавдасидан кўз узмай тураркан, бу қиздан айрилиб қолиши аниқлигини хис этиб, юраги увушиб кетди. Маъюс қиёфада атрофга аланглади. Паст-баландда чўққилар вазмин сукут сақлаб турар, адирда уймалашган ранг-баранг кийимли чанғичиларнинг кулгиси, шовқин-сурони тоғларнинг вазмин сукунати қаршисида ўйинчоқдек туюлар эди. Пастда – қорайиб турган сой соҳилларида баҳор шивирлар, шодон боқаётган қуёшдан ҳам, қордан ҳам кўклам иси келаётганга ўхшарди.

Ёдгор яна арчага ўхшашиб из қолдириб пастдан секин-секин чиқиб келаётган Чаросга кўзи тушди-ю, ҳозир оғат рўй беринини хис этиб, бадани жунжикиб кетди. Бўлди, ортиқ чидаб бўлмайди. Кунда-кунда ўлгандан, бир йўла ўлган яхши. «Ўзинг-ку алдовнинг қурбони бўлдинг. Энди аламингни ундан олмоқчимисан? Мана шу қиздан-а? У сени яхши кўриб қолди. Сезилиб турибди. Нега билиб туриб шу кунгача айтмадинг, номард?»

Чарос етиб келганида Ёдгор бўларича бўлиб қолган, мудхиш хабарни унга қандай айтишини билмай, лаби гезариб турарди.

У Чаросга қарашга ботинолмас, аммо қизнинг ҳарсиллаб нафас олаётганини, юzlари олов бўлиб ёниб кетганини сезиб турарди.

– Бошланг! – деди Чарос нафаси энтикиб, – кўриб олдингизми, қани... – у Ёдгорни оҳиста итариб юборди.

Ёдгор бехуш бир тарзда таёкларини саланглатиб сирғалиб кетди. Ўн қулочча паастлаганидан кейин оёқлари керилиб гурс этиб йикилди. Бир оёғи кўтарилиб, боши билан қорга кўмилиб кетди. Телпаги анча нарига бориб тушди. Ўрнидан турмоқчи бўлди-ю, ёғоч оёққа ўхшаган нокулав чанғи халақит бериб, анчагача ўзини ўнглай олмади.

Чарос аллақачон унинг тепасига келиб олган, қўйидаги таёкларни силкитганча эгилиб-эгилиб қулар, бу кулги қуёшнинг баҳтиёр нурларига мингашиб, бутун оламни тутиб кетаётгандай бўлар эди.

– Нега куласиз? – деди Ёдгор бўғилиб. – Нега куласиз?!

Чарос унинг овозида йигига ўхаш оҳанг борлигини билиб, бирдан тўхтади. Кўркиб Ёдгорнинг устига эгилди.

– Ёмон тушдингизми?

– Нега куласиз? – деди Ёдгор унинг гапини эшитишни хоҳламагандай бақириб. Кейин бирдан Чароснинг кўзларига тик қараб пичирлади. – Бугун охирги марта кўришаётганимиз, эртага бир-биrimизга бегона бўлиб кетишимизни билмайсиз-да! Билмасангиз, билиб олинг! Мен илгари уйланганман. Хотиним мени алдагани учун ажрашиб кетганмиз. Эшитдингизми? – У қўллари билан қор чангллаганча ҳайкириб юборди. – Эшитдингизми, мен сизни яхши кўраман. Шунинг учун сизни алдашни хоҳламайман. Хоҳламайман!

У ҳамма дардини бирдан тўкиб солди-ю, толиққандай бошини қорга ташлади: «Мана энди нима десанг, деявер!»

Чарос даҳшатдан қотиб қолгандай унинг тепасида ҳамон эгилиб турар, нима гап бўлганига тушуна олмаган сингари оғзи ярим очиқ, кўзларини Ёдгордан узмас

эди. Кейин мадори қуриган каби, таёғига ҳассадек таяниб, қаддини ростлади. Ёдгорга тикилиб туриб-туриб, киприкларини туташтирган эди, икки томчи ёш сизиб чиқди. Йўқ, бу одамнинг руҳини енгиллатадиган йиғи эмас, юракдан оққан қондек аламли, аччиқ икки томчи эди. У яна кўзларини очиб, Ёдгорга қараб турди-да, оҳиста пичирлади:

– Бироннинг мозорига мени гул қилиб эмкоқчи бўлибсиз-да, – унинг лаблари бурилиб, негадир кулди. – Майли... раҳмат...

Яна чорак соатдан кейин автобусга чиқиши. Ёдгор Чароснинг ёнига ўтиаркан, бундай қилишга энди ҳақи йўқлигини, Чароснинг ҳам бунга тоқати қолмаганини ҳис этди. Қоп кўтарган чол автобусга чиқиши билан дарров жой берди.

– Барака топинг, ўғлим! – чол қопини ёнига қўйиб, gox Ёдгорга, gox Чаросга қаради-да, дуо қилди. – Кўша қаринглар, яхши фарзандлар берсин.

Ёдгор Чароснинг лаблари титраб кетганини, дераза томонга ўгирилиб олганини, кўзи ёшланганини кўриб, энди ҳаммаси тамом бўлганини тушунди.

\* \* \*

«Ўл ахмок! Бу кунингдан ўлиб кўя қолганинг яхши, – деб ўйларди Чарос автобус деразасидан кўз узмай ўтиаркан. – Ким сенга айтди бир кўришда маҳлиё бўлгин деб? Ҳаммасини қилган ўзинг-ку. Институтга кидириб борган, учрашувга чақирган ўзинг эмасми? Чанғи сайлини ҳам ўзинг ўйлаб топдинг. Билардинг, бувингникуга борганингни опанг эшитиб қолса адабингни беришини, «Отанг авлод-аждоди билан қирилиб кетсин», деб қарғашини билардинг! Билиб туриб, ўзинг бошлайдинг. Ажаб бўлди! Ўз қадрини билмаган нодон. Бу кунинг ҳам ҳолва ҳали, баттар бўл».

У боягина томоша қилиб ўтган манзарапарни: кўча чеккасидаги яланғоч тутларни, тўда-тўда бўлиб учиб-кўниб юрган қарғаларни, оппоқ далаларни яна кўриб борарди. Ҳали уч-тўрт соатгина аввал буларнинг хаммаси алланечук сехрли кўринганди кўзига. Энди бўлса...

Унинг кўзлари яна ёшланди. Сездирмаслик учун пешанасини машинанинг совуқ ойнасига босди. Бошидан муз ўтиб кетгунча шу алфозда ўтираверди. Автобус силкиниб-силкиниб борар, одамлар бир-бири билан шовқинлаб гаплашишар, аммо Чарос ҳеч нимани эшитмас, ҳеч нимага кизиқмас эди. У фақат бир нарсани хис қиласди. Шу машинада Ёдгор ҳам кетяпти. Бир нарсани билади. Аввал билмасди, энди билиб олди: у илгари уйланган. «Хотиним алдаган», дедими? Нега алдайди? Умуман, одамлар нега бир-бирини алдайди? Тўғрима-тўғри, халол яшашса бўлмайдими? Ахир, одам одам-ку... Ёдгор ҳам уни алдадими? «Мен сизни яхши кўраман», деди. «Алдашни хоҳламайман», деди. Шундоқ экан, илгарироқ айтса бўлмасмиди?

Чарос чукур хўрсинди. «Шундоқ бўлганида нима ўзгаради... Қийин, жуда қийин бўлади энди... Нимасини яхши кўриб қолди бу йигитнинг? Нимасига учди? Бир ками бироннинг қозонида ош пишириши қолувди. Опаси соғ қўярмикин? Қийин, жуда қийин...»

...Шаҳарга келганларидан кейин ҳам у Ёдгорга кайрилиб қарамади. Ёдгор ҳам унга гапирмади. Фақат трамвайbekatiга келганларида секин сўради:

– Кузатиб қўяйми? – Чарос бу гапни у қўрқа-писа айтганини сезди.

– Йўқ... – Чарос титраётган лабини тишлади. – Умуман, ҳеч нима керакмас.

Улар сўнгги марта яхшироқ эслаб қолмокчи бўлган-дек, бир-бирларига узоқ қараб туришди. Чарос Ёдгор-

нинг кўзларидаги чуқур ғуссани кўриб, яна ўйлади: «Жудаям оғир бўлади».

У уйига келиб, хонасига кирганидан кейингина хиқиллаб йифлаб юборди.

\* \* \*

«Хаммаси тамом бўлди, – деб ўйларди Ёдгор гавжум кўчалардан юриб бораркан. – Барибир шундай бўлиши керак эди-да...»

Оқшом чоғлари Тошкент кўчалари чумоли инига ўхшаб кетади. Бекатларда одамлар тикилишиб қолади. Ҳамма чумолидек шошилади, ўз уясига алланималарни ташмалайди.

Ёдгор ётоқхонага етиб келганида ўзини иситишга ҳам куч тополмай, жунжиккан қуёш сарғайиб ботиб борар, ётоқхона деразаларида совуқ шафақ ёнарди. У ўз хонасинг эшигига яқинлашди-ю, рубоб овози, ашула товуши ни эшитиб, бир зум тўхтаб қолди.

Хоразмлик курсдоши Нурматнинг овозини Ёдгор яхши танирди. Ашула тўхташи билан қарсак янгради. Афтидан, ичкаридагилар кўпчилик эди.

«Нима байрам ўзи? – деб ўйлади у ҳайрон бўлиб. Ке-йин бирдан ёдига тушди-ю, эсанкираб қолди. – Бугун... бугун Зойиржоннинг туғилган куни-ку! Нега айтмади, оббо кув-ей! ўзинг-чи, нега ўзинг эсламадинг?»

Эрталаб Ёдгор Чарос билан токқа чиқмоқчи эканини айтганида, Зойиржон қувонган эди. Ҳозир у Зойиржоннинг «яхши ўйнаб келинглар», деганини эслаб, баттар ўсал бўлди. «Йўлдан колдиргиси келмаган».

Ёдгор гарангсиб турган эди, Зойиржоннинг ўзи чиқиб қолди. У исиб кетгандек кўйлакчан бўлиб олган, озроқ ичган шекилли, юзи қизарган, кўзлари қисилиб турарди.

– Бормисиз? – деди қувониб. – Эзилиб кетдик-ку жуда!

Ёдгор ҳушини тўплаб олмасиданоқ, Зойиржон уни кучоклаб, ичкарига олиб кирди.

– Мана, овчи ҳам келди! Токқа, каклик овига кетганди!

Гурра кулги кўтарилиди. Ёдгор бир зум тўхтаб, ўтирганларга разм солди. Доим девор тагида турадиган стол икки каравот ўртасига олинган, стол безатилган, муррабодан бўшаган банкага чиннигул солиб қўйилганди. Тўрда юзлари қизариб кетган Аваз ўтирас, унинг ёнида доим бир хил – кулранг пиджак кийиб юрадиган Нурмат рубобини ушлаб турар, берироқда эса қоп-қора қошкўзли, хиёл пучукроқ бурни ўзига ярашган бежирим Наргиза жилмайиб ўтиради.

Ёдгор ичкарига кириши билан Наргиза қувониб кетди.

– Штраф! Штраф! – деди ўтирган ерида қарсак чалиб.

Ёдгор ўтиromoқчи эди, Зойиржон қўймади.

– Кизларнинг гапи – қонун!

Аваз киррадор стаканга ичкилик қўйиб узатди.

Ёдгор димоғига арақ иси урилиб, сесканиб кетди. Лекин негадир жуда ичгиси келди. Арақ бора-боргунча куйдириб кетганини сезди-ю, зум ўтмай руҳида аллақандай енгиллик туйди.

Чароснинг кўзидан ситилиб чиққан ёш, индамай ўтирган қиёфаси, «ҳеч ниманинг кераги йўқ», дегани хаёлида жонланиб, яна ичгиси келди. Столни тартибга солаётган Наргизага кўмаклашди, унинг узун киприклариними, ихчам жуссасиними – қаеринидир Чаросга ўхшатди.

– Қаёқда юрибсиз? – деди Наргиза киприкларини пирпиратганча жилмайиб. – Ростдан овга бордингизми?

«Овни нима қиласман! – деб ўйлади Ёдгор нон ушоқларини сидириб оларкан. – ўзимнинг овим чиқиб турибди-ю!»

– Ҳавас-да, – деди у қулишга уриниб. – Болалигимдан овга қизиқаман.

– Биз ҳам борайлик бир, – деди Аваз тўлдираётган қадаҳларидан кўз узмай. – Нима отдингиз?

Ёдгорнинг назарида у киноя килаётгандай, ахволидан хабардордек туюлиб кетди. Янги йилда ҳам Чарос билан унинг ўртасида ўхшашлик излаб тополмаган эди. Ҳозир яна шундай бўлди. «Тоға-жиян бир-бирига ўхшамас экан».

– Ҳеч нима! – Ёдгор яна жилмайишга ҳаракат қилди. – Мени отишиди!

Тагин кулги кўтарилди. Зойирjon ош кўтариб кирди.

– Аканг қарагай ошни қийиб юбораман, – У Наргизага қараб қўйди. – Лекин бу деган сўз уйланганимдан кейин ҳам ўзим ошпазлик қиласман деган гап эмас.

– Ҳечам-да – деди Наргиза кулиб, – ўзингиз айтгансиз, бухороликлар ош қилишни билмайди, деб. Гап битта бўлади! Ошпазлик доим сизнинг зиммангизда қолади.

Ошдан кейин Нурмат хоразмча куйлар чалиб, қўшиқ айтди. Ёдгор илгарилари унинг ашулаларини унча ёқтирмас, ҳаммаси бир хилга ўхшаб туюларди. Ҳозир бўлса улар бутунлай бошқача эшитила бошлади. Кўнглида маҳзун туйгулар уйгониб, боши айланди.

Зойирjon чап кўлини орка белидан ўтказганча, ўнг кўли билан қошини чимчилаб «Андижон полька»сига шундай муком қилиб ўйнадики, қарсакбозлик бўлиб кетди. Зойирjon ўйнаб келиб, Наргизани тортди.

Наргиза уялиб ўрнидан турди. Аввалига тортинди-ю, қарсак янграгандан кейин, юzlари дув қизарганча ўйнаб кетди.

Ёдгор ҳам беихтиёр Авазнинг қарсагига қўшиларкан, Зойирjонга, унинг олдида ўзини шунчалик эркин тутаётган Наргизага ҳаваси келди.

«Чарос ҳам ҳеч ўйнармикан! – деб ўйлади қизарган кўзларини бахтиёр дўйстларига тикиб. – Балки ўйнар... фақат сен билан эмас. Энди сенинг ўйининг тамом бўлди».

– Мен тураман, – деди Аваз анчадан кейин. – Эртага илмий кенгаш бор. Кутубхонадан материал тўплайман...

Кетидан Нурмат ҳам кўзгалди.

...Ёдгор чирокни ўчириб, тескари қараб ётганча, ухлашга уриниб кўрди. Аммо боши хувиллар, кўзлари ачишар, ухломас эди. Йиғлаб турган Чарос хаёлига келиши билан аламдан тўлғаниб кетар, ҳеч нимани ўйлагиси келмас, лекин Чароснинг ғамгин қиёфаси кўз олдидан кетмас эди.

Наргизани кузатишга чиқиб кетган Зойиржон анчадан кейин қайтиб келди. Ёдгор унинг ҳам ечиниб ўрнига ётганини билди.

– Мунча уф тортасиз, исиб кетяпсизми? – деди Зойиржон тўнғиллаб. – Мен тарашадек қотиб қолдим-у, бу уф тортади!

Ёдгор индамай ётаверди.

– Нима бўлди? – деди Зойиржон каравотини ғижирлатиб.

– Тамом бўлди! – деди Ёдгор пичирлагандек паст товушда.

– Айтмайсизми: ҳой овсар, бутун Ўзбекистонни қидирсанг мендек йигитни тополмайсан, ишонмасанг, ана, бориб Зойиржондан сўра, деб. Телепатиям айтиб турувди-я. Бугун эрталаб чиқиб кетаётганингизда кўнглим сезувди-я.

Ёдгор яхшироқ бурканиб олди. Арак таъсириданми, бошқаданми, унинг боши баттар гувиллаб боради.

Хонага оғир жимлик чўқди. Аллақаерда ғийқиллаб айланәтган трамвай овози эшитилди. Унинг товуши Ёдгорга нола чеккандек бўлиб туюлди. Биринчи марта Чарос билан кўришган кунларини эслаб, яна уф тортди.

– Телепатиям яна бир нарсани айтиб турибди, – деди Зойиржон. – Чарос сиздан кечмайди.

«Юпат-а, юпат! – деб ўйлади Ёдгор ғижиниб. – Бунақа чучмал гапларингни укангга айт, оғайни!»

– Мен телепатияга ишонаман. Фарбда телепатия махсус фан сифатида ўрганилаётган эмиш...

– Уйқунгиз келмаяпти шекилли, Зойиржон! – деди Ёдгор унинг гапини бўлиб. Зойиржоннинг юпатишга уринаётгани унинг ғашини келтирас, қайтага аламини оширарди. «Аза очган билан ўллик тирилиб келарми?»

У кечаси билан тўлғониб чиқди. Начора, созланган тор фарёдсиз узилмайди.

## ИККИНЧИ ҚИСМ

Табиатнинг ҳеч кимга бўйсунмайдиган, бирордан рухсат ҳам сўраб ўтирумайдиган ўз қонунлари бор. Бу йил кўклам эрта келди. Мана, бир хафтадирки, муттасил илиқ шабада эсади. Офтоб тафтиданми, мана шу жонбахш шамол таъсириданми, қорлар эриб кетди. Ер уйкудан уйгониб, ширин керишганича кўксини тўлдириб, чуқур-чуқур нафас олади. Азамат қуёш олтин тожини кийиб мўралаган чоғи уфққа қарасангиз, олис тоғлардаги гунафшаранг чўқкилар шундоқ аник кўринади.

Қиши бўйи диққинафас хоналарда ўтириб зериккан кампирлар пешинда невараларининг аравачасини ғилдиратиб чиқиб, офтобрўя жойларда ўтириб олишганча эзмаланишади. Оқшомлари ўйинқароқ болаларнинг шодон шовқини оламни тутади. Осмон бирдан қорайиб, юлдузлар ёркин-ёркин порлайди. Онда-сонда қаергадир яшириниб олган бақанинг журъатсиз қуриллагани эшитилиб қолади. Чордокларда тун бўйи мов мушуклар миёвлаб чиқади. Факат кунга тескари пана жойлардаги музи эримаган ариқчалардагина қишининг сўнгги рўёлари титрайди.

Кейин бирдан ёмғир шивалаб қолади. Дарахт шохларида илиқ томчилардан сесканиб уйғонган гүдак куртаклар табассум киласди.

Қишлоққа баҳор илгарироқ келди шекилли, Васила Назаровна танаффус пайтида йўлакда югуриб кетаётган бир қизалоқнинг кўлида гунафша кўриб қолди. Баҳорнинг бир парчасини кўрганидан беихтиёр шодланниб кетди. Мамнун кайфиятда 9 «В» синфига кириб, дарс ўта бошлади. Тўққизинчи синфда математика мураккаб бўлади. Шунинг учун у мавзуни шошилмай, дикқат билан тушунтиришга киришди.

Болалар унинг сўзларини эътибор билан тинглашар, фақат ҳамиша орқа партада ўтирадиган, бир ўрим сочини елкаси оша олдинга ташлаб олган, оқ-сариқдан келган Дилфузা исмли дўмбок қиз Васила Назаровнанинг гапларига эътибор бермас, алланимани ёзиш билан банд эди. Васила Назаровна бу қизнинг ўртacha ўқишини, дарсларни яхши ўзлаштира олмаслигини биларди.

«Ўзининг аҳволи бу-ку, тағин дарс эшитмаганига ўлайми?» – деб ўйлади Васила Назаровна фижиниб. Кейин унинг ҳам эътиборини тортиш учун атайлаб, баландроқ овозда тушунтира бошлади.

– Шундай қилиб, куб илдиз остидаги икс...

Ҳамма ўқувчиларга хос бир ожизлик бўлади. Ўқувчи, «биз, кўпчиликмиз, ўқитувчи ҳаммамизни бравар кўролмайди», деб ўйлайди. Ҳолбуки, ўқитувчи синфдаги ҳар бир боланинг нима қилаётганини аниқ билиб туради. Дилфузা Васила Назаровнанинг гапирагапира ўзига яқинлашаётганини пайқамай қолди. Ёнида ўтирган қиз бикинига туртгандан кейингина чўчиб бошини кўтарди-ю, тепасида турган Васила Назаровнани кўриб, ёзаётган қофозини кафти билан яширди. Оқ-сариқ кулча юзи дув қизариб, кўзлари жавдираб қолди.

– Бу ёққа бер! – деди Васила Назаровна эркакча овозда.

Олдинги партада ўтирганлар баравар ўгирилиб қарашди. Дилфузанинг ранги ўчиб кетди. Қўркув тўла кўзларини ўқитувчидан узмай, титраётган қўли билан қофозни ғижимлай бошлади.

– Бер, бу ёққа! – деди Васила Назаровна қони қайнаб.

Қиз индамади. Аммо қалин лабини тишлаганча, бошини чайқади. Унинг ўжарлиги Васила Назаровнанинг ғашига тегди. Кўлидан қофозни юлиб олди.

Дилфузага ўрнидан туриб кетди.

– Беринг! – деди овози қалтираб.

Васила Назаровна индамасдан бурилиб кетди. Парта-лар орасидан ўтиб бораркан, қофозга кўз ташлади-ю, хат эканини билиб, тепа сочи тикка бўлиб кетди. «Гап бу ёқда экан-да! Ҳалитдан йигитларга салом хат ёзишга уялмаган зумраша!» У хатни жемперининг чўнтағига тикиб, дарсини давом эттиаркан, бошини партага ташлаб ўтирган Дилфузага қараб қўйди.

– Келаси дарсда шу мавзуни сендан сўрайман.

Дилфузага бошини кўтартмади. Бу Васила Назаровнанинг ҳамиятияги тегди. Дарс тугагунча киздан кўз узмади.

У эшигига «Завуч» деб ёзилган ўз хонасига кирди-да, алвон ёзилган стол қаршисига ўтирди. Дераза олдидан ўқиши тутатган болалар қий-чув қилиб ўтиб боришар, ботаётган қуёш нури бурчакдаги шкаф ойналарида жилоланар эди.

Васила Назаровна оғир уф тортиб, чаккаларини кисди. Чекди. Кўп йиллик оғир меҳнат уни толиқтириб кўйган, кейинги пайтларда кўп асабийлашадиган, боши оғрийдиган бўлиб қолганди. Анчагача шу алфозда ўтирганидан кейин бояги хат эсига тушди. Олиб ўкиди.

«Р... Хатингни олдим. Мендан хафа бўлдингми? Хафа бўлма, мен сени жонимдан ортиқ кўраман. Бугун чиқолмайман. Дадам уйда. Билса сўйиб кўяди. Эртага...».

Хат шу ерда узилиб қолган эди. Васила Назаровна нинг энсаси қотди. «Жонимдан ортиқ кўраман», эмиш. Тухумдан чиқмасидан туриб мов мушукка ўхшаб қолади бу замоннинг қизлари! Билмадим, ота-онаси тергамайди шекилли». У Дилфузанинг гузарда сартарошлик қиласидаги отасини танир, негадир ёмон кўёарди бу кишини. «Ҳайитвой сарик», «Ҳайитвой тажанг» деб ном олган бу киши ниҳоятда жангари, одам билан гаплашганида ҳам узун мўйлови учеб-учиб турар, унга гап тушунириб бўлмас, ўз билганидан қолмасди.

«Мана, қизининг аҳволи, – деб ўйлади Васила Назаровна фижиниб. – Тағин ҳеч кимнинг олдида бўйин эгмаганига ўлайми?».

Кейин яқинда район маориф бўлимининг мудири ўтказган мажлисни эслади. РайОНО мудири шаҳардаги бир мактабда ўнинчи синфда ўқийдиган бир қиз туфайли директор ҳайфсан олиб, завуч ишдан ҳайдалганини айтган эди.

«Битта аҳмоқнинг касрига ҳамма қолади, – Васила Назаровна ўрнидан туриб кетди. – Ишқ-муҳаббатни бошига урадими бу зумрашалар. Биз буларнинг ёшида ўқишни билардик. Бўш вақтимизни жамоат ишига сарфлардик! Бу масалани педсоветда ё ота-оналар мажлисида муҳокама қилиш керак».

Эшик тақиллаб, унинг хаёли бўлинди.

– Ҳа, – деди у биронта ўқитувчи бўлса керак, деб гумон қилиб.

Остонада Дилфуза пайдо бўлди. У яшил плаш кийиб олган, ичкари киришга қўрққандай ерга караб турарди.

«Сочини олдига ташлаб олганини-чи! Тусингни ел есин олифтагарчилик қилмай!».

– Ким у Р.? – деди Васила Назаровна унга қаттиқ тикилиб.

Дилфуза индамади.

– Гарангмисан?

Дилфуза ер тагидан ўқрайиб қараб қўйди.

– Хатни беринг!

Васила Назаровна бу қизнинг руҳида бўйсунувчанлик эмас, исёнкорлик борлигини кўриб, тутақиб кетди.

– Сен менинг саволимга жавоб бер, ким у?!

– Айтмайман! – деди қиз ўжарлик билан. Кейин секин, аммо талабчан оҳангда сўради. – Беринг хатни!

Васила Назаровнанинг ғазаби тошиб кетди:

– Ўзинг-ку, зўрга учга илиниб юрибсан. Энди бошқаларнинг ҳам бошини қотиряпсанми?! Ҳовлиқма, эрга тегишга улгурасан ҳали...

У гапининг давомини айттолмай қолди. Дилфузадан папка ушлаган қўли билан юзини тўстанча, ҳиқиллаб йиглаб юборди. Шартта бурилди-да, эшикни кучи борича тарақлатиб ёпиб чиқиб кетди.

«Вой шарманда-ей!» – деб ўйлади турган ерида котиб қолган Васила Назаровна. У ғазабдан титрар, аламини кимдан олишини билмас эди.

\* \* \*

Дилфузадан ҳовлига чиқди. Ойнабанд қия томи қуёш шафағида қизариб ётган иссиқхона олдидан, икки четида тол ниҳоллари куртак чиқарган йўлкадан югуриб ўтди-да, дарвоза ёнидаги гулзорда ер чопаётган қоровул чонни ҳайрон қолдирганча, кўчага отилди. Катта йўлни кесиб ўтаётганида машинанинг чийиллаб тормоз берганини эшитди, уч қадамча нарида тўхтаган «Волга» деразасидан бошини чиқариб сўқинаётган ҳайдовчини кўрди. Аммо кайрилиб қарамай, папкасини саланглатганча кетаверди. Кўчаларда илк баҳор кезар, деразаларда шафақ ёнар, олчалар шохида жонсарак чумчуқлар чирқиллашар, аммо Дилфузадан буларнинг ҳеч қайсисига эътибор бермас, ўз дарди ўзига етиб ортар эди.

Ўзларининг кўчаларига кирганидан кейингина хушини тўплаб олди. Бир зум тўхтаб, кўз ёшларини артди. «Опа» худди орқасидан қувиб келаётгандек хавотирланиб аланглаб қўйди. «Дадамга чақиб беради энди». Йўқ, ҳеч ким уни қувмас, кўчада одам сийрак, факат нарирокда болалар самокатда учишар, ғилдирақларнинг вағиллаган овози қулоқни батанг келтирап эди.

Дилфузा кўкиш тусли эшик олдига келганида сочларини тузатди. Секин ичкари кирди. Уларнинг иморати ҳали битмаган, икки уйни хомсувоқ қилиб, кўчиб киришган эди. Ҳовлидаги олчаларнинг новдалари бўртиб қолибди. Этакдаги сим тўр ортида товуқлар қақағлайди.

У пол ўрнига тахталар ташлаб қўйилган айвондан ўтиб, уйга кирди-ю, бурчакдаги кўрпачага чўкка тушганча пиёз тўғраб ўтирган отасини кўрди. Дадаси мoshранг дўпписини бостириб кийган, оғзида носи бўлса керак, пишиллаб нафас олар, пичоқ шириллаган сайин юпқа пиёз ҳалқалари олдидаги лаганчага тушиб турарди. «Чақиб беради», деб ўйлади у отасининг қўлидаги дандон сопли каттакон пичоқдан кўз узмай.

– Осхонадан ширке опке, Дилпус, – деди отаси унга қараб. Кейин шолчани қайириб, носини тупурди.

Дилфузা айвондан сакраб тушди-да, товуқ катаги ёнидаги нимқоронғи ошхонага кириб, токчадаги узун шишани топди. Отаси аллақаердан маҳсус шишали сирка топиб келар, ҳар хафта норин қилдириб, устига сиркалган пиёз солиб ер эди.

Дилфузা нариги хонада ўтирган онасининг олдига кирди. У энгашиб ўтирганча хамир ёяр, нимча кийиб олган, энтикиб нафас олар, шишинқираган юзи қизариб кетганди. Шу қишида унинг жигари хасталаниб, оёқлари шишиб кетганди.

– Менга бера қолинг, ойи, – деди Дилфузада унинг устига эгилиб. Кузда опасини узатишгандан кейин хизмат Дилфузанинг зиммасига тушганди.

– Кўявер, қизим, – деди онаси унга қараб. – Дадангга чой дамлаб бер.

Дилфузада яна ошхонага кирди. Тунука чой кутида кўк чой қолмабди. «Яхши бўлибди, – деб ўйлади у. – Рустам кетиб қолмагандир. Магазин олдида турмоқчиди».

Ҳалиги хатни у танаффусга чикқанида Рустамга бермоқчи эди. У бугун дадасининг эрта келишини, ҳеч ёққа чиқмаслигини билгани учун шундай қилмоқчи эди. «Опа» олиб кўйишини қаёқдан билсин?!

– Ойи, кўк чой қолмабди-ку, обкела қолай... – деди у эшиқдан мўралаб.

– Нега қолмайди... Ана, токчада турибди, – деди онаси лаган-товоқлар кўйилган токчани ўқлоғи билан кўрсатиб.

Дилфузада ноилож аҳволда қолди...

Нориннинг қуруғидан озгина чимдиган бўлиб, ётиб олди.

– Бошим оғрияпти...

«Бормайман мактабига, – деб ўйлади у Васила Назаровнанинг «эрсираб қолибсан», деганга ўхашаш гапини эслаб. – Жинни экан. Наҳотки, қизлар болаларни эрга тегиши учун яхши кўрса?! Рустам хафа бўлади энди».

Магазин олдида йўлига кўз тикиб турган Рустам унинг хаёлида жонланди. Бугун ҳам свитер кийиб юрган бўлса керак. Қизик, Рустам кишдаям бош яланг юради. Свитердан бошқа нарса киймайди. Спортчи, мактабнинг энг зўр, волейболчиси. Қизлар уни қора дейишади. Бекор айтишибди. Кимё гайирлиги келганидан шунича дейди. Унинг ўзи бир вақтлар Рустамни яхши кўрарди. Шунга алам қиласди...

Дилфузада билади: Рустам бугун жудаям хафа бўлади. Бир марта қишида Дилфузада «корбўрон ўйнашга» бораман,

деб чиқолмаганида, эртасига Рустам қўлига нина билан «Д» деб ёздириб келган, «Биламан, сен мени ташлаб кетасан, эсадалик бўлиб қолсин, деб ёздиридим», деганди. Ўшанда Дилфузанинг унга жудаям раҳми келганди. Йўқ, у Рустамдан кечмайди: алам қилсин «опа»га!..

Дилфуза терлаб кетди. Девор томонга ўгирилиб ётди.

10 «А» синфида ўқийдиган Рустам кузда пахта байрамига атаб мактабда ўтказилган кечада рубоб чалиб, ашула айтганидаёқ Дилфуза уни яхши кўриб қолганди. Кейин билса, Рустам ҳам уни яхши кўраркан. Улар бир-бирларига кўп хат ёзишди. Дилфуза Рустамнинг биринчи хатини адабиёт китоби орасидан топиб олган куни аллақандай туйғудан боши айланиб кетган эди. Кейин юрсаям, турсаям, шу бола унинг хаёлидан кетмайдиган бўлиб қолди.

Улар фақат бир марта кинога тушишди. Ўшандаям овлоқдаги темирийўлчилар маданият саройининг клубида томоша кўришди. Шаҳарлик қизларга маза! Ҳеч кимнинг иши йўқ. Бу ерда бўлса ҳар қадамингни санаб туришади. Дилфузанинг назарида ҳамма унга қараётгандек, таниб колиб, дадасига айтиб бераётгандек бўлганди. Кинодан чиқиши-ю, дарров хайрлашишди. Рустам бошқа автобусда, Дилфуза бошқасида уйга қайтди. Бўлди, энди кинога тушишмайди. Бугун фақат бирпас гаплашишмоқчи эди. Бўлмади.

Дилфуза бояги хатидаги «жонимдан ортиқ кўраман» деган сўзларни эслади-ю, юраги титраб кетди.

Чиндан ҳам унинг боши лўқиллаб оғрий бошлади. Бадани қизиб бораётганини ўзи ҳам хис этиб ётар, кўзлари ачишар, чакка томирлари лорсиллаб уради. Қамишлари кўриниб ётган шифтга тикила-тикила кўзи илинди.

Тушида «опа» Рустамни тутиб олиб ураётгандиши. Дилфуза чопиб борган экан, «опа» уни итариб юборибди. Боши ерга қаттиқ текканмиш.

Дилфузга оғриқдан инграб уйғонди. Унинг иситмаси күтарилиб кетган, тепасида онаси ўтиради.  
Эртасига у мактабга бормади.

\* \* \*

Бир вақтлар Ёдгор Мирзо буванинг чойхонасида дастёрлик қилиб юрганида узоқ қиш кечалари чойхўрлар йиғилишиб «Фарҳод ва Ширин», «Лайли ва Мажнун»ларни ўқишиар, унда Ёдгор ҳали мактабга қатнамас, чойхўрлар ўқиётган китобларга дикқат билан қулоқ солиб, бир бурчакда ярим кечагача ухламай ўтиради. У Лайнинг дардида сахрода чиқиб кетган Мажнунга ачинар, бундай ҳолни гўдак тасаввуринга сифдиромас, хайрон қолар эди. Энди ишонди. Чарос билан охирги марта кўришганидан буён ўтган бир ярим ой ичидан эсдан оғиб қолмаганига, қишки имтиҳонларни қандоқ топширганига ўзиям хайрон бўлди. У илгариги кисмати яна такрорланганини, кулиб боқсан баҳт қўл чўйса етгудек жойга келиб қолганида тағин тўсатдан олисларга узоклаб кетганини кўриб турад, шунга ўзини кўннигиришга уринар эди. «Нима қипти, худди шундоқ бўлиши керак эди. Қачондир бари бир шундоқ бўларди. Бўлмаса Чарос сенинг кўксингга бош кўя қолиши керакими! Анойи экан-да!»

Шундай дерди-ю, бари бир Чаросиз туролмаслигини хис қилар, деярли ҳар куни бир марта кўтаради уни... Ёдгор умри бино бўлиб баҳорнинг кириб келишини шу қадар дикқат билан кузатмаган экан. Илгарилари назаридага кўклам бирданига кириб келганга ўхшар, ҳаммаёқ ям-яшил бўлиб кетганидагина баҳор келибди, деб қувонар эди. Бу сафар у кўкламнинг туғилишини кузатди.

Театр ва рассомлик институтининг рўпарасида, кўчанинг бериги бетида уч туп ёш чинор бор. Ёдгор мана шу

чинорлар остидаги ариқчада қачон муз эриб битганини, қайси қоқигул энг аввал очилганини, қайси дарахтнинг қай бир шохida қайси япроқ биринчи бўлиб ёзилганини хозир бехато кўрсатиб бера оларди.

У ўзига сирдош бўлиб қолган мана шу чинорлар пасида туриб, Чароснинг дарсдан чикишини кузатарди. Бора-бора Чароснинг қайси куни, соат нечада дарси тугашини билиб олди. Соат миллари муддатга яқинлашган сайин унинг юраги безовта типирчилар, шунча қиз орасидан уни узоқданоқ таниб оларди.

Чарос дарвоза олдида дугоналари билан хайрлашарди-да, бошини куйи солганча, китобларини қўлтиқлаб, секин-секин юриб кетар эди. Ёдгор унинг ранги синикиб, кўзлари киртайиб қолганини сезар, изтироб чекиб юрганини билар, югуриб бориб қўлидан тутгиси, «мен сени соғиниб кетдим, ахир», дегиси келар, аммо журъати етмас, бундай қилишга ўзини ҳақсиз, деб билар эди.

Икки марта Авазларнига борди. У Чарос ҳакида тоғасидан бирон гап эшитиш илинжида эди. Аксига олиб, Аваз aka ҳизмат сафарида экан. Тамила опа биринчи марта анчагача гаплашиб ўтирди. Аммо Чарос тўгрисида оғиз очмади. Иккинчи галда анча совуқ қарши олди, Ёдгор дарров чиқиб кетди. Охири гал борганида Аваз aka келган экан. Негадир у ҳам Ёдгор билан очик-ёриқ гаплашмади. Ким билсин, йўлдан чарчаб келгандир-да. Шу-шу Ёдгор уларнига қайтиб бормай кўя қолди.

Ёдгор сирларини фақат Зойиржонга айтарди. Якшанба куни Зойиржон уни каллаи сахарлаб уйғотди.

– Келинг, дўстим, – деди у шангиллаб. – Бугун бозор. Ўтирамизми ётоқقا тиқилиб. Бунака кунда қаламуш ҳам инида ўтирмайди. Ҳавони қаранг. Дунё ташвишлари битганмас, юринг, дала айланиб келамиз.

...Ётоқнинг адёлинин газетага ўраб олганча Олой бозоридан маставабоп масаллиқ харид қилишди.

Тўрхалталарни кўтариб, автобусга ўтиришди-да, шаҳарнинг шимоли-шарқ массивига бориб тушиши.

Бу ерда ҳам курилиш борар, йўллар ўйдим-чукур бўлиб кетган, ҳаммаёқда бетон плиталар, арматура-лар сочилиб ётарди. Йўл чеккасида бульдозер билан кўпориб ташланган ўрик дарахти илдизлари очилиб ётар, яқинда йиқитилган бўлса керак, ўқилдиз атрофидаги тупроқнинг нами қочмаган, новдаларида куртаклар бўртиб туради.

– Ҳайронман, бу падар лаънат қурувчиларнинг ўзи умрида бир туп дарахт экканмикин?! – Зойиржон тўрхалтасини силкитиб елкасига оларкан, нотаниш бульдозерчини сўқди.

– Ҳали кўрасиз, уй ҳам битади, йўллар қурилади – деди Ёдгор паришон қиёфада, – кейин ер ости ишларини бажарамиз, деб яна бузишади.

– Қайси куни ўқиб қолдим, – Зойиржон йўл четидаги зовурдан ҳатлаб ўтиб, бурилиб қаради. – Баъзан мамла-катларда олдин ер ости коммуникацияларини таҳт қилиб, йўлгача, тротуаргача битириб кўйишаркан-да, кейин уйни қуришаркан. Уй битганидан кейин трассалар жой-жойига улаб қўйиларкан. Бизда тескарисини қилишади. Ҳам вақт кетади, ҳам маблаг...

... Темир йўлдан ўтишганидан кейин, колхоз даласи кўринди-ю, эркинроқ нафас олишди. Зойиржон бу жойларни яхши биларкан. Олдинга тушиб, йўл бошлади. Майда эгатларда сув ялтираб оқар, рўмол тангиган хотинлар чамаси эртанги карам экишарди. Даланинг нарёғида ям-яшил адир ястаниб ётар, у ер-бу ерда новдалари қизара бошлаган ўрикларми, шафтолиларми кўзга ташланарди.

– Ҳов ўша ўрик тагига борамиз, – деди Зойиржон адир ўртасидаги бошқаларидан каттароқ дарахтни кўрсатиб.

Яқин кўринса ҳам хийла узоқ йўл экан. Етиб келгунларича чорак соатча вақт ўтди. Ўрик тагида ўтлаб юрган

кўй хуркиб қочди. Иккита жажжи қўзичоқ чопқиллаб, онасига эргашди.

Ўрик шохларида ғунчалар бўртиб турар, аммо ҳали япроги йўқлиги учун айтарли соя ташламасди. Уларга соянинг кераги ҳам йўқ эди.

Адёлни майсалар устига ташлаб ўтиришди.

– Офтобнинг тафти ёмонмас-а! – Зойиржон пиджагини ечиб ташлаб, рўмолча билан бўйинини артди.

– Бултур Наргиза билан шу ерда ўтиргандик, – деди у кўзларида ўт чақнаб.

Ёдгорнинг юраги бир қалқиб кетди. «Шунинг учун бу ерларни яхши биларкан-да».

Зойиржон унга қараб шодон жилмайиб қўйди-да, сигаретини улоқтириб, ўрнидан турди.

– Сиз гўштни майдалаб туринг, мен қозон топиб келаман. Адир орқасида бир кампир туради.

Зойиржон бошини ғоз тутиб кетиб бораркан, Ёдгор унинг орқасидан узок қараб қолди. Пичоқ билан гўшт майдалай туриб, ўзидан-ўзи хижолат бўлди.

«Балки бугун ҳам Наргиза билан чиқмоқчи бўлгандир-у, кейин мени бошлагандир. – Унинг хаёлига аввал Наргиза, кейин яна Чарос келди. – Агар ҳозир Чарос бўлганида, Наргиза ҳам бирга чиқарди. Қандоқ яхши бўларди...»

Бир оздан кейин боши устида кичикроқ қозонни баланд кўтариб, Зойиржон келди.

– Кичкина бўлсаям хийла оғир экан, – деди қозонни ерга қўйиб. – Кўрайлик-чи, бултурги ўчоқ турганмикин?

Ўрик тагидаги ариқча кирғоғидан ўйиб ясалган ўчоқ чиндан ҳам турган экан. Фақат бир чети ёмғирдан увалашиб тушибди. Унинг тагини ўт босган, қирралари қорайиб кўринарди.

– Зарари йўқ, паккини олиб келинг, янгисини қазиймиз! – деди Зойиржон кулимсираб.

Зойиржон намхуш тупроқни пичоқ билан чаққон кесиб, ишга киришиб кетди.

– Сиз ялпиз териб келинг, – деди юмушини давом эттириб. – Бу ёғини ўзим боплайман.

Ёдгор оҳиста юриб, адир этагига тушиб кетди, ҳали сув келмаган бир ариқни топди-да, ялпиз излай бошлади. Ялпиз кўп экан. У сариқ чўпаклари диккайиб турган бултурги бурган қолдиқлари орасидан ялпиз тера бошлади. Бир маҳал аллақаёқдан учиб келган жажжи хонқизи унинг қўлига кўнди. Ёдгор кафтини қимирлатмай, уни диққат билан томоша қила бошлади. Кўнғизча хол-хол кора доғли қизғиш қанотларини товлантирганча бирпас турди-да, кейин учиб кетди. Ёдгор беихтиёр жилмайиб, унинг кетидан қараб қолди. Кейин ариқдан чиқди-ю, тирноқдек митти гуллар очилиб ётган ўт устига чалқанча ётиб олди.

Осмон тиник, одамнинг кучоқлаб олгиси келадиган оппоқ момиқ булуғлар онда-сонда оҳиста сузиб ўтар, уларнинг сояси адирлар устида секин-секин судралиб борарди.

Аллақаерда тўргай сайради. Унинг кумуш қўнғироги анчагача ҳавони титратиб турди. Ёдгор болалигиданоқ шу күшни яхши кўриб қолган. Келесда бошоқ теришга чиққанида ҳам тўргайнинг овозини берилиб тинглар, жажжигина күшча қандоқ қилиб дам олмай шунчалик узоқ сайрай олишига ҳайрон қоларди.

Ҳозир ҳам кўзларини ярим юмганча санай бошлади. Ҳисоб ўн бешдан ошиб ҳам кетдики, тўргай ҳамон нафас олмай сайради. Унинг сайраши қўшиқ эмас, кўпроқ ноглага ўхшаб кетарди.

Ёдгорнинг бутун вужудини хоргин, мудроқ бир кайфият эгаллади. Кейин тўргай ноласи ҳам, аллақаерда маъраган қўзичоқ овози ҳам, Зойиржон ҳам, Чарос ҳам – барчаси аралашиб кетди-ю, таранг асаблари бўшашиб, кўзи илинди.

– Толқон еб, сувга юборадиган экан-ку, сизни!

Ёдгор Зойиржоннинг овозини эшишиб, кўзини очдида, негалигини ўзиям билмай, беихтиёр жилмайиб кўйди. Адёлга газета тўшаб, мастава ичишди.

– Менга қаранг, дўстим! Чаросингиз сизни ёқтиради.— деди Зойиржон. – Бир гаплашиб берайми? Очикчасига! Масала ҳал бўлади-кўяди. Юрасизми шунаقا қилиб, рангингизни қаранг.

– Кўяверинг! – деди Ёдгор кулиб. – Ўзим шунака юришни яхши кўраман.

– Хўп денг, ўзим гаплашаман! – деди Зойиржон таъкидлаб. – Наргизани юборайликми?

Ёдгор яна кескин бош чайқади.

– Керак эмас, ўзим!

– Ўзим, ўзим!!! Нима, мен бегонаманми?

\* \* \*

Азиза қишки имтиҳонларни топшириб, туманга қайтиши билан яна ишга тушиб кетди. Онаси ўқишини суриштиришдан хам аввал «эринг билан гаплашдингми», дегани унга оғир ботди. Ёдгорнинг кўнглида ярашиш нияти йўқлигини билиб, Азизанинг ғаши келган эди. Бу ҳақда онасига гап очганидан буён уйдагилар уни узатиш пайига тушиб қолишиди.

Бугун у ишдан барвақт қайтди. Оч зангори рангга бўялган дарвозадан ўтиб, ҳовлига кирди. Кенг ҳовли сахнидаги гулзор яхшилаб пайкалларга ажратилган, дадаси ҳавас қилиб, шаҳардаги оранжереядан маҳсус келтириб эктирган гуллар куртак ёзиб қолган, гулзор ўртасидаги усти ёпик баланд шиййон панжаралари янгитдан бўялган эди. Наридаги ишкомлар тагида уч-тўрт киши уймалашиб юрар, чамаси, булар токни очгунча ишкомларни тартибга солиб қўйиш учун кел-

ган ҳашарчилар эди. Ёз пайтлари уларнинг боғи жаннат бўлиб кетади. Гулзор ўртасидаги сўрида деярли ҳар оқшом дадасининг улфатлари тўпланишади. Ҳа, дадаси яшашни билади. «Мен беш панжамни баравар оғзимга тиқмайман, ўзим ҳам ейман, бошқаларга ҳам едираман», деб кўп айтади. Бўлмаса, сельпо раислигидай нозик лавозимда ўн-ўн беш йил муқим ишлаш осонми?!

Азиза силлиқ цемент йўлқадан ўтиб, ойнабанд айвонга чиқди. Бутун айвоннинг бўй-энини эгалладиган гилам устидаги пастак стол одатдагидек безатиб қўйилган, чамаси, дадаси хозир туриб кетган бўлса керак, столда конъяк шишаси, апельсин тўла ваза турар эди.

Азиза устига яшил баҳмал қопланган креслога оғир чўқди. Эринчиоқлик билан апельсин арчаётган эди, ёнбош томондаги ошхонадан онаси чиқди. У парча гулли крепсатин халатининг енгини шимариб олган, оппоқ, семиз кўлларида олтин билагузуклар яраклар эди.

– Келдингми, қизим? – деди у бир тарелка қазини Азизанинг олдига қўяркан. – Чарчагансан, ол.

Азиза қаршисида ўзига тикилиб ўтирган онасининг каттакон балдоқларига бир қараб қўйди-ю, унинг ниманидир айтмоқчи бўлиб тараддуланаётганини сезди.

– Уф, меҳмонлар ҳам ўлсин... – деди онаси халатининг этагини тўғрилаб. – Дадангнинг шу одати қолмади-қолмади-да... Ҳар куни меҳмон. Ҳар куни ичкилик...

Азиза унинг бошқа гапни айтмоқчи эканини тушунгани учун индамади. Апельсин пўчоғини кулдонга ташлаб, хўрсиниб қўйди.

– Ўзинг биласан, қизим, – онаси ўтирган креслосини унга яқинроқ сурмоқчи бўлди-ю, кучи етмади. Ўтирган ерида бўйини чўзиб, гапириб қўя қолди: – Уйимизнинг тўри сеники. Тор қорнимга сиққан, кенг уйимга сигмайсанми?

– Яна ўша гапми? – деди Азиза онасининг муддаоси-ни тушуниб.

– Нима қилай, болам? – онаси йигламсиради.

«Шу гапни бошласа, доим йигламсирайди», деб ўйлади Азиза онасига тезгина қараб олиб.

– Ёшинг йигирма бешга қараб кетяпти, – деди онаси титраган товушда, – хотин киши ўттизга кирса ўтин бўлади. Юрасанми шундоқ қилиб?! Ер ютсин ўша ялангоёқни! – У қархисида Азиза эмас, Ёдгор тургандек лаблари оқариб кетди. – Ким қўйибди унга ноз-фироқни. Хотин бокишдан олдин ўзини эплаб олсин. Сен ярашман дединг-у, у киши ноз қилдиларми?!

Ўшанда ётоққа борганида Ёдгорнинг: «Эрга тегсанг, тегавер!» – дегандек қилганини эслади-ю, Азизанинг ҳам энсаси котди. «Рост-а, нимасига керилади у? Кўча чангитиб юрган бир ялангоёқ бўлса».

– Даданг гаплашибди, – деди онаси унинг кўнглидан ўтганларни пайқагандек. – Отаси эскидан таниш экан. Йигитнинг ўзиям топармон-тутармон эмиш. Хотини ўлган экан. Иккита боласини бувиси боқиб олади, қизингизга зиёни тегмайди, депти...

«Нима?! – Азиза бир чўчиб тушди. – Уч йил эрсиз юриб-юриб, эди икки болаликка тегармишманми? Бошига тортсин болаларини!»

У ўрнидан иргиб турди.

– Нима, уйларингга сифмай қолдимми?! – деди томогига тиқилган ёшни тутолмай. Шу топда Ёдгор ҳам, отаси билан онаси ҳам хунук қўриниб кетди кўзига. – Бўлмаса кета қолай! – деди столни муштлаб.

Онасининг ҳам ранги бўзариб, ўрнидан туриб кетди:

– Бор! Ҳалиям бориб яраша қол, ўша гадойвачча билан. Ялина қол, пайтавасини ювиб юра қол. – У Азизага яқин келиб, яна шангиллади: – Овора бўлма, ярашмайди сен билан. Холангнинг қизи айтди. Ўшаларнинг инсти-

тутида ўқийдиган бир қошиқ сув билан ютгудай қизни етаклаб юрганиши. Ўз кўзи билан кўрибди. Ҳозир нима кўп, киз кўп.

Азизанинг томогини бўғган ёш бирдан йўқолди. Кафтини тушириб, онасига қараб қолди. «Шунаками? Ҳали бошқа қизни кўнгиллари тусаб қоптими?!» У кўксидаги тошган адоватдан ёниб, лабини тишлади.

– Нима қиласай, қизим, ўзинг айбдорсан... – деди онаси анча юмшаб. – Ким сенга шунақа бўлгинг, деб эди...

Онасининг юмшоққина қилиб айтган охирги сўзлари Азизанинг суяк-суягидан ўтиб кетди. Кўзларига яна ёш куйилиб келди-ю, чопиб бориб ўз хонасига кирди. Эшикни қарсиллатиб ёпиб, қулфлаб олди-да, ўзини диванга ташлади. Анчагача бошлари сирқиллаб, шифтга тикилиб ётди. Куёш ботиб борар, деразадан тушган хира шафақ нури биллур қандилда товланиб ёнар, ташқарида кушларнинг сайраши қаттиқ-қаттиқ эшитилар эди.

\* \* \*

«Ўзинг айбдорсан!» Мана шу бир оғиз сўзнинг ўзи ҳар сафар ота-онасининг олдида Азизанинг оғиз-тилини боғлаб қўяр, ҳар қандай далиллар дарвозасини тақа-тақ ёпиб ташлар эди.

«Яхши кўрмай ҳам ўлай, айбдор бўлмай ҳам ўлай!» – дерди у ҳар гал «айбдор бўлиб қолиши» воқеасини эслаганида юраги тилимланиб. Шунақа пайтларда уни баҳти қаро қилган ўша Суннат ёдига тушар, шу кўргиликларнинг ҳаммасига сабабчи бўлган йигитни ер титраб қарғар, ўлим тилар эди унга.

Ўша баҳтсиз ҳодиса Азиза савдо техникумидаги ўқиб юрганида бўлувди. Азиза бутун тафсилоти билан эслайди. Уларнинг гуруҳини Сирдарё соҳилидаги колхозга пахтага олиб чиқишиди. Дарё бўйида катта-кичик кўллар,

тўқайзорлар кўп эди. Қизлар ҳар куни ишдан қайтаётиб ўзлари жойлашган мактабдан ярим чақиримча наридаги кўлда чўмилишарди.

Бир куни Азиза илиқ сувда чўмилавериб, ҳаммадан орқада қолиб кетди. Сувдан чиқса, қизлар кетиб қолибди. Атрофни гира-шира қоронгилик босган, қамишлар ваҳимали шитирлар эди. У шоша-пиша артинаётган эди, бирдан қамишлар шитирлаб кетди. Азиза ваҳима билан бурилиб қаради-ю, қамиш орасидан чиқиб келаётган ўзининг курсдоши Суннатни кўриб, уялганиданми, кўркканиданми, чинқириб юборди. Бир қўлида қармоқ, бир қўлида транзисторли радио кўтариб олган Суннат сехрлангандек котиб туради.

– Кетинг! – деди Азиза кўл силтаб. – Илтимос, кетинг!

Суннат яна бир лаҳза қараб турди-да, қамишзор орасига кириб кетди.

Азиза юраги типирчилаб кийинди. Худди шуни кутиб тургандек Суннат ҳам қамишзордан чиқиб келди.

– Кечирасиз, – деди Азизага қарашга уялгандай радионинг қулоғини бураб. – Билмасдан келиб қолдим... Юринг, кузатиб кўяман. Кеч бўлиб кетди.

Азиза аввал ҳам бу йигитга кўп қизлар орқаворотдан кўз тикиб юришини билар эди. Суннат яхши ўқир, келишган, ёқимтой йигит эди. Ўша кундан бошлаб иккаласининг ўртасида умумий сир пайдо бўлгандек туюлди. Азизанинг назаридаги ҳар томонлама мукаммал, одобли, билимли йигит шу эди.

Шаҳарга қайтишганидан кейин улар бирга дарс тайёрлайдиган, ҳамма кетганидан кейин ҳам аудиториянинг эшик тутқичига стул оёғини тиқиб кўйиб, алламаҳалгача қолиб кетадиган бўлишди. Азиза курсдош қизларнинг рашки келаётганини сезгани сайин ўзини ғолиб ҳисоблаб, роҳатланар, борган сайин Суннатга яқинлашар эди. Имтиҳонлар бошланганида Азиза Суннатларникига бо-

радиган бўлди. Йигит Эски шаҳардаги кампирнида ижара ўтирас, кампир ховлисига камдан-кам келар экан.

Бир куни у Суннатнида ётиб қолди...

Шаҳар билан Келеснинг ораси ярим соатлик йўл. Шундай бўлса ҳам Азиза онасига: «Қизлар билан дарс тайёрламасам, миямга ҳеч нима кирмаяпти», деб тез-тез колиб кетадиган бўлди. Энди шунчаки кинога тушиш, ўпишиш Азизани ҳам, Суннатни ҳам қа-ноатлантирмайдиган бўлиб қолди.

Азиза сирини бутун дунё билиб қолаётгандек даҳшатга тушар, сирини бировга ошкор қилмас, яна ўша Суннатнинг ўзига дардини айтиб йигларди.

Ўқишлилар битиб, Суннат уйига – Самарқандга кетадиган бўлди. «Уйдагиларга айтмай туринг, яқинда совчи юбораман», деди хайрлашаётсиб.

Азиза бир ҳафта кутди, икки ҳафта кутди. На хат бор, на хабар. Дадаси уни туман универмагига ишга киритиб кўйди. Ҳар куни ишдан чиқиб, почтага югуради. Жинни бўлишига оз қолганида хат келди. Азиза конвертдаги адресни кўриб, тахта бўлиб қолди. Хат Самарқанддан эмас, Хабаровскдан келибди. У аллақандай оғатни ҳис қилиб, хатга кўз югуртириди. Суннат: «Мени армияга олишди. Уч йилгача нима гапу нима сўз, йўлингиз очик, эрга тегиб кетаверинг. Ҳозир эски замон эмас, бунақа нарсаларнинг унчалик аҳамияти йўқ», деган мазмунда ёзибди.

Азиза додини кимга айтишни билмай, қон-қон йиғлади. Бирор қучоини очса бағрига кира қолган ўзини, уни алдаган Суннатни қарғади. Хат устига хат ёзди. Жавоб бўлмаганидан кейин касал бўлиб қолди. У: «Қизимга кўз тегди, бирор илму амал қилди», деб чирқиллаётган онасини кўрган сайин бир дардига ўн дард қўшилар эди.

Уйга совчи устига совчи кела бошлади. Онаси куёв боланинг «суқсурдай» эканини, дадаси бадавлатлигини

айтиб ҳамма келганларни мақтар, Азиза бўлса ҳар хил баҳоналар қилар, ўлимини кутган одамдай таҳлика билан яшар эди. Ота-онаси ўзингга ёқкан одам бўлса айт, ахир, дейишганида ҳам йиғлашдан нарига ўтмади.

Охири бўлмади. Отаси, ўзига муносиб жойдан совчи келганидан кейин тегсанг ҳам, тегмасанг ҳам шунга бераман, деб туриб олди.

Ўша кечаси тирик қолганига Азиза ўзи ҳам ҳайрон бўлди. Йиглаб-йиглаб, онасига сирини айтди. Онаси сочини юлди, юзини тирнади. «Даданг ўлдиради, бу иснодга чидолмайди», деди.

Йўқ, дадаси уни ўлдирмади. Эр-хотин келишиб: «Энди биронта етим-есирни топсин, ичкуёв қиласиз, ёпиқлик қозон ёпиқлигича қолади», деган хulosага келишибди. Худди шу пайтда оёқ остидан Ёдгор чиқиб қолди. Бу ота-онасининг мўлжалидаги йигит эди: хеч кими йўқ, пандавакигина қўринади. «Жуда бўлмаса, номинг оқланиб қолади-ку, – деди онаси, – сени ҳали кимлар олмайди».

Азиза Ёдгорни ҳар кўрганида Суннатни эслар эди. «Сен бировни алдамасанг, бошқалар сени алдайди. Дунёнинг ишлари шунаقا мушт кетди бўларкан», деб ўйларди Азиза лалайган бу йигитни кўриб.

Суннат «ҳозир бунака нарсаларнинг унчалик аҳамияти йўқ», деб ёзган бўлса ҳам Азиза турмушлари яхши бўлмаслигини ҳис қиласди. Ўйлагани тўғри чиқди. Азиза азбаройи бола деб кўзи учиб турганидан эмас, бир амаллаб Ёдгорни боғлаб олиш учун болалик бўлишни хоҳларди. Худоям бу ниятига ҳам етказмади. Бора-бора узун кириб, узун чиқиб юрган Ёдгорни ўзиям ёмон кўра бошлади. Топиш-тутишининг тайини йўқ «кора рабочий»ни сўқимдек боқиб ўтириш ота-онасига малол кела бошлади.

Ёдгор кетиб қолганидан кейин онаси уни юпатди. «Қаёққа борарди! Кириб келади бир кун чориғини суд-

раб!» Азиза ҳам эри бир кунмас-бир кун мулла минган эшакдек ювош тортиб кириб келишини кутиб юрди. Аммо у келмади. Онаси уни яна юпатди. «О Худо, тешик мунчоқ ерда қоптими? Сочингни мўйича эр. Кимлар олмайди сени?!»

«Энди бўлса икки болалик одамни рўпара килиб ўтириби», деб ўйлади Азиза ҳамон шифтдан кўз узмай ётаркан. Уй ичи қоронғи бўлиб кетган, осмонга булат чиқкан шекилли, ҳаво дим эди. Кейин онасининг «Эринг бир қошиқ сув билан ютгудай қизни етаклаб юрганмиш», дегани ёдига тушди-ю, аламдан тўлғаниб, ўрнидан туриб кетди.

Шу пайтгача у Ёдгорни яхши кўраманми, йўқми, деб ўйлаб кўрмаган экан. Ҳар сафар уни ўйласа, Суннат билан иккови етаклашиб келарди хаёлига. Бари бир қачондир кириб келади, ўзи кетди, ўзи келади, деб юрарди. У онасидан: «Ўлдим – азиз бўлдим, шишдим – семиз бўлдим», деган нақлни кўп эшишганди. Ҳозир Ёдгорнинг «бир қошиқ сув билан ютгудай» қизнинг бошини айлантириб юрганини билиб, кўнглининг бир чеккаси унга боғлик эканини, шунинг учун уч йилдан буён бошқа эрни хаёлига келтирмаганини, институтга киришининг боиси ҳам Ёдгорга яқинроқ туриш бўлганини тушунди.

Кишда Ёдгорнинг ётогига борганида, эрга тегаман, деганида шунчаки унинг қўйнига қўл солиб кўрмоқчи эди. Ўшанда Ёдгорнинг шунчалик баланд келишида гап бор экан-да!

«Кўрамиз, қанақа қизнинг бошини айлантириб юрганини! – деб ўйлади у юмшоқ гилам тўшалган полда сассиз у ёқ-бу ёкка юраркан, кўнглида қасоскор бир лаззат сезиб. – Нимасига учиби қиз шўрлик бу ландавурнинг! Уйланганини айтмаган. Ширин гап билан алдаган-да, йигит ўлгур! Яхшиям развод бермаганим! Биламан, бари бир ярашмаймиз. Башарасини кўришга тоқатим йўқ.

Аммо мен баҳтсиз бўлиб чапак чалиб қолаверарканман-у, у киши айшини сурармишми? Шундок кунларни бошига солайки! Шундок шармандасини чиқарайки!»

\* \* \*

Чарос нима ходиса рўй берганини анчагача ўзиям тушунмай юрди. У фақат бир нарсани билар эди: Ёдгор илгари ҳам кимнидир яхши кўрган, уйланган. Чарос бирорвнинг қозонида ош пиширмоқчи бўлган экан.

У, аввало, ўзидан нафратланиб кетди. «Ўл-а, опанг гапирса алам қилганди! Баттар бўл, ғуруурингни поймол қилишингта оз қолди-ку! Тағин нима керак сенга! Шу кунга тушганингни билса, ўлдириб қўя қолар опанг!»

Кейин Ёдгорнинг айби кўзига кўрина бошлади. Камтар, эсли йигит деб юрса писмик экан-ку! Одам ҳам шунаقا бўладими?

Орадан анча кун ўтди. Чарос аллақандай ўйчан, жizzаки бўлиб қолди. Дугоналарининг ҳазили ҳам, опасининг гаплариям ғашини келтиради. Кўпинча, беихтиёр Ёдгорни ўйлаётганини пайқаб қолади. Шунаقا пайтларда неғадир Ёдгорни доим бир киёфада кўради. Қорга йиқилиб ётганча, бошини кўтариб турган аламли чехрасини тасаввур қиласди. «Йўқ, у сени алдамади. Ўшанда юрагида бор гапни айтди. Йифлагудай бўлиб айтди. Сен бўлсанг дуруустроқ гаплашмадинг ҳам. Балки кўнглида бошқа дардлариям бордир. Ҳар нима бўлгандаям дўстлашиб қолувдинг-ку».

Ҳов ўша – трамвайдаги воқеа рўй берган куни бир лаҳза кўриб, йўқотиб қўйганида чеккан ташвишлари ҳолва экан. Бу сафар ўз ихтиёри билан йўқотди. Хайрлашаётганида «ҳеч нима керакмас», дегани «сенинг керагинг йўқ», дегани эди. Ёдгор шундок бўлишини билгандирки, ростини айтгандир. Лақиллатиш нияти йўқдирки, шундок қилгандир.

Чарос чалкаш ўйлардан боши айланиб, кечалари узок хаёл суриб ётар, ҳаловатсиз тушлар кўриб чикар эди.

Бир куни хаёлига у билан очикчасига гаплашиш керак, деган фикр келди. Тоққа чиқишлидан олдин Чарос ўқишидан уйига қайтаётганида бозорча олдидағи троллейбус бекатига бир-икки марта «тасодифан» келиб қолган Ёдгор билан учрашган эди. Энди у тез-тез шу бекатга борадиган, йўл айланиш бўлсаям троллейбусга ўтирадиган бўлди. Назарида негадир Ёдгор шу бекатда яна «тасодифан» туриши керакдек эди. Лекин йигит келмади. Чарос икки-уч марта архитектура факультетининг биноси олдидан ўтди. Унинг тасаввурида Ёдгор мана шу деразаларнинг биридан қараб тургандай, хозир уни кўрибок, югуриб олдидан чиқадигандек эди.

Бора-бора у Ёдгорни согинаётганини, кўришгиси келаётганини тушунди. Кейин унинг расмини чизишга аҳд килди. У ўзига юпанч топгандек, кечалари узок ишлар, эскизларини онасидан қизганар эди.

Бугун дарс эртароқ тугади. Кўчада баҳор қуёши чараклаб турар, атроф тинч, қушларнинг сайраши тиник ҳавода баланд янгарди.

Чарос эллик қадамча юриши билан кўча четидаги новдаларини шода-шода гуллар қоплаган шафтоли тагида турган Дилшодни кўриб қолди. Дилшод қора костюм кийиб олган, туфлисининг ингичка учи шафтоли тагидаги майсаларни эзгилаб турарди.

«Қаёқдан келиб қолди бу», деб ўйлади Чарос қошини чимириб. У барча кўргиликлари учун шу йигит айбдордек Дилшодни ёмон кўриб қолган, ноҳақлик қилаётганини, унда айб йўқлигини ҳис этса ҳам тан олгиси келмасди буни. Ким билсин, балки Дилшодни кўрган заҳоти яна Ёдгорни ўйлагани учун шундай бўлгандир.

У индамай ўтиб кетмоқчи эди, Дилшод тўхтатди.

Чарос совуқкина саломлашиб: «Нима гапингиз бор эди?» дегандек, савол назари билан қаради.

Дилшод гапни нимадан бошлашни билмагандай галстугуни тузатган бўлди.

– Бирпас ўтирайлик, – у автобус бекатидаги харракни кўрсатди.

– Шошиб турибман, – деди Чарос қуруқкина қилиб.

– Биламан, ўшанда мен қўполлик қилдим, – Дилшод бошини қуи солди. – Сизни ранжитиб қўйдим. Лекин сиз ҳам анави йигит билан...

«Энди эсингга келдими?» – деб ўйлади Чарос энсаси котиб.

– Ракс тушдингиз, кейин Ёдгор билан кетдингиз, демоқчисиз-да, – у Дилшоднинг силлиқ қиртишланган ияигига тикилганча, кинояли кулди. – Мен ҳозир ҳам ўшанинг олдига кетяпман!

Дилшод ярқ этиб бошини кўтарди. Унинг сал қисилган кўзларида истехзо бор эди.

– Майли, боринг! Фақат эҳтиёт бўлинг, хотини кўриб қолиб, сочингизни юлмасин.

Бир лаҳзада Чароснинг боши айланиб, тиззалари қалтираб кетди. Дод деб юбормаслик учун лабларини тишлади. У Дилшод ўзига синовчан тикилиб турганини, эсанкираб қолишини кутаётганини сезар, сезган сайин қаттироқ азобланар эди. Дилшод унинг юрагини бехато мўлжалга олди. «Номард! – деб ўйлади Чарос аламдан қақшаб, – атайлаб таъна килгани келибсан-да, уятсиз». У бундай таъналарни яна кўп эшитишини аниқ ҳис килди-ю, эти жимирлашиб кетди. Бир амаллаб ўзини босиб олди-да, Дилшоднинг кинояли кўзларига тик қаради.

– Шуни айтиб, суюнчи олмоқчимидингиз?!

Бу сафар Дилшоднинг ўзи довдираф қолди. Чамаси, у Чарос бу гапдан бехабар деб ўйлаган бўлса керак, ранги ўчди.

– Йўқ, – деди тутилиб. – Огоҳлантириб қўймоқчийдим.  
– Менга даллол керакмас! – Чарос кескин бурилиб,  
юриб кетди.

Зум ўтмай Дилшод унга етиб олди.

– Тўхтанг, – деди йўлини тўсиб. Энди у ҳам ўзини  
тутиб олган, қарашлари мағрур эди. – Мен ҳам сиз-  
нинг марҳаматингизга муҳтож эмасман. Фақат бир нар-  
сани билиб қўйинг. Янги йил кечасида Ёдгор билан  
қолганингизни опангизга мен айтмоқчи эмасдим, ўзлари  
сўрадилар. Қолаверса, Ёдгорнинг уйланганини Тамила  
кеннойингиздан эшитиб, азбаройи ачинганимдан сизга  
айтдим.

– Сиз майда одамсиз! – деди Чарос тез юриб борар-  
кан, унга қарамай. – Бу гапниям бориб опамга сотинг. –  
У тўхтаб кескин бурилди. – Энди мени тинч қўйинг.  
Айтдим-ку, Ёдгор ака кутиб қолди.

У муюлишдан ўтганидан кейин қўзига ёш келди.

«Қандок кунларга қолдим. Қани унинг ўзи?..»

Чарос шу топда Ёдгорни кўргиси, дардини тўкиб сол-  
гиси келди.

\* \* \*

Дилфузা бир ҳафтача ётиб олди. Онаси ўзининг каса-  
лини ҳам унутиб, унинг бошида парвона бўлди. Ҳазилми,  
бир парча этни ўстириб, шунчалик қилганида... Опаси  
кўп оғриса ҳам Дилфузা бола бўлиб бирон марта «их»  
демаганди. Шунинг учун онаси кўрқиб кетди. Доктор-  
га югурди, ўзича «туркона» дорилар қилди. Қизининг  
аллақандай маъюс, ғамгин бўлиб қолгани, кечалари бир  
нимадан қўрқиб, алаҳлаб чиқиши уни, айниқса, ташвиш-  
га солиб қўйди.

Бугун Дилфузा қаддини кўтариб турди. Касалдан тур-  
ган ҳар қандай одамда бўладиган алланечук бир руҳий

енгиллик унинг ҳам қалбини қувончга тўлдирди. У пол тахталари лопиллаб турган айвон устунига суюнганча ховлини томоша қиласарди. Куёш ботиб кетган, аммо ҳали ёруғ эди. Ҳовлидаги олчалар япроги яшил оловдек товланар, охиста силкиниб туаради. Онаси нимча устидан жун рўмолини белбоғ қилиб боғлаб олганча энкайиб, катақдаги товуқларга дон сочарди. Товуқлар талашиб-тортишиб донга ёпишар, каттакон қизил хўроз қақағлаб уларни «зиёфат»га ундар, аммо товуқлар бусиз ҳам тўрт тарафдан ёрилиб, донни олиб қочишарди.

Дилфузабабини ўзи ҳам тушуммай, кулиб қўйди.

Шу пайт кўчадаги чўян симёғоч даранглаб кетди. Дилфузанинг юраги гупиллаб урганча, оёклари бўшашиб, айвон устунига юзини босди.

«Рустам! Рустам келди!»

Бу уларнинг «пароли» эди. Рустам Дилфузани чақириб келишга кўркар, шунинг учун кўчадаги симёғочни тош билан уриб «сигнал» берарди.

Дилфузабабида кўнглида кўркув аралаш қувонч уйғониб, калишини шапиллатганча айвондан сакраб тушди.

– Ойи, мен айланиб келай.

Онаси қаддини ростлаб, ташвишли кўзларини тикди унга.

– Вой, нега турдинг?

Симёғоч яна даранглади.

– Ҳозир келаман, сиқилиб кетдим. – У негадир титраб кетаётган оёкларини илдам босишга уриниб, кўчага чиқди. Рустам кўчанинг у юзидаги водопровод олдида шу томонга кўз тикиб туарар, худди Дилфузабабида қизил свитер кийиб олган эди. Дилфузани кўриши билан бирдан юзи ёришди-ю, секин-секин юриб кетди. Улар Дилфузанинг дадаси кўриб қолмаслиги учун ёнма-ён юришмас, ҳар сафар нариги кўчадаги доим берк турадиган китоб дўкони олдида гаплашишарди.

Дилфуз ҳозир ҳам унинг ўша ёққа кетаётганини билди. Атрофга аланглаб олди-да, секин юриб кетди.

Салқин тушиб қолган, осмонда қўршапалаклар айланар эди. Дўкон олдида турган Рустам, у яқин келиши билан юзига хавотирланиб қаради.

– Нима қилди?

– Касал бўп қолдим, – деди Дилфуз Рустамдан кўз узмай. Рустамнинг озғин юзида, кўзларида ташвиш бор эди.

– Рангинг кетиб қопти, – деди у Дилфузанинг кўзларига тикилиб. – Тўрт марта келдим. Тураман-тураман, даданг уйга қайтганларидан кейин кетаман.

«Рахмат сенга», деди Дилфуз хаёлан. Унинг кўзларида қувонч порлаб кетди.

Шу кўйи бир-бирларига қараганча, узоқ жимиб қолишиди. Кўча ичкарисида болалар чиллак ўйнашар, уларнинг шовқин-сурони оламни тутарди.

– «Зу-у-ув», – деди бир бола чўзиб.

– Нафас олдинг, қайтадан бошла, – деди бошқаси бўғилиб.

– Йўқ, олмадим...

– Олдинг.

Ютқазган бола яна зувлади. Нафаси қолмагунча чўзиб борди. Рақиби маза қилиб кулди. Югуриб бориб, елкасига осилди.

Ютқизган болакай маррагача уни опичлаб борди-да, алам қилди шекилли, рақибининг ғашига тегиш учун бақирди:

Анвар алами,  
Кулогида қалами.  
Поезд юриши,  
Тўхтаб туриши...

– Ўша куни сенга хат ёзаётгандим, опа олиб қўйди, – деди Дилфуз секингина.

Рустам бошини кескин силтади.

– Нега олади?

– Билмайман, олиб қўйди. Кимга ёзгандинг, деб сўради.

– Нега олади, ахир?! – деди Рустам бўғилиб. – Нима иши бор унинг!

Дилфузা елкасини қисди.

– Яхшики сенинг хатларингни кўрмади. Беркитиб кўйибман, хужрадаги кутида турибди.

Дилфузা бирпас жим турди-да, ўпкаси тўлиб йиғлаб юборди.

– Опа айтадики, эрга тегмоқчимисан, дейди. Хатимни қайтариб бермагунча бормайман мактабига!

Рустам эсанкираб қолди шекилли, уни қандоқ юпатишни билмай, қўлини мушт қилди.

– Опани ўлдирман.

– Жинни бўпсан!.. – деди Дилфузা ҳиқиллаб. – Қамаб кўяди.

– Қамамайди. Армияга кетаман.

Дилфузা унинг «армияга кетаман» деганида чўчиб тушди.

– Керакмас... – деди ялиниб. Кейин яна бояги гапини қайтарди: – Опа хатимни бермаса, бари бир бормайман мактабга! – У бошини кўтарди-ю, бирдан кўзларида кўркув пайдо бўлди. – Вой, ана ўзи!

Кўчанинг нариги бетидан Васила Назаровна ўтиб борарди. У яшил плаш кийган, бир даста китоб кўлтиқлаганча, ерга қараб кетарди.

– Бекин, Рустам, – деди Дилфузা овози титраб. – Кўриб қолса ойингларга айтади...

Рустамнинг онаси мактабда фаррош бўлиб ишларди. Шунинг учун Дилфузা «опа»нинг Рустамни таниб қолиши, бориб онасига айтишидан қўрқиб кетди. Негадир шу топда «Менга ҳеч нима эмас-ку, Рустамга қийин бўлади», деб ўйларди.

Васила Назаровна улар томонга қарамай ўтиб кетди.

– Бизнига кетяпти, – деди Дилфузा типирчилаб. – Ҳозир дадамга айтади.

– Айтиб кўрсингчи! – Рустам тишларини ғижирлатиб, муштини дўлайтириди.

– Кет уйингга! – деди Дилфузана ялиниб.

... У шом қоронгиси тушиб қолган кўчадан ҳовлиқиб келаркан, Опа ўзларининг уйига келганини юраги сезиб турарди. «Дадам келмаган бўлсин ишқилиб, келмаган бўлсин», деб ўйларди юраги титраб.

Қия очиқ эшикка етганидан кейин, ичкари киришга ботинолмай, туриб қолди.

– Мана, ҳозир ҳам қаёққа кетганини билмайсиз. Битта қизингизни эплаб ололмайсиз. – Бу Васила Назаровнанинг овози эди. Дилфузанинг юраги шувиллаб кетди.

– Ҳозиргина чиқиб кетувди-я. Бир ҳафтадан бўён қаддини кўтаролмай ётди болам бечора, – деди онаси. – Сиқилиб кетдим, ҳаво олиб келаман, деди. Раҳмим келди болага.

Дилфузанинг қўнгли бир оз таскин топди. Демак, дадаси ҳали келмабди.

– Жаям ёш бола эмас, – деди Васила Назаровна кинояли овозда. – Анча нарсага ақли етади... Аввал борсин, комсомол мажлисида гаплашамиз.

Дилфузанинг назарида Опа бу гапни бутун оламга эшиттириб айтгандай бўлди. Тўсатдан оёқларидан мадор кетиб, қалтирай бошлаганини сезди. «Мажлис? Ўртоқларимнинг юзига қандоқ қарайман! Қишлоқда қандоқ бош кўтариб юраман!» У онасининг гапини эшитмади, юраги зириллаб, эшикдан нари кетди-ю, муюлишга бориб қолди.

Анчадан кейин Васила Назаровна эшикдан чиқди. Муюлишга етганида Дилфузани кўриб тўхтади. Ўша куни Дилфузана эшикни қарсилатиб ёпиб кетгани ғашига теккан бўлса керак, қовоғи солиқ эди.

– Нега мактабга бормаяпсан? – деди қошини чимириб.

Опанинг боя онасига айтган гапи ҳамон Дилфузанинг қулоғи остида жаранглаб турарди. «Комсомол мажлисида кўрармишми? Нимани кўради? Хатними?»

Дилфуза салом ҳам бермай, унинг кўзига тик қаради.

– Хатни беринг!

– Кўча сандироқлаб юргандан кўра, онангга боқишишсанг бўлмайдими, кап-катта қиз, – деди Васила Назаровна унинг гапини эшитмагандай.

– Мактабга бормайман, – деди Дилфуза йиғи арапаш. – Нега менинг хатимни оласиз? Ҳаққингиз йўқ!

Васила Назаровна унга бир нафас қараб турди-да, жеркиб берди:

– Хукуқ талашишни билгандан кўра, ўқиши бил! – У кескин бурилиб, юриб кетди.

Дилфуза Васила Назаровнанинг кетидан қараганча, йиглаб қолди. «Бари бир бормайман мактабига! Рустам билан қочиб кетаман!» – деб ўйлади қайсарлик билан. Унинг руҳида отасидан юқкан бир сўзлилик жўш урар, Опанинг «мажлисга кўяман» деган гапидан даҳшатга тушар, бунинг устига агар Опа гапни ковласа, Рустамга ҳам ёмон бўлиши мумкин, деган хаёл уни, айниқса, қаттиқ азоблар эди.

\* \* \*

«Нега олиб кўяди?» Рустам қоронги тушиб колган қишлоқ кўчасидан руҳи чўйкан ахволда юриб бораркан, ҳадеб шу саволни такрорларди. «Нега олади?»

Ҳали симёғочлардаги чироқлар ёқилмаган, кўчалар устида енгил тутун, пиёздоф иси кезар, аллақаерда сигир маърар, беркинмачоқ ўйнаётган болаларнинг шовқини тинмас эди. Ҳали Дилфузанинг Опани кўриб кўркиб кетганини эслаб, ҳозир ўзининг ҳам юраги увушди.

«Опа ёмон, бир нарсага киришса кўймайди! Мактабда ундан қўрқмайдиган одам йўқ... – У юриб-юриб гузарга келиб қолди. Деразасидан нур тушиб турган сартарошхонани узоқдан кўрди-ю, сесканиб кетди. – Дадасига айтиб берса-я! Тикка сўяди. Чапани одам!»

Рустам қўнглида ғулғула билан аста яқин келди-да, деразадан мўралади. «Хайрият, ҳали уйига қайтмабди!» Ҳайитвой амаки оқ ҳалат кийиб олган, хиёл энгашганича, гавдали бир кишининг соқолини қирап, алланималарни гапирав эди. Дераза томонга бир қараб қўйганида Рустам унинг узун мўйлови, кўкиш кўзларини қоплаб олгудай қуюқ, сариқ қошларини кўрди-ю, юраги шувиллаб, ўзини орқага ташлади. Ташқари қоронги бўлгани учун у Рустамни кўрмади шекилли, ишини қиласкерди.

«Тезроқ мактабни битирсан эди, – деб ўйлади Рустам нари кетаркан. – Қутулардим шу Опадан ҳам, бошқасидан ҳам. Институтга кирсан, кирдим, бўлмаса армияга кетаман. Физкультура институтига кириш ҳам осонмас, дейишади-ку!»

Жисмоний тарбия ўқитувчisi унга «сендан яхши спортчи чикади», деган. Рустам ҳам шунга қизиқарди.

Аслида Дилфузани севиб қолишига ҳам волейбол сабаб бўлган. Рустам илгарилариям Дилфузани кўриб юарди-ю, эътибор бермаган экан. Ўша куни яхши кўриб қолди.

Кузда уларнинг синфи 10 «б» билан волейбол ўйнади. Аввалига «б»чилар юта бошлади, майдон чеккасида туриб олган қизлар уларни олқишлиб қарсак чалишар, бу эса Рустамнинг ғашига тегарди. Кейин хисоб тенглашди.

Гал айланиб келиб, Рустам тўрнинг рўпарасида турган эди. Бир маҳал тўп баланд кўтарилиб, шундоқкина тўр устига туша бошлади. Рустам, тўрнинг нариги томонидан туриб тўпга сакраётган рақибини кўрди-ю, кисилган пружинадек осмонга сапчиди, шундай зарб билан урди-

ки, тўп рақибининг бошига тегиб, чеккага учиб кетди. Рақиби беихтиёр чўккалаб қолди.

Рустам томоша қилиб турган қизлар орасида биттаси чинқириб осмонга сакраганини, кула-кула қарсак чалганини кўрди. Негадир ўша куни шундай яхши ўйнадики, ўзиям ҳайрон қолди. Ҳар сафар рақиб тўрига тўп туширганида бояги қиз қувониб қарсак чалар, унга сайин Рустам яхшироқ ўйнар эди.

Шу кундан бошлаб у ўша қизни хар кўрганида юраги алланечук титраб кетадиган, дарси илгари тугаган кунлари атайлаб тўққизинчи синф деразаси олдидан ўтадиган бўлиб қолди. Шундоқ тўполончи боланинг бирдан «қуйилиб» қолганини кўриб синфдошлари ҳайрон эди. Рустам охири дардини Азим деган ўртоғига айтди. Икковлашиб Дилфузага хат ёзишди. Азим айтиб турди, Рустам ёзди. Шундан кейин Дилфузза ҳам уни яхши кўриб қолди.

Рустам ҳамон бошини қуи солиб бораркан, боя Дилфузанинг йиғлагани кўз ўнгига келди-ю, ўзининг ҳам йиғлагиси келди.

«Нега унақа дейди Дилфузага?! Нима ёмонлик қипти?»

У ўзидан-ўзи Опаларнинг кўчасига бурилди. Ўша гапи учун шунақанги таъзирини берсинки, нима, кўрқадими! Қани, Дилфузанинг хатини қайтариб бермасинчи?!

Рустам опаларнинг уйи қаршисидаги толлар тагига келиб тўхтади. Ичкарида чироқ ёниб турар, аммо деразаларга парда тўсилгани учун ҳеч нима кўринмасди.

У анчагача шу ахволда толга суюниб турди. Кейин бирдан дераза шарақлаб очилганини эшилди-ю, кўркиб бошини кўтарди. «Опа!»

Дераза пардаси сурилиб, бир қизнинг боши кўринди. Рустам, икки-уч йил илгари мактабни битирган Опанинг қизини таниди.

– Ким керак эди сизга? – деди қиз қоронғида яхши кўрмайтгани учун бўлса керак олдинга эгилиб.

– Ўзим... – деди Рустам дудуқланиб. Кейин орқасига қарамай, секин-секин юриб кетди.

«Қани, қайтариб бермасин-чи! – деди қўча бошига борганидан кейин опани тагин яниб. – Обқочиб кетаман Дилфузани».

У Опа билан қандоқ гаплашишни, хатни қандоқ қайтариб олишни ўйлар, аммо хаёлига дурустрок бир фикр келмай, қийналар эди.

\* \* \*

Азиза онасидан Ёдгорнинг «бир қошиқ сув билан ютугулик» кизни етаклаб юрганини эшитганида чандон ишонмаган эди. «Бунақа гапларнинг ўзидан қулоги узун бўлади», деб юрганди.

Йўқ, рост экан. Театр ва рассомлик институтида ўкий-диган холасининг қизи ҳаммасини айтиб берди. Азиза «бечора» қизнинг миридан-сиригача билиб олди.

«Душманингдан кўркма, душманга айланган дўистингдан кўрк», дейдилар. Азиза Ёдгорнинг нозик жойларини яхши биларди. Шунча кўргиликлари эвазига эридан қасос олишга аҳд қилди: Ёдгорнинг институтига хат ёзди. Бирорнинг ошидан ҳазар қилмаган бегона қиз билан пачакилашиб ўтиришга кўнгли чопмади-ю, онаси билан гаплашиб кўйишга аҳд қилди. Она бўлса қизини тийиб олсин!

У мактабга кириб келганида танаффус пайти экан. Болалар ховлидачувиллашиб ўйнар, юкори синф ўқувчилари иссиқхонанинг ойнабанд томига хашак ёпишар, бир хиллари гуллар тагини чопар эди.

Азиза кўнгироқ чалинишини кутиб турди. Зум ўтмай ховли жимжит бўлиб қолди. Тутлар шохидагайраётган

мусичаларнинг кукулаши аниқ эштила бошлади. У де-  
ворига ҳар хил диаграммалар, портретлар илиб ташлан-  
ган ўқитувчилар хонасидан ўтиб, юраги пўкиллаганча  
«Завуч» деган ёзув осиғлиқ эшикни тақиллатди.

Ичкаридан «ҳа» деган бўғиқ овоз эштилгач, кирди-ю,  
остонада туриб қолди. Тўрдаги алвон ёпилган стол  
кархисида ўтирган соchlари оқара бошлаган тўлагина аёл  
«нима ишингиз бор эди?» дегандай кўзларини пирпират-  
ди.

– Кечирасиз, – деди Азиза яна юраги пўкиллаб. – Ба-  
сила Назаровна сизмисиз?

– Ҳа, ўтириб туринг, – деди аёл стулни кўрсатиб.

Азиза этакдаги стулга чўкди.

– Кеча боргандим! – деди аёл девор тагидаги стулда  
ўтирган кўхлик йигитга қараб. – Келмаган бўлса ўзидан  
кўрсин. Отасининг олдига ўтқазиб қўйиб гаплашамиз.

Азиза унинг эркакча овозини эштиб, яна юрагини  
кўркув босди. «Юмма талаб берса-я?.. Ўлдими... Ўзиям  
қизини тириклайн ейдиган хотинга ўхшайди».

У ўзини босиб олиш учун хонани томоша қила бош-  
лади. Бурчакда каттакон сейф жойлашган, девор тагидаги  
китоблар солинган шкаф устида аллакимнинг ҳайкалчаси  
туарди. Азиза кимники эканини билолмади.

– Бўпти, Дилшоджон, – деди хотин яна кескинлик  
билан. – Дарсингизга киринг. – Кейин Азизага қараб  
сўради. – Хизмат?

– Сиз Театральний институтда ўқийдиган Чароснинг  
оналаримисиз? – деди Азиза тутилиб.

– Ҳа, нимайди?

Азиза яна тутилиб қолди. У қандоқ қилса гапи  
таъсирчанроқ чикишини ўйлар эди.

– Мени кечиринг, – деди анчадан кейин. – Буни сиз-  
га айтмоқчи эмасдим. Эшитдим, сиз обрў-эътиборли аёл  
экансиз...

Аёл гапингни айт, дегандай, қошини чимириди.

– Қизингизга айтсангиз, бироннинг баҳтига чанг солмаса...

Аёл тушунолмай, кўзини пирпиратди.

– Менинг қизимни айтяпсизми? Нима деганингиз бу?

Кимнинг баҳтига чанг солибди?

«Бехабар экан. Билмаса билиб қўйсин», деб ўйлади Азиза кўнглида қасоскор бир лаззат туйиб.

– Кимнинг бўларди, менинг! – деди у овозини баландратиб. – Мен ҳам жудаям ердан чиққан эмасдирман. Қанот қўйруғим бордир.

Аёлнинг ранги оқариб, кўзлари катта очилиб кетди. Столда ётган сигаретни олиб тутатди.

– Сиз адашяпсиз, синглим, – деди у Азизага тик қараб.

– Йўқ, адашаётганим йўқ. Сиз рассомлик факультетининг иккинчи курс студенти Чароснинг онасимисиз, ахир... Васила Назаровнамисиз?

– Нима қилибди Чарос? – аёл ўрнидан туриб кетди. – Нима қилди?

Азиза юзини кафти билан яширганча, пиқиллаб йиглаб юборди. Шу топда кўзига ёш кела қолганига ўзиям хайрон қолди. Кейин бутун баҳтсизликларига ўша қиз айбдор эканига ўзиям ишонди-ю, дардини тўкиб солди.

– Қизингиз менинг эримни тинч қўйсин! Уялмайдими, кўча тўла йигит...

– Нима, нима дедингиз?

Азиза аёлнинг бўғиқ овозини эшитиб, бошини кўтарди.

– Ишонмасангиз ўзидан сўранг қизингизнинг!

У кўз ёшларини артиб, аёлга қаради. Хотин гарданига бирор гурзи билан ургандай бирдан мук тушиб қолган, энкайганча столга тиралиб ўтирас, Азизага тикилиб турган кўзларида ғазаб бор эди. Чамаси, у ҳозир Азизани кўрмас, бутунлай бошқа нарсани ўйларди.

– Эрингизнинг оти нима? – деди у анчадан кейин таҳдидли овозда.

– Ёдгор... Ёдгор Мирзаев... Политехника институтида ўқиёди. Ётоқда, бир юз ўттиз тўққизинчи хонада туради. – Азиза хийла жим қолди-да, аста қўшиб қўйди. – Тўгри, мен эrim билан турмайман. Лекин хали қонуний ажрашганимиз йўқ. Балки Чаросхон унинг уйланганини билмас, қизингизда айб йўқдир... Унинг бошини айлантириб қўйгандир, йигит ўлгур...

Хотин «бас қил», дегандек бошини кескин қўтарди. Унинг кўзларида алам, нафрат, аллақандай дард бор эди.

– Кечиринг, сизни хафа қилмоқчи эмасдим... – деди Азиза яна ўша ялинч оҳангидга.

– Бўлди, – деди аёл лабларини қимтиб. – Бораверинг! Азиза қушдай енгил тортиб, ҳовлига чиқди.

\* \* \*

Чарос дарпардани суриб, деразани очди. Юзига майин шабада урилиб, чукур энтикди. Осмон чароғон, куёш чараклар, камқатнов асфальт кўчанинг ўртасида қизалоқлар черта ўйнашарди. Уларнинг бири – сочиға бантик тақсан қизча чумчуққа ўхшаб бир оёқлаб ҳаккалар, бошқаси – атлас кўйлакча кийиб олгани эса сабаб турарди.

Дераза қархисида тол шохлари шитирлаб кетди. Чарос бошини кўтариб, толга осилиб турган болани кўрди.

– Туш, Адҳам, – деди у қўшни болакайни таниб.

– Варрагим илиниб қолди. Чарос опа, олиб тушай, – деди бола бир оёгини осилтириб турганча ялиниб.

Чарос дераза панжарасидан мўралаб қараб, тол шохларига ипи ўралашганча узун думи ликиллаб турган даканг варракни кўрди.

– Йиқилиб кетсанг-чи?..

– Йиқилмайман...

Чарос деразадан нари кетди. У икки кундан кейин бўладиган семинарга тайёланар эди. Кейинги пайтда тарихий шахслар портрети масаласида мунозарали фикрлар кўпайиб кетди. Бунинг боиси бор. Чарос, хусусан, Темур портрети ҳақида гапирмоқчи эди. Тўгри, анча йиллар аввал машҳур рус рассоми яратган портрет жаҳонгирнинг бош суягига қараб чизилган. Лекин инсон юзининг умумий чизиқларини топиш ҳали портрет яратиш деган гап эмас. Портретда кўз ифодаси, ички оламининг чехрадаги акси шахс характерини очади. Шоҳнинг ҳозирги портретида у ваҳшний килиб тасвирланган. Ҳолбуки, Темур факат жаҳонгир эмас, яратувчи ҳам бўлган. Самарқанд обидалариdek санъат асарларининг бунёд бўлишига ҳомийлик қилган, жаҳонга донги кетган олимларни тўплаб, уларга шароит яратиб берган одам эзгуликни ҳис қилмаслиги мумкин эмас. Бунинг устига замондош тарихчилар Темур донишманд, истарали одам бўлганини ёзиб қолдирганлар. У мана шулар ҳақида албатта гапирмоқчи эди.

Эшик тарақлаб очилиб, унинг хаёллари дув тўзиб кетди. Чарос ҳуркиб бошини кўтарди-ю, ранги қув ўчиб, лаблари титраганча остонаяда турган онасини кўрди, важохатидан чўчиб кетди.

– Ҳа, опа?

Васила Назаровна қўлтиғидаги китобларни остонаяга ташлаб, Чаросга тешиб юборгудай тикилди.

– Ёдгор ким?

Чароснинг вужуди музлаб кетди. Негадир хаёлидан «Дилшод айтган», деган фикр лип этиб ўтди.

– Ким деяпман? – деди Васила Назаровна унга томон юриб.

Чарос чўчиб, орқага тисарилди.

– Опа... – деди ялиниб.

– Ким? – Васила Назаровна янаем яқинроқ келди.  
Унинг лаблари титрар, кўзлари қисилиб кетганди.

– Ўша... – деди Чарос онасининг юзига қарашга боти-  
нолмай пичирлаб.

– Нима «ўша?» Ким «ўша?» – Васила Назаровна унга  
такалиб турар, нафаси Чароснинг юзига уриларди.

Чарос аламдан кўзларига қуйилиб келаётган ёшни  
базур тийиб турар, юзлари ловиллар эди. «Бу қандоқ гап.  
Ўзининг дарди ўзига етмайдими? Нега уни хўрлашади.  
Айби нима, ахир. Яхши кўрганими? Қачондан буён  
ўшани бир марта кўриш орзусида юрганими?» Шу топда  
у Ёдгорни яхши кўришини, усиз яшай олмаслигини аниқ  
хис қилди-ю, онасига қаради.

– Ўша!

– Яхши кўрасанми? Туролмайсанми, «ўша»сиз?!

– Яхши кўраман, туролмайман! – деди у йигига бу-  
рилган лаблари титраб.

Васила Назаровна караҳт бўлгандай, тили калимага  
келмай қолди.

– Энди келиб-келиб бироннинг сарқитини ейди-  
ган бўлиб қолдингми? – деди у пичирлаб. – Мен сени  
ювинди билан боққанмидим?! Энди ювиндихўр бўлиб  
қолдингми?

Аламдан, уятдан Чароснинг қулоқлари шангиллаб  
кетди. Ўз онасининг таънаси суяк-суягидан ўтиб, юзлари  
ловиллай бошлади.

– Опа... – деди лабини тишлаб.

Онаси қулоқ солмади.

– Эл-юрт ўртасида мени шарманда қилмоқчимисан?  
Биласанми, мен кимман? Йўқ, сен шармандани деб  
таъна эшитишни хоҳламайман. Ишқ-муҳаббат деган  
шиқилдоғингни ўзинг ўйна, менинг қўлимга тутқазма!  
Ўша хотинбознинг шундок шармандасини чиқарайки!

Чарос чўчиб, бошини кўтарди.

– Борманг олдига! Бормайсиз!

Чарос қулоқ-чаккасига тушган тарсакидан гангиб, кўзларини катта очганча онасига узоқ қараб қолди. Энди у йиғламас, оғир-оғир нафас оларди. Бола бўлиб онасидан калтак емаганди. Бугун онаси урди, Нега, нима учун?!

– Нега урасиз? – деди пичирлаб. – Нега урдингиз?! – У энтикканча онасига томон эгилди. – Эшитиб қўйинг, опа, аввал юрмаган бўлсам, энди юраман!

У эшикни тарақлатиб очганча, айвонга чиқди. Шошилиб туфлисини оёғига илиб, сакраб ҳовлига тушди.

– Юрсанг, қайтиб келма! – деди онаси унинг кетидан қичкириб.

У югуриб кўчага чиқди. Онасининг диванга ўтириб олганча ўксисб-ўксисб йиғлаётганини ҳам, ер юттур хотинбозни қаргаётганини ҳам эшитмади. Ловиллаётган юзини кафти билан силаганча юриб кетди, ҳуши учганча автобусга ўтирди. Айланиб-айланиб стадионга келиб қолди. Негадир бир вақтлар Ёдгор билан майдонни томоша қилишган жойга – марказий минбардаги панжара олдига келди.

Стадион таъмир қилина бошланган, панжаралар қизилсариқ рангта бўялган, кўм-кўк майдон осмоннинг бир бўлагидек яшнаб ётарди. Каердадир музика янграп, майдон четидаги йўлкаларда майкачан қизлар югуришарди.

Чарос Ёдгорнинг гапини эслади: «Бахорини кутиб ётиби!» Унинг ўйчан, самимий чехраси Чароснинг кўз ўнгига келди-ю, аччиқ жилмайди:

«Мана, баҳор келдиям. Баҳор ҳам барчани баравар баҳтиёр этолмас экан-да».

\* \* \*

Бугун стипендия олишгани учун икки ўртоқ қўлбола ош қилишмоқчи бўлди. Зойиржон дарсдан кейин бозорга кетди.

Ёдгор трамвайдан тушиб, ётоқ томонга кетаркан, тўрт қаватли уй бурчагида тўдалашиб турган одамларни кўрди. Кўпчилиги яктак кийган, салла ўраган кексалар эди. Улар бошини куйи солганча оҳиста гаплашиб туришар, тепага, иккинчими, учинчими қаватга қараб-қараб қўйишарди.

Ёдгор яқинроқ келиб, подъезд олдида турган тобутни кўрди-ю, тўхтаб қолди. Тобут атрофи қизил алвон билан ўралган эди.

«Ёш одам қазо қилибди», деб ўйлади у юраги увушиб.

Тобут тепасида бекасам тўн кийиб, қийиқча боғлаган бир йигит букчайиб турар, қизариб кетган кўзлари билан атрофга жавдирар, одамлардан мадад кутгандек, маъносиз қараб-қараб қўяр эди.

«Акасими, укасими бўлса керак», деб ўйлади Ёдгор яқинроқ келиб. Шу топда мана шу гуссали нотаниш йигитчага нимадир деб тасалли бергиси келди-ю, сўз тополмади. Оқила буви вафот этганидан бўён у аза кўрмаган эди. Ҳозир негадир томогига бир нима тикилиб, кўзлари ачишиб кетди.

Йўлак рўпарасидаги ёш толга чиқиб олган йигит болтacha билан силлиқ шохларни танлаб кесар, берирокда турган чоллар ўзаро секин-секин гаплашишарди. Уларнинг сухбати Ёдгорнинг қулоғига чала-ярим чалинди.

– Дом жоннинг роҳати дейишади-ю, шунақа пайтда чатоқлиги билинади-да, – деди сийрак соқолли киши оғир-оғир нафас олиб турган, қовоклари салқиган семиз хамроҳига, – каталакдай жойда тўй ўтказа олмасанг, маърака ўтказа олмасанг...

– Ҳалиям бўлса ўзимизнинг Курбақаобод тузук, – деди хамроҳи секин.

Учинчи қават деразасидан ғўнғир-ғўнғир товуш келди. Кейин хотинларнингчуввос солиб йиғлагани эши тилди. Ёдгорнинг қулоқлари шанғиллаб, ҳеч нимани англай олмай қолди. Зум ўтмай одамлар тўдаси тобутни

липиллатиб, кўча томонга йўл олди. Ёдгор тобут кўтариш савоб, деган гапни эшитган эди. Туртениб-суртиниб олдинга ўтди. Тобутнинг бир бандига елкасини тутиб, катта кўчагача кўтаришиб чиқди.

Ётоққа қайтаркан, унинг кўнгли бўм-бўш бўлиб қолганди. Лопиллаб бораётган тобут, ҳассакашлар, секин гаплашаётган чоллар унинг кўз олдидан кетмас эди.

«Уйларнинг маҳаллий шароитга мослашмагани мана шунаقا пайтда айниқса билинади, – деб ўйлади у кўнгли хижил тортиб. Яна бояги чолларнинг гапини эслади. – Тўй қилиб бўлмаса, маърака қилиб бўлмаса...»

У ўтган қишида Зойиржон аллақайси тоғаваччасининг маъракасига бориб, сўкиниб келганини эслади. «Одам тирбанд, каталакдай уйга ким сифарди, элликка яқин киши беш-ўнтадан навбат билан кириб чиқкунча оёғимдан муз ўтиб кетди».

Начора, бари бир таомилга амал қилиш керак. Балки шунинг учун хам кўплар тайёр уй турганда, иморат соламан, деб шаҳар чеккасига югурад?.. У яқинда Қорақамиш массивига кўчиб борганлар ўзбошимчалик билан бир хонали уйга маҳалланинг қозон-товоргини киритиб қўйганини, район ижроия қўмитасида катта жанжал бўлганини эшитган эди.

Йўқ, ақалли ҳар бир даҳада биттадан маҳалла маркази бўлиши керак. Халқ таомилига кўра, чойхоналар ҳашар йўли билан қурилади. Уйлар қурилаётганида маҳалла маркази учун жой қолдирилиб, лойихаси чизиб берилса-чи?! Масалан, бундай марказни икки қаватли қилиш мумкин. Биринчи қавати чойхона бўлади. Маҳалланинг бутун хўжалиги шу ерда сақланади. Оқшомлари қўни-қўшнилар дам олиши мумкин. Шунда бир-бири билан яқинроқ танишади, бирор-бирор вининг иссиқ-совуғидан хабардор бўлади. Иккинчи қаватда клуб жойлашса, турли йигинлар, тўйлар бўлса.

Мана бундай маъракалар-чи?! Одамлар жон-жон деб рози бўлади. Давлат қуриб берсинг деб ўтирмай, ҳашар билан битириб кўяди. Факат жой ажратиб, лойиҳасини чизиб бериш керак.

«Албатта шундай қилиш керак, – деб ўйлар эди Ёдгор хонанинг у бошидан-бу бошига бориб келаркан, – келгуси лойиҳаларда шуни албатта ҳисобга олиш керак».

У гарангсиб, стол олдига келди. Чойнак жўмрагидан совуқ чой ичаркан, бугун навбатчилик ўзининг гали эканини эслади. Уларнинг хонасида ўзига хос қоида бор эди. Навбатчи пол ювади, идиш-товоқларни тозалайди, уйда овқатланмоқчи бўлишса, овқат қиласи. Кейин идишларни яна ювиб кўяди.

У Зойиржон келиб қолса, ҳалиям имиллаб ўтирибсизми, деб койишини билиб, деразаларни, стол-стулларни артди. Кейин латта ҳўллаб, пол ювишга киришиб кетди. Энкайганича, орқаси билан очиқ эшик томонга аста сурилиб келаркан, кўлтиғининг тагидан караб, оstonада турган семиз оёқларни кўрди. «Оббо, пол ювишни кўриш ҳам томоша бўптими?»

У қаддини ростлаб, бурилиб қаради.

Остонада кўк жемпер кийган, сочи турмакланган тўлагина аёл туарди. Унинг қаеридир Ёдгорга танишдек туюлди.

– Келинг, – деди салом бериб.

Аёл киши қархисида майкачан, қўлида ҳўл латта осилтириб тургани учун хижолат бўлиб, кафтининг орқаси билан терлаган пешанасини артиб кўйди.

– Менга Мирзаев Ёдгор керак! – деди нотаниш аёл ундан кўз узмай.

Унинг овозидаги қатъиятдан, ўзининг аҳволидан Ёдгор янаям кўпроқ мулзам бўлди.

– Мен, – деди у ҳайрон қолиб. Кейин латтани чељакка солди-да, қўлинини ювиб, кўйлагини кийди. Стол устига

тўнкариб илиб қўйилган стулларни тушириб артди-да, таклиф қилди:

– Ўтиринг.

Аёл столга тирсагини тираб ўтирганча Ёдгорга узок қараб турди. Ёдгор хижолат чекиб, кўзини олиб қочди.

«Қаерда кўрган эканман уни?»

– Мен Чароснинг онасиман! – деди аёл яна ўша қатъий оҳангда.

Ёдгор сакраб туриб кетди. «Вой каллаварам! Худди ўзига ўхшаб турибди-ю, танимайсан-а? Фақат Чарос нозик...»

Чарос деган сўзни эшитганданоқ унинг юраги ҳаприкиб кетганди. Довдира б қолди.

– Кечирасиз, мен ҳозир... – деди у Хизрга йўлиққандай қайтадан салом бериб. Илдам бориб, бурчакда турган чойгумни олди. Таги сарғайган чойгумни кўрсатмаслик учун четлаб ўтмоқчи эди, аёл тўхтатди.

– Керакмас, ўтиринг, – деди стулга имо қилиб.

– Йўғ-е – Ёдгор нокулад жилмайиб, чиқиб кетаётган эди, аёл янада қатъийроқ қилиб таъкидлади:

– Керакмас!

Ёдгор қайтиб келиб, унинг қаршиисига ўтириди.

Аёл синчковлик билан уни бошдан-оёқ кузатиб чиқди. Унинг қошини чимириб ўтиришидан Ёдгорнинг юраги шувиллаб кетди. «Чарос тинчмикин?».

– Чаросни кўпдан танийсизми? – деди аёл вазиятни ўзгартирмай.

– Танийман, – деди Ёдгор қизариб.

– Танийсиз... – аёл хўрсишиб қўйди. Кейин кўзлари кенгайиб, Ёдгорга қаттиқ тикилди. – Сиз хотинингизни танинг!

«Ҳаммасини билибди, – деб ўйлади Ёдгор. Кейин дафъатан хаёлига келган фикрдан енгил тортди. – Шунча кўринмай юрган бўлсаям бу гап чиқибдими, демак, Чарос унутмабди».

У кўнглидаги умид чўғидан рухланиб, аёлга хотиржам қаради. Ҳозир жаҳли чиқиб ўтирган бу аёл кўзига қадрдан кўриниб кетди.

– Уялинг, – деди Чароснинг онаси овозини баландлатиб. – Оилали бўла туриб, ёш қизнинг бошини айлантиришга уялмадингизми? Тағин студент эмиш!

Ёдгор ундан ранжимади. «Унинг ўрнида бўлганида бошқалар ҳам шундай қиларди», деб ўйлади у ерга караб.

– Гап шу! – деди аёл эркакча овозда. – Чаросни тинч кўясиз. Бўлмаса, ўзингиздан кўринг.

Ёдгор ўзи учун азиз инсонни дунёга келтирган одамга қаттиқ гапиролмаслигини биларди.

– Мен сизнинг аҳволингизни тушунаман, – деб гап бошлаган эди, аёл шартта кесди:

– Э, сиз ўзингизнинг аҳволингизни билинг! – деди жеркиб. – Чарос ёш, аҳмоқ, сизни севиб қолган бўлиши мумкин. Лекин сиз ёш бола эмассиз-ку!

Ёдгорнинг боши айланиб кетди. «Севиб қолган бўлиши мумкин», деб ўйлади хаёлан такрорлаб. «Севиб қолган!» У кўзларида порлаган қувончни яшира олмас, тасаввурида бирданига фариштага айланган шу одамни хафа қилмаслик учун бошини кўтаролмас эди.

«Яхши кўриб қолган. Шундан бошқа мукофот керакмас менга. Она бўлса... Бари бир она-ку, бир кун тушунади. Қачонdir тушунади...»

– Эшитдингизми? – деди аёл яна овозини баландлатиб.

Ёдгор гарангсиб, бошини кўтарди.

– Чаросни хаёлингиздан чиқариб ташланг!

Ёдгор уни ҳарчанд ранжитгиси келмаса-да, ёлгон гапиролмади.

– Йўқ, – деди бошини оҳиста чайқаб. – Хафа бўлманг, опа, мен уни унтишишга вайда беролмайман.

Аёлнинг ранги қув ўчиб, ўрнидан турди.

– Аввал биттасини эплаб олинг, йигит! – у Ёдгорга киноя билан қараб қўйди. – Бўпти, кўрамиз! Комсомол бор, деканат бор! – У кескин бурилди-да, чикиб кетди.

Ёдгор ҳамон стулдан жилмай ўтирас, онани ранжитиб қўйганидан кўнгли чўкар, аммо бояги биргина сўзнинг ўзи руҳини шу қадар тетик килиб юборган эдики, бошқа ҳеч нимани ўйлагиси келмасди.

\* \* \*

Уч кундан кейин Ёдгор институтга борганида йўлакдаги тахтада осиглиқ турган каттакон эълонни кўрди. «Эртага – 24 март куни соат 13 да 3-курс студентларининг умумий комсомол йиғилиши бўлади. Кўриладиган масала битта: студент Мирзаев Ёдгорнинг ахлоқи». Эълон қора босма ҳарфлар билан чиройли қилиб ёзилган эди. Лойиҳачиларнинг хуснихати чиройли бўлади...

Ёдгор ўқиди-ю, михлангандай серрайиб қолди. Ҳаво булат бўлгани учун йўлакдаги чироқлар ёкиб қўйилган, эълон узоқдан кўзга яққол ташланиб турар, Ёдгор ўзи ҳақидаги хукмни ўзи ўқиган маҳбус каби талмовсираб қолган эди. Ёнидан ўтиб кетаётган таниш талабалар гоҳ унга, гоҳ эълонга қараб, бири ҳайрон бўлиб, бошқаси худбинларча илжайиб қўяётганини Ёдгор анчадан кейин пайқади. Пайқади-ю, бу ердан кетиш, тезроқ кетиш кераклигини билиб, югурди. У ажалдан қочиб қутулиш мумкин бўлмаганидек, эълондан ҳам қутулиб бўлмаслигини ҳис этиб турар, юрагини ваҳима босар, «ахлоқи» деган сўз шармандаларча бонг чалаётганини билиб, кулоклари шангиллар эди.

Ўша куни Чароснинг онаси «комсомол бор, деканат бор», деганида жаҳл усида айтди-қўйди-да, деб ўйлаганди.

«Шунчалик тез-а», деб ўйлади у плашини билагига илганича, зиналардан туртиниб-суртиниб тушиб борар-кан. Назарида ҳамма унга қараётгандек, «мана, мана, ўша ахлоқсиз!» деб бармоғини бигиз қилиб кўрсатаётгандек эди.

Ҳаво тунд, каттиқ шамол эсар, пастак, қоп-қора булутлар шаҳар устидан зудлик билан этагини судраб борар, телевидение минорасининг ярмидан нарёғи кўринмас эди.

Ёдгор шамолдан гандираклагандай довдираб борар-кан, кузда бўлган комсомол мажлисини эслади. Ўшанда талабалар пахтага бормаган бир болани чўқилаб, «патини тўзитиб» юборишган, институтдан ҳайдашга қарор чиқаришган, ректорат ҳам бу қарорни тасдиқлаганди.

«Тамом бўлди, – деб ўйлади Ёдгор томогига нимадир тиқилиб. – Мана, ўқиши ҳам тамом бўлди. Қанча орзула-рим бор эди».

У шу топда Чаросни кўриши кераклигини, кўрмай ту-ролмаслигини пайқади.

Юриб-юриб таниш – уч туп чинор тагига бориб қолди.

Чинорлар шиддат билан вишиллаётган шамолда тит-рар, тангадек япроқлар ожиз қалтирас, ҳозир узилиб тўзиб кетгудай бўларди. Шамол яна кучайди.

Ёдгор чинорлардан бирига суюнганича узок турди. Ниҳоят, бир тўда қизлар орасида Чарос кўринди. У оқ жемпер кийиб олган, кўлида китоблар бор эди. Ёдгор юраги типирчилаб қараб турди. Чарос қизлар билан хайрлашдида, одатдагидек бошини қуи солганча, китоблари билан юзини шамолдан пана қилиб, юриб кетди. У бошқа қўли билан жемперининг тугмаларини солишга уринар, аммо рўпарадан эсаётган шамол бўй бермас, жемпер барини оппоқ қанотдек пирпиратар эди.

Ёдгор кўксини тўлдирган туйғулар тўлқинида энти-киб, унга талпинди. Шу пайт юзигами, пешанасигами

йирик бир ёмғир томчиси тушди. Кейин тангадек-тангадек томчилар асфальт кўчани чакичлай бошлади.

Ёдгор кўча чеккасидаги шафтоли тагида Чаросга етиб олди.

– Чарос! – Аввал ўзи қичқирдими ё олдинроқ Чарос ўтирилиб қарадими, Ёдгор билолмай қолди.

Шу ондаёқ Чароснинг энтикиб кетганини, кўзларида мунг аралаш соғинч бир туйғу ёнганини пайқади-ю, плашини унинг елкасига ташлади. Плаш этаклари ерга тегай деб қолди. Ёдгор плаш ёқаси билан унинг томоғини ўраркан, шамол ҳам, жала ҳам кучайиб кетди. Шафтоли гуллари дув учиб, бир қанча гул япроқлари Чароснинг хўл соchlарига, юзига ёпишиб қолди. Негадир Чароснинг юзи худди шу гул билан бир хил рангда эканини энди сезди.

– Келдингизми? – деди Чарос пицирлаб. Кейин лаблари бурилди-ю, унинг кўксига бош қўйиб, ҳиқиллаб йиглаб юборди. – Кийналиб кетдим.

Ёдгор томоғига яна ўша илиқ нарса тикилиб, қизнинг бошига юзини босди. Чароснинг тўзиган хўл соchlаридан гулнингми, атирнингми ҳиди келарди.

Чарос яна бошини кўтарди. У йиғлар, кўзларида табассум билан йиғларди.

Ёдгор шартта эгилди-ю, унинг ёшми, ёмғирми илиниб турган узун киприкларидан, юзидан, лабларидан ўпа бошлади. Чарос титраб, энтикар, аммо қаршилик қилмас, ингичка кўллари Ёдгорнинг билагига осилганча, ожиз титрар эди.

\* \* \*

Мажлис роппа-роса соат бирда бошланди.

Факультет комсомол ташкилотининг котиби, бешинчи курс талабаси Искандаров деган йигит аудиторияга кириб келганида талабалар жимгина ўтиришарди. Ёд-

гор ёноқ сүяклари туртиб чиққан, кичкина, дум-думалоқ корачиқли кўзлари ўйнаб турадиган бу йигитни яхши танир эди. Пахтага боришганида бешинчи боскич болалари бу йигитни ёмон кўришини, орқасидан «куруқ» деб лақаб кўйишганини эшиттанди. Ҳозир у доим диккайиб турадиган соchlарини хўллаб тараган, кора костюм-шим кийган эди.

Искандаровнинг кетидан аудиторияга Маҳмуда Алиевна исмли профессор кирганида талабалар гур этиб ўрнидан турди. Ёдгор ҳам елкасидаги юқ оғирлик килгандай, амаллаб қаддини кўтарди. Маҳмуда Алиевна нинг қаеридир Чароснинг онасига ўхшаб кетишини энди сезди-ю, бўшашиб ўтириб қолди. Маҳмуда Алиевна дезара тагига – кафедра ёнидаги стулга ўтирди.

– Сиз, ўртоқ Мирзаев, бу ёққа чиқинг! – деди Искандаров қўлини бигиз қилиб.

Ёдгор оёқларига тош боғлагандай имиллаб олдинга чиқаркан, Маҳмуда Алиевна ўзига синчилаб қараб кўйганини пайқади. Секин келиб, эшик тагидаги курсига чўқди. Қора курсига ўтираётган жиноятчига ўхшаб қолганидан юзлари ловиллаб кетди.

– Мана шундок, – деди Искандаров унга тепадан қараб. – Одамларга қараб ўтиринг.

«Юзинг чидаса», деб ўйлади Ёдгор унинг фикрини хаёлан давом эттириб. Искандаровнинг биринчи мумомаласиданоқ Ёдгор иш яхшилик билан тугамаслигига ақли етди. «Бўлди... Тамом...» У қўлларини яширишга жой тополмагандек стул ўриндиини чангаллаб, ерга қаради.

Шу пайт эшик очилиб, «мумкинми?» деган овоз эшитилди. Ёдгор зимдан қаради-ю, Аваз акани кўриб, юрагига умид учкуни ялт этди. «Яхши бўлди келгани».

Аваз унга бир қаради-ю, Маҳмуда Алиевнанинг ёнбoshидаги стулга бориб ўтирди. Шундай жимлик чўқдики,

катта кўчадан ўтаётган трамвайларнинг гулдираши ўн хисса ортиқ тарақлаб эшитила бошлади.

– Ўртоқлар! – Искандаров талабаларга қараб бир лаҳза жимиб қолди-да, Ёдгорни кўрсатди. – Бугун биз мана шу талабанинг ахлоқини муҳокама қилишимиз керак. У сизлар билан бирга юради, бир аудиторияда ўқийди, бир ҳаводан нафас олади. Ҳозир мен сизларга ўқиб берадиган хат унинг кимлиги ҳакида кўп нарсалар айтса керак, деб ўйлайман. – У костюмининг чўнтағидан буклоглик қоғоз олиб, яна Ёдгорга қараб кўйди.

«Хурматли институт раҳбарлари, домлалар. Сизларда, архитектура факультетининг 3-курсида ўқийдиган Ёдгор Мирзаев исмли студент менинг ҳаётимни қурбон қилди. Ширин турмушимизни бузиб, мени ташлаб кетди. Мен ҳам она бўлсам, орзу-ҳавас кўрсам, одамлардек яшасам дегандим...»

Ёдгорнинг соchlаригача диккайиб кетгандек бўлди. «Азиза! Азизанинг хати!» У хатнинг давомини эшиитмади. У Чароснинг онаси жаҳл устида хат ёзган бўлса керак, деб ўйлаганди. «Демак... демак, бу Азизанинг иши эканда».

Хатнинг охири унинг қулоғига чала-ярим кирди:

... «Ҳозир бўлса у бошқа бир бечора қизнинг бошини айлантириб юрганмиш. Менинг раҳмим келади ўша қизга...»

Ёдгор кўзини ердан ололмай қолди.

– Энди иккинчи хатни эшиТИНГ! – деди Искандаров яна чўнтағини ковлаб.

Ёдгор чўчиб ўгирилди. «Бунисиям борми?»

«Мирзаев Ёдгор исмли студент оиласи бўла туриб қизимнинг кетидан югуриб юрган экан, мен буни коммунизм қурувчи авлод ахлоқига зид деб биламан. Бу гапларни айтиш менга оғир. Аммо мен онаман. Ўз фарзандимнинг тақдирини ўйлашим керак. Биз – қирқинчи

йилларнинг комсомоллари бундай масалаларни бир мажлисдаёқ ҳал қилиб, айборнинг адабини бериб кўярдик. Ўйлайманки, ҳозирги ёшлар ҳам ўз ота-оналарининг шонли анъаналарига содик қоладилар».

– Бу иккала хат, – деди Искандаров қоғозларни силкитиб, – кетма-кет келган (у Васила Назаровнанинг хатини ўзи ёздириб олганини, албатта айтмади). Кўриб турибсизки, ҳар иккала хат ўртасида мантиқий боғлиқлик бор. Студент Мирзаев ўз хотинини ташлаб кетгани етмагандай, бошқа бир қизни ҳам алдаб юрган. Айтинглар-чи, бу қайси ахлоқ нормасига сигади?!

Яна оғир жимлик чўқди. Одатда ўсал бемор ётган хонада шунаقا жимлик бўлади. Ҳозир ҳамма Ёдгорнинг ўлишини кутиб, жимиб қолгандай эди.

– Ўзи гапирсин! – деди кимдир.

Ёдгор кеча Чаросни ўпганини эслади. Қизиқ, кеча дунёда ундан баҳтиёр одам йўқ эди. Бугун ундан баҳтсиз кимса йўқ. Баҳт билан баҳтсизлик етаклашиб юарканда, доим.

– Нимани гапиради? – Искандаров Ёдгорга қаради. – Хатдаги гаплар ростми, ахир?

Кечаги баҳтиёр дамларини эслашнинг ўзиёқ Ёдгорга руҳий тетиклик берган эди.

– Рост, – деди у тескари қараб.

Аудитория бир сесканиб тушгандай бўлди.

Энг аввал қашқадарёлик сап-сариқ қиз сўзга чиқди.

– Мен билмасдим, – деди ҳаяжондан овози титраб. – Мирзаевнинг бунчалик писмиқлигини билмасдим, яхши йигит, деб юардим. Энди биламан. Унга орамизда ўрин йўқлигини биламан.

Кейин Ҳикматилла деган новча йигит сўз олди. Ҳикматилла кузда ҳашарга чиқишганида Ёдгорнинг бир этак пахтасини ўғирлаган, Ёдгор кўриб қолиб, уни урган, ўшандан буён икковлари гаплашишмасди.

«Энди кўймайди», деб ўйлади Ёдгор юраги увушиб.

– Коммунизм курувчисининг ахлоқ кодексида, – деди Ҳикматилла салмоқлаб, – «маънавий поклик» деган модда бор. Ёдгор ким? Ҳамма нарсани ўз исми билан аташ керак. Мирзаев – маънавий бузук одам. Бу ерда иккита масалани аралаштириб юбормаслик керак. Биринчидан, Мирзаев баҳтсиз хотинига бой-феодалларча муносабатда бўлган. Иккинчидан, яна бир бечора қизнинг бошини айлантирган.

– Қаёқдан била қолдингиз хотини баҳтсиз эканини?

Ёдгор Зойиржоннинг овозини эшитиб, бошини кўтарди. Зойиржоннинг қоп-қора юзи аламдан кўкариб кетган, ўтирган жойида бўйини жўжахўроздай чўзиб гапиради.

– Нега уч йилдан бери индамай юрган хотин бирдан даъвогар бўлиб қолибди. Балки ўша қиз туфайлидир.

– Жим! – Искандаров кафти билан столни урди. – Бу ерда инсоннинг маънавий қиёфаси ҳақида гап кетяпти. Сизга ким қўйибди гапни, ўртоқ Қозимов! Ётоқхонада маст бўлиб бошингизни у девордан, бу деворга уриб юрганингиз етмагандай, тағин ҳамтовоғингизни ҳимоя киласиз! Гапиринг, – деди у Ҳикматиллага далда бериб.

«Якшанба куни ётоқ эшигида турганди-я, – деб ўйлади. Ёдгор қони қайнаб. У ўша куни даладан қайтишганида вестибиоль бурчагида ўзларига чақчайиб қараб турган Искандаровни кўрганидаёқ юраги бир қалқиган эди. – Ёзib қўйган экан-да дафтариға... Шунга ялинаманми? – У кечаги фароғатли дамларини яна эслади-ю, кўнгли кўтарилди. – Тўпига солиб отиб юбормайдими?!»

Ҳикматилла яна гапга киришган эди, Зойиржоннинг ёнида ўтирган Наргиза ўрнидан туриб кетди. Оппоқ юзи жаҳлдан қизариб, тез-тез гапириб ташлади:

– Нега бироннинг гапини бўғасиз! Балки ўша қиз Мирзаевни яхши кўрар? Балки хотин шунинг аламига ти-тиричилаб қолгандир??!

Искандаров бепарво қўл силтади:

– Қўйсангиз-чи, ўша қизнинг ўрнида сиз бўлсангиз,  
Мирзаевни яхши кўрармидингиз?

– Сиздан рухсат сўраб ўтирмасдим! – деди Наргиза  
йиғлагудек қизариб.

Искандаров «ўл бу кунингдан» дегандек, заҳарли  
жилмайиб қўйди...

– Менга онанинг хатидаги бир гап айниқса таъсир  
килди, – деди Нафиса исмли аълочи қиз. – Қирқинчи йил-  
лар комсомолларининг анъанасини давом эттиряпмизми?  
Менимча, йўқ. Ҳозир комсомол нима иш қиляпти? Маж-  
лис ўтказсак, болалар қочиб кетмасин, деб эшик олдига  
коровул қўйгудек бўламиз. Нега? Нега деганда одамлар  
 билан ишлашни билмаймиз. Уч йил бирга ўқибмиз-у,  
орамиизда шундай одам юрганини билмабмиз. – У жир-  
кангандай Ёдгорга қараб қўйди. Кейин Искандаровга  
ўгирилди. – Бунга сиз ҳам айбдорсиз!

... Нурмат залга хомуш тикилганча:

– Бир шоир айтган экан, – деб гап бошлаган эди, И-  
скандаров жеркиб ташлади:

– Биз аниқ фан одамларимиз. Романтикасиз гапира-  
веринг.

Нурматнинг жаҳли чиқиб кетди шекилли, бақириб  
берди:

– Қизиқмисиз, ўртоқ Искандаров, гапиртирасан-  
гиз хукмингизни чиқариб қўя қолинг. Нега мажлис  
чақирдингиз?!

Ёдгор зимдан қараб қўйди. Нурмат аччиқланганидан  
ёнок суяклари тутиб чиқсан юзи қизариб кетган, И-  
скандаров диккайган соchlарини силар. Аваз ака Нурматга  
дикқат билан тикилиб қолган, Маҳмуда Алиевна эса каф-  
тини юзига қўйганича тирсаги билан столга таяниб, ўйчан  
бир тарзда қўлидаги қофозга алланималарни чизар эди.

– Бир шоир айтган экан, – деди Нурмат гапи-  
ни қайтадан бошлаб. – Мұҳаббатнинг саройи кенг-у,  
30–Ўтқир Ҳошимов

аммо унга иккитадан ортиқ одам сифмайди. Учинчиси ортиқчалик қилади, деб. Хўп, Мирзаев хотини билан ажрашибди.

– Ташлаб кетибди денг, – деди Искандаров унинг гапини яна бўлиб.

– Ажралишибди! – деди Нурмат шу сўзни атайлаб таъкидлаб. – Орадан уч йил ўтибди. Бошқа бир қизни яхши кўрибди. Хўш, биз нима қиласиз уларнинг юрагидаги чўғга қора косов тикиб? Шуям ишми?!

Искандаров яна луқма ташлади:

– Балки ўзингиз ҳам шунақадирсиз? Қарға қарғанинг кўзини чўқимайди.

– Жим туринг бирпас зағизонга ўхшаб сайрамай! – деди Нурмат энсаси қотиб.

Тўполнон бўлиб кетди. Бирор Нурматни айблади, бирор Ёдгорни хотинбоз деб атади, яна бирор ўзгаларнинг севгисини муҳокама қилишнинг ўзи ахлоқсизлик, деди. Хуллас, ҳеч нимани англаб бўлмай қолди.

Ёдгорнинг боши ғувуллар, бозордаги даллоллар ўртасида нархи баҳоланаётган эчкидек бўлиб қолганидан афсусланар, нима бўлсаям шу гаплар тезроқ ҳал бўлишини истарди.

Аваз ака кафедрага чиқиши билан ҳамма жимиб қолди. «Ҳайрият», деб ўйлади Ёдгор унга тикилиб. Аваз ҳам Ёдгорга қаради.

– Мен бу йигитни яхши танийман, – деди у негадир овози титраб. Унинг юзи қизариб кетган, қошлари асабий учиб турарди. – Ўша қизни – Чаросни ҳам танийман. – Аваз залдаги пи chir-пи chirлар тинишини кутиб, бир оз жим қолди-да, давом этди: – Мирзаев Чароснинг тирноғига ҳам арзимайди.

«Нима?» Ёдгорнинг кўз ўнги коронғилашди-ю, ийқилиб кетмаслик учун стул ўринидигини чанглаб олди. «Наҳотки, Аваз ака шунақа деб ўйласа? Шунчаликка бориб етдими-а?»

– Менинг таклифим шуки, – деди Аваз қатъий оҳангда. – Мирзаевга ўхшаганларга институтда ўрин йўқ.

Ёдгор қалбида чидаб бўлмас оғриқ сезди. «Душманнинг отган тош эмас, дўстинг отган пахта ўлдиради», деганлари бежиз эмас экан. Бу гапни айнан Аваз акадан эшитиш айниқса оғир эди. Уйига борганда шунинг учун рўйхуш бермаган экан-да! Бундан чиқди Аваз ака уни Чаросга нолойиқ деб санайди. Бундан чиқди, Ёдгор «иккинчи навли!».

Боши ғувиллаб ўтиаркан, «комсомол вожаги»нинг дағдағасини элас-элас эшилди.

– Қани, Мирзаев, нима дейсиз? – деди Искандаров митти кўзлари ёниб. – Туринг ўрнингиздан!

Ёдгор ҳамон хушини тўплаб ололмай, аранг кўтарилиди. Искандаров саволини яна қайтарди:

– Нима дейсиз?

– Нимани нима дейман? – деди Ёдгор аламдан кисирлаб кетаётган тишларини аранг бир-бирига жип-слаштириб.

– Хотинингизни нега ташлаб кетганингизни айтинг. – Искандаров истеҳзоли кулди. – Ярашасизми ё институтдан кетасизми, шуни айтинг. Бир begunoҳ қизни тинч кўясизми-йўқми, шуни гапиринг.

– Нега айтарканман? – деди Ёдгор бўғилиб.

– Комсомолмисиз? Мен сизнинг вожагингизман. Айтинг, ахир, хотинингизни нега ташлаб кетдингиз?

Ёдгор яна бир пас жим турсин дод деб юборишини билар, энди унга ҳамма нарса бари бир бўлиб қолган эди. Искандаровга нафрат билан тикилди-ю, хайқириб юборди:

– Вожак бўлиш у ёқда турсин, авлиё бўлсанг ҳам айтмайман. Билдингми? Менинг ўз юрагим бор, ўз оламим бор! Нима учун унга сени киритар эканман?! Нега энди дардимни бозорга солишим керак экан? – У ҳарчанд уринмасин, овози титраб кетди. – Ана, керак бўлса ўзинг

мажлис қилиб, бирорни севиши ҳақида қарор чиқаргин-да, шу қарорга биноан уйлангинг. Хотинингни ўпаёттганингда қарор чиқарғанлар тепангда қарсак чалиб турсин. Менга қолса, хотиним билан ярашмайман, Чаросдан ҳам кечмайман, институтдан ҳам кетмайман!

У оёқлари қалтираб, жойига ўтириб қолди. Шундай асабий, шундай таранг сукунат чўқдики, ҳозир бир нарса портлашини кутгандек, ҳамма юрагини ҳовучлаб қолди.

– Ҳақорат қилди! – деди Искандаров анчадан кейин тилга кириб. У ранги гезарид, ўрнидан туриб кетди. – Нега мени ҳақорат қилдинг, ифлос!

– Ҳа, қанақа бўларкан? – деди Ёдгор унинг митти кўзлари, пирпираб учайдган лабларига қараб.

– Мумкинми, мен... – деди Маҳмуда Алиевна Искандаровга хотиржам қараб.

Искандаров анча гапи бор бўлса ҳам ноилож индамай қолди.

– Анави аёлнинг хати, – Маҳмуда Алиевна бир зум тўхтаб, негадир Авазга қаради. – Мени ўйлантириб қўйди. «Қирқинчи йилларнинг комсомоллари бундай ма-салаларни бир мажлисдаёқ ҳал қилиб қўйишарди», дебди. – У ўша дамларни эслагандек жимиб қолди. – Мен ҳам қирқинчи йилларнинг комсомолиман. Қирқинчи йилларнинг комсомоллари жанг қилишди. Вайроналар ўрнида шаҳарлар бунёд этишди... Ҳали бир қизча айтди. Ҳозирги комсомоллар ота-оналари анъанасини давом эттирмаюпти, деди. Менимча, бу унчалик тўғри эмас. Ўша аёл ёзганидек, агар қирқинчи йилларнинг ёшлари бирорларнинг юрагини ковлаштириш билан овора бўлганида, бошқа ишлар колиб кетарди. Агар баъзилари шундай қилган бўлса, қаттиқ адашган экан.

Ёдгор ғувиллаб кетаётган бошини базур кўтариб қаради. Маҳмуда Алиевна ҳамон ўша сокин овозда гапи-рар эди.

– Уялмайсизми? – деди у Искандаровга қараб. – Ўз сафдошингизни бирорни нега яхши кўрасан, деб сўрек килишга уялмайсизми? Шу йигитнинг ўрнига ўзингизни бир қўйиб кўринг.

Искандаров сочини асабий силаганича индамай ўтиради.

Негадир Ёдгорнинг яна ўпкаси тўлди-ю, дераза томонга ўгирилиб олди.

– Сизлар ёшсизлар, – деди Махмуда Алиевна залга қараб. – Куч-ғайратингиз кўп. Эрта-индин лойиҳачи, архитектор бўласизлар. Вақтингиз кўп бўлса, бирорнинг юрагини ковлаб ўтиргандан кўра, ана, курилишга боринг! Тошкентда нима кўп, қурилиш кўп. Ҳаммага иш топилади.

Деразадан тушаётган нур Ёдгорнинг киприклари орасида гунафшаранг ҳалқачалар ҳосил қилиб, пирпирайверди, бошқа гапларни эшитмади. Кеча йиглаб, кўксига бош қўйган Чарос яна тасаввурни жонланди-ю, лабларини қимтиб, чаккасини чангллаганча, стул суянчигига елкасини ташлади.

Шундан кейин мажлис узоқ чўзилмади.

Ёдгор йўлакка чиққанида гангиб турар, чеккиси келарди. Ҳозир уни ёмонлаганлар ҳам энди юзсизларча илжайиб қараётганини кўриб, унинг ғаши келди.

– Кетдик, – деди Зойиржон Ёдгорни билагидан тутиб. – Қўйинг шу гапларни!

\* \* \*

Васила Назаровна уч қундирки, Чарос билан гаплашмасди. Наинки битта шу қизи деб умрини ўтказса, кўзимнинг оку қораси деб авайласа, бева боши билан шунчалик ўстирса-ю, у юзига тик қараса? Тағин келиб-келиб, аллақанақа бир қаланғи-қасанғи йигит деб-а! Қайси куни факультет комсомол ташкилотининг секретари Мирзаевнинг масаласини йиғилишда муҳокама

қиламиз, деганидан кейин у бир қадар таскин топгандай бўлди-ю, бари бир Чаросни кечиролмади.

«Қариб қолдим... Асабларим қақшайдиган бўлиб қолди...» Кейинги пайтларда шу фикр унинг хаёлига тез-тез келадиган бўлди. Аксига олиб, директор ҳам бир ойдан буён касал. «Семашко»да шифоланяпти. Ҳамма иш унинг зиммасида қолиб, ташвиши яна кўпайди.

Бугун Дилшод, ниҳоят, Дилфузা билан отасини етаклаб, мактабга олиб келди. Васила Назаровна Дилфузани кўрди-ю, беихтиёр ўз қизининг қилмиши яна ёдига тушди. Чарос билан бу қиз ҳаракатида аллақандай ўхшашлик, ҳатто яқинлик бордек туюлиб, ёмон кўриб кетди уни.

Ўқитувчилар хонасининг шифтида тўрт чироқли қандил ёниб турар, олти-етти чоғли ўқитувчи, ота-оналар кенгашининг уч аъзоси ўртадаги узун стол атрофида турли алфозда ўтиришарди.

Дилшод журнал вараклар, рангсиз юзли шопмўйлов география муаллими столга мункайганча хаёлга толган, бошқа педагоглар ҳам турли иш билан машғулдек кўринишса-да, Васила Назаровнанинг гапларини диққат билан тинглашарди.

Этакроқдаги стулда чийдухоба камзул, мoshранг дўппи кийиб олган Ҳайитвой сариқ ўтирас, тарғил мўйловини ўқтин-ўқтин силаб қўярди.

Унинг ёнидаги стулда ота-оналар кенгашининг раиси – телевизорда ҳам бир-икки марта одоб ҳақида суҳбат ўтказган чўққисокол чол – Қосим ота жойлашган. У як-тагининг узун енги билан ёшланаётган кўзларини артганча гоҳ Васила Назаровнага, гоҳ Ҳайитвой сариққа қараб қўярди. Қишлоқ женсоветининг раиси, Васила Назаровнанинг дугонаси ориқ аёл – Ханифа Саломатовна эса унинг гапларини сехрлангандек берилиб эшитарди.

Шундоқ эшик олдидаги уч оёкли ёғоч илгич ёнида нимча кийиб олган Дилфузা сочининг учини ўйнаганча, оғирлигини бир оёғидан иккинчисига ташлаб турарди.

Чамаси, у чарчаган, ўтиргиси келар, аммо ёнидаги стулда ичига бўр солинган ботинка қутиси тургани учун уни олиб ташлаб ўтиришга ботинолмас эди.

– Шундок қилиб, ўқимайман деяпти денг? – сўради Васила Назаровна Ҳайитвой акадан.

– Биммийман, мунга нима жин улди, – деди Ҳайитвой ака бир қизига, бир Васила Назаровнага қараб. Кейин носини ташлашга жой излаб аланглади. Бурчакда турган сим саватни кўриб тупуриб келди-да, жойига ўтириди. Кафтининг орқаси билан мўйловига ёпишган нос доналарини артди. – Ишлийман, дейди-да. Пабрикка кира-ман, дейди. Опасиниям роса гўрига ғишт қаладим. Нима қиласарди шунга тикишни ўргатиб.

– Балки бисот йифмокчиидир? – Васила Назаровна Дилфузанинг ўзига адоват билан қараб қўйганини кўриб, ғаши келди. Яна Чаросни эслади. – Қизлар молпараст бўлади-ку...

– Биззи жаям унчалик камситманг, опа! – Ҳайитвой сариқ қизариб кетган бўйини олдинга чўзди. – Жа, ўн олти яшар қизимизга қараб қолган жойимиз йўқ. У ўқийман дейди-ю, мен йўқ дейманми?

– Нега ўқимайди, ўқийди, – деди география ўқитувчиси Дилфузага қараганча бош силкиб – паспортсиз одам ишга олинмайди.

– Йўқ! – деди Дилфуза ердан кўз узмай.

Ҳамма ўтирганлар ярқ этиб у томонга қарашди.

– Ана! – Ҳайитвой сариқ бошини ликиллатди.

– Балки узатмоқчиидирсизлар?! – деди Васила Назаровна қизнинг ўжарлигидан кўзгаган ғазабини базур босиб.

Ҳайитвой сариқнинг мўйлови липиллаб кетди.

– Ия, яна гапиради-я! – Унинг бўйидаги томирлари бўртиб чиқди. – Опа деганимга жаям ўзингиздан кетовурманг, опа! Биз ўқимаган, оми одам бўлсак ҳам аҳмок эмасдирмиз.

– Бўлмаса нега ўқиши хоҳламайди? – Васила Назаровна қони қайнаб, Дилфузага ғазабнок тикилди. – Ўқишига мажбурсан. Нега хоҳламайсан?

Қиз ҳам ўйнаб турган сочини силтаб орқасига ташлади-ю, унинг кўзларига тик қаради.

– Ўзингиз биласиз! Била туриб нега ўзингизни гўлликка соласиз?

Ўқитувчилар ҳайрон бўлиб, бир-бирларига қараб қўйишиди. Ўқувчи у ёқда турсин, ҳали биронта муаллим ҳам Васила Назаровнага шунчалик кескин гапирмаган эди. Назарида педагоглар ўртасида, қолаверса, бутун қишлоқда обрўси чилпарчин бўлгандай туюлиб кетди-ю, сакраб ўрнидан турди.

– Ўзим билсам, ана, отанг ҳам билиб қўйсин, ахмоқ! – У тортмани очиб ўша хатни шартта олди-ю, ўқиб берди. «Жонимдан ортиқ кўраман», деган сўзларни айниқса, қаттиқ ўқиди. – Энди тушундингизми, Ҳайитвой ака! Сиз узатишини хоҳламасангиз ҳам, балки бу эрга тегишини хоҳлаб қолгандир! Бу ер – мактаб. Мен тарбиянинг бузилишига йўл қўймайман. Ўзини тийиб юрсин.

Ҳамма бир лаҳзалик жимликда музлаб қолди.

– Бу масалани синфдошлари ўртасида муҳокама қиласак, ўртоқлари нима дейди? Ким қўйибди унга...

Васила Назаровна гапини тугата олмади. Ҳайитвой сариқ учеб ўрнидан турди-ю, бора солиб қизни шундай тарсакилаб юбордики, хона жаранглаб кетди. Дилфузанинг боши вешалкага тегди.

Дилфузада чайқалиб-чайқалиб, қаддини ростлади. Унинг бурнидан тирқираб кон оқар, Васила Назаровнага тикилган кўзлари шишадай қотиб қолган эди.

– Жодугар!

Хонадагилар қизнинг ҳайқириғидан сесканиб кетишиди. Йўқ, бу йиғи эмас, нидо ҳам эмас, аллақандай даҳшатли, этни сескантирувчи ваҳшиёна ҳайқириқ эди.

Дилфуза стул устида турган ботинка қутисини Васила Назаровнанинг башарасига отди.

– Жодугар! Мактабингни пишириб е! Мен нима гуноҳ қилдим? Нега шунча одам ўртасида мени шарманда қиласан, жодугар!

У соchlари ёйилган холда кўчага отилди. Коронги дe-раза ортида унинг яна ўша ваҳший ҳайқириғи эшитилди:

– Жодугар!

– Кўрдингизми қизингизни! – деди Васила Назаровна стол устида сочилиб ётган бўйларни чеккага суриб. Унинг жемпери оппоқ бўлиб кетган эди.

Ҳайитвой сариқ эшик олдида талмовсираб турад, ча-маси, кетишини ҳам, қолишини ҳам билмасди.

Қосим ота бориб, унинг қўлидан тутди.

– Ёш-да, ёш... Ёшлиқда ҳаммадан ҳам хатолик ўтади. Кичикдан хато, каттадан узр. Кўйинг, ўзингизни босинг.

Дилшод чўнтағидан оппоқ рўмолча олиб, опага узатди. Васила Назаровна жемперини артиб тозалаган бўлди. Ҳайитвой сариқ ҳамон мўйлови учганча тишини гижирлатиб ўтирас, ўқтин-ўқтин Васила Назаровнага қараб кўяр, кўйиб берса униям ургудек вахоҳати бор эди.

Орага жуда хунук сукунат чўкди. Гап гапга қовушавермаганидан кейин, секин туриб тарқалишди.

\* \* \*

Чарос уйда ёлғиз ётарди. Ташқарида шамол гувуллар, тол шохлари қарсиллар, дераза ортидан ҳадеб кимлар-дир гурсиллаб ўтаётгандай бўларди. ўқтин-ўқтин шамол тиниб қолар, бўғотнинг аллақаери кисирлаб кетар, зум ўтмай яна шамол ўкирас, тунука том устидан бирор югуриб ўтгандай даранглаб кетар, кетидан яна жимлик чўкарди. Мана шу асабий сукунат айникса, даҳшатли туюлар, унинг юрагига ғулғула соларди.

– Опам ҳам келмадилар! – деди Чарос атайлаб товуш чиқариб. Овози жимжит хонада жаранглаб эшитилди-ю, ўзи чўчиб кетди. У терлаб кетган, аммо негадир туришга кўрқар, аъзойи бадани карахт бўлиб қолганга ўхшар эди.

Яна шамол гувуллади. Аллақаерда дераза ойналари синиб, жаранглаб кетди. Кейин яна асабни қақшатадиган жимлик чўқди.

Шу пайт эшик ғийқиллаб очилди. Чароснинг назарида уйга бирор сездирмай бостириб кираётгандай бўлди-ю, даҳшатдан кўзлари олайиб, сакраб туриб кетди.

Остонада турган онасини кўриб, вужудига илиқлик югуруди.

– Овқат ейсизми, опа?

Онаси индамай бош чайқаб қўйди. Афтидан, у чарчаган, тўзонда қолган бўлса керак, кийим-боши чанг, чехраси ғамгин эди. Индамай нариги хонага кирди-ю, ечинмасдан ўзини диванга ташлади. Гугурт чақди.

Чарос чирокни ўчиравкан, ўргадаги эшикни атайлаб очиб қўйди. Келиб ўрнига ётиши билан бояги кўрқув яна вужудида илондек чирмаша бошлади.

Шамол тагин ҳам қаттиқроқ вишиллади. Тунука том даранглаб кетди. Кейин сукунат чўқди. Нариги хонадан онасининг ух тортгани эшитилди, сигарет чўғи қизарди.

Тўсатдан оппоқ, совук нур хонага ёпирилиб кирди-да, Чароснинг вужуди музлаб кетди. «Чақмок», деб ўйлади у шифтга тикилганча. Кейин худди бўйнига қилич келиб тушишини кутган одамдек, момақалдироқни кута бошлади. Бу сониялар шундай асабий, шундай таранг чўзилдики, у бўғилиб кетди. Аммо момақалдироқ гумбурламади. Фақат олис-олисларда «гум» этган товуш эшитилди. Бир лаҳзадан кейин яна чақмоқ чақди. Кетидан момақалдироқ шундай қаттиқ гумбурладики, худди уларнинг томи устида ёрилиб кетгандай бўлди. Том шатир-шутур қила бошлади.

Ховлида ит увиллади. Аввалига бир-икки ғингшиб кўйди-да, кейин чўзиб-чўзиб улий бошлади. Нариги хондан онасининг уф тортгани эшитилди.

– Нима жин тегди унга...

– Опа, қўрқяпман, – деди Чарос овози титраб.

Шу пайт дарвоза тақиллагандек, кимдир додлагандек бўлди.

– Эшиятисизми, опа? – деди Чарос товуши қалтираб.

«Сенга шунаقا туюлгандир», деб ўйлади у онаси индамаганидан кейин. Яна момақалдироқ қарсиллади. Ит нола чеккандай узоқ увлади.

Бир нафасли жимлиқда эшик яна тақиллади. Кимдир бўғилиб бақирди. Бу сафар Чарос аниқ эшилди.

– Опа! – деди сакраб туриб.

Онаси илдам туриб, чироқни ёқди. Олдинма-кейин ховлига тушишди. Чароснинг кўйлаги дарров жиққа сув бўлди.

Аллаким дарвозани муштлар, йиғлар, аммо нима деяпганини тушуниб бўлмасди.

– Ким? – икковлари бараварига сўрашди. – Ким бу?!

– Оч! – деди бўғик овоз хириллаб. – Оч деяпман!

– Кимсиз ахир?

– Оч, деяпман! – деди келган одам дарвозани тепиб.

– Очинг, опа, очинг! – деди Чарос даҳшатдан оёқлари титраб.

Васила Назаровна занжирни тушириши билан нотаниш бир эркак отилиб кирди-ю, унинг ёқасига ёпишди.

– Қизимни тўллаб бер, қанжиқ! Тўллаб бер!

Чарос чинқириб, унинг билагига осилди. Чақмок чақиши билан Ҳайитвой сариқни таниди. Унинг кўзлари олайиб кетган, ҳадеб бир гапни қайтарарди:

– Тўллаб бер! Единг қизимни!

«Феруза! Ферузага бир нима бўлган! – Чарос ўзи билан бирга ўқиган синфдошини эслади. – Нега опам

тўлайди? Ўқишни битириб, эрга тегиб кетган-ку. – Кейин тўсатдан унинг синглиси Дилфузга ёдига тушди. – Нимадир бўлган, қандайдир оғат бўлган!»

Ҳайитвой ака Васила Назаровнани қўйиб юборди-да, бошини муштлай кетди.

– Айрилиб қолдим! Айрилиб қолдим!

Чарос кўчага отилди. У қишлоқ этагида турадиган Ҳайитвой сариқнинг уйини билар, Феруза билан дарс тайёрлашга кўп борган эди. Елдек учиб келаркан, эшик тагида турган «Тез ёрдам» машинасини кўрди-ю, нафаси бўғзига тикилиб, баттар югурди.

Кажавали машинанинг орқа эшиги очиб қўйилган, остонаяда тўрт-беш хотин-халаж тўпланиб турар, том бурчагига омонат илиб қўйилган лампочка хира нур сочар, тарновдан шовуллаб сув оқар эди.

Чарос яқин келиши билан узуқ-юлуқ гапларни эшилди.

– Вой, нима қипти?

– Сирка ичибди.

– Войй!

Ичкаридан дилни ларзага солувчи фарёд эшилди:

– Вой болеем! Онанг ўлсин, болеем! Онагинанг ўлсин, болеем! Боламни еди-я! Боласининг ўлигини устида ўтирумаса розимасме-ен!

Чарос Дилфузанинг ойиси ўз онасини қарғаётганини тўсатдан тушунди-да, юраги сесканиб кетди.

Зум ўтмай ичкаридан иккита хотиннинг қўлига осилиб қолган Дилфузанинг онаси чиқди.

– Онагинанг ўлсин, болеем! – дерди у беҳуш бир тарзда атрофга аланглаб. – Онасининг гўрига тушган, болеем!

Чарос йифлаб юборди. Хотин хушидан кетиб, шилқ этиб тушди. Одамлар четланишди. Оқ халат кийган икки киши брезент замбилини лопиллатиб эшиқдан чиқиб келишди. Чакмоқ чакди. Чарос олдинга эгилди-ю, чақмоқ ёлқинида Дилфузанинг юзини кўриб қолди. Унинг кўз-

лари ярим очиқ ҳолида қотиб қолган, лаби, ияги, томоғи қонга ўхшаш аллақандай қора нарсага беланган эди.

Чарос кафти билан юзини тўғсанча ўзини орқага ташлади.

– А-а-а!!! – деди чинқириб. Боши деворга гурсиллаб урилиб, хўл йўлкага ўтириб қолди.

Машина эшигини беркитишлари билан кўйлакчан, бош яланг бир бола одамлар орасидан отилиб чиқиб, машинанинг орқа ғилдирагини қучоқлаганча ерга йиқилди.

– Дилпу-уз! Дилпу-уз!

Унинг оқ куйлаги, тўзиб кетган соchlари дарров лойга беланди. Одамлар уни тортқилашар, унга сайин бола ғилдиракка қаттикроқ ёпишганча, бошини ерга уриб додларди:

– Дилпу-у-з!

Чарос яна йифлаб юборди. Кейин кўз ўнги коронғилашиб, ҳеч нима кўринмай қолди.

У ўзига келганида машинанинг қизил чироқлари узоқлашиб борар, кимдир унинг қўлтиғидан кўтарар эди. Чарос бошини кўтариб, нотаниш хотинни кўрди. Хотин бир қўллаб унинг билагидан тортқилар, иккинчи қўли билан юзига сув сепарди.

Ичкаридан эса ҳамон ўша фарёд эшитилар, факат энди овоз бўғилиб, хириллаб қолган эди.

– Онагинанг ўлсин, болеем!

Чарос сув ҳалқоб бўлиб ётган йўлкадан гандираклаб-гандираклаб, юриб кетди.

\* \* \*

Бугун бозор бўлгани учун Ёдгор кеч уйғонди. Зойиржон кеча ҳаммомга бораман, деганди. Ўрнини тузатиб, кетиб қолибди.

Ёдгор кўзларини ярим юмганча, эриниб яна узок ётди. Йўлакдан қатиқчи боланинг овози келди:

- Иссик нон, кўк пиёз, ёғлиқ қатик...
- Бирпасдан кейин эшик такиллади.
- Керакмас! – деди Ёдгор ётган жойида қичкириб.
- Эшик бир очилиб ёпилди-ю, Ёдгор оқ жемперни кўриб, сакраб туриб кетди. «Чарос!»
- Кечирасиз, мен ҳозир... – деди илдам кийинаркан. Шоша-пиша ювиниб, эшикни очди.
- Чарос нарироқда тескари қараб тураг, кўлида газетага ўралган патнисга ўхшаш нарса бор эди.
- Келаверинг, – деди у кўйлагининг тугмасини ўтказа туриб.
- Чарос ердан кўз узмай келди-да, кўлидаги нарсани унга тутқазди.
- Ичкари киришлари билан Ёдгор хайрон бўлиб қозони очди. Очди-ю, ҳайратдан оғзи очилиб қолди. Бу – ўзининг расми эди. У қорда йиқилиб ётар, чанғили оёғи кўтарилиб кетган, нарироқда, кор орасида телпаги корайиб кўринар, узоқда чўққилар чизиги кўзга ташланар эди. Ёдгор расмдаги яна бир нарсани кўриб, хайрон қолди. Унинг чехраси хушчакчақ қилиб тасвирланган, гўё йиқилиб тушганига хурсанддек кўринарди.
- Ёдгор шодон бир туйғудан қалби ларзага келиб, жилмайганча Чаросга қаради. Карави билан бирдан бўشاшиб кетди. Чароснинг кўзлари қизариб, қовоги шишиб кетган, қошини чимирганча, ерга қараб туради.
- Нима, нима бўлди? – деди Ёдгор қўрқиб. – Нега йигладингиз?!
- Чарос Ёдгорнинг кўксига бошини ташлаганча, ўкириб йиглаб юборди.
- Ўлди... – деди энтикиб. – Дилфузा ўлди...
- Ёдгор даҳшатдан қотиб қолган, ҳеч нимага тушунолмас, Чарос эса йиғларди.

1972 йил

---

---

## **МУНДАРИЖА**

Б. Назаров. Халқ мөхрини қозонган адид .....	3
--	---

## **ҲИҚОЯЛАР**

Мұхаббат .....	18
Хүркитилган туш .....	29
Бахт .....	35
Хаёлларга бўламан тутқун .....	43
Узун кечалар .....	58
Умр савдоси .....	84
Оқ булат, оппоқ булат .....	99
Куёш тарозиси .....	113

## **ҚИССАЛАР**

Баҳор қайтмайди .....	128
Ҷўл ҳавоси .....	277
Сирли юлдуз .....	307
Қалбингга қулоқ сол .....	347

*Адабий-бадиий нашр*

*Ўткір Ҳошимов*

## **СЕВГИ ҚИССАЛАРИ**

Хикоялар ва қиссалар

Мухаррир *Л. Игамова*

Бадиий мұхаррир *К. Зокирова*

Рассом *Ш. Одилов*

Техник мұхаррир *Т. Харитонова*

Кичик мұхаррир *Д. Холматова*

Мусахих *Э. Курбонов*

Компьютерда тайёрловчи *Л. Абкеримова*

Нашриёт лицензияси AI № 158, 14.08.09.

Босишига 2013 йил 26 июнда рұхсат этилди. Офсет қофози.

Бичими 84x108<sup>1/32</sup>, «Times» гарнитурасыда оффсет

усулда босилди. Шартли босма табоги 25,20. Нашр табоги 24,15.

Адади 3000 нұсха. Буюртма № 13-160.

Ўзбекистон Матбуот ва ахборот агентлигининг “O’zbekiston”

нашриёт-матбаа ижодий уйи.

100129, Тошкент, Навоий күчаси, 30.

e-mail: [uzbekistan@iptd-uzbekistan.uz](mailto:uzbekistan@iptd-uzbekistan.uz)

[www.iptd-uzbekistan.uz](http://www.iptd-uzbekistan.uz)